



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation


Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>



889 9 1870 136
J. Chappuis
1842

LÉGUÉ

A LA

BIBLIOTHÈQUE DE LA FACULTÉ DE THÉOLOGIE

DE

L'ÉGLISE LIBRE DU CANTON DE VAUD

PAR

Sam. CHAPPUIS, prof.

1870

Digitized by Google

N-18

HISTOIRE DE
M^{re} JEAN DE
BOVCICAVT,
MARESCHAL DE FRANCE,
GOVERNEVR DE GENNES,
ET DE SES MEMORABLES FAICTS
en France, Italie, & autres lieux, du Regne
des Roys Charles V, & Charles VI,
iusques en l'an 1408.

ESCRIPTE DV VIVANT DV
dict Mareschal & nouuellement mise en lumiere par
THEODORE GODEFROY,
Aduocat au Parlement de Paris.



*Jacques
Mallet
Genou*

A PARIS,
Chez ABRAHAM PACARD, rue Saint Jacques,
au Sacrifice d'Abraham.

M. DC. XX.
Avec Priuilege du Roy.

REVUE DE
MATHÉMATIQUES

BOYD & CO. LTD.

10, RUE DE LA HARPE, PARIS

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES

REVUE DE MATHÉMATIQUES



AVGVSTIN GIVSTINIANO,
EVESQVE DE NEBIO, AV. V.

Liure des Annales de Gennes

imprimez l'an 1537.

L'ANNO mille quatro cento vno, al' vltimo d'Octobre, arrivo a Genoua il nouo Gouvernatore Gioanni ~~le Meingis~~ cognominato Boucicaut, della Citta di Turonia, Marefalo del Regno di Francia, & Luogotenente del Re di qua da monti, &c.

L'ANNO di mille quatro cento dui, Dominico Imperiale, & Cosmo Tarigo, Ambaffatori, impetrarono dal Re di Francia che il Gouvernatore Boucicaut douessi gouernare in sua vita. Della qual cosa i cittadini restorono molto consolati. Conciosia che il Gouvernatore fussi dotato di tutte quelle virtu che si ricercano in vno Principe. Era nell'operare molto pronto, alieno da giochi,

† ij

& dalla conuersatione delle donne, religioso,
 & offeruantissimo delle cerimonie Christiane,
 elemosinaro, dedito all' Oratione, libe-
 rale, gratiofo, magnanimo, intrepido, ama-
 tor della giustitia, & circonfpetto, &c.


L'Autore Amato de' Gentili

1587.



Il libro di mille quattrocento anni
 di Agostino, & Colone, & Colone, & Colone,
 di Agostino, & Colone, & Colone, & Colone,
 di Agostino, & Colone, & Colone, & Colone,
 di Agostino, & Colone, & Colone, & Colone,
 di Agostino, & Colone, & Colone, & Colone,
 di Agostino, & Colone, & Colone, & Colone,
 di Agostino, & Colone, & Colone, & Colone,
 di Agostino, & Colone, & Colone, & Colone,
 di Agostino, & Colone, & Colone, & Colone,
 di Agostino, & Colone, & Colone, & Colone,

H V B E R T F O G L I E T A,
Gentil-homme Genevois, au 1^x Livre
de l'Histoire de Genes imprimée l'an 1583.

 **N**o millesimo quadrin-
gentesimo secundo, Bouci-
caudi opera adeò grata ciui-
bus fuerunt, vt Dominico
Imperiali, & Cosmo Tari-
ga, Oratoribus ad Regem
missis, enixis precibus impetrarint ne Boci-
caudus ab illo vnquam per omnem vitam
Genua reuocaretur, cuius prudentia & vir-
tute Ciuitas sese à præteritis malis respiratu-
ram, atque ad priscum illum felicium tem-
porum statum redituram speraret. Quæ res
impetrata ingenti gaudio Ciuitatem imple-
uit. Fuit enim Boucicaudus omnibus virtu-
tibus, quæ in claro & celso viro esse possunt,
verè admirabilis; ab omni flagitiorum ge-
nere, omnibusque libidinum illecebris ac iu-
uentutis lusibus natura longè remotus; ad
hoc Religionis, ac sacrarum ceremoniarum
diuinique cultus diligentissimus obseruator;
cùm magnam partem temporis sacris & pre-
† iij

cationibus daret. Condecorabant Iustitiæ
studium, animi magnitudo, Regia liberali-
tas, intrepidus ad terrores animus, celeritas in
negotijs susceptis conficiendis, ingenium-
que minimè in consilijs rapidum, sed omnia
circumspiciens; quæque re nihil est ad ho-
minum benevolentiam magnæ fortunæ vi-
ris attrahendam validius, summa humanitas,
morumque suauitas, atque in quotidiana
consuetudine & colloquijs comitas, & affa-
bilitas. Quibus laudibus id affectus est, ut
omnis generis hominum voluntates teneret;
cùm boni eximias virtutes amarent, impro-
bi vererentur.

ARMOIRIES de Iean le Meingre, dict Boucicaut, Il du nom Marechal de France.

ELLES sont d'argent à vn aigle esployé à deux testes, de gueulles, membré & becqué d'azur.



ARMOIRIES d'Antoinete, Vicomtesse de Turenne, femme de Iean le Meingre, dict Boucicaut, Il du nom Marechal de France.

ELLES sont de Boucicaut cy dessus, party d'un escu escartelé. Le premier d'argent à la bande d'azur, accompagné de six roses de gueulles, trois en chef, & trois en pointe, qui est Beaufort. Soustenu d'or, à vne bande de gueulles de quatre pieces, Qui est Turenne.





THE
LIBRARY OF THE
UNIVERSITY OF CHICAGO
1215 EAST 58TH STREET
CHICAGO, ILL. 60637

THE
LIBRARY OF THE
UNIVERSITY OF CHICAGO
1215 EAST 58TH STREET
CHICAGO, ILL. 60637

TABLE DES CHAPITRES
CONTENVS EN CESTE HISTOIRE
du Marechal de Boucicaut.

PREMIERE PARTIE.

- I.  E PROLOGVE. page 7.
- II.  Du mouuement de qui ceste Histoire feut
faicte. p. 10.
- III. De quels parens feut le Marechal de Boucicaut, & de
sa naissance. p. 11.
- IV. De l'Enfance du dict Boucicaut. p. 15.
- V. De la premiere fois que Boucicaut porta les armes. p. 18.
- VI. Comment Boucicaut en son jeune aage voulut poursuivre
les armes, & se prist à aller en voyages. p. 20.
- VII. Des essay que Boucicaut faisoit pour se diuier aux ar-
mes. p. 22.
- VIII. Discours de l'amour, en demonstrent par quelle maniere
les bons doibuent aimer pour deuenir vaillans. p. 24.
- IX. Comment amour & desir d'estre aymé creust en Bouci-
caut couraige & volonté d'estre vaillant & cheualieu-
reux. p. 29.
- X. Comment Boucicaut feut faict Chenalier, & des voya-
ges de Flandres. p. 32.
- XI. Comment Boucicaut feut la premiere fois en Prusse, &
comment la seconde fois il y retourna. p. 36.
- XII. Comment Boucicaut apres le retour de Prusse alla auuecle
Duc de Bourbon deuant Taillebourg, & deuant Berrueil,
qui feurent pris, & autres chasteaux en Guyenne. p. 38.
- XIII. Comment le Duc de Bourbon laissa Boucicaut es fron-
à

TABLE

- tieres son Lieutenant, & comment il jousta de fer de glaiue à Sicart de la Barde. p. 41.
- XIV. Comment Boucicaud jousta de fer de glaiue à vn Anglois appelé Pierre de Courtenay, & puis à vn autre nommé Thomas de Clifort. p. 46.
- XV. Comment Boucicaud alla en Espaigne, & comment au retour le Seigneur de Chasteauneuf, Anglois, entreprit de faire armes avec luy, vingt contre vingt, & puis ne les voulut ou n'osa maintenir. p. 50.
- XVI. Comment Boucicaud alla outre mer, où il trouua le Comte d'Eu prisonnier. p. 55.
- XVII. De l'emprise que Boucicaud feit luy troiesme de tenir champ trente iours à la joustte à tous venans entre Boulogne, & Calais, au lieu que l'on dict Sainct Ingelbert. p. 58.
- XVIII. Comment Boucicaud alla la troiesme fois en Prusse, & comment il voulut vanger la mort de Guillaume de Douglas. p. 66.
- XIX. Comment Boucicaud feut fait Mareschal de France. p. 69.
- XX. Comment le Mareschal de Boucicaud alla avec le Roy à Boulogne au Traicté, & de la charge de gens d'armes que le Roy luy bailla apres pour aller en plusieurs voyages, & comment il prit le Roc du Sac. p. 73.
- XXI. Comment le Mareschal alla en Guyenne, & les forteresses qu'il y prit. p. 76.
- XXII. Du voyage de Hongrie, & comment le Comte d'Eu admonesta le Mareschal de Boucicaud d'y aller. p. 78.
- XXIII. Comment le Comte de Nevers, qui ores est Duc de Bourgogne, voulut aller au voyage de Hongrie, & comment il feut fait Cheuetaine de toute la compaignée

DES CHAPITRES.

- des François qui là allerent.* p. 82.
- XXIV. *De plusieurs Villes que le Roy de Hongrie prit sur les Turcs, par l'ayde des François, & comment le vaillant Marefchal de Boucicaut entre les autres s'y porta ver- tueusement.* p. 84.
- XXV. *De la fiere bataille que on dit de Hongrie, qui feut des Chrestiens contre les Turcs.* p. 90.
- XXVI. *De la grande pitié qui estoit du martyre que l'on faisoit des Chrestiens deuant Bajazet. Et comment le Marefchal de Boucicaut feut respité de mort.* p. 101.
- XXVII. *Comment les nouuelles veindrent en France de la dure desconfiture de nos gens, & le deuil qui feut mené.* p. 104.
- XXVIII. *Comment le Comte de Neuers feut emmené prisonnier à Burse, & plusieurs autres Barons, & de leur rançon qu'on enuoya à Bajazet, & du bienfaict du Marefchal de Boucicaut.* p. 107.
- XXIX. *Comment apres le retour de Hongrie le Roy enuoya le Marefchal de Boucicaut en Guyenne, à belle compai- gnée de gens d'armes sur le Comte de Perigort, qui se- stoit rebellé contre luy, Si le prist, & amena prisonnier au Roy.* p. 114.
- XXX. *Comment l'Empereur de Constantinople enuoya re- querir secours au Roy contre les Turcs, & comment le Roy y enuoya le Marefchal de Boucicaut à belle com- pagnée.* p. 117.
- XXXI. *Comment le Marefchal de Boucicaut s'en alla par mer, & l'affaire qu'il eut avec les Sarrafins.* p. 119.
- XXXII. *De la grand chere & joye que l'Empereur de Constan- tinople feit au Marefchal de Boucicaut, & à sa compagnée, & comment ils allerent courir sus aux*

T A B L E

- p.123.
- Sarrasins par grand vertu.
- xxxiii. Des Villes & Chasteaux que l'Empereur de Constantinople, le Marechal de Boucicaut, & leur compaignée preindrent sur les Sarrasins. p.126.
- xxxiv. Comment apres que l'Empereur de Constantinople avec l'ayde du Marechal de Boucicaut & des François eut enuiron soy descombre de Sarrasins, s'en voulut venir en France pour redemander ayde au Roy, pource qu'argent & viures luy failloient. Et comment le Marechal, qui s'en venoit avec luy, laissa en son lieu à Constantinople le Seigneur de Chasteaumorant à tout cent hommes d'armes, bons, & esprouuez, bien garnis de traict. p.132.
- xxxv. Comment le Seigneur de Chasteaumorant feit bien son debuoir de garder Constantinople, & la famime qui y estoit, & le remede qui y fust mis. p.135.
- xxxvi. Comment l'Empereur de Constantinople veint en France, & comment le Marechal de Boucicaut y arriua deuant. p.137.
- xxxvii. Comment l'Empereur de Constantinople fent vengé de Bajazet par Tamburlan, & de la mort du dict Tamburlan. p.140.
- xxxviii. Comment le Marechal de Boucicaut estant en France eut grand pitié de plusieurs Dames, & Damoiselles, qui se complaignoient de maints grands torts qu'on leur faisoit, & nul n'entreprenoit leurs querelles, & pour ce entreprit l'Ordre de la Dame blanche, à l'Escu verd, par lequel luy treiziesme portant ceste Deuise s'obligea à la defence d'elles. p.143.
- xxxix. Du contenu és lettres d'armes par lesquelles s'obligeoient

les treize Cheualiers à defendre à leur pouuoir le droit
de toutes Gentilsfemmes qui les en requeroient. p. 146.

¶ SECONDE PARTIE.

- I. DE l'ancienne constume qui court en Italie des Guelphes, & Guibelins. p. 158.
- II. De la Cité de Genes, & de la tribulation où elle estoit auant que le Mareschal en feut Gouverneur. p. 161.
- III. Comment la Cité de Genes se donna au Roy de France. p. 163.
- IV. Comme Vertu plus que autre chose doit estre cause de l'exaucement de l'homme. p. 165.
- V. Comment le Mareschal de Boucicaut pour sa vertu & vaillance feut esleu pour estre Gouverneur de Genes. p. 167.
- VI. Comment le Mareschal de Boucicaut alla à Genes, & comment il y feut receu. p. 169.
- VII. Comment saigement le Mareschal de Boucicaut parla aux Geneuois au Conseil. p. 172.
- VIII. Des saiges Establissemens & Ordonnances que le Mareschal de Boucicaut feit à Genes. p. 177.
- IX. Comment le Mareschal de Boucicaut feit edifier deux forts chasteaux, l'un sur le port de Genes, & l'autre autre part, Et comment il remeit en estat toutes choses. p. 179.
- X. Comment apres que le Mareschal de Boucicaut eut mis en bon estat la Cité de Genes il y feit aller sa femme, & comment elle y feut receüe. p. 182.
- XI. Comment les nouuelles veindrent au Mareschal de Boucicaut que le Roy de Cypre auoit mis le siege deuant

T A B L E

- Famagouste, laquelle Cité est aux Geneuois, & comment il partit de Gennes à grande armée pour s'y en aller.* p.184.
- XII. *De l'ancienne haine qui est comme naturelle entre les Geneuois, & les Venitiens.* p.187.
- XIII. *Comment le Marechal de Boucicaut donna secours à l'Empereur de Constantinople, pour s'en retourner en son pays.* p.193.
- XIV. *Comment le Marechal de Boucicaut arrina à Rhodes, & comment le grand Maistre de Rhodes le receut, & le pria que il allast en Cypre pour traicter de paix.* p.195.
- XV. *Comment le Marechal de Boucicaut alla en Turquie deuant vne grosse Cité que l'on nomme l'Escandelour.* p.198.
- XVI. *Comment le Marechal de Boucicaut assaillit l'Escandelour par belle ordonnance.* p.200.
- XVII. *Des escarmouches que faisoient tous les iours les gens du Marechal de Boucicaut aux Sarrasins, & comment ils les desconfirent, & chasserent.* p.202.
- XVIII. *Comment la paix feut faicte entre le Roy de Cypre, & le Marechal de Boucicaut, & comment il voulut aller deuant Alexandrie.* p.207.
- XIX. *Comment les Venitiens auoyent faict scauoir par les terres des Sarrasins que le Marechal de Boucicaut alloit sur eux & comment le dict Marechal alla deuant Tripoli.* p.210.
- xx. *De la belle ordonnance du Marechal de Boucicaut en ses batailles, & comment il desconfit les Sarrasins deuant Tripoli.* p.214.

DES CHAPITRES.

- xxi. Comment on sceut certainemēt que les Venitiens auoient
faict à sçauoir aux Sarraſins la venüe du Mareſchal de
Boucicaut, & comment il preint Boton, & Barut.
p. 219.
- xxii. Comment le Mareſchal alla deuant Sayette, & ſa
grande hardieſſe & vaillāce contre les Sarraſins. p. 222.
- xxiii. Comment le Mareſchal de Boucicaut alla deuant Liche,
& les embuſches que les Sarraſins auoyent faićtes pour
le ſurprendre. p. 226.
- xxiv. Comment le Mareſchal de Boucicaut pource que ja l'hy-
uer approchoit voulut retourner à Genneſ. p. 228.
- xxv. Comment les Venitiens pour auoir achoiſon de faire ce
qu'ils feirent apres, ſe plaignirent du Mareſchal de la
priſe de Barut. p. 230.
- xxvi. Comment les Venitiens aſſaillirent le Mareſchal de
Boucicaut, & la fiere bataille qui y feut, & comment
le champ & la victoire luy en demeura. p. 235.
- xxvii. Comment le Mareſchal de Boucicaut ſ'en alla à Genneſ
irrité contre les Venitiens; Et des priſonniers qui feu-
rent emmenez d'un coſté & d'autre. p. 242.
- xxviii. De la pitie des priſonniers François. p. 244.
- xxix. Comment les priſonniers mettoient peine par leurs lettres
vers les Seigneurs de France, que le Mareſchal de Bou-
cicaut ne feiſt guerre contre les Venitiens, afin que leur
deliurance n'en feuſt empeſchée. p. 246.
- xxx. Comment les Venitiens ſ'enuoyerent excuſer enuers le
Roy de ce que ils auoient faićt. p. 249.
- xxxi. La teneur des Lettres que le Mareſchal de Boucicaut
enuoya aux Venitiens. p. 251.

TABLE

TROISIÈME PARTIE.

- I. Des Seigneurs Italiens qui desiroient auoir l'acointance du Marechal de Boucicaut, pour les grands biens que ils oyoient dire de luy. p. 270.
- II. Comment le ieune Duc de Milan entreprit guerre au Marechal de Boucicaut, dont mal luy en ensuiuit. p. 272.
- III. Comment le Marechal de Boucicaut laboura afin qu'il peust mettre paix en l'Eglise, que les Geneuois se declarassent pour nostre Sainct Pere le Pape. 274.
- IV. Comment le Marechal de Boucicaut assemblea à conseil les plus saiges de Genes, & les paroles que il leur dict sur le faict de l'Eglise. p. 276.
- V. Comment le Marechal de Boucicaut rendoit que l'Eglise feust en vnion, & sous l'obeissance d'un seul Pape esleu par Concile general. p. 282.
- VI. Comment les Pisains se rebellerent contre leur Seigneur, & comment le Marechal de Boucicaut se peina d'y mettre paix. p. 286.
- VII. Comment les Pisains feirent entendre au Marechal de Boucicaut par feintise que ils vouloient estre en l'obeissance du Roy de France, & deuenir ses hommes, & la mauuaise qu'ils feirent. p. 289.
- VIII. Comment le Marechal de Boucicaut se traualloit tousiours que ceux de Pise se donnassent au Roy de France. p. 293.
- IX. Comment le Marechal de Boucicaut dit & manda aux Pisains que s'ils ne se donnoient au Roy, leur Seigneur les vendroit aux Florentins. p. 298.
- X. L'accord qui fut faict entre le Marechal de Boucicaut

&

DES CHAPITRES.

- Et les Florentins du faict de Pise. p.300.
- XI. Comment le Marechal de Boucicaut enuoya par escript au Roy de France, à Nosseigneurs, et au Conseil l'accord qu'il auoit faict avec les Florentins du faict de Pise, lequel le Roy et Nosseigneurs agréerent par leurs lettres; Et comment depuis par feintise les Pisains se voulurent donner au Duc de Bourgogne. p.303.
- XII. Comment Nosseigneurs les Ducs d'Orleans et de Bourgogne sceurent mauuaise gré au Marechal de Boucicaut pour ce qu'il n'auoit esté en l'ayde des Pisains contre les Florentins. p.309.
- XIII. Exemples comment les bons sont communément enuiez. p.311.
- XIV. Exemples que on ne doit pas tousiours croire ne adjoyster foy en paroles et opinions de peuple. p.314.
- XV. Comment le Marechal de Boucicaut par la vaillance de son courage entreprit d'aller prendre Alexandrie, et des Messaigers qu'il enuoya pour ceste cause au Roy de Cypre. p.316.
- XVI. De l'instruction que le Marechal de Boucicaut bailla à ses Ambassadeurs de ce qu'ils debuoient dire au Roy de Cypre. p.323.
- XVII. De la grand chere et belle responce que le Roy de Cypre feit aux Ambassadeurs du Marechal de Boucicaut. p.327.
- XVIII. Comment le Roy de Cypre s'excusa vers les Messaigers du Marechal de Boucicaut de non aller sur Alexandrie. p.331.
- XIX. Du faict de l'Eglise, et comment le Marechal de Bou-

T A B L E

- XX.** *Comment Paul Ursin Romain meit le Roy Lancelot à Rome par argent qu'il receut.* p.338.
- XXI.** *Comment le Marechal de Boucicaut en venant par mer de Genes en Provence combatit quatre galées de Morres, où grande faison en y eut d'occis.* p.346.
- XXII.** *Comment Messire Gabriel Marie, bastard du Duc de Milan, chida usurper au Roy la Seigneurie de Genes & comment il eust la teste couppee.* p.350.

Q U A T R I E S M E P A R T I E.

- I.** *De la stature du corps du Marechal de Boucicaut.* p.358.
- II.** *De la deuotion que le Marechal de Boucicaut a vers Dieu en aunes de Charité.* p.359.
- III.** *La Regle que le Marechal de Boucicaut tient au seruice de Dieu.* p.362.
- IV.** *Comment le Marechal de Boucicaut se garde de trespasser la Loy de Dieu, & ses commandemens, mesmement en fait de guerre, & de la mesure qu'il y tient.* p.367.
- V.** *Comment le Marechal de Boucicaut est hardy & seur en ses saiges entreprises.* p.373.
- VI.** *Comment le Marechal de Boucicaut est sans conuoitise & large du sien.* p.375.
- VII.** *Comment la vertu de Contenance & de Chasteté est au Marechal de Boucicaut.* p.378.
- VIII.** *Comment le Marechal de Boucicaut suit la Regle de Iustice,* p.383.

DES CHAPITRES.

- IX. *Comment avec ce que le Marechal de Boucicaut est Justicier il est piteux & misericordieux. Et preuue par exemples que ainsi doibt estre tout vaillant homme.*
p. 386.
- X. *De la belle Eloquence qu'a le Marechal de Boucicaut.*
p. 389.
- XI. *De l'ordonnance de viure du Marechal de Boucicaut.*
p. 392.
- XII. *L'Histoire conclud comment homme où tant y a de vertus doibt bien estre honoré.*
p. 397.
- XIII. *L'Histoire dit en parlant au Marechal de Boucicaut que pourtant ne se vueille fier en fortune, qui tost se change; Et donne Exemples.*
p. 398.
- XIV. *Fin de l'Histoire, où la personne qui l'a faicte s'excuse vers le Marechal de Boucicaut de ce qu'il l'a faicte sans son sceu, & commandement; Et non si bien mis par escript que il appartiendrait.*
p. 406.
- XV. *Exemple des vaillans hommes trespassez qui sceurent bon gré à ceux qui auoient escript leurs gestes, & leurs vaillans faicts.*
p. 409.



CY COMMENCE

LA TABLE DES RVBRIQUES

DV LIVRE DES FAICTS DV BON
Messire Iean le Maingre, dit Boucicaut,
Mareschal de France, & Gouverneur de
Gennes. Lequel dict Liure est party en
quatre Parties. La premiere Partie parle
de son Enfance, & de la poursuite en
armes & faicts qu'il feut iusques au temps
qu'il feut esleu pour estre Gouverneur de
Gennes. La seconde Partie parle depuis
qu'il eut le dict Gouvernement iusques au
retour qu'il feut de Surie. La troisieme
Partie parle depuis le temps du dict retour
iusques au temps present. Et la quatrieme
parle des vertus, bonnes mœurs, & con-
ditions, qui sont au Mareschal, & de sa
maniere de viure.

Les Rubriques de la premiere Partie.



REMIEREMENT le Prologue. I.

Item par quel mouuement ce Liure fust
faict. II.

Item de quels parens fut le Mareschal Bou-
cicaut, & de sa naissance. III.

A

2 HISTOIRE DV MARESCHAL

Item encores de l'Enfance du dict Boucicaut. IV.

Item de la premiere fois que Boucicaut prist à porter armes. V.

Item comment en ieune aage Boucicaut voulut poursuivre les armes, & se prist à aller en voyages. VI.

Item les essais que Boucicaut faisoit pour soy duire aux armes. VII.

Item parle d'amour, en demonstrent par quelle maniere les bons doiuent aimer, pour deuenir vaillans. VIII.

Item comment amour & desir d'estre aimé creust en Boucicaut courage & volonté d'estre vaillant & cheualereux. IX.

Item comment Boucicaut fut faict Chenalier, & des voyages de Flandres. X.

Item comment Messire Boucicaut feut la premiere fois en Prusse, & puis comment la seconde fois il y retourna. XI.

Item comment Messire Boucicaut, apres le retour de Prusse, alla avec le Duc de Bourbon deuant Taillebourg, & deuant Bertueil, qui feurent pris, & autres chasteaux en Guyenne. XII.

Item comment le Duc de Bourbon laissa Messire Boucicaut es frontieres son Lieutenant, & comment il iousta de fer de glaiue à Messire Sicart de la Barde. XIII.

Item comment Messire Boucicaut iousta de fer de glaiue à vn Anglois appellé Messire Pierre de Courtenay. XIV.

Item comment Messire Boucicaut alla en Espagne, & comment au retour le Seigneur de Chasteauneuf, Anglois, entreprist à faire armes à luy : vingt contre vingt.

- Et puis ne les voulut ou n'osa maintenir. XV.
- Item comment Meflire Boucicaut alla oultre mer, où il trouua le Comte d'Eu prifonnier. XVI.
- Item de l'emprife que Meflire Boucicaut feit, luy troiefieme, de tenir champ trente iours à la ioufte à tous venans, entre Boulongne, & Calais, au lieu que on dict Saint Tyn le vert. XVII.
- Item comment Meflire Boucicaut alla la troiefieme fois en Pruffe. XVIII.
- Item comment Boucicaut feut faict Marefchal de France. XIX.
- Item comment le Marefchal Boucicaut alla avec le Roy à Boulongne au traicté, Et la charge de gens d'armes que le Roy luy bailla apres, pour aller en plusieurs voyages, & comment il prift le Roc du Sac. XX.
- Item comment le Marefchal alla en Guyenne, & les foreffes qu'il y prift. XXI.
- Item commence à parler du voyage de Hongrie, comment le Comte d'Eu admonefta le Marefchal d'y aller. XXII.
- Item comment le Comte de Neuers, qui ores eft Duc de Bourgongne, voulut aller au voyage de Hongrie, & comment il feut faict Cheuetaine de toute la compaignée des François. XXIII.
- Item de plusieurs villes que le Roy de Hongrie prift fur les Turcs, par l'aide des François, & comment le Marefchal entre les autres fy porta bien. XXIV.
- Item de la fiere bataille que on dict de Hongrie, qui feut des Chreftiens contre les Turcs. XXV.
- Item de la grand' pitié qui eftoit du martyre qu'on faisoit

4 HISTOIRE DV MARESCHAL

des Chrestiens deuant Bajazet : Et comment le Marefchal fut respité de mort. xxvi.

Item comment les nouvelles veindrent en France de la dure desconfiture de nos gens, & le dueil qui y feut mené.

xxvii.

Item comment le Comte de Neuers feut enuoyé prisonnier à Bourse, & plusieurs autres Barons, & de leur rançon qu'on enuoya à Bajazet, & du bien faict du Marefchal. xxviii.

Item comment apres le retour de Hongrie, le Roy enuoya le Marefchal en Guyenne, à belle compaignée de gens d'armes, sur le Comte de Pierregort, qui s'estoit rebellé contre luy, Si le prist, & amena prisonnier au Roy.

xxix.

Item comment l'Empereur de Constantinople enuoya requier secours au Roy contre les Turcs, & comment le Roy y enuoya le Marefchal à belle compaignée.

xxx.

Item comment le Marefchal s'en alloit par mer, & l'affaire qu'il eut contre les Sarrafins. xxxi.

Item la grand chere & ioye que l'Empereur fist au Marefchal & à sa compaignée, & comment ils allerent tost courir sus aux Sarrafins par grand vertu. xxxii.

Item des villes & des chasteaux que l'Empereur, le Marefchal, & leur compaignée prirent sur Sarrafins.

xxxiii.

Item comment apres que l'Empereur, avec l'aide du Marefchal, & des François, eut tout enuiron soy descombre de Sarrafins, s'en voulut venir en France, pour re-demander aide au Roy, pour ce que argent & viures

leur failloient , & comment le Marechal , qui s'en venoit avec luy , laissa en son lieu à Constantinople le Seigneur de Chasteaumorant , à tout cent hommes d'armes , bons & esprouuez , bien garnis de gens , & de traict.

XXXIV.

Item comment le Seigneur de Chasteaumorant fist bien son debuoir de garder Constantinople , & la famine qui y estoit , & le remede qui y fut mis.

XXXV.

Item comment l'Empereur veint en France , & comment le Marechal y arriua deuant.

XXXVI.

Item deuisse comment l'Empereur de Constantinople eut paix avec Bajazet , & comment le Tamburlan l'en vengea , & de la mort du Tamburlan.

XXXVII.

Item comment le Marechal estant en France eut grand pitié de plusieurs Dames & Damoiselles , qui se complaignoient de maints grans torts qu'on leur faisoit , & nul n'entreprenoit leurs querelles , Et pour ce entreprist l'Ordre de la Dame blanche , à l'Esku verd , Par lequel luy treiziesme portant celle deuisse s'obligea à la defence d'elles.

XXXVIII.

Item le contenu des Lettres d'armes , par lesquelles s'obligeoient les treize Cheualiers à defendre à leur pouuoir le droict de toutes Gentils-femmes qui les en requerroient.

XXXIX.

CHAPITRE I.

*Cy commence le liure des faiëts du bon Meſſire
Iean le Maingre, dit Boucicaut, Mareſchal
de France, & Gouverneur de Gennes.*

DE v x choses ſont par la volonté de Dieu eſtablies au monde, ainſi comme deux piliers à ſouſtenir les Ordres des Loix diuines & humaines, qui à creature humaine donnent reigle de viure en paix & deüement ſoubs les termes de raiſon, & qui accroiſſent & multiplient le ſens humain en congnoiſſance & vertu, & l'oſtent d'ignorance, & avec ce defendent & ſouſtiennent & augmentent le bien propre & auſſi le public, & ſans leſquels ſeroit le monde ainſi comme choſe confuſe, & ſans nul ordre. Et par ce pouuons nous veoir que comme elles nous ſoient neceſſaires, pour le grand bien d'elles, & le grand profit qui nous en vient, nous les deuons ſouuerainement priſer, honnorer, ſouſtenir, loüer, & auoir en reuerence. Iceulx deux piliers ſans faille ſont Cheualerie, & Science, qui moult bien conuiennent enſemble. Car en Pays, Royaume, ou Empire auquel l'vne des deux faudroit, conuiendroit que le lieu euſt peu de durée. Car là où Science ſeroit deſtruiëte, Loy ſeroit nulle. Et comme homme ne puiſſe bien viure ſans Loy, & ſeroit retourné comme en beſte, avec ce le Royaume ou Contrée

là où deffence de Cheualerie cesseroit , l'enuieuse conuoitise des ennemis , qui rien ne craindroient, tost à confusion le mettroit. Or nous a, Dieu en soit loüé, avec les autres biens que faiçts nous a, donné ces deux defences. Mais de l'vne parlerons plus auant au propos que nous voulonstraicter ; C'est à sçauoir de Cheualerie , en la loüant en la personne d'vn vaillant & noble Cheualier encores au monde, Dieu luy tienne, aujourd'huy viuant en bon aage, & prosperité de corps, d'esprit, & de noble estat. C'est Monseigneur Messire Iean le Maingre , dit Boucicaut, Mareschal de France , & Gouverneur de Gennes, en la reuerence & honneur duquel, pour les dessertes de ses biensfaiçts sera au plaisir de Dieu traicté & parfaict ce present Liure. Racomptant le bien de luy, tant en vertu de nobles mœurs, gentillesse, & toutes graces, comme en proüesse, & vaillantise de son corps, & biensfaiçts par luy accomplis , és quelles vertus on le veoid perseuerer de mieulx en mieulx. Et comme à tous par nature ceste vie soit brîefue, est chose deüe & de belle ordonnance, afin que le bienfaiçt des vaillans ne soit mie amorty , que ils soyent mis en perpetuelle souuenance au monde, c'est à sçauoir en registre de liures. Et pour ce est il dict de plusieurs vaillans trespassez, de qui les noms & bontez sont mis en memoire, que ils ne sont pas morts, ains viuent, C'est à dire que le bien d'eulx n'est pas mort ; Car leur bonne renommée est encores viue au monde, & viura par le rapport des tesmoings des liures iusques à la fin du monde.

monde. Et avec ce, c'est chose conuenable, que en memoire autentique soient mis les bons, & leur nom authorisé: affin que ceulx qui tendent à honneur puissent prendre exemple de bien faire, pour atteindre au loyer de bonne renommée, qui est deüe à ceulx qui le desseruent. Mais à vn peu reuenir au propos de prouuer ce que deuant est dict, c'est à sçauoir que aussi avecques Cheualerie, Science doit estre loüée, comment sçaurions nous des bons trespassez les biensfaicts entre nous humains, de qui l'entendement ne comprend rien des choses passées, fors par le rapport d'autrui, si Science n'estoit, qui le nous certifie? Ce sont lettres & escriptures lesquelles sont le premier membre de Science, par qui nous sont rapportées les choses passées, & que à l'œil nous ne voyons mie. Et pour ce dict Caton, Lis les liures. Car certes homme de quelque estat qu'il soit ne sera ja droictement appris, si n'est par introduction de lettres, & de liures. Et pour ce me semble que moult deuons loüer Science & ceulx qui les Sciences nous donnerent, par qui auons congnoissance de tant de nobles choses, que nos yeux ne peuuent veoir, & des vaillans preux trespassez, qui tant honnorablement vesquirent en ce monde, qu'ils en ont desseruy memoire à tousiours.

CHAPITRE II.

Cy dit par quel mouuement ce present Liure fut faict.



FFIN qu'il ne soit pas celé, mais sceu de tous ceulx qui ce present Liure verront & orront, par quel mouuement il a esté faict, & mis sus, Il est à sçauoir que plusieurs Cheualiers de grand renom & Gentils-hommes vaillans, pourluiuans le noble faict & hautesse des armes, lesquels ont congneu & hanté dès son enfance de tels y a & encores font le bon vaillant preux Mareschal, de qui nous parlons, & ses nobles ancestres, & esté avec luy en maintes nobles places, & assemblées cheualeureses, parquoy tant l'ont veu & esprouué en toutes conditions, qui à vaillant Cheualier aduisent, ont aduisé que affin que le temps aduenir, si comme deuant est dict, le nom & bienfaict de si vaillant preud'homme ne soit pery, ains soit demeurant au monde avec les viuans par longue memoire, & que les autres s'y puissent mirer, que bon seroit que certain Liure de luy, & de ses faicts fust faict. Et pource, comme il en soit bien digne, aduiserent personne propice à qui l'œuure commeirent & chargerent, laquelle personne pour l'autorité de luy, & aussi d'iceulx nobles dignes de foy ne contredit leur bon vouloir, ains promet à l'aide de Dieu l'accôm-

plir au mieulx que faire le sçauroit, selon la relation de leurs rapports, & sans rien du sien en parlant de luy adioulter, Et ainsi entreprist ce dict Oeuure, apres le tesmoignaige & le rapport d'iceulx, qui estre nommez ne veulent, affin que enuieux ne deissent que aulcune flaterie leur feist dire.

CHAPITRE III.

Cy dit de quels parens fut le Marechal Boucicaut, & de sa naissance & enfance.



R ENTRONS dorefnauant au propos que nous entendons à poursuiure, c'est de parler du vaillant Boucicaut, à la loüange duquel veritable & sans flaterie, sera continué ce Liure, à l'aide de Dieu, iusques à la fin. Fils fut du noble & tres-vaillant Cheualier Monseigneur Iean le Maingre, dit Boucicaut, lequel dict Cheualier fut moult preud'homme, & de grand sçauoir, & toute sa vie & son temps employa en la poursuite d'armes, Et à l'exemple des vaillans anciens, qui ainsi le feirent, ne luy chailloit de trefor amasser, ne de quelconques choses fors d'honneur acquerir. Pour lesquels biensfaicts, & sa grand vaillance, & preud'homme, au temps des grandes guerres en France, au viuant du cheualeureux Roy Iean, fut faict Marechal de France, lequel seruit le dict Roy en ses guer-

res, si comme assez de gens encore viuans le scauent, si puissamment, que de present est appellé & tousiours sera le vaillant Mareschal Boucicaut. Et encores pour vn petit toucher de la grand' ardeur & feule conuoitise qu'il auoit en la poursuite d'armes, sans ce qu'il luy chalust de quelconque autre auoir, dirons de luy en brief, ce qu'il respondoit à ses parens & autres de ses amis, quand par plusieurs fois le blasmerent de ce qu'il n'acqueroit terres & Seigneuries pour ses enfans, veu qu'il estoit tant en la grace du Roy. Je n'ay rien, disoit-il, vendu, ne pensé à vendre de l'heritage que mon pere me laissa, ne point acquis aussi, n'en ay, ne vueil acquerir, Si mes enfans sont preud'hommes, & vaillans, ils auront assez, & si rien ne vaillent, dommaige sera de ce que tant leur demeurera. Assez se pourroit dire de ce vaillant preud'homme, qui voudroit parler de ses faiëts, & vaillances: Mais pour tirer à la matiere dont nous esperons parler, à tant nous en souffrerons. Si ne forligne mie son vaillant fils, s'il est plain de bonté, Car ainsi que dit le Prouerbe commun, De bonne fouche bon fyon. Sa femme, & mere de celuy dont nous faisons nostre Liure, fut Madame Fleurie de Linieres, qui en son viuant estoit tresbonne belle sage & tres-noble Dame, & d'honneste vie. Né fut celuy dont nous parlons en Touraine, en la Cité de Tours, & en baptisme eut nom Lean. Si fut chèrement tenu de ses parens, comme leur premier fils, & nourry ioyeusement, comme il appartient à enfant de tel parage. Mais le vaillant pere, dont cy des-


fus auons parlé, ne dura au fils que deux ans apres sa naissance. Si trespassa de ce siecle, dont dommage fut au Royaume de France, aussi à la noble Dame sa femme, qui moult le pleura, & grand dueil en fist, & aussi fut grand perte à ses enfans. Si fut cest enfant bel, & doucet, & tres-plaisant à nourrir, qui au veufuage de la mere feut grand reconfort. Car au feu qu'il croissoit, grace & beauté croissoient & multiplioient en luy. Si fut enfant bel plaisant, gracieux, & de ioyeux visaige, vn peu sur le brunet, & assez coulouré, qui bien luy fist. Si estoit auenant, ioyeux, & courtois en tous ses enfantibles faicts. Et quand il fut vn peu parcreu, la sage & bonne mere le fist aller à l'escole, & luy continua à y aller, tant qu'elle l'eut avec soy en ce temps de son enfance. Tout ainsi que dict le Proverbe commun, Ce que nature donne nul ne peut tollir: car quoy que l'on die, dès l'enfance de l'homme se peurent appercevoir ses inclinations, de quoy que ce soit, si comme par experience se peut chacun iour veoir. Et cet esmoingnent assez les anciennes Histoires des faicts de plusieurs vaillans, si comme de Cyrus, qui en son enfance cuidoit estre fils du Pasteur qui l'auoit nourry, & ses bestes gardoit aux champs, & il estoit de Royale lignée, & fils de la fille d'Altiages, Roy de Perse, lequel Roy l'auoit commandé à occire dès qu'il feut né, de peur qu'il le desheritast, quand en aage seroit, pour cause d'vn fier songe qu'il auoit songé, qui ainsi luy fut par Sages exposé. Mais comme le dict commandement du Roy ne fust mie du

tout obey, le trouua vn pasteur au bois pendu par
 les drapelets à vn arbre. Si le nourrit sa femme com-
 me sien: Mais quand il feut parcreu, nature qui ne
 peut celer ce qu'elle donne, ne voulut pas mucier en
 luy son noble sang, & sa Royale venue. Car avec ce
 que bel de corps, & de vifaige estoit, le gétill port de
 luy son Seigneurial maintien, l'alleure, le regard, &
 la sage parole, demonstroient en luy qui il estoit. Et
 qu'il soit vray que grand chose & merueilleuse soit
 que les dons de grace & de nature, tant estoit celuy
 Cirus naturellement de Seigneurial maintien, que
 les autres pasteurs l'auoient en reuerence, & en firent
 leur Roy. Si le craignoient & doubtoient, & quand
 ils'estoient aux champs, ils s'assembloient entour
 luy, & il oyoit leurs causes, & en determinoit, &
 leur faisoit droict. Et ainsi nature prophetisoit en
 luy ce que puis adueint: Car il feut Roy de Perse,
 d'Assyrie, & de Mede, & conquist Babilone la gran-
 de. Semblablement aduint de Romulus, qui fonda
 Rome, & de Remus, son frere, qui dès leur enfance
 assembloient les petits enfans, par maniere de ba-
 taille, & ainsi le continuoient & maintindrent,
 quand ils furent grands & hommes parfaicts; tant
 qu'ils conquirent grand pays. Pâris le fils de Priam,
 qui pasteur mescongneu fut en son enfance, & fils
 de pasteur cuidoit estre, mais son gentil maintien,
 & son poly atour, ses chapelets de fleurs, & son arc
 doré, donnoient enseignes, avecques sa tres-grande
 beauté, tant de ses inclinations, & conditions amou-
 reuses, plus que batailleres, quel il estoit. D'assez

d'autres nobles hommes, pourroit-on dire, desquels quand ieunes estoient les enseignes de leur enfance demonstroient enseignes de leurs conditions.

CHAPITRE IV.

Encores de l'enfance du dict Boucicaut.

 PROPOS de ce que dict est dessus, dès l'enfance du noble Mareschal Boucicaut, duquel nous esperons ramener à digne memoire les tres-notables, & beaux faiçts par luy acheuez, & accomplis, au contenu de ce Liure, estoient en luy apparans ses belles bonnes & honorables conditions, & inclinations naturelles: Car ses ieux enfantelins estoient communément de choses qui peuuent signifier faiçts de Cheualerie, & comme il est dict deuant des susdicts cheualeux, nature prophetisoit en cestuy cy les haults offices que Dieu & bonne fortune luy apprestoient à venir en son temps. Car il assembloit les enfans de son aage, puis alloit prendre & saisir certaine place, comme vne petite montaignete, ou aultre part, & avec luy Geoffroy son frere, qui en son parfaict aage a esté & est Cheualier de tres-grand' emprise, fort & fier à ses ennemis, hardy & de grand courage, & bel de corps, & de visaige, & en si grand office, comme Gouverneur du Daulphiné; Et aussi Mauuinet, leur frere de mere, qui moult vaillant Cheualier a esté

16 HISTOIRE DV MARESCHAL
en son viuant. Iceux estoient avecques luy, à garder
le pas, ou le lieu contre les autres petits enfans, à qui
de sa puissance chalengioient la place, & autresfois
vouloit estre l'assaillant, & par force en deboutoit
les autres, puis faisoit assemblées, comme par batail-
les, & aux enfans faisoit bacinets de leurs chappe-
rons, & en guise de routes de gens d'armes, cheuau-
chant les bastons, & armez d'escorces de buches, les
menoit gaingner quelques places les vns contre les
autres. Atous tels ieux volótiers ioüoit, ou aux barres,
ou au ieu, quel'on dict le croq Madame, ou à faillir,
ou à ietter le dard, la pierre, ou si faictes choses. Mais
à quelque ieu qu'il ioüast tousiours estoit le maistre,
& vouloit congnoistre du droict ou du tort des au-
tres enfans. Et dés lors estoit sa maniere Seigneuria-
le, & haulte; Et se tenoit droict, la main au costé,
qui moult luy auenoit, regardant ioüier les autres
enfans, pour iuger de leurs coups, & ne parloit mie
moult, ne trop ne rioit. Non pas que ce luy veint
d'orgueil, ne outrecuidance: Car il estoit amiable,
doux & humain, & courtois sur tous autres enfans,
& tres-humble & tres-obeissant à son maistre, qui
le gouuernoit, & à toute gent: mais que tort on ne
luy feist. Car ce ne souffroit-il en nulle guise. Et telle
maniere auoir à si ieune enfant, estoit demonstnan-
ce de son grand & noble couraige, qui dés lors se
donnoit à congnoistre. Et qu'il eust grand cœur,
apparut bien vne fois, que son maistre l'auoit batu,
pour cause que vn enfant s'estoit plaint qu'il luy
auoit donné vne buffe, pource qu'il l'auoit desmen-
ty,

ty, Boucicaut ne pleuroit point, ains tenoit sa main
soubz sa iouë, comme tout pensif. Son maistre,
qui regarda la maniere qu'il ne pleuroit point, com-
me font les autres enfans communément, qui pleu-
rent quand on les a battus, luy dist asprement, Re-
gardez est-il bien fier ce Seigneur là, Il ne daigne
pleurer. L'Enfant luy respondit, Quand ie seray
Seigneur, vous ne m'oserez battre, & ie ne pleure
point, pour ce que si ie pleuroye, on sçauroit bien
que vous m'aurez batu. Quand il fut vn peu gran-
delet, le saige Roy Charles, qui lors viuoit, lequel
n'auoit pas oublié les bons seruices que son pere le
vaillant Mareschal Boucicaut auoit faicts en son
vuiant au Roy Iean, & à luy, aussi és faicts des guer-
res du Royaume de France, contre les Anglois, eut
esperance que semblablement le fils seroit vaillant,
& que bien estoit raison qu'il le remunerast des
biens faicts de son feu pere. Si voulut, & ordonna
qu'il fust amené par deça, & qu'il demeurast à la
Cour du Daulphin de Vienne, son fils, qui à present
regne. Et ainsi feut faict. Si fut nourry avec le dict
Daulphin iusques à ce qu'il eut d'aage enuiron dou-
ze ans. Et tant comme il y feut se gouuerna tres-
gracieusement, tellement que le Daulphin l'auoit
moult cher, & semblablement tous les autres haults
& nobles enfans, qui là estoient nourris, & mesme-
ment aussi les grans gens l'aimoient, & moult repu-
toient ses belles manieres sages, & gracieuses, & tou-
tes telles que noble enfant taillé à venir à grand bien
doibt auoir.

C

CHAPITRE V.

*Cy dit de la premiere fois que Boucicaut prist
à porter armes.*



BOUCICAUT comme dict est , estoit ja venu en l'aage de douze ans , & non-obstant que ce soit moult grande ieunesse à ja commencer à porter armes, cestuy enfant oultre le commun cours des autres enfans, qui en cest aage naturellement ont coustume de plus desirer à ioïer avec les autres enfans que à faire quelconque autre chose , ne cessoit de se debatre , & guermenter qu'il fust armé , & allast à la guerre. Et à bref parler , nonobstât que plusieurs qui l'oyoient se rigolassêt de luy, Disans Dieu de l'hôme d'armes. Tant s'en debatit , que le Duc de Bourbon en ouyt parler. Et de ce qui luy feut rapporté que l'enfant disoit, & du grand desir qu'il auoit d'aller en guerre, eut moult grand ris , considerant le grand courage qu'il auoit en si ieune aage , dont il presuma que s'il viuoit encores seroit vn vaillant homme, dont il feut moult ioyeux : Et pour le plaisir qu'il y prist , requist au Roy que il luy voulust bailler pour le mener avec luy en l'armée qu'on faisoit adonc , pour aller en Normandie , assieger & prendre les chasteaux , & forteresses du Roy de Nauarre , qui lors viuoit , à qui le Roy Charles auoit contens. A laquelle dicte requeste du Duc de Bourbonnois , le Roy par maniere

de ieu & d'esbatement, & pour accomplir le desir de l'enfant s'y consentit: mais bonne garde luy bail-la. Si fut Boucicaut armé, & mis en estat: Quand il se veid habillé, tout ainsi qu'il demandoit, ne con- uient à demander s'il eut grand ioye. Et quand il estoit armé, ce ne luy sembloit mie charge, ains en estoit si ioly que il falloir remirant comme vne Dame bien atournée. Et tant se contenoit bel, que ceulx qui le voyoient y prenoient grand plaisir. Et ainsi le ieune enfant Boucicaut alla en celle armée, de laquelle feut principal chef le Duc de Bourgon- gne, frere du Roy Charles, avec lequel estoit le Duc de Bourbon, & le bon Connestable de France Mes- sire Bertran de Claquin, & maints autres vaillans Capitaines, & grande foison de gens d'armes. Par laquelle puissance furent pris par force maints forts chasteaux, & forteresses, c'est à sçauoir Bretueil, Beaumont, Requieruille, Gauray, Saint Guillaume de Mortaing, & tant qu'il ne luy demeura que Che- rebourg. Et ce faict, s'en retournerent en France. Mais tant gracieusement se gouuerna l'enfant des- sus dict en ce voyage, que oncques homme ne le veid lassé du fais du harnois, ne de quelconque pei- ne qu'il conueint souffrir aux sieges, ains tousiours si ioyeusement s'y contenoit, que vrayement on pouuoit iuger par les contenance que armes deb- uoient estre son naturel mestier. Mais au retour fail- lit la ioye de l'enfant Boucicaut: car ja cuidoit estre vn vaillant homme d'armes: mais esbahy setrouua, quand on luy dist, Or ça ça Maistre bel homme

20 HISTOIRE DV MARESCHAL
d'armes, reuenez à l'escole. Si fut derechef mis à l'es-
cole avec le Daulphin, comme deuant, dont moult
se trouua marry. Et ainsi comme vous oyez, fut ce-
luy voyage le premier où Boucicaut fut oncques
armé: mais de bonne heure y commença: car si
bien puis l'a continué, que pris n'a gueres de repos.

CHAPITRE VI.

*Cy dit comment en ieune aage Boucicaut
voulut poursuire les armes, & se prist
à aller en voyages.*



AINSI vn espace de temps feut l'en-
fant Boucicaut tenu à sejour malgré
luy, avec le Daulphin, tant que moult
luy commença à ennuyer. Si se prist
moult à tourmenter d'estre tiré hors
de là, & de porter armes, laquelle chose moult desi-
roit: Car bien luy sembloit que ja feust fort, & dur
assez, pour donner, & receuoir grands coups de
lance, & d'espée, & de soustenir le fais qu'il y con-
uient. Et de ce tant mena grand noise, que le Roy
ouït parler de sa grand volonté, & qu'il disoit vraye-
ment que qui ne l'armeroit il iroit seruir aucun Gen-
til-homme, qui luy donneroit cheuaux, & harnois.
Car plus ne vouloit ainsi sejourner en Court. Le
Roy eut grand plaisir de veoir en si ieune cœur tel
desir & volonté de ja venir à vaillance: Et si pensa

que bien retrairoit à son cheualeureux pere. Et quoy qu'il retardast de luy octroyer ce qu'il requeroit, pource que trop ieune luy sembloit, tant en fait parler au Roy, & tant le requist, que en la parfin conueint qu'il feust armé. Si le fait le Roy moult bien ordonner de tout ce qui luy conuenoit, & tresbien monter, & bonne compaignée luy bailla, & assez de quoy despenfer. Et ainsi en tresbel estat l'enuoya derechef en la compaignée du Duc de Bourbon, qui ioyeusement le receut, lequel alloit avec le Duc de Bourgongne, par le commandement du Roy, à tout belle compaignée de gens d'armes, apres le Comte de Bouquingam, Anglois, qui adonc alloit dommageant le Royaume de France. Si luy fut par le dict Duc de Bourgongne & sa compaignée par fois, porté maint dommage, tant que à petite compaignée s'en retourna en Angleterre, & petit eut gaigné en France. En celuy voyage moult se commencerent à demonstrier les vaillances du bon courage & hardiesse du iouuencel Boucicaut. Car es escarmouches & rencontres qu'ils faisoient sur leurs ennemis, tant & si auant s'y abandonnoit que nul plus que luy ne s'y aduanturoit. Et tant que merueilles estoit à veoir à si ieune enfant faire ce qu'il faisoit, & plus en eust fait encores, qui luy eust souffert. Mais assez y auoit avecques luy qui ne le souffroit faire tous ses hardis vouldoirs, pource que trop se vouloit abandonner. Et mesmement le bon noble Duc de Bourbon, qui deuant l'aimoit pour l'amour de son vaillant pere, l'acueillit adonc en plus

grand amour , pour l'apparence & signe qu'il voyoit en luy d'estre vaillant homme. Et depuis lors l'eut moult cher en sa compaignée. Ce voyage faict, s'en retourna à Paris le Duc de Bourgogne, & le Duc de Bourbon, & Boucicaut avec eulx ; Si feut grandement receu du Roy, & du Daulphin son fils, qui ja auoient ouy parler de l'esprouue de son hardieffe, & grande volonté.

CHAPITRE VII.

Cy deuise les essais que Boucicaut faisoit de son corps, pour soy diuire aux armes.



NEST pas à tant le noble iouuencel Boucicaut. Si dit que plus ne le tiendra la Court à sejour, & qu'il sera dorefnauant maistre de soy. La luy semble qu'il soit homme, & que il doie trauailler comme les autres. Si s'en partit moult tost de Paris, & s'en alla en Guyenne avec le bon Mareschal de Sancerre, qui alloit mettre le siege deuant Monguison. Et comment Boucicaut se mainteint en celuy voyage, nous vous dirons: Tant estoit grande l'ardeur de la volonté qu'il auoit aux armes, que nulle peine ne luy estoit griefue, & ce qui eust esté grand trauail à vn autre, à luy estoit tres-grand soulas. Car quand il estoit vn peu à sejour, adonc comme celuy que grand desir menoit,

ne se pouuoit tenir coy. Dont maintenant s'essayoit à faillir sur vn courfier tout armé, puis autre fois courroit ou alloit longuement à pied, pour s'accoustumer à auoir longue haleine, & souffrir longuement trauail. Autre fois ferissoit d'une coignée, ou d'un mail grand piece, & longuement, pour bien se dui-re au harnois, & endurcir ses bras, & ses mains à longuement ferir, & qu'il s'accoustumast à legerement leuer ses bras. Pour lesquelles choses exercer duisit tellement son corps, que en son temps n'a esté veu nul autre Gentil-homme de pareille appertise; Car il faisoit le soubresaut armé de toutes pieces, fors le bacinet, & en dansant le faisoit armé d'une cotte d'acier. Item failloit sans mettre le pied à l'estrier sur vn courfier armé de toutes pieces. Item à vn grand homme monté sur vn grand cheual, failloit de terre à chetiauchon sur ses espaules, en prenant le dict homme par la manche à vne main, sans autre auantage. Item en mettant vne main sur l'arçon de la selle d'un grand courfier, & l'autre empres les oreilles, le prenoit par les creins en plaine terre, & failloit par entre ses bras de l'autre part du courfier. Item si deux parois de plastre feussent à vne brasse l'une pres de l'autre, qui feussent de la haulteur d'une tour, à force de bras & de iambes, sans aultre aide, montoit tout au plus hault, sans cheoir au monter, ne au deualer. Item il montoit au reuers d'une grande eschelle dressée contre vn mur tout au plus hault, sans toucher des pieds, mais seulement sautant des deux mains ensemble d'eschelon en eschelon, armé d'un

ne cotte d'acier, & ostée la cotte, à vne main sans plus montoit plusieurs eschelons. Et ces choses sont vrayes, & à maintes autres grandes appertises faisoit duifit tellement son corps, que à peine peult-on trouuer son pareil. Puis quand il estoit au logis, s'essayoit avec les autres Escuyers à ietter la lance, ou à autres essais de guerre, ne ja ne cessoit. Et ainsi se conteint en celuy voyage, ne ja ne luy sembloit qu'il peult estre à temps à aulcune besongne pour soy bien esproouuer. Et quand ils feurent au siege deuant la dicte forteresse de Monguison, aux assaults, qui y furent faicts, là s'essayoit Boucicaut, qui legerement couroit des premiers, pour faire en toutes choses en tel cas ce que appartient à tout bon homme à faire. Et tant s'y abandonnoit perilleusement, que tous s'en esmerueilloient : Pour lesquels biensfaicts, & l'apparence de sa grande hardiesse & vaillance, le prist le dict Marechal de Sancerre en moult grand amour, & dist, presens plusieurs de ses gens, Si cest enfant vit, ce sera vn homme de grand faict. Et à la parfin feut prise la dicte forteresse, & plusieurs autres chasteaux, & forteresses feurent prises par traité. Et apres ce s'en reuindrent en France.

CHAPITRE VIII.

Cy parle d'Amour, en demonstrent par quelle maniere les bons doiuent aimer, pour deuenir vaillans.

IA



A estoit venu Boucicaut en l'aage & au temps que Amour naturellemēt a coustume de prendre le treu & la paye de tous ieunes nobles courages. Si ne fut mie droict qu'il feust exēpt ne eschapast del'amoureux lien, lequel n'ēpesche mie ne oste aux Cheualeux de bonne volōté à poursuiure le noble exercice des armes, ainçois est ce qui plus faict és ieunes cœurs auier & croistre le desir del'hōnorable poursuite cheualeuse. Ha quants ont esté exaulliez au nom de proiēsse, que si ne feust Amour, par qui leur venoit la hardiesse d'entreprēdre les fortes choses, lesquelles pour accroistre leur renōmée ils acheuoient, affin qu'ils eussent la grace de leurs Dames, ce ne fust rien d'eulx? Mais quelle chose est-ce qui soit griefue ne forte à faire à cœur qui bien aime, & qu'il n'ose entreprendre? Certes nulle. Amour oste peur, & dōne hardiesse, faict oublier toute peine, & prendre en gré tout le trauail que on porte pour la chose aimée. Et qu'il soit vray, qui veult lire les Histoires des vaillans trespassez, assez trouuera de ce preuue. Si cōme on lit de Lancelot, de Tristan, & de plusieurs autres, que Amour fait bons, & à renōmée attaindre. Et mesmement de nostre viuant y a eu assez de nobles hommes de France & d'autre part en voyons & auons veu, si comme on diēt de Messire Othe de Granſſon, du bon Conneſtable de Sancerre, & d'autres assez, qui long seroit à dire, lesquels le seruice d'Amour a faict deuenir vaillans, & bien morigenez. O noble chose est que d'Amour qui

D

bien en sçait vser, quoy que à tort aulcuns le blasment. Car si mal en prend à ceulx qui à droict n'en sçauent vser, ce n'est pas la coulpe d'Amour; car de soy il est bon. Et pource qu'il pourroit sembler à aucuns que il ne suffist mie de dire en termes si generaux, sans en plus auant declarer, que Amour soit bon à qui bien en sçait vser, est bon de toucher aucunement par quels termes bien vser on en peut, parquoy il soit bon. Et pour declaration de ce, sans querir trop de subtiles questions, me semble que le cœur qui veut aimer doibt principalement fonder l'entente de son amour sur trois choses. La premiere est, qu'il aime pour en valoir mieulx en toutes mœurs & en conditions, & pour amender ses coustumes, viure plus ioyeusement, auoir cœur plus hardy, & plus entreprenant, & en toutes vertus se vouloir habiliter & conjoindre. La seconde chose est, qu'il aduise biē de se mettre en lieu, qui soit tel, si bien cōditionné, si vertueux & si bon, qu'il y puisse prendre exemple de toute bonté, & où il y ait sens. Car soit certain que s'il aime en fol lieu, il deuiendra fol, & si en villieu & mal morigené, semblablement deuiendra vil & vicieux: Car Amour est de telle nature, qu'il faiēt tout cœur aimant traire à la nature & aux conditions de la chose que on aime. Doncques si mieulx valoir veut d'emprendre amoureuse vie, quelle que soit la personne qu'il veut aimer, soit belle ou laide, grande ou petite, garde soy bien d'aimer en lieu où il n'y ait sens, graces, & vertus. La troisieme chose sur quoy le bon cœur doibt fonder son

entente est sur honneur, en telle maniere que en cest amour où il se mettra, de tout son pouuoir y garde honneur, ne pour mourir ne face à son pouuoir chose dont de nulle part deshonneur vienne à luy, ne à ce qu'il aime. Et si sur ces trois choses le cœur qui veut aimer met bien son entente, c'est à sçauoir que pour aimer il amende ses conditions, en viue plus liément, & que son courage en accroisse en hautes pensées, & qu'il s'assie en lieu noble de mœurs, & bien conditionné, & qu'en cest amour en toutes choses garde honneur, il trouuera amour si bon & si profitable, qu'il en vaudra mieulx toute sa vie: Mais aucuns me respondront à ces raisons, Voire mais ie cuideray que le lieu où ie m'arrestteray soit bon, & bien conditionné, & puis ie trouueray le contraire: & si n'en pourray oster mon cœur. Car ie luy auray tout mis. Si fais telle responce, que puis que ils dient qu'ils ne s'en pourroient oster, & si y treuuent assez de mal: que ils n'vissent donc pas du bon amour que ie deuise. C'est à sçauoir que ils doiuent aimer pour mieulx en valoir, & non mie pour en empirer. Et celuy en empireroit qui plus s'y tiendroit; puis que le lieu rien ne vaudroit. Et de dire que ce feust faulseté. Non feroit. Car il est fol qui du mauuais pas ne se tire, s'il y est entré. Mais sçais-tu la cause pourquoy tu qui veux aimer, trouues en amour communément tant d'amertumes, & de maulx? C'est pour ce que tu ne mets mie ton cœur en la vie amoureuse, pour cause de mieulx en valoir, ne pour vertu: mais seulement pour la dele-

ctation que ton corps en a ou espere auoir. Et pour
 ce que telle folle plaifance & delectation est chose
 qui durer ne peult, toute chose qui est fondée dessus
 ne peult estre feure, & à peine se peult garder; mais
 ce qui est fondé sur vertu est tres-durable, & en vient
 bien & ioye. Mais trop peu font qui aiment selon
 les susdictes regles, & pour ce trouuent amour dur,
 quand à la chose que ils desirent ils faillent, c'est à
 sçauoir à leur folle plaifance. Si est à leur coulpe le
 mal qu'ils en ont, & non mie d'Amour. Car culx
 mesmes se font le mal & grief qu'ils en reçoient.
 Tout ainsi que ie puis bailler exemple du vin, lequel
 est de soy tresbon, & qui resioüit le cœur de l'hom-
 me, & le reconforte, & soustient, & assez de bonnes
 choses en sont faictes: mais si discrettement il n'en
 prend & que gloutemēt & en delectation plus que
 raison de son corps il luy destourne le sens, & le ra-
 mene comme à nature de beste, qui n'a nulle rai-
 son, & luy trouble la veüe, si n'est mie à la coulpe du
 vin, mais de celuy qui follement en vse. Doncques
 selon mon opinion en cōclusion ie veulx dire, Que
 amour qui est fondé plus sur delectation & folle
 plaifance que sur vertu & bonnes mœurs, ne peult
 durer, & que tel amour est au cœur que s'y boute
 cause d'assez de maux & de griefues amertumes, &
 aucunesfois de destruction. Et de ceste matiere, qui
 n'est mal gracieuse, se pourroïēt mouuoir plusieurs
 questiōs, & de moult subtiles: mais à temps m'en tai-
 ray, pour tourner au premier propos, c'est à sçauoir
 de celuy de qui nostre matiere est encommencée.

CHAPITRE IX.

*Cy dit comme Amour & desir d'estre aimé,
creust en Boucicaut courage, & volonté
d'estre vaillant, & cheualeureux.*



SE PREINT à deuenir ioÿeux, ioly, chantant, & gracieux plus que oncques mais: Et se preint à faire Balades, Rondeaux, Virelais, Lais, & Cóplaintes d'amoureux sentimét. Desquelles choses faire gayemét & doucement Amour le feit en peu d'heures si bon maistre, que nul ne l'en passoit. Si côme il appert par le liure des cent Balades, duquel faire luy & le Seneschal d'Eu feurét compaignons au voyage d'oultre mer. Et voulut auoir robes, cheuaux, harnois, & tous habillemens cointes, & faitis, plus que il ne fouloit. La auoit choisy Dame belle, & gracieuse, & digne d'estre aimée, si comme Amour l'auoit admonesté, pour laquelle preindrent ses pensées à croistre de plus en plus en desirs cheualeureux. Si prist deuise & mot propice à l'entente & propos de son Amour, qu'il porta en tous ses habillemens. Et feut secretemét en son courage desireux de tant faire par bien seruir, celer, & par vaillance, & poursuiure armes, quel amour de sa Dame peut acquerir. Si la voyoit quand il pouuoit, sans blasme d'elle. Et quand à danse ou à feste s'es-

batoit, où elle feut, là nul ne le passoit de gracieuseté & de courtoisie en chanter, en danser, en rire, en parler, & en tous ses maintiens. Là chantoit chansons, & rondeaux, dont luy mesme auoit faict le dict, & les disoit gracieusement, pour donner secretement & couuertement à entendre à sa Dame, en se complaignant en ses rondeaux & chansons comment l'Amour d'elle le destraignoit. Mais il ne feut mie tost hardy de plainement dire sa pensée, comme font les lobeurs du temps present, qui sans desserte vont baudemét aux Dames requerir qu'ils soyent ayez : & de faintises & faulx semblans, pour elles decepuoir bien se sçauent aider. Ainsi ne feit mie l'enfant Boucicaut, ains deuant elle & entre toutes Dames estoit plus doux & bening que vne pucelle. Toutes seruoit, toutes honnoit, pour l'amour d'une. Son parler estoit gracieux, courtois, & craintif deuant sa Dame. Si celoit sa pensée à toute gent, & sagement sçauoit jecter son regard & ses semblans, que nul n'apperceust où son cœur estoit. Humblement & douteusement seruoit Amour, & sa Dame. Car il luy sembloit qu'il n'auoit mie assez faict de bien, pour si haulte chose requerir & demander, comme l'amour de Dame, & pource mettra ce dict toute peine que par son bien faire elle soit esmeüe à l'aimer, & le prendre en grace, & voudra toutes manieres & conditions & conténances amender, & continuer de mieulx en mieulx pour l'amour d'elle. En celuy temps estoit assez de nouuel couronné le Roy Charles sixiesme

du nom, qui à present regne. A donc commencerent à multiplier festes & ioustes & danſes en France; plus que de long temps n'y auoit eu, pour cause du ieune Roy, à qui ieunesse, puissance, & Seigneurie admonestoient de se ſoulacier & esbatre, comme à ieune cœur qui a puissance est chose naturelle. Si faisoit le Roy au temps delors souuent & menu de belles festes à Paris, & ailleurs, où haultes Princesses, & Dames, & Damoiselles, de toutes parts estoient mandées. Si peut-on ſçauoir que maintes en y auoit de belles, iolies, & richement atournées. Là s'efforçoient ces ieunes Cheualiers & Escuyers d'estre iolis, cointes, & auenans: Car la veüe de tant de nobles & belles Dames leur accroissoit le courage & volonté d'estre amoureux & auenans plus que oncques. Mais là estoient les ioustes à tous venans grandes, & plainieres. Si ne ſ'y faingnoient Gentilshommes, de chascun endroict ſoy monſtrer son vaſſelage pour l'amour des Dames. Là estoit le iouuencel Boucicaut ioly, richement habillé, bien monté, & bien accompagné, lequel en recepuant le doux regard de ſa Dame, lance baiffée vous poignoit son deſtrier de telle vertu que pluſieurs en abatoit en ſon encontre. Et tant bien ſ'y contenoit, que chascun ſ'eſmerueilloit de ce qu'il faisoit. Car moult ieune d'aage encores en celuy temps estoit. Si faisoit à merueilles parler de luy, & les Dames & toutes gens par grand plaisir le regardoient, & grand plaid en tenoient, que vous en feroye long compte. Ainſi comme vous oyez croiſſoit amour

32 HISTOIRE DV MARESCHAL
au courage de Boucicaut desir & volonté d'estre
vaillant. Si ne sera mie dorefnauant des derniers en
toutes besongnes belles & honorables, où employer
se pourra. Toutes ses pensées, & autrestoutes bon-
nes volonteiz fait amour croistre & multiplier au
courage de Boucicaut, lequel bien le meit à effect.
Comme il apperra par la description de ses bons
faicts, & poursuite de Cheualerie, comme nous di-
rons cy apres.

CHAPITRE X.

*Cy dit comment Boucicaut fut faict Cheua-
lier, & des voyages de Flandres.*



FFIN que tous ceulx qui ce present
Liure verront, & orront, sçachent &
voyent clairement comment sans iu-
ste cause ne sont mie meus les dessus
dicts Cheualiers, & Gentils-hommes,
par le mouuement desquels & ordonnance ce pre-
sent Liure est faict, à vouloir & desirer que le nom
du vaillant homme, de qui nous voulonstraicter en
cestuy volume, soit mis en perpetuelle memoire
au monde, pour donner comme deuant est dict
exemple à tous ceulx qui desirent venir au hault
honneur, & proüesse de Cheualerie, en demon-
strant qu'à ce ne peut nul attaindre sans grands tra-
uaux, & labour continuel en armes, & en bons
faicts, leur plaist que apres leur tesmoignage auten-
tique,

rique, & digne de foy, ie declare & demonstre en ceste presente escriture tout au long & par quelle maniere le bon Boucicaut a employé sa vie diligemment & continuellement en exercice d'armes, & en faicts de vaillance, & qu'il en racomprant ses faicts, & les voyages où il feut, commenceant dès sa premiere ieunesse iusques à ores, ie puisse demonstrier fil a son temps employé en oisiveté, & folie. Pour entrer en la Narration des choses touchées, il est à sçauoir que enuiron le temps dessus dict, les Flamans se rebellerēt contre leur Seigneur le Comte de Flandres, & de faict le chasserent. Pour laquelle chose le dict Comte veint deuers le Roy de France Charles sixiesme du nom, qui à present regne, comme à son souuerain Seigneur, requerir aide & secours contre iceulx, pour subjuguer & remettre en obeissance les villes de Flandres, & le dict pays, comme Seigneur doibt secourir son vassal, si besoing en a, & il l'en requiert. Et aussi à la priere du Duc Philippes de Bourgongne, oncle du dict Roy, lequel Duc auoit espousé Marguerite, fille du susdict Comte de Flandres. N'y enuoya pas le Roy tant seulement, ains luy mesme en propre personne y alla, accompagné de ses oncles, & de ceulx de son noble sang, à moult grande Baronnie, & tres-grand ost de Cheualiers, & de gens d'armes. En celuy voyage alla le iouuencel Boucicaut, qui encores estoit moult ieune: mais non obstant son ieune aage y fut faict Cheualier de la main du bon Duc de Bourbon, oncle du Roy, qui moult l'auoir cher, &

E

en laquelle compaignée & soubz lequel il estoit. Là s'assemblerent par leur presumption les Flamans à bataille contre leur souuerain Seigneur le Roy de France, & contre leur naturel Seigneur le Comte de Flandres, dont la mercy Dieu, qui à toutes choses iustemét pourueoit leur en prist comme il doit faire à tous subiects, qui contre leur Seigneur se rebellent. Car en leur pays mesmes és plaines de Rosebech feurent present le Roy, estant armé en la bataille, nonobstant qu'il feust encores enfant, morts & desconfits soixante mille Flamans. Aduint en icelle bataille que le Cheualier nouuel, dont nous parlons, se voulut par sa grande hardiesse coupler main à main à vn Flamand, grand & corfu. Si le cuida ferir à deux mains de la hache qu'il tenoit. Le Flamand, qui le veid de petit corsage, presuma bien que encores estoit enfant, si le desprisa, & si grand coup luy frappa sur le manche de sa hache que il luy feit voler des poings, en luy disant Vate ter, va enfant. Or veois-je bien que les François ont faute de gens, quand les enfans menent en bataille. Boucicaut, qui ce ouït, & qui grand deuil eut que sa hache estoit perduë, tira tantost la dague, & soubdainement se fiche soubz le bras de l'autre, qui iamais ne l'eust cuidé. Si luy donna si grand coup au dessoubz de la poitrine, que il faulsa tout le harnois, & avec toute la dague luy ficha és costez, & il cheut en terre de la douleur qu'il sentit, ne puis ne luy meffait. Si luy dit Boucicaut par mocquerie, Les enfans de ton pays se ioient-ils à tels ieux? D'autres

beaux coups & aduantureux biensfaicts feit le nouuel Cheualier à ceste besongne, & tant & si bien s'y porta, que il donna bonne esperance de son faict à tous ceulx qui le voyoient. Et ainsi feut tout le pays de Flandres subjugué par le Roy de France. Et tout ce faict, le Roy s'en retourna à Paris. Mais les Flamans indignez contre les François, & desirans de eulx vanger s'ils eussent peu, apres que le Roy se feut party pour ce qu'ils veirent bien que ils ne pourroient forçoyer contre le Roy, & que leur puissance estoit trop petite, pour greuer les François, appellerent les Anglois à leur aide, & les meirent en leur pays: dont quand le Roy le sceut il y retourna, c'est à sçauoir l'année d'apres. Et cestuy feut le voyage de Bourbourg, où le Roy prist Bergues d'assault, où les Anglois estoient qui s'enfuirent. A cest assault, & és autres besongnes ne fut mie des derniers Monseigneur Boucicaut, ains si bien s'y porta que nul mieulx. Et ainsi, par trois années le Roy alla en Flandres, tant qu'il rendit les Flamans & tout le pays subiect à luy, & obeissant à leur naturel Seigneur. Le Roy apres la prise de Bergues, en s'en retournant en France, laissa son Connestable Clifson à Terrouienne, accompagné de bonnes gens d'armes, pour garder la frontiere. Mais le iouuencel Boucicaut ne ressembra mie ceulx lesquels apres le grand trauail suyent tant qu'ils peuuent au repos & aise, comme font les nouveaux & tendres, ains voulut à toutes fins demeurer en garnison avec le dict Connestable.

CHAPITRE XI.

Comment Boucicaut feut la premiere fois en Prusse, & puis comment la deuxiesme fois il y retourna.



APRES le departement dela frontiere dessus dicte, ne s'en voulut mie retourner Monseigneur Boucicaut à Paris, ainsi que les autres faisoient, ains dit que il accompliroit le desir qu'il auoit d'aller en Prusse. Et comme communément font les bons qui voyager desirent, pour accroistre leur prix, entreprist adonc celuy voyage. Si se partit, & bien accompagné s'en alla en Prusse, là où il se mist en toute peine à son pouuoir de porter dommaige aux Sarrafins, & là demeura vne saison, puis s'en retourna en France. Bien fut temps, & assez auoit desseruy, que il eut la ioye de reueoir sa Dame, & n'est pas doubte que son gracieux cœur, ieune, gentil, & tout parfaict en loyauté, sentoit ardemment la pointure du desir amoureux, qui tire les amans à conuoiter veoir leurs amours, quand tresloyaument. Mais nonobstant ce desir, qui point de luy ne partoit, vouloit auant qu'il s'auenturast à requérir si grand don commel'amour de sa Dame, le desseruir par bien faire. Si prisoit tant si hault don, que il ne luy sembloit mie, si comme dict est, qu'il peust assez faire pour si grand grace

acquérir, & tous les faicts tenoit à peu de chose envers si riche guerdon. Mais Amour, qui ne desprise pas les humbles seruans, ne leur souffre mie pourtant fils n'osent grace demander perdre leur doux loyer, & merite, & que ceux, qui en vaillance si bien s'espreuent que il en soit renommée, ne soient apperceus de leurs Dames estre vrais loyaux amoureux, & que Amour ne die & mette en l'oreille aux belles pour qui ils se penent, comme leurs vrais amans s'efforcent de valoir pour l'amour d'elles. Parquoy souuentefois tant y met peine Amour que elle esueille Courtoisie, qui tant s'en entremet avec Franche volonté, que iceulx sont aimez sans ce que ils le sçaichent. Et tout ce leur est pourchassé par leurs biensfaicts, & haultes deffertes. Si croy bien que par celle voye peut aduenir Messire Boucicaut à sa gracieuse entente sans vilain penser. Car trop feust la Dame vilaine, qui refusast vn tel seruant; Parquoy ie tiens que à son retour luy pourchassoit Amour ioye, & tout le doux accueil que à son amant Dame par honneur peut donner & faire. Et ainsi Boucicaut retourna en France: où il fut vn peu à Paris à sejour. Au temps de lors auoit paroles de traicté entre les François, & Anglois, auquel traicté allerent à Boulongne le Duc de Berry, & celuy de Bourgongne, oncles du Roy. Si voulut Boucicaut pour tousiours son honneur accroistre en voyageant, & voyant de toutes choses aller avec eux au dict traicté, & retourna avec les dicts Nostreigneurs. Et pource que il luy sembla que on ne

38 HISTOIRE DV MARESCHAL
besongnoit mie moult adonc en France en faißt de
guerre, pour tousiours employer sa ieunesse en bien
faire, s'en retourna la deuxiesme fois en Prusse, où
l'on disoit que celle saison deuoit auoir belle guerre.
Là demeura vn temps, puis s'en reueint en France.

CHAPITRE XII.

*Comment Messire Boucicaut apres le retour
de Prusse alla avec le Duc de Bourbon deuant
Taillebourg, & deuant Bertueil, qui
furent pris, & autres chasteaux
en Guyenne.*



V T E M P S de lors les Anglois occu-
poient moult le Royaume de France
en plusieurs lieux, c'est à sçauoir
maintes villes & chasteaux que ils re-
noient par force, tant en Picardie,
comme en Guyenne & autre part. Combien que
Dieu mercy, par la vaillance des bons François ja
en estoit le pays moult descombré, & tousiours al-
loit en amandant au proffict du Roy de France,
par les bons vaillans qui peine y mettoient. Entre
lesquels bons & vaillans estoit le bon Duc de Bour-
bon dessus nommé, qui aux dicts Anglois faisoit
souuent maintes enuahies, dont il yssoit à son hon-
neur. Et pour ce, comme dict le Prouerbe com-
mun, Que chacun aime son semblable, pourtant

qu'il estoit bon, aimoit-il moult cherement Boucicaut, pour cause qu'il le voyoit hardy, & vaillant, & passer tous les iouuenceaux de son aage. Si le tenoit volontiers pres de luy, & grand plaisir auoit que il feust en sa compaignée. Si auint en la saison apres que le dict Boucicaut fut retourné de Prusse, comme dict est, que le Duc de Bourbon s'appresta pour aller en Guyenne, mettre le siege deuant aucuns chasteaux, que les Anglois tenoient. Si mena avec luy moult belle compaignée. C'est à sçauoir mille cinq cent hommes d'armes, & foison de traict. En celle compaignée ne s'oublia pas le bon Boucicaut, qui moult enuis eust demeuré derriere. Ains tout ainsi que les belles Dames ont coustume se resioüir d'aller à feste, ou les oiseaux de proye quand on les laisse voler apres la proye, se resioüissoit celuy gracieux iouuencel d'aller en armée. Quand le Duc de Bourbon fut en Guyenne, il mit le siege deuant Taillebourg, qui moult estoit fort chasteil, & fut prins par force. Puis alla mettre le siege deuant Bertueil, qui est vne forteresse de grand force, & là trouuerent moult grand defence. Là feut faicte vne mine dessoubsterre, laquelle feut si bien continuée, que elle perça le mur du chasteil, tant que les ennemis la veindrent defendre, & là endroiçt à estriuer. Contre les dicts ennemis feut des premiers Boucicaut, qui à pouffer de lance & d'espée main à main vaillamment se combattir, & longuement y souffrir. En telle maniere, que par luy & par ceulx qui le suivoient fut pris le dict Chasteil, où moult eut grand

honneur Boucicaut, & moult l'en priferent les bons amis. Apres ces forteresses prises, le Duc de Bourbon alla deuant vn autre fort chastel appellé Mauleon. Là feut liuré fort assault, & au dernier feut pris par mine, & par eschelle, où feurent faictes moult de belles armes. Le premier en eschelle feut Boucicaut, qui longuement se combatit, & tant que nonobstant les pesans coups que on luy lançoit d'amont, tant de pierres, comme d'espées, nul ne le peut garder que il ne feust des premiers sur le mur: & là feut tant d'armes que plus faire nul n'en pourroit. Ces choses faictes, le Duc de Bourbon alla deuant vn autre chastel appellé le Faon, mais la prise des autres forts chasteaux, espouuenta ceulx qui dedans cestuy estoient, pource que ils voyoient que moult estoit le Capitaine, & sa compaignée vaillans. Si n'oserent attendre l'assault, ains se rendirent à la volonté du bon Capitaine, Et pareillement se rendit au Duc de Bourbon vn autre fort Chastel appellé le bourg Charante. Pour ce que tout ne se peut dire ensemble, conuient parler des matieres l'une apres l'autre. Si est à sçauoir que tandis que le siege duroit deuant Bertueil, veindrent nouuelles en l'ost que les Anglois s'estoient assemblez, pour aller combattre vne forte Eglise de nostre Dame. Ces choses ouyes, s'assemblerent vne compaignée de Cheualiers, & Escuyers, desireux d'acroistre leur honneur, & renommée, & dirent que ils leur seroient au deuant. Boucicaut, qui autre chose ne queroit fors aduanture d'armes, voulut estre de la route, & tant qu'ils feurent

rent

rent par route trente Cheualiers, & Escuyers, tous de grande renommée. De ceste compaignée fut Capitaine & conduiseur, pour ce que le pays sçauoit, & les destours, & les adresses, vn Cheualier, qui au dict siege estoit, que on nommoit Messire Emery de Rochechouart. Si monterent tantost à cheual les trente bons Gentils-hommes, bien habillez de leurs harnois, & tant allerent par destours que ils vindrent à rencontrer les Anglois, qui garde d'eulx ne se donnoient, & bien estoient en nombre soixante dix. Tantost s'entrecoururent sus, & forte & aspre feut la bataille, qui n'estoit mie pareille. Car plus du double les Anglois estoient: mais nonobstant ce tant s'y porterent vaillamment les nostres, & tant fait bien chacun endroiçt soy, que les Anglois furent à la parfin tous morts, & desconfits, excepté neuf qui s'enfuirent. Ce faict, le dict Messire Emery de Rochechouart les mena aduanturer deuant vn chastel bien garny, appelé le Bourdrun; lequel par leur vaillance ils combatarent trois fois en vn iour: mais pour ce que trop peu de gens estoient ne le peurent prendre, si leur en conueint partir.

C H A P I T R E X I I I .

*Cy dict comment le Duc de Bourbon laissa
Messire Boucicaut és frontieres son Lieuten-
nant, & comment il iousta de fer de
glaiue à Messire Sicart de
la Barde.*

F



IA S'ESTOIT tant esprouvé Messire Boucicaut, que sa vaillance, laquelle avec la force luy croissoit de iour en iour estoit congneüe & manifestée à tous ceulx qui se trouuoient en armes en place où il fust. Parquoy si grand honneur luy feit le Duc de Bourbon que au partir du pays, apres les dessus dicts chasteaux pris, comme dict auons cy deuant, & que il s'en voulut partir & venir en France, le fait son Lieutenant es frontieres & au pays de delà, & ne laissa mie pour son ieune aage, que il ne luy laissast grand' charge de gens d'armes. Et avec luy demeurerent Messire le Barrois, Monseigneur de Chasteaumorant, & Messire Regnauld de Roye, cent cinquante hommes d'armes, & cent arbalestriers. Si n'en fut mie degeu le Duc de Bourbon de là le laisser. Car n'y demeura pas en oisueté, ne en vain. Car nonobstant l'hyuer, & la dure saison, alla tantost assaillir vne forteresse appelée la Granche, laquelle ils combattirent par trois iours, puis fut prise. Ne se deporta pas à tant en celuy hyuer, ains ainsi comme en icelle morte saison les Gentils-hommes se seulent esbatre à chasser aux Connins & Lieures ou autres bestes sauages, le bon Boucicaut par maniere de soulas s'esbatoit à chasser aux ennemis; & le plus souuent ne failloit mie à prendre. Et tout ainsi comme on a de coustume prendre icelles bestes en diuerses manieres, c'est à sçauoir à force de bons chiens, ou par traict d'arc, & de dards, ou par bourses & filets, ou autres ma-

nieres de les deceuoir, ainsi semblablement le vaillant Capitaine, qui contre ses ennemis se debuoit aider de plusieurs sages cauteles, les surprenoit en maintes manieres. Si voulut aller assaillir la forteresse de Corbier, & va ordonner vne embusche, où il feut, & avec luy Messire Mauuinet, son frere, & ses autres dessus dicts compaignons, tant que ils feurent vingt huit Cheualiers, & Escuyers sans plus, tous hommes d'esslite. Et ordonna que vne route de ses autres gens d'armes iroient courir par deuant la dicte forteresse. Et ainsi feut faict: car il s'alla embuscher au plus pres qu'il peut du chastel, & se cacha tout coyement entre arbres, & masures, qui là estoient. Tantost apres veindrent courir ceulx qu'il auoit ordonnez par deuant le chastel. Quand ceulx de dedans veirent nos gens courir par deuant eulx, tantost saillirent dehors, & les meirent en chasse. Car tout de gré les nostres fuyoient. Quand ils feurent dauantaige eslongnez, adonques saillit l'embusche; & prirent à courir vers la porte du chastel pour eulx ficher dedans. Quand la Guette du chastel veid saillir l'embusche, tantost escria par son signe au Capitaine, & à ceulx qui estoient avec luy saillis dehors que ils retournaissent, & ils le feirent tantost. Mais si tost ne sceurent arriuer, que ils ne trouuassent ja Messire Boucicaut combatant à pied pardeuant la porte. Car tout le premier deuant ses compaignons, comme le plus courageux estoit là arriué: où il faisoit merueilles d'armes: mesmement deuant que ses compaignons veinsent. Car ja auoit

pris le compaignon du Capitaine, qui le plus vaillant de ceulx de dedans estoit. Ia estoient ses gens arriuez, auant que ceulx du chastel peussent estre retournez. Lors commença la bataille grande & fiere: mais tant y ferit le bon Boucicaut avec sa compaignée, que ceulx du chastel feurent tous morts & pris, exceptez cinq qui s'enfuirent, & se bouterent au chastel, tandis que les autres se combatoient. Quand ce feut faict, Boucicaut avec les siens se va loger deuant le chastel, & enuoya querir tout le demeurant de ses gens. Si meit son siege par belle ordonnance. Quand ceulx de dedans veirent ce, ils n'oserent attendre l'assault, ains se rendirent, sauues leurs vies. Si feit Boucicaut la forteresse raser par terre. Et apres s'en retourna en son logis: car il en y auoit qui mestier auoient de repos. Mais comme Messire Boucicaut laissoit guairir ses gens & reposer, luy fut rapporté que vn Cheualier Anglois de Gascongne, appellé Messire Sicart de la Barde, auoit par maniere d'enuie dit de luy aucunes paroles, comme en disant que il n'auoit mie le corps taillé d'estre si vaillant comme on le tenoit. Pour lesquelles paroles, nonobstant que celuy fust vn des beaux Cheualiers que on sceust, & tres-vaillant homme d'armes, luy manda Boucicaut, que pour ce que il le scauoit vn des meilleurs & des plus beaux Cheualiers que on sceust, il se tiendroit moult honoré d'auoir aucune chose à faire avec luy, & pour ce le prioit que il luy voulust faire cest honneur que il luy voulust accomplir aucunes armes telles com-

me luy mesme vouldroit choisir, & deuiser. Car il estoit ieune & nouice en faict d'armes, si auoit bien mestier d'estre apais & enseigné d'un si vaillant homme comme il estoit. Quand le Cheualier eut entendu ceste requeste, pour ce qu'il se sentoit bon iousteur, il luy remanda qu'il luy accompliroit volontiers vn certain nombre de coups de fer de glaive. Ceste chose accordée, la iournée feut emprise, & la place où seroit. Quand ce veint au iour deuisé, Messire Boucicaut se partit bien monté, & bien habillé, accompagné des principaux Gentilshommes des siens, & alla deuant le chasteau de Chaulucet, de laquelle garnison le dict Messire Sicart de la Barde estoit: Car par sa grande hardiesse auoit le dict Messire Boucicaut accepté la place deuant la dicte forteresse. Là s'assemblerent les deux Cheualiers à la iouste: Le premier coup ne faillit pas Messire Sicart, ains assena Messire Boucicaut en targe si grand coup, que à peu ne le feist voler des arçons. Ne l'assena pas à celuy coup Boucicaut, pour son cheual qui se desroya. Si feut durement couroucé. Les lances leur feurent rebailées, & de rechef poignirent l'un contre l'autre. A celuy coup ne faillit mie Boucicaut, qui grand peine meit à bien viser. Si assena son compaignon en la visiere, que il rompit les boucles, & à peu qu'il ne luy fist voler le bacinet du chef, & du coup fut si estourdy, que qui soustenu ne l'eust, il alloit par terre. La tierce fois poignirent l'un contre l'autre, il assena Messire Boucicaut, si que la lance vola en piéces, & l'eschine

luy feit plier. Mais Boucicaut le assena tellement, qu'il n'eut si bon harnois qui le garentist qu'il ne luy fischast la lance par entre les costez, & le porta par terre, si que on cuidoit qu'il fust mort: Et ainsi finit ceste iouste sans parfaire le nombre des coups, qui vingt debuoiert estre. Mais l'essoine de l'une des parties acheua l'emprise. Si s'en partit Messire Boucicaut à tres-grand honneur; & assez tost apres le Duc de Bourbon, par le commandement du Roy l'enuoya querir. Si s'en retourna à Paris.

CHAPITRE XIV.

Comment Messire Boucicaut iousta de fer de glaiue à un Anglois appelé Messire Pierre de Courtenay, & puis à un autre nommé Messire Thomas de Clifort.



QVAND l'hyuer fut passé, & le renouvel du doux printemps fut reuenu, en la saison que toute chose meine ioye, & que bois & prez se reuestent de fleurs, & la terre verdoye, quand oisillons par les boscaiges menent grand bruit, lors que rossignols demeinent glay, au temps que Amour faict aux gentils cœurs aimans plus sentir sa force, & les embrase par plaisant souuenir, qui faict naistre vn desir, qui plaisamment les tourmente en douce langueur de sa uoureuse maladie. Adonc au gay mois d'Auril,

estoit le bel gracieux, & gentil Cheualier Messire Boucicaut à la Court du Roy, où festes & danfes souuent se faisoient. Si estoit gay & ioly, richement habillé, & en toutes choses si auenant, que nul ne le passoit. Si croy bien que quand Amour departoit ses grands trefors, & ses tres-douces ioyes, qu'il n'oubloit mie Boucicaut son loyal seruant, qui tout bien desseruoit. Si le nourrissoit ainsi Amour de ses doux mets, tandis qu'il auoit temps & aise de veoir sa douce Dame. Mais vaillantise, qui ne le laissoit longuement estre à sejour, luy tournoit son plaisir en grande amertume, quand la belle eslongnoit. Si le conduisoit douce esperance, qui luy disoit qu'à son retour seroit doucement receu de sa plaisante maistresse, pour l'amour de laquelle il feroit tant, qu'elle en oiroit toutes bonnes nouuelles. Et ainsi apres qu'il eust eu des doulx biens amoureux en celle dicte plaisante saison, pour les mieulx desseruir, voulut derechef Boucicaut aller au labeur d'armes en frontiere au pays de Picardie. Dont il adueint tandis qu'il estoit là, que il oïit dire que vn Cheualier d'Angleterre, appelé Messire Pierre de Courtenay, lequel estoit passé en France, s'alloit vantant qu'il auoit trauerfé tout le Royaume de France, mais oncques n'auoit peu trouuer Cheualier, qui eust osé iouster à luy de fer de glaiue, & si s'en estoit mis en son debuoir de le requerir. Quand Messire Boucicaut eut ouy ceste vantise, moult en eut grand despit. Et tantost par vn Herault luy manda que il ne vouloit mie que il eust cause de tant se plaindre

des Cheualiers de France, comme que ils luy eussent failly de si peu de chose, comme de iouster de fer de glaiue, & que luy, qui estoit vn des plus ieunes, & du moindre pris, si ne luy faudroit mie de greigneur chose. Si voulust aduiser toutes telles armes comme il luy plairoit, & il les luy accompliroit tres-volontiers. Laquelle chose fut tres-briefuement faicte. Car bien sembloit à celuy de Courtenay, qui moult estoit vaillant Cheualier, & tres-renommé, que de Boucicaut viendroit-il tost à chef. Si assemblerent à la iouste les deux Cheualiers: Mais sans que i'alonge plus ma matiere, pour deuifer l'assiete des coups d'un chacun, pour dire en brief; tous leurs coups parfirent: Mais ce feut si bien, & si grandement au bien de Boucicaut que il en faillit à son tres-grand honneur, & loüange. Pour laquelle chose tantost après, par maniere d'enuie, vn autre Cheualier d'Angleterre, nommé Messire Thomas de Clifort, l'enuoya requerir de faire certaines armes nommées, lesquelles il luy accepta tres-volontiers. Et nonobstant que le droit & coustume d'armes soit telle, que le requerant va & doit aller deuant tel Iuge comme celuy qui est requis veult eslire, Messire Boucicaut doubtant que il peust estre empesché par le Roy, ou autre de nos Seigneurs de France; si ceste chose leur venoit à congnoissance, ou que le Iuge que il esliroit ne les y voulust receuoir, alla accomplir les dictes armes à Calais deuant Messire Guillaume de Beauchamp, pour lors Capitaine de Calais, & oncle du dict Messire Thomas. Quand ils feurent

feurent au champ, & veint à la iouste, sans faille tous deux moult vaillamment le feirent: Et à la parfin de leurs coups, Messire Boucicaut porta à terre de coups de lance Messire Thomas, cheual & tout en vn mont: Si descendit tost à pied Boucicaut & se prirent aux espées. Et sans plus alonger le compte des armes qu'ils firent à pied, c'est à sçauoir d'espées, de dagues, & de haches, sans faille Messire Boucicaut tant y feit, que tous dirent que il estoit vn tres-vaillant Cheualier. Et ainsi en faillit à son tres-grand honneur. Apres ces choses, en celle mesme année le Roy eut Conseil, que grand bien seroit pour luy & pour son Royaume, & grande confusion à ses ennemis, si luy mesmes passoit à grand puissance en Angleterre: Si fut fait adonc à celle entente moult grande armée, en laquelle fut baillé à Messire Boucicaut la charge de cent hommes d'armes. Mais ne tint pas le dict voyage: Car auant qu'il peust estre mis sus du tout, l'hyuer vint si fort que despecer le conueint. Et feut appellée celle allée le voyage de l'Escluse, par ce que là vouloit le Roy monter en mer, & iusques là alla. Si s'en retourna en France. Et ainsi fut Messire Boucicaut à sejour celle saison, dont ne despleut mie à celle qui de bon cœur l'aimoit, qui maintes hachées souuentesfois auoit en son cœur pour les perilleuses aduantures où il s'abandonnoit.

G

CHAPITRE XV.

*Comment Messire Boucicaut alla en Espagne,
& comment au retour le Seigneur de Cha-
steauneuf Anglois entreprist à faire armes
à luy, vingt contre vingt, & puis ne le
voulut ou n'osa maintenir.*



EST E année ensuiuant, adueint que le Duc de Lancastre, à tres-grande puissance alla en Espagne pour destruire le pays: Et pource que il n'auoit mie intention de tost retourner, mena avec luy sa femme, & ses enfans. Si auoit en son aide le Roy de Portugal à cause de certaines alliances qui estoient entre eulx. Quand le Roy d'Espagne se veid ainsi oppressé de ses ennemis, il enuoya tantost les messaigers deuers le Roy de France, le supplier que il luy voulust enuoyer brief secours: De laquelle chose le Roy dit que ce feroit-il tres-volontiers. Si y enuoya Messire Guillaume de Nouillac, & Messire Gaucher de Pasac, avec certain nombre de gens d'armes: Mais tantost apres le Duc de Bourbon y alla, avec grand foison de gens, avec lequel Messire Boucicaut alla. Si y eut si belle compaignée, que quand le Duc de Bourbon, avec ceulx qui estoient allez deuant, furent ensemble, ils se trouuerent en nombre de gens d'armes bien deux mille. Adonc pour le secours qui

alors veint au Roy d'Espaigne, les Anglois qui ne veirent leur aduantage à celle fois, se retirèrent en Portugal. Et quand le Duc de Bourbon eut esté vne piece au pays, pource que il luy sembla que on ne faisoit mie moult, il s'en partit pour retourner en France, & passa en retournant par le Comté de Foix. Là se trouuoit aucunes fois Messire Boucicaut en compaignée d'Anglois, où ils beuuoiert & mangeoient ensemble, quand le cas s'y adonnoit. Et adonc pour ce que les dicts Anglois apperceurent quelques abstinences que le dict Messire Boucicaut faisoit, demanderent si c'estoit pour faire armes, & si c'estoit pour ceste cause que tost trouueroit qui l'en deliureroit. Boucicaut leur respondit que voirement estoit ce pour combattre à oultrâce: mais que il auoit compaignon, c'estoit vn Cheualier nommé Messire Regnault de Roie, sans lequel il ne pouuoit rien faire. Et toutesfois s'il y auoit aucuns d'eulx qui voulussent la bataille il leur octroyoit, & que à leur volóté prissent iour tant que il l'eust faict à sçauoir à son cōpaignon. Et encores s'ils vouloient estre plus grād nombre, il se faisoit fort de leur liurer partie tant que ils voudroient estre, c'est à sçauoir depuis le nombre de deux iusques au nombre de vingt. Si allerent tant auant ces paroles, que vn Seigneur Anglois du pays, que on appelloit le Seigneur de Chasteauneuf, & estoit parent du dict Comte de Foix, accepta ceste bataille: c'est à sçauoir vingt contre vingt, dont des Anglois celuy dict Seigneur debuoit estre chef, & des François Mes-

sire Boucicaut. Si fut ainsi ceste chose accordée des
 deux parties, & debuoit Boucicaut querir Iuge. Si
 eleut le Duc de Bourbon, & de cel' alla tant requere
 r que il s'y accorda, & pour l'amour de luy voulue
 bailler bons ostages pour tenir la place seure: Mais
 ie ne sçay si les Anglois trouuerent en ce leur excuse
 pour delaisier la chose, & que repentifs de celle em
 prise fussent: Car ny le Duc de Bourbon, ny plu
 sieurs autres que Messire Boucicaut leur presenta, ils
 ne voulurent accepter pour Iuges. Quand Messire
 Boucicaut veid ce, moult luy en pesa, pour ce que
 bien voyoit que ja s'en repentoient. Parquoy luy
 qui sur toute chose desiroit la bataille, afin que ils ne
 s'en peussent excuser, & que plus ne sceussent que
 dire, leur offrit que la bataille fust deuant le Comte
 de Foix: mais le dict Comte ne le voulut oncques
 accepter, ne leur tenir place. Si demeura ainsi la
 chose au tres-grand honneur de Boucicaut. Et le
 Duc de Bourbon, luy party du Comté de Foix, s'en
 vint par la Duché de Guyenne, & alla combattre
 vne ville appelée le bras saint Paul, auquel lieu on
 fit de moult belles & cheualeuses armes, & par
 especial de la personne de Boucicaut en eschelle, &
 autrement à grand danger & peril. Car les fossez
 estoient profonds de plus d'une lance, & tranchez
 à plain comme vn mur, & si y auoit moult grand
 garnison qui bien defendoit la place. Mais nonob
 stant ce, quand ce veint au fort de l'assault, Bouci
 caut au hardy courage sans rien doubter faillit es
 fossez sans aide nulle, & plusieurs autres le suiurent,

pour grauir & monter sur vn pont qui là estoit, dont les ennemis auoient despiecé plusieurs ais, & alloit le dict pont droict à leur porte sans pont leuis. Mais l'on n'y pouuoit aller sans le danger de deux tours, & avec ce les dicts ennemis auoient faict deuant la dicte porte, comme du long d'une lance loing vn bon & fort palis, qui estoit gardé des dictes deux tours. En ce fossé, comme dict est, estoit Boucicaut & autres, ausquels le Duc de Bourbon enuoya vne eschele pour monter sur le dict pont, à laquelle dresser à grand diligence meit la main Boucicaut, & tout le premier monta sus, & tout deuant les autres vint au palis d'enhaut. Mais apres luy monterent tant d'autres desireux semblablement d'auoir honneur à la iournée, comme bons & vail-lans, que l'un empeschoit l'autre. Si que en nulle guise ne pouuoient combattre de leurs lances pour la petitesse de la place. Quand Boucicaut veid que ainsi empeschoient l'un l'autre, il bôta & feit cheoir l'eschele pour faire descendre la grand charge de gens qui dessus estoit. Si ne fault mie parler comment là estoient bien seruis de grosses pierres lancées des deux tours de dessus. Plus feirent les ennemis. Car pour empescher aux nostres la montée ils ouurirent leurs portes, & veindrent combattre main à main avec nos gens de lances & d'espées. Là leur veint au deuant Messire Boucicaut & ceulx qui avec luy estoient, qui ne leur faillit mie. Si feit là de tres-grandes armes Boucicaut, & moult y sousteint grand faiz. Car trop estoient les ennemis de gens

qui tant y poufferent , que ils feirent ressaillir nos gens és fossez sans eschele. Mais tousiours encores que tout seul feust demeuré des siens , leur tenoit estail Boucicaut. Grand piece se combatit , & tant d'armes faisoit , que les amis & les ennemis le regardoient par grand merueille. Et ainsi dura si grand piece ceste bataille que vn lyon de grande fierté deust estre lassé ; tant que les dicts ennemis vindrent sur luy à si grande quantité , que à force de pousser des lances le feirent cheoir au fossé. Si cessa à tant l'assault : car tard estoit. Mais ne fault demander le grand honneur & la feste que le Duc de Bourbon fist le soir à cestuy vaillant champion Boucicaut. Et generallyment tous Cheualiers & Escuyers grande louïange luy donnoient , & petits & grands ne parloient sinon de luy , & de ce que on luy auoit veu faire grand compte en tenoient , en racomptant chascun à son tour diuerses armes de grand force que veu faire luy auoient : Et à brief parler , au iugement de tous l'honneur de la iournée en emporta Boucicaut. Le lendemain voulurent nos gens recommencer l'assault : mais quand les ennemis veirent ce , ils se rendirent , & pour celle prise semblablement se tournerent François plusieurs chasteaux & villes de là enuiron.

CHAPITRE XVI.

*Comment Messire Boucicaut alla outre mer,
où il trouua le Comte d'Eu prisonnier.*

FAICTES & accomplies les choses dictes cy dessus, le Duc de Bourbon s'en retourna à Paris : mais Messire Boucicaut, qui grand desir auoit de visiter la terre d'outre mer, prit congé du dict Duc. Et luy & Messire Regnauld de Roye de compaignée partirent ensemble, & tant errerent qu'ils vindrent à Venise, où ils monterent sur mer, & allerent descendre en Constantinople. Et là demurerent tout le Carême. Et en ces entrefaites enuoyerent deuers Amurat, pere de Bajazet, qui estoit adonc en Grece, pres de Galipoli, pour requerir vn faufconduit, lequel il leur octroya tres-volontiers. Si s'en allerent apres deuers luy, & il les receut à grand feste, & leur fit tres-bonne chere, & ils luy presenterent leur seruice, en cas que il feroit guerre à aucuns Sarrafins. Si les en remercia moult Amurat ; & demurerent avec luy enuiron trois mois : mais pource que il n'auoit pour lors guerre à nul Sarrafin ils prirent congé, & s'en partirent, & il les feit conuoyer seurement par ses gens par le pays de Grece, & par le Royaume de Bulgarie, & tant qu'ils feurent hors de sa terre. Si tournerent vers Hongrie, & tant allerent qu'ils arriuerent deuers le Roy de Hongrie, qui les receut à

tres-grand chere, & grand honneur leur fit. Si auoit adonc le dict Roy moult assemblé de gens, pour vn grand debat qu'il auoit avec le Marquis de Morauie, dont il fut pour ceste cause encores plus ioyeux de leur venue. Là demurerent trois mois, & apres prirent congé du Roy & s'en partirent, & adonc se separerent l'un del'autre. Car Messire Regnauld de Royetourna vers Prusse, & Messire Boucicaut qui desiroit, comme dict est, visiter la Terre Sainte, retourna à Venise, & prit son passaige outre mer. Si alla en Hierusalem, au pelerinage du saint Sepulchre, que il visita tres-deuotement, & aussi fut par tous les saints Lieux accoustumez. Et lors qu'il faisoit la dicte cerche, il ouït nouuelles que le Comte d'Eu, lequel venoit au dict saint pelerinage, auoit esté arresté à Damas de par le Souldan de Babilone. Si tost que Boucicaut eut ce entendu, adonc nonobstant que il eust laissé toute sa robe en vne naue sur la mer en intention d'aller en Prusse, par sa tres-grande franchise, & pour l'honneur du Roy de France, à qui le dict Comte estoit parent, nonobstant qu'il n'eust oncques à luy gueres d'acointance, alla deuers luy à Damas, dont le Comte eut grand ioye quand il le veid. Si y arriua Boucicaut si à point, que le Souldan auoit enuoyé querir le Comte pour amener au Caire deuers luy. Quand il y feut, le dict Souldan feit mettre en escript tous les gens qui estoient au dict Comte d'Eu, & de sa mesnie, & aux autres pelerins qui estoient avec luy, & n'estoient pas de ses gens, il feit donner congé de eulx en

en aller. Mais le tres-bon gentil Cheualier franc & liberal Boucicaut, qui s'en fut allé s'il eust voulu, ne le voulut laisser là estre prisonnier sans luy, ains pour luy faire compaignée se fist escrire & se meit en la prison avec. Et là demeura de sa volonté, & sans contrainte, à ses propres despens, par l'espace de quatre mois que le dict Comte feut és prisons du Souldan, qui apres les laissa aller. Et quand ils furent hors de prison, ils retournerent à Damas, & de là prirent leur chemin à aller à Sainct Paul des deserts, & de là à Saincte Catherine du mont de Sinai, & puis s'en veindrent droict en Hierusalem. Et là de-rechef Messire Boucicaut visita le sainct Sepulchre, & paya tous les treus qui y sont establis, pour luy, & pour les gens, comme deuant, & refist la cerche en tous les autres lieux. Et quand le Comte d'Eu & Boucicaut eurent par tout ainsi esté, ils s'en partirent & veindrent à Barût, en intention de monter là sur mer pour eulx en retourner: mais ils furent arrestez des Sarrafins, & l'espace d'un mois fut passé, auant qu'ils les laissassent partir. Si monterent en mer, & de là s'en allerent en Cypre, & puis de Cypre à Rhodes, & là prirent vne galée, qui les mena iusques à Venise: Et ainsi s'en retournerent en France. Et quand ils furent en Bourgongne, ils trouuerent en leur chemin le Roy, qui estoit à l'Abbaye de Clugny, & s'en alloit prendre possession du Languedoc, où il n'auoit oncques esté. Si les receut le Roy moult ioyeusement, & grand feste fait de leur venue. Si se loüa le Comte d'Eu moult grandement

H

38 HISTOIRE DV MARESCHAL
au Roy de Boucicaut, & de la bonne compaignée
que il luy auoit faicte, & dit que oncques n'auoit
trouué tant de franchise ny de bonté en Cheualier.
Si luy sceut le Roy moult bon gré du bon amour
que il auoit porté à son cousin, & tous ceulx qui la
verité en sceurent le tindrent à grand franchise, &
bonté, & moult en loüerent Boucicaut.

CHAPITRE XVII.

*De l'emprise que Messire Boucicaut feit luy
troisiesme de tenir champ trente iours à la
iousté à tous venans, entre Boulongne
& Calais, au lieu que on diët
Saint Tin le vert.*

LEST à sçauoir que Messire Bouci-
caut auoit esté en sa ieunesse commu-
nément en voyages avec le bon Duc
de Bourbon, lequel pour la bonté que
il auoit veüe en luy dès son premier
commencement, l'auoit retenu de son hostel, &
avec luy, comme il est diët cy deuant. Si aduint
alors, comme le Roy estoit alors à Clugny, comme
il est diët, que pour le grand bien que il voyoit qui
toufiours multiplioit en Boucicaut, il l'aima plus
que oncques mais, combien que l'amour fut com-
mencé dès leur enfance. Si le voulut auoir du tout
en sa compaignée, & de faict le demanda au Duc.

de Bourbon, qui en fut content, pour l'aduancement de Boucicaut: Et ainsi fut du tout de la Cour du Roy, & s'en alla avec luy en ce voyage de Languedoc. En ce voyage aduint, ainsi comme Amour & Vaillance cheualeuse admonestent souuent le courage des bons à entreprendre choses honorables, pour accroistre leur pris & leur honneur, pour pensa Boucicaut vne entreprise la plus haute, la plus gracieuse, & la plus honorable, que passé a long temps en Chrestienté Cheualier entreprist. (Et soit noté & regardé aux faicts de ce vaillant homme) comment sans doubte il est bien vray ce que le prouerbe dict, Que aux œuures non mie aux paroles se démontrent les affections du vaillant preux. Car il n'y a point de doubte que l'homme qui a affection & desir d'atraindre & paruenir à honneur, ne pense tousiours comment & par quelle voye il pourra tant faire que il puisse desseruir que on die de luy qu'il soit vaillant. Ne iamais ne luy semble que il ait assez faict, quelque bien que il face, pour auoir acquis los de vaillance & proüesse. Et que ceste chose soit vraye, nous appert bien par les œuures de cest vaillant Cheualier Boucicaut. Car pour le grand desir qu'il auoit d'estre vaillant, & d'acquérir honneur, n'auoit autre soing fors de penser comment il employeroit sa belle ieunesse en poursuite Cheualeuse. Et pource que il luy sembloit que il n'en pouuoit assez faire ne prenoit aussi comme point de repos: Car aussi tost que il auoit acheué aucun bienfaict il en entreprenoit vn autre.

Si fut telle l'emprise que apres que il eut congé du Roy, il fit crier en plusieurs Royaumes & pays Chrestiens, c'est à sçauoir en Angleterre, en Espagne, en Arragon, en Alemaigne, en Italie, & ailleurs, Que il failloit sçauoir à tous Princes, Cheualiers, & Escuyers, que luy accompagné de deux Cheualiers, l'un appelé Messire Renault de Roze, l'autre le Seigneur de Sampy, tiendroient la place par l'espace de trente iours sans partir, si esloine raisonnable de la laisser ne leur venoit. C'est à sçauoir depuis le vingtiesme iour de Mars iusques au vingtiesme iour d'Auril, entre Calais & Boulongne, au lieu que l'on dict Sainct Tin le vert. Là seroient les trois Cheualiers attendans tous venans, prests & appareillez de liurer la iouste à tous Cheualiers & Escuyers qui les en requerroient, sans faillir iour, excepté les Vendredis. C'est à sçauoir vn chacun des dicts Cheualiers cinq coups de fer de glaive, ou de rochet à tous ceulx qui seroient ennemis du Royaume, qui de l'un ou de l'autre les requerroient, & à vn chacun autre, qui fut amy du Royaume qui demanderoit la iouste, seroit deliuré cinq coups de rochet. Ce Cry feut faict enuiron trois mois auant le terme de l'emprise, & le fit ainsi faire Boucicaut, affin que ceulx qui de loing y voudroient venir eussent assez espace, & que plus grandes nouuelles en feussent, par quoy plus de gens y veinssent. Quand le terme commença à approcher, Boucicaut preint congé du Roy, & s'en alla luy & ses compaignons en la dicte place, que on dict Sainct Tin le vert. Là fait tendre en

belle plaine son-pauillon qui fut grand bel & riche. Et aussi ses compagnons firent coster le sien tendre les leurs, chascun à part soy. Deuant les trois pauillons vn peu loignet auoit vn grand orme. A trois branches de cest arbre, auoit pendu à chacune deux escus, l'vn de paix, l'autre de guerre. Et est à sçauoir que mesmes en ceulx de guerre n'auoit ne fer ne acier, mais tout estoit de bois. Coste les escus, à chacune des dictes trois branches y auoit dix lances dressées, cinq de paix, & cinq de guerre. Vn cor y auoit pendu à l'arbre, & deuoit par le cry qui estoit faict, tout homme qui demandoit la iouste corner d'iceluy cor, & s'il vouloit iouste de guerre, ferir en l'escu de guerre, & s'il vouloit de rochet, ferir en l'escu de paix. Si y auoit chacun des trois Cheualiers faict mettre ses armes au dessus de ses deux escus, lesquels escus estoient peints à leurs deuises differemment. Afin que chacun peust congnoistre auquel des trois il demanderoit la iouste. Outre cest arbre auoit Messire Boucicaut faict tendre vn grād & bel pauillon, pour armer & pour retraire, & rafraischir ceulx de dehors. Si deuoit apres le coup feru en l'escu saillir dehors monté sur le destrier, la lance au poing & tout prest à poindre celuy en la targe duquel on auroit feru, ou tous trois, si trois demandans eussent feru és targes. Ainsi feit là son appareil moult grandement & tres-honorablement Messire Boucicaut, & feit faire prouisions de tres-bons vins, & de tous viures largement, & à plain, & de tout ce qu'il conuient si plantureusement comme

pour tenir table ronde à tous venans tout le dict temps durant, & tout aux propres despens de Boucicaut. Si peut-on sçauoir que ils n'y estoient mie feuls : Car belle compaignée de Cheualiers & de Gentils-hommes y auoit pour les accompagner, & aussi pour les seruir grand foison de mesnie. Car chascun des trois y estoit allé en grand estat. Si y auoit Heraults, Trompettes, & Menestriers assez, & autres gens de diuers estats. Et ainsi comme pouuez ouyr fut mis en celle besongne si bonne diligence, que toutes choses dés auant le temps de trente iours feurent si bien & si bel apprestées, que rien n'y conueint quand le dict iour de la dicte emprise feut venu. Adonc furent tous armez & prests en leurs pauillons les trois Cheualiers, attendans qui viendrait. Si fut Messire Boucicaut par especial moult habillé richement. Et pource que il pensoit bien que auant que le ieu faillist y viendrait foison d'estrangers, tant Anglois comme autre gent ; à celle fin que chacun veid que il estoit prest & appareillé s'il estoit requis d'aucun deliurer & faire telles armes comme on luy voudroit requerir & demander, prit adonc le mot que oncques puis il ne laissa, lequel est tel. **CE QVE VOVS VOULDREZ.** Si le fist mettre en toutes ses deuises, & là le porta nouvellement. Les Anglois, qui volontiers se peinent en tout temps de desauancer les François, & les surmonter en toutes choses s'ils peuuent, ouyrent bien & entendirent le cry de la susdicte honorable emprise. Si dirent la plus part & les plus grands d'en-

tre eulx que le ieu ne se passeroit mie sans eulx. Et n'oublierent pas dés que le dict premier iour fut venu à y estre à belle compaignée, mesmes des plus grands d'Angleterre, si comme cy apres on les pourra ouyr nommer. A celuy premier iour, ainsi comme Messire Boucicaut estoit attendant tout armé en son pauillon, & aussi ses compaignons es leurs, à tant eist veu venir Messire Jean de Holande frere du Roy Richart d'Angleterre, qui à moult belle compaignée tout armé sur le destrier, les Menestriers cornans deuant, s'en veint sur la place. Et en celuy maintien de moult haute maniere, presente grande foison de Gentils-hommes qui là estoient, alla le champ tout enuironnant. Et puis quand il eust ce faict il veint au cor, & corna moult haultement. Et apres on luy lassa son bâcinet qui fort luy fut bouclé : Adonc alla ferir en l'Escu de guerre de Boucicaut qu'il auoit bien aduisé. Apres ce coup ne tarda mie le gentil Cheualier Boucicaut, qui plus droiët que vn ionc sur le bon destrier, la lance au poing, & l'escu au col, les Menestriers deuant, & bien accompaigné des siens, vous sort de ce pauillon & se va mettre en rang. Et là bien peu s'arreste, puis baïsse sa lance & met en l'arrest, & poind vers son aduersaire qui moult estoit vaillant Cheualier, lequel aussi repoint vers luy. Si ne faillirent mie à se rencontrer, ains si tres-grands coups s'entredonnerent es targes, que à tous deux les eschines conueint ployer, & les lances volerent en pieces. Là y eut assez qui leurs noms haultement escrierent : Si prirent

leur tout, & nouuelles lances leur furent baillées, & derechief coururent l'un contre l'autre, & semblablement se entreferirent. Et ainsi parfirent leur cinquiesme coup, assistous de fer de glaiue, si vaillamment tous deux que nul n'y doit auoir reproche. Bien est à sçauoir que au quatriesme coup, apres que les lances furent volées en pieces, pour la grande ardeur des bons destriers qui fort couroient, s'entreheurterent les deux Cheualiers si grand coup l'un contre l'autre, que le cheual de l'Anglois s'accula à terre, & feust cheu sans faille si à force de gens il n'eust esté soustenu, & celuy de Boucicaut chancela, mais ne cheut mie. Apres ceste iouste, & le nombre des coups acheuez, se retirerent les deux Cheualiers és pauillons: mais ne fut mie là laissé à sejour moult longuement Boucicaut; Car d'autres y eut moult vaillans Cheualiers Anglois, qui semblablement comme le premier luy requirent la iouste de fer de glaiue, dont en celuy iour en deliura encores deux autres, & parfist ses quinze coups assis, si bien & si vaillamment que de tous il se departit à son très-grand honneur. Tandis que Boucicaut ioustoit, comme dict est, ne cuide nul que ses autres compaignons feussent oiseux, ains trouuerent assez qui les hastèrent de iouster, & tout de fer de glaiue. Si le firent si bel & si bien tous deux que l'honneur en fut de leur partie. Si ne sçay à quoy ie esloigneroye ma matiere pour deuiser l'affiette de tous les coups d'un chacun, laquelle chose pourroit tourner aux oyans à ennuy: mais pour tout dire en brief,

ic

ie vous dis que les principaulx qui iousterent à Boucicaut les trente iours durant, furent, premierement celui dont nous auons parlé, & puis le Comte d'Arli, qui ores se dict Henry Roy d'Angleterre, (lequel iousta avec dix coups de fer de glaïue : Car quand il eut iousté les cinq coups selon le cry, le Duc de Lancastre son pere luy escriuit que il luy enuoyoit son fils pour apprendre de luy. Car il le sçauoit vn tresvaillant Cheualier, & que il le prioit que dix coups voulust iouster à luy,) le Comte Mareschal, le Seigneur de Beaumont, Messire Thomas de Perci, le Seigneur de Clifort, le Sire de Courtenay, & tant de Cheualiers & d'Escuyers du dict Roy d'Angleterre que ils furent iusques au nombre de six vingt, & d'autres pays, comme Espaignols, Alemans, & autres, plus de quarante, & tous iousterent de fer de glaïue. Et à tous Boucicaut & ses compagnons parfeirent le nombre des coups, excepté à aucuns qui ne les peurent acheuer, par ce que ils furent blecez. Car là furent plusieurs des Anglois portez par terre, maîtres & cheuaulx, de coups de lances, & naurez durement. Et mesmement le susdict Messire Jean de Holande fut si blessé par Boucicaut que à peu ne feust mort, & aussi des autres estrangers. Mais le vaillant gentil Cheualier Boucicaut, & ses bons & esprouuez compagnons, Dieu mercy, n'eurent mal ne blessure. Et ainsi continua le bon cheualeux sa noble emprise par chacun iour iusques au terme de trente iours accomplis. Si en faillit à tresgrand honneur du Roy, & de la Cheualerie de

66 HISTOIRE DV MARESCHAL
France, & à si grand los de luy & de ses compaignons, que à tousioursmais en deura estre parlé. Et s'en partit de là Boucicaut avec les siens, & s'en retourna à Paris, où il fut tres-ioyeusement receu du Roy & de tous les Seigneurs, & aussi des Dames grandement festoyé & honoré. Car moult bien l'auoit defferuy.

CHAPITRE XVIII.

Comment Messire Boucicaut alla la troiesieme fois en Prusse, & comment il voulut venger la mort de Messire Guillaume de Douglas.

NE D E M E V R A mie longuement apres l'acheuement de la susdicte entreprise, que le Duc de Bourbon entreprist le voyage pour aller sur les Sarrafins en Barbarie, à moult grande armée. D'icelle allée eut moult grand ioye Boucicaut. Car ne cuida mie que ce deust estre sans luy : mais quand il en demanda congé au Roy il ne le voulut nullement laisser aller, dont moult grandement pesa à Boucicaut, & tel desplaisir en eut que il ne se voulut tenir en Cour, pour chose que le Roy luy deist. Si feit tant à toutes fins que il eut congé d'aller derechef en Prusse. Si partit apres le congé le plus tost qu'il peut, de peur que le Roy ne se r'ad-

uifast & ne le laiffast aller : mais quand il feut par delà il trouua qu'il n'y auoit point de guerre. Si delibera de demeurer au pays toute celle faifon pour attendre la guerre. Et tandis qu'il estoit là , ja y auoit si longuement attendu, que son frere Messire Geofroy, lequel on a nommé le ieune Boucicaut, qui estoit retourné de Barbarie avec le Duc de Bourbon, auquel voyage auoit esté plus de huiet mois, le veint là trouuer. Si s'entreferent les deux freres moult grande ioye ; Et ainsi comme Messire Boucicaut & son frere attendoient temps & faifon que la dicte guerre se feist, luy veint messaige de par le Roy, qui luy mandoit qu'il auoit en propos de faire certain voyage, si vouloit qu'il feust avec luy, & pour ce luy mandoit expressement, que tantost & sans delay s'en retournast vers luy. Ces nouuelles ouyes, Boucicaut, qui desobeir n'osa quoy que il luy en pesast, se mist au retour, si comme raison estoit, & tant erra pour venir tost deuers le Roy, que il estoit ja venu au pays de Flandres. Et comme il estoit à Bruxelles messaige luy vint de par le Roy, qui luy mandoit que par l'ordonnance de son Conseil il auoit changé propos, si luy remandoit qu'il estoit à sa volonté de s'en reuenir ou de tenir son voyage. Quand Boucicaut ouït ce il fut moult ioyeux, & s'en retourna dont il venoit. Et ainsi comme il s'en retournoit, & ja estoit à Konigsberg, aduint telle aduanture, que comme plusieurs estrangers feussét arriuez en la dicte ville de Konigsberg, lesquels alloient pour estre à la susdicte guerre, vn

vaillant Cheualier d'Escoffe appellé Messire Guillaume de Duglas, fut là occis en trahison de certains Anglois. Quand ceste mauuaistié fut sceüe, qui desplaire debuoit à tout bon homme, Messire Boucicaut, nonobstant que à celuy Messire Guillaume de Duglas n'eust eüe nulle accointance ; mais tout par la vaillance de son noble courage, pour ce que le faict luy sembla si laid qu'il ne deust estre souffert ne dissimulé sans vengeance, & pour ce que il ne veid là nul Cheualier ny Escuyer qui la querelle en voulust prendre, nonobstant qu'il y eust grand foison de Gentils-hommes du pays d'Escoffe, ains s'en taisoient tous, il fist à sçauoir & dire à tous les Anglois qui là estoient, que s'il y auoit nul d'eulx qui voulust dire que le dict Cheualier n'eust esté par eulx tué faulcement & traistreuement, que il disoit & vouloit soustenir par son corps que si auoit, & estoit prest de soustenir la querelle du Cheualier occis. A ceste chose ne voulurent les Anglois rien répondre, ains dirent que si les Escossois qui là estoient leur vouloient de ce aulcune chose dire que ils leur en respondroient : mais à luy ne voudroient rien auoir à faire ; Et ainsi demeura la chose, & Boucicaut s'en partit, & fut tout à point en Prusse à la guerre, qui fut la plus grande & la plus honorable que de long temps y eust eu. Car celle année estoit mort le hault Maistre de Prusse, & celuy qui de nouuel estoit en son lieu estably meit sus si grande armée qu'ils estoient bien deux cent mille cheuaux, qui tous passerent au Royaume de Lecto, où ils

frent grande destruction de Sarrafins, & y preindrent par force & de bel assault plusieurs forts chasteaux. Et en ceste besongne, pource que Messire Boucicaut veid que la chose estoit grande, & moult honorable & belle, & qu'il y auoit grande compaignée de Cheualiers & d'Escuyers, & de Gentilshommes, tant du Royaume de France, comme d'ailleurs, leua premierement banniere, & fist en celle besongne tant d'armes que tous l'en loüerent, & par l'entreprise de luy avec le hault Maistre de Prusse fut fondé & faict en celuy pays de Sarrafins au Royaume de Lecto, malgré leurs ennemis, & à force, vn fort & bel chastel en vne Isle, & nommerent le dict chastel en François le chastel des Cheualiers. Et demurerent sur le lieu le dict hault Maistre & Boucicaut accompaignez de belle compaignée de gens d'armes pour garder la place tant que il feust acheué, & apres s'en retournerent en Prusse.

CHAPITRE XIX.

*Comment Mestire Boucicaut fut faict
Mareschal de France.*



A T E M P S que Messire Boucicaut estoit en Prusse, comme dict est cy deuant, trespassa de ce siecle le Mareschal de Blainuille. Mais comme dict la Balade, Qui bien aime n'oublie pas son bon amy pour estre loing. Le bon Roy de

I iij

France, qui aimoit de moult grand amour, & aime encores & tousiours aimera Boucicaut, comme par plusieurs fois luy auoit demonsté, à celle fois de rechef grandement luy monstra. Car nonobstant que si tost que le Mareschal de Blainville fut trespassé, luy fut requis l'Office par plusieurs haults & grands Seigneurs, & nonobstant que Boucicaut ne fut mie présent, ains ne l'auoit veu ja auoit pres d'un an, ne l'oublia pourtant le bon noble Roy: ains delibera incontinent que autre ne l'auroit que luy. Et de faict luy manda hastiuement que tantost & sans delay il s'en retournast. Si vint si à point le messai-ge du Roy deuers Boucicaut, que il le trouua que ja il s'en retournoit du susdict voyage de Prusse. Si se hasta pour ces nouuelles encores plus de venir, & quand il fut approché de France il sceut que le Roy estoit adonc au pays de Touraine. Si tourna celle part, & tant erra que il le trouua en la Cité de Tours, & vint vers luy si à point que il estoit adonc au propre hostel où il mesme estoit né, & où son pere en son viuant demeuroit. Deuant le Roy se meit à genouils Boucicaut, & comme il debuoit humblement le salua. Quand le Roy le veid, ne conuient demander s'il luy fit grand chere: Car ne cuidez pas que de long temps nul Cheualier fust receu du Roy à plus grand feste. Si luy dict incontinent le Roy, Boucicaut, vostre pere demeura en cest hostel, & gist en ceste ville, & feustes né en ceste chambre, si comme on nous a dit. Si vous donnons au propre lieu où vous naquistes l'Office de vostre pere, &

pour vous plus honnorer, le iour de Noel qui approche, apres la Messe nous vous baillerons le baston, & ferons recevoir de vous le serment comme il est accoustumé. Boucicaut qui estoit encores à genoulx remercia le Roy humblement comme il debuoit faire. Et quand veint au iour de Noel seleva de matin Messire Boucicaut & se vestit moult richement. Là estoient ja venus grand foison de Cheualiers & Seigneurs ses parens & affins pour l'accompagner. Et quand temps & heure luy sembla s'en alla en moult noble appareil à la Messe devers le Roy. Quand la Messe fut chantée, le Duc de Bourbon qui moult l'aimoit, comme celuy que il auoit nourry, & duquel il auoit faict noble & bonne nourriture, le prist & le mena devers le Roy, & avec eux feurent plusieurs autres Seigneurs & Cheualiers qui l'accompagnerent. Deuant le Roy se mit à genoulx Boucicaut, & le Roy le receut tres-ioyeusement, & le reuestit de l'Office de Marechal en luy baillant le baston. Et là estoit le Duc de Bourgogne oncle du Roy, lequel pour luy faire plus grand honneur voulut luy mesme en recevoir le serment. Nonobstant que ce ne soit chose accoustumée que autre le recoiue que le Chancelier de France qui mesme là estoit. Là estoit present Messire Oliuier de Clisson pour lors Conestable de France, & Messire Jean de Vienne Admiral, & grand foison de Baronnie, qui tous dirent que le dict noble Office ne pouuoit estre en autre mieulx employé, & grand ioye en eurent, comme de celuy

qui le valoit & qui bien l'auoit defferuy. Et ainſi fut fait Boucicaut Mareſchal de France. Si fait à noter en ceſt endroit le grand bien de ceſtuy Cheualier, lequel ainſi qu'il eſt contenu és hiſtoires des cheualeux Romains, quand il aduenoit que aucun d'entre eulx eſtoit veu & apperceu dès ſon enfance plus que les autres enfans eſtre enclin en l'amour & poursuite d'armes, en continuant faits cheualeux par grande ardeur, tant & ſi vaillamment que meſmement en ieune aage euſt ja fait maintes choſes fortes & honorables, & touſiours continuaſt de mieulx en mieulx, on preſumoit & iugeoit-on par tels ſignes que tels enfans & iouuenceaux ſeroient en leur droit aage tres-vaillans hommes: Et pour ce les Romains ne laiſſoient point pour la grâde ieuneſſe d'iceux à les mettre és grands Offices de la Cheualerie, ſi comme les faire Ducs, Conneſtables, & Cheuetains de tres-grands oſts, nonobſtant que l'ordonnance commune ne feult de mettre hommes en tels Offices que ils n'euffent à tout le moins accompli trente ans: mais ceulx qu'ils veoient aduancez en excellence outre le commun cours de nature, ils les aduançoient auſſi en honneur outre les autres hommes. Et ce faiſoient-ils affin que ils feuffent plus auiuez & embraſez en l'amour & ardeur des armes de tant comme plus ſy verroient honnorer. Comme ils feirent de Pompée le tres-vaillant Cheualier, qui tant auoit ja fait de bien en ſon enfance & ieuneſſe, que ils le repouterent digne dès l'aage de vingt deux ans d'eſtre Conſul de Rome,

Rome, qui estoit Office comme nous dirions Duc & Connestable de la Cheualerie. A cest exemple, comme il me semble, fut faict le noble iouuencel Boucicaut, lequel tant auoit ja faict de bien par longue continuation dés son enfance tousiours multipliant en vertu & biensfaicts, que il feut reputé digne d'estre mis en si noble Office comme de Mareschal de France dés l'aage de vingt cinq ans, qu'il auoit sans plus accomplis lors que le Roy le reuestit du dict Office. Mais vrayement, nonobstant ce ieune aage ne descheut pas en luy l'honneur de si noble Estat. Car sa grand bonté, vaillance & vertu, exceda, passa & vainquit tous les mouuemens & inclinations de folle ieunesse. En telle maniere qu'il estoit plus meur en vertu & mœurs dés l'aage de vingt ans que plusieurs ne sont à cinquante. En laquelle grace & meureté a tousiours perseueré & perseuere multipliant en bien, si comme il appert par ses faicts, lesquels en continuant nostre matiere seront declarez cy apres.

CHAPITRE XX.

Comment le Mareschal Boucicaut alla avec le Roy à Boulongne au Traicté. Et la charge de gens d'armes que le Roy luy bailla apres pour aller en plusieurs voyages, & comment il prit le Roc du Sac.

K



PRES que le Roy eut estably Boucicaut son Mareschal, il s'en retourna à Paris, & le dict Mareschal avec luy. Si fut tout cest hyuer à sejour avec le Roy en ieux & esbatemens avec les Dames, qui de sa presence estoient ioyeuses. Car tout ainsi qu'il estoit propice & vaillant en faict d'armes, semblablement estoit tres-auenant & gracieux de toutes choses entre Dames & Damoiselles, & bien y sçauoit son estre, & pour ce estoit tres-aimé & bien venu. Si y auoit adoncques trefues entre François & Anglois, & pour ce vn peu plus longuement fut à sejour. Quand veint l'Esté d'apres, durant les dictes trefues le Roy tint vn Parlement à Amiens, & avec luy alla son frere le Duc d'Orleans, ses oncles le Duc de Berry, le Duc de Bourgongne & le Duc de Bourbon, & autres Seigneurs du sang Royal, & d'autres grand foison, & tous les Capitaines de France, c'est à sçauoir le Connestable de Clisson, le Mareschal de Sancerre, le Mareschal de Boucicaut, l'Admiral de Vienne, & avec ce belle compaignée de Seigneurs, & de Cheualiers & Escuyers. A Amiens deuers le Roy vindrent à parlement les Anglois, c'est à sçauoir le Duc de Lancastre à belle compaignée de Seigneurs & de Cheualiers, & d'Escuyers. Et là fut traicté de paix: mais adonc ne la conclurent mie. Si s'en retourna le Roy à Paris, & ne demeura pas moult longuement apres, que vn maltalent sourdit entre le Roy & le Duc de Bretaigne: parquoy le Roy feit grand man-

dement & assemblée de gens d'armes, & luy mesme en personne se meut pour aller sur luy. Si ordonna le Roy en celuy voyage au Marechal de Boucicaut grande charge de gens d'armes, c'est à sçauoir fix cent hommes d'armes sous luy, dont ils furent ioyeux d'estre sous tel Capitaine. Et pour le grand amour que les Gentils-hommes auoient à luy, & la grande opinion que ils auoient de sa bonté, furent plus d'autres quatre cent hommes d'armes, qui outre la susdicte charge se veindrent mettre sous luy, & s'en tenoient bien honnôrez. Et luy comme tres-saige Capitaine bien les sçauoit tenir & gouverner, en telle maniere que tous l'aimoient & craignoient. En celuy voyage le Roy bailla le gouvernement de la moitié du pays de Guyenne au dict Marechal, & ordonna que quand il auroit faict son emprise du voyage où il alloit, & qu'il s'en retourneroit en France, que le Marechal avec vne grande compaignée de gens d'armes s'en iroit en Auvergne mettre le siege deuant vn tres-bel & fort chastel appelé le Roc du Sac, que les Anglois auoient pris pendant les trefues. Le Roy à tout ceste belle compaignée de gens d'armes alla iusques au Mans, ne plus outre ne passa, pour maladie qui luy prist. Si fut ce voyage rompu; mais le Marechal au partir de là obtint le commandement du Roy, & s'en alla au plus tost qu'il peut en Auvergne mettre le siege deuant le dict chastel du Roc du Sac. Et si meit son siege en si belle ordonnance que tous l'en loüerent, & que il sembla bien que il estoit ja duit de son mestier. Si

76 HISTOIRE DV MARESCHAL
fist liurer dur assault au chastel par plusieurs iours,
car moult estoit forte place, & là fut faict de moult
belles armes. Et au dernier ne peut plus tenir le cha-
stel. Si se rendirent ceulx de dedans au Mareschal.
Et fut celle prise moult honorable: car grande def-
fence y trouuerent, parquoy conuint de tant plus
grand sens & force à en venir à chef.

CHAPITRE XXI.

*Comment le Mareschal alla en Guyenne,
& les forteresses qu'il y prit.*



AN apres que le Mareschal eut prins le
Roc du Sac, vindrent nouuelles au Roy
que les Anglois auoient pris au fufdict
pays d'Auuergne vne ville appellée le
Dompine. Parquoy le Roy ordonna que le Comte
d'Eu, qui lors estoit faict nouuel Conneftable, iroit
en Auuergne, & le Mareschal avec luy, & mene-
roient mille hommes d'armes pour mettre le fiege
deuant la dicte ville. Si se partirent du Roy le Con-
neftable & le Mareschal à tout leur compaignée, en
intention d'executer & mettre à effect ce qui leur
estoit commis de par le Roy. Et quand ils feurent
arriuez à Limoges, ils sceurent que le Mareschal de
Sancerre qui pour lors estoit au pays, auoit deliuré
par traicté la dicte ville de Dompine, & qu'il en
estoit à accord. Et pource le Conneftable & le

Mareschal , afin que les Anglois eussent honte de plus rompre les trefues , feirent venir deuant eulx tous les Capitaines Anglois qui au pays tenoient chasteaux & forteresses , & leur feirent promettre & iurer de loyaument tenir & garder les trefues : Et ces choses faictes s'en reueindrent en France. Mais l'an apres les Anglois , qui petit ont accoustumé de tenir ce qu'ils promettent , preindrent derechef sus les dictes trefues deux forteresses és marches de Xainctonge & d'Angoulesme , l'une appelée le Cor , & l'autre la Roche. Si les tenoit & gardoit contre le Roy vn appelé Parot le Biernois. Si fut ordonné par le Roy que le Mareschal iroit à tout cinq cent hommes d'armes pour les assieger : mais le Roy luy commanda que ainçois il allast à Bordeaux requerrir au Duc de Lanclastre qui là estoit , qu'il luy feist deliurer icelles forteresses qui sus les trefues auoient esté prises. Ce commandement bien reteint le Mareschal. Si s'en alla à tout sa compaignée droict à Bordeaux , & là trouua le Duc de Lanclastre qui le receut à moult grand honneur , & bonne chere luy fait. Le Mareschal luy fait bien & faigement sa requeste , disant comment ce pouuoit tourner à petit honneur aux Anglois d'ainsi rompre les trefues , & d'aller contre ce qui auoit esté promis & iuré , & que il luy feist rendre les forteresses qui sus les conuenances & en rompant les dictes trefues auoient esté prises. De ceste chose luy fait honnorable responce le Duc de Lanclastre , en luy disant que ce n'auoit esté fait mie de son consentement , ne que onques

n'en auoit rien sceu. Si luy en promettoit restitution plainiere, & en faire faire telle amende comme il luy plairoit. Si manda tantost à celuy Parot le Bernois que incontinent rendist les forteresses, & amandast les forfaitures, où il mesme l'iroit assieger. Si feurent tantost renduës les dictes forteresses, & restitué le dommaige. Et le Mareschal demeura toute celle saison au pays, où il se trouuoit souuent en celuy temps de trefues avec les Anglois, qui pour sa valeur moult l'honnoroient. Et là estoit parlé entre eulx souuentesfois de maintes armes & faicts de Cheualerie. Si s'en retourna apres deuers le Roy.

CHAPITRE XXII.

Cy commence à parler du voyage de Hongrie, comment le Comte d'Eu admonesta le Mareschal d'y aller.



APRES ces choses le voyage de Hongrie fut mis sus. Et pour ce que ce fut vne entreprise de grand renom, & dont plusieurs gens ont désiré & desirer sçauoir du faict toute la maniere & la pure verité de la chose, pour cause que en plusieurs manieres & differemment l'vne de l'autre on en deuise, me plaist & assez faict à nostre propos que ie deuise de long en long depuis le commencement iusques à la fin tout le contenu de la

verité d'iceluy voyage, & comment il meut premierement. Si est à sçauoir que le Comte d'Eu cousin prochain du Roy de France, auoit comme vaillant Cheualier qu'il estoit, & grand voyageur selon son ieune aage, ja esté en plusieurs parts auau le monde en maints honorables voyages. Entre les autres auoit esté en Hongrie, & le Marechal avec luy, si comme cy deuant auons compté. Si l'auoit le Roy de Hongrie moult honoré en son pays, & à luy faict grande amitié & maint signe d'amour. Pour laquelle alliance & affinité, le dict Roy de Hongrie luy manda & fit sçauoir par vn Herault que Bajazet venoit sur luy en son pays à bien quarante mille Sarrafins, dont les dix mille estoient à cheval, & les trente mille à pied. Si auoit deliberé de leur liurer la bataille. Et pour ce comme tout bon Chrestien & par especial tous vaillans nobles hommes doiuent desirer eulx trauailler pour la foy Chrestienne, & volontiers & de bon cœur aider à soustenir l'un l'autre contre les mescreans, il luy requeroit son aide, & aussi le prioit que il le feist à sçauoir au Marechal Boucicaut, en la bonté & vaillance duquel il auoit grande fiance, & ainsi le voulust annoncer à tous bons Cheualiers & Escuyers qui desiroient accroistre leur honneur & leur vaillance. Car moult estoit le voyage honorable, & aussi auoit grand besoing de leur secours & aide. Quand le Comte d'Eu eut ouy ces nouuelles, tantost il le dict au Marechal, lequel incontinent & de cœur delibera d'y aller. Si respondit que au plaisir de Dieu il iroit

80 HISTOIRE DV MARESCHAL
sans faille. Car à ce estoit-il meü pour trois raisons.
L'une pour ce que il desiroit plus que autre riens
estre en bataille contre Sarrafins. L'autre pour la
bonne chere que le Roy de Hongrie luy auoit faicte
en son pays. Et la tierce raison estoit pour le grand
amour que il auoit à luy qui entreprenoit le voyage,
& le plaisir que il auoit d'aller en la compaignée. Si
fut ceste chose tantost espanduë par tout, & tant alla
auant que le Duc de Bourgongne qui ores est & lors
estoit Comte de Neuers en ouyt parler. Adonc luy
qui estoit en fleur de grand ieunesse desirant suiure
la voye que les bons quierent, c'est à sçauoir hon-
neur de Cheualerie, considerant que mieulx ne se
pouuoit employer que de donner au seruice de
Dieu sa ieunesse, en trauaillant son corps pour l'ac-
croissement de la foy, desira moult d'aller en ceste
honorabile besongne. Et tant timonna son pere le
Duc de Bourgongne qui lors viuoit, qu'il eut congé
d'y aller. De ceste chose alla le bruit par tout, & pour
ce que adonc estoient trefues en France, pour laquelle
cause Cheualiers & Escuyers y estoient peu embe-
songnez des guerres, desirerent plusieurs ieunes Sei-
gneurs du sang Royal, & autres Barons & nobles
hommes à y aller, pour eulx tirer hors de oisueté, &
employer leur temps & leurs forces en faict de Che-
ualerie. Car bien leur sembloit, & vray estoit, qu'en
plus honorabile voyage & plus selon Dieu ne pou-
uoient aller. Si fut toute la France esmeüe de ceste
chose. Et pour les nobles Seigneurs & Barons qui y
alloient, à peine estoit Cheualier ne Escuyer qui
puissance


puissance eust qui n'y desirast aller. Et des principaux qui furent de ceste emprise dirons les noms & le nombre des François. Le premier & le chef de tous feut le Comte de Neuers qui ores est Duc de Bourgongne, cousin germain du Roy de France, Monseigneur Henry & Monseigneur Philippes de Bar freres, & cousins germains du Roy, le Comte de la Marche, & le Comte d'Eu Connestable, cousins du Roy. Des Barons le Seigneur de Coucy, le Marechal de Boucicaut, le Seigneur de la Trimouille, Messire Iean de Vienne Admiral de France, le Seigneur de Heugueville, & tant d'autres Cheualiers & Escuyers, toute fleur de Cheualerie & de noble gent, que ils furent en nombre bien mille du Royaume de France. Si faiet icy à noter le grand couraige & bonne volonté que les vaillans François ont tousiours eu & ont en la noble poursuite d'armes, pour lequel honneur acquerir n'espargnent corps, vie, ne cheuance. Car il est à sçauoir que non obstant que ils eussent faiet le Comte de Neuers leur chef, si comme raison estoit; si y alloit chacun à ses propres despens, excepté les Cheualiers & Escuyers qui y alloient soubz les Seigneurs & Barons pour les accompagner & pour leur estat. Et entre les autres le Marechal de Boucicaut y mena à ses despens soixante dix Gentils-hommes, dont les quinze estoient Cheualiers ses parens, C'est à sçauoir Messire le Barrois, Messire Iean & Messire Godemart de Linieres, Messire Regnaud de Chauigny, Messire Robert de Milli, Messire Iean Degre-

L

82. HISTOIRE DV MARESCHAL
uille, & autres, iusques au nombre dessus dict. Et
semblablement les autres Seigneurs en menerent,
& par especial le Comte de Neuers y mena belle
compagnée de Gentils-hommes de l'hostel de son
pere & des siens.

CHAPITRE XXIII.

*Comment le Comte de Neuers, qui ores est Duc
de Bourgongne, voulut aller au voyage de
Hongrie, & comment il fut faict Che-
uetaine de toute la compaignée des
François qui là allerent.*

 VAND le Comte de Neuers & les au-
tres Seigneurs & Barons eurent tres-bien
appresté, leur erre ils prirent congé du
Roy, de la Roynie & de nos Seigneurs,
& de leurs peres & parens. Si croy bien que assez y
eut pitié au departir des pleurs & des plaints de leurs
prochains, & des meres & femmes, sœurs & paren-
tes. Et n'estoit mie sans cause. Car moult estoit le
voyage perilleux comme bien y a paru, & si elles
eussent sceu les dures nouvelles qui leur en estoient
à venir, ie ne croy mie que à de telles y auoit le cœur
ne fust party. Si feut piteuse la departie à ceulx qui
puis ne retournerent. A tant se meit le Comte de
Neuers en voye à toute sa belle compaignée, & tant
erra par l'Alemaigne, & puis par Austriche, qu'il

arriva au Royaume de Hongrie. Tantost allerent les nouvelles au Roy qui estoit adonques en la cité de Bude , comment le Comte de Neuers à tout moult noble compaignée des Seigneurs de la fleur de lys, & d'aultres haults Barons & bonne gent venoit à son aide. De ceste nouvelle fut moult ioyeux le Roy, & le plus tost qu'il peut veint à l'encontre à tout moult grande compaignée de gent ; Car ja auoit faict moult grand amas de gens d'armes, tant d'estrangers comme de ceulx de son pays. Tant alla le Roy qu'il rencontra le Comte de Neuers. Quand le Roy fut approché de luy moult fait grande reuerence au dict Comte & à tous ceulx du sang Royal, & aux autres Barons, & tous receut à grand ioye & honneur. Si les mena en la cité de Bude, où grandement les honnora & aisa de tout ce que il peut. Si n'eurent pas esté là moult de iours à sejour, quand le Roy de Hongrie par la volonté & assentement des Seigneurs François qui fors la bataille ne desiroient, fait ses ordonnances, & les gens meit en array bien & bel, & côme qu'il affiert en tel cas. Et peu de iours apres se meit sur les champs pour aller au deuant des Sarrafsins lesquels on luy auoit dict que ils approchoiēt. Et quand il feut dehors, trouua que nos François & les autres estrangers, & les siens propres qu'il auoit avec luy, montoient bien à cent mille cheuaulx. A l'issuë du Royaume de Hongrie vindrent au fleuve que on nomme le Danube, si le passerent à nauires. Outre ceste riuiera auoit vne grosse ville fermée que on nommoit Baudins, qui se tenoit

84 HISTOIRE DV MARESCHAL
pour les Turcs, si la voulurent nos gens assaillir.
Deuant ceste ville feut faict le Comte de Neuers
Cheualier, aussi le Comte de la Marche & plusieurs
autres. Le lendemain qu'ils feurent arriuez prirent
à combattre la dicte ville par grande ordonnance.
Mais aussi tost que l'assault feut commencé faillit
dehors le Seigneur du pays, lequel estoit Chrestien
Grec, & par force auoit esté mis en la subjection des
Turcs, & veint rendre luy, la ville & tout son pays
au Roy de Hongrie, & luy deliura tous les Turcs qui
estoint dedans la forteresse.

CHAPITRE XXIV.

*De plusieurs villes que le Roy de Hongrie prist
sur les Turcs, par l'aide des bons François:
Et comment le vaillant Mareschal
Boucicaut entre les autres bien
s'y porta.*



PRES que la ville de Baudins eut esté
prise comme dict est, se partit de là le
Roy de Hongrie à tout son ost, & s'en
alla deuant vne autre ville appelée
Raco. Mais si tost que le Comte d'Eu
& le Mareschal de Boucicaut sceurent que le Roy
auoit deliberé d'aller là, ils feirent vne emprise pour
y estre des premiers. Si allerent avec eulx plusieurs
grands Seigneurs, c'est à sçauoir Messire Philippes

de Bar, le Comte de la Marche, le Seigneur de Coucy, le Seneschal d'Eu & plusieurs autres, & cheuaucherent toute nuit tant qu'ils y feurent le matin. Mais si tost que les ennemis les veirent approcher ils issirent dehors en grand quantité pour aller rompre vn pont gisant qui estoit par dessus vn grand fossé, qui deffendoit que nul ne peust venir pres des murs ny de la closture de la dicte ville. Et estoit celuy fossé si tres-profond que en nulle maniere on ne le pouuoit passer fors par sus iceluy pont. Si arriuerent là nos gens qui se hastoient d'aller auant que les Sarrafins peussent estre à temps à despecer le pont. Si s'entrecoururent sus en celle place, & nos gens les enuahirent de grand vigueur, qui moult y feirent de belles armes. Car les Sarrafins taschoient tousiours à venir rompre le pont, & auoient faict vne telle ordonnance, que tandis que vne partie d'entre eulx maintiendroit la bataille les autres iroient despecer le dict pont: mais tout ne leur valut rien. Car le vaillant Mareschal demanda au Comte d'Eu, pour ce que il estoit premier chef d'icelle emprise, la garde du dict pont, qui forte chose estoit à garder, & difficile pour la grande quantité de Sarrafins qui tousiours y arriuoient: & il luy bailla. Si le garda si vaillamment luy & ses gens que Sarrafins n'eurent pouuoir d'en approcher, & moult y feit le Mareschal de belles armes par plusieurs fois. Car souuent repoussoit les Sarrafins par viue force dedans leur ville, & puis derechef ils issaient dehors. Mais il leur estoit derechef à l'encontre, par telle

vertu que ils ne pouuoient souffrir la bataille , &
 r'aller les en conuenoit. Et à bref parler de ce que il
 feit là endroict , sans faille tellement y ouura que il
 monstra bien , si comme autresfois auoit faict , que
 il estoit vn tres-vaillant & esprouué Cheualier. Le
 Comte d'Eu & les autres Barons François qui avec
 luy estoient , qui se combatoient à l'autre partie des
 Sarrafins comme dict est , tant y feirent & tant y
 chappelerent , & tant bien s'y porterent que par
 force rebouterent les Sarrafins en leur ville & moult
 en occirent. Celle iournée arriua le Roy de Hongrie
 à tout son ost celle part , & tanrost prist à mettre ses
 gens en ordonnance pour assaillir la ville. Quand le
 Marechal Boucicaut veid ce , il enuoya tantost de
 ses gens en vn lieu pres d'illec , où il y auoit de beaux
 arbres , & feit faire deux grandes eschelles : & quand
 il veid la grand flotte des gens d'armes venir pour
 aller assaillir la ville , adonc dit-il à ses gens , Certes ,
 dit-il , grand honte nous seroit si autres gens pas-
 soient ce pont deuant nous qui l'auons eu en garde.
 Or sus mes tres-chers compaignons & amis , faisons
 tant en ceste besongne que il soit renom de nous.
 A tant sans plus dire se meit deuant , & tous les gens
 le suiuirent de bonne volonté : Si s'alla mettre au
 plus pres du mur , & là furent apportées les eschelles
 que il auoit faict faire. Si commença l'assault luy &
 les siens auant que autres gens y veinssent. Si veissiez
 là faire merueilles d'armes : car la grande hardiesse
 que ces bonnes gens prenoient es biens faicts de
 leur conduiseur les faisoit abandonner cōmelyons ,

& pour la grande ardeur que ils auoient de monter contre mont les murs, ils chargeoient tant les eschelles que à peu ne brisoient. Si estoit la bataille là moult grande de ceulx de dehors qui estriuoient à monter sur les murs, & de ceulx de dedans qui leur chalangoient vigoureusement. Si s'entrélançoient de merueilleux coups, dont moult en y auoit de morts & d'affolez d'un costé & d'autre: Toutesfois feirent tant Sarraïns que ils froisserent vne des eschelles des grands fais des pierres que ils lançoient contre val. Et sur l'autre fut monté Hugues de Cheuenon qui portoit le panó du Mareschal, qui moult vigoureusement se combatit. Mais tant le presserent les Sarraïns que ils luy arracherent le dict panon d'entre les poings, & à la fin renuerferent luy & l'eschele contreual, où il fust moult froissé: mais tost y eut qui le tira hors de la presse. Si fut là l'assault grand & merueilleux. Là y estoient arriuez les autres François, & le Roy de Hongrie à tout son grand ost. Si dura ainsi tout le iour iusques à ce que la nuit les departit. Et si le Mareschal y auoit esté des premiers, aussi feut-il des derniers retraits. Et tant y feir d'armes celle iournée, que de luy & de son faict furent grandes & honorables nouvelles, & aussi de ses bonnes gens qui tant bien s'y porterent que nulles gens mieulx ne peussent. Mais nonobstant que le bon Mareschal & ses gens feussent si foulez que à peu n'en pouuoient plus, ne cuidez mie que pourtant s'allassent reposer; ains quand tous furent passez se teint à garder le susdict pont que les ennemis

ne le veinssent despecer. Et si croyez fermement vous qui ce oyez, que nul n'auoit enuie de luy oster cest office, ny de prendre la garde du dict pont. Le lendemain que nos gens cuiderent retourner à l'assault, ceulx qui estoient dedans, qui estoient la plus grande partie Chrestiens Grecs, veirent bien que nonobstant que fust leur ville moult forte, que ils ne se pourroient au dernier garder, se rendirent au Roy de Hongrie sauues leurs vies & leurs biens. Et le Roy qui eut conseil que le mieulx estoit de les y prendre que ce que il meist plus en peril ses gens, & aussi veu que ils estoient Chrestiens, les receut à celle conuenance. Si feut estably le Marechal pour les garder que nulle offense ne leur feust faicte. Si entra dedans la ville à tout ses gens, & si bien fit son debuoir de les garder que rien ne leur fut meffaiet. Et iceulx Chrestiens baillerent tous les Turcs qui estoient dedans au Roy de Hongrie, qui tous les fait mourir. Ceste chose acheuée, se partit le Roy pour aller mettre le siege deuant Nicopoli, qui est vne moult forte ville, & en allant à ce siege, le Marechal, qui le cœur n'auoit à autre chose fors à tousiours greuer les Sarrafins, sçauoit par ses espies les embusches & les retraits où Sarrafins par routes & par troupeaux repairoient, & se mettoient en embusches, pour cuider courir sus aux nostres. Mais le vaillant Marechal par son sens & par son aguet leur estoit sur le col auant que ils s'en donnassent de garde, & par telle maniere leur porta de grands domaiges par plusieurs fois, & moult en occirent luy
& les

& les siens. Et semblablement feit le Comte d'Eu & nos autres Barons François, qui tant bien firent tous iusques alors & tant monstrent leurs prouesses, que le Roy de Hongrie & tous ceulx de sa partie en estoient d'autant enhardis, & leur en estoit creu le couraige, que ils ne doubtoient tout le monde. Helas, si fortune ne leur eust nuit bien pourroient encores benir l'heure & le iour que telle noble compaignée de François leur estoit venuë. Mais comme fortune est souuent coustumiere de nuire aux bons & aux vaillans, sembla que elle eust enuie du grand bien & de l'excellente vaillance qui estoit en eulx. Hé qui est-ce qui se puisse garder de male fortune quand elle veut courir sus & nuire à qui que ce soit? Bien en sçait trouuer les tours. Ne s'en peut mie garder iadis Hercules le fort quand il vestit la chemise enuenimée dont il ne se donnoit de garde. Ny ne se plainit mie moins de fortune le preux Hector qui tant auoit faict de Cheualeries, quand Achilles par derriere le veint ferir & le ietta mort. Ny Troye la grand cité ne cuidoit point que fortune tant au bas la sceust mettre comme elle la meit. Alexandre le grand qui osa enuahir tout le monde, ne feut-il pas par elle en vn seul moment rué jus? Hannibal grand Empereur de Carthage ne te peux-tu plaindre de ceste faulse Deesse? Ne se ioüa-elle pas bien de toy à la pelote quand elle te meit si hault que tu surmontas, vainquis & subjuguas la grand force des Romains, & que tu ne redoutois tout le monde, puis apres quand elle t'eust accueilly, en haine elle te

M

alla minant par plusieurs malheurs, & tant que elle te conduisit au poinct que il n'estoit nul homme plus pauvre que toy? Car avec ce que tout auois perdu, il n'y auoit lieu ny place sur terre où tu osasses ne peusses à seur heberger, & en fin à tant te mena la desloyale que tu feus contrainct par desespoir de toy mesme occire par dur venin. Que dirons-nous de Pompée le tres-excellent Prince Romain, lequel après que il eut conquis vne grande partie du monde, cheut tellement és durs lacs de fortune, que au dernier feut contrainct fuir miserablement à refuge au Roy Ptolomée d'Egypte, que il cuidoit estre son amy, pour ce que il l'auoit remis par sa puissance au droict de son Royaume? Mais ce fut bien fortune qui là le conduit. Car le desloyal Roy ingrat traistreuusement le feut occire. Ha fortune, fortune, trop fol est cil qui ne redoubte la mutabilité de tes doubles visaiges, & qui tousiours te cuide tenir en esgale beauté. Car en peu d'heure souuentesfois se change la prosperité en quoy tu sçais les hommes hault exaucer.

CHAPITRE XXV.

De la fiere bataille que on diët de Hongrie, qui feut des Chrestiens contre les Turcs.



REVENIR à ma matiere, quand le Roy de Hongrie avec son ost feut arriué deuant la ville de Nicopoli, il se logea par grande ordonnance, & tantost feit commencer deux belles mines par deffoubs terre, lesquelles feurent faictes & menées iusques à la muraille de la ville. Et feurent si larges que trois hommes d'armes pouuoient combattre tout d'un front. Si demeura à celuy siege bien quinze iours. En ces entrefaictes les Turcs ne muse-
rent mie: ains feirent tres-grand appareil pour courir sus au Roy de Hongrie. Mais ce feut si celément que oncques le Roy n'en sceut rien. Et ne sçay s'il y eut trahison en ses espies, ou comment il en alla: Car combien que il eust estably assez de gens pour bien prendre garde au dessein des Sarrazins, n'en auoit-on ouy nouuelles iusques à celuy quinziesme iour que il auoit esté au siege, pour laquelle cause ne se donnoit d'eulx nulle garde. Quand veint le seiziesme iour iusques à l'heure de disner, veindrent messaiges batans au Roy dire que Bajazet avec ses Turcs estoit à merueilleusement grande armée si pres d'illec, que à peine seroient iamais à temps armé son ost & ses batailles mises en ordonnance. Quand le Roy qui estoit en son logis ouyt ces nouuelles il feut moult esbahi. Si manda hastiuement par les logis que chascun s'armast & saillist hors des logis. Si pouuez sçauoir que en peu d'heure feut cel ost moult esmeu. Chascun y courut aux armes qui mieulx mieulx. Ia estoit le Roy aux champs quand

M ij

on veint dire au Comte de Neuers qui seoit à table,
 & aux François, que les Turcs estoient au plus pres
 de là, & que le Roy estoit tout hors des logis en
 plains champs en ordonnance pour liurer la batail-
 le. De ce se debuoient tenir aulcunement mal con-
 tents le Comte de Neuers & les Seigneurs François
 que plus tost ne leur auoit le Roy mandé; mais en-
 cores me doute que il leur face plus mauuaistour.
 Celle nouuelle ouye tantost faillit le Comte de Ne-
 uers & les siens en pieds, & vistement s'armerent.
 Si monterent à cheual & se meirent en tres-belle
 ordonnance, & ainsi allerent deuers le Roy que ils
 trouuerent ja en tres-belle bataille & bien ordon-
 née, & ja pouuoient veoir deuant eulx les bannie-
 res de leurs ennemis. Et est à sçauoir sur ce pas cy,
 que sauua la grace des diseurs qui ont dict & rappor-
 té du faict de la bataille, que nos gens y fuirent, &
 allerent comme bestes sans ordonnance, puis dix,
 puis douze, puis vingt, & que par ce feurent occis
 par troupeaux au feur que ils venoient, que ce n'est
 mie vray. Car comme ont rapporté à moy qui apres
 leurs relations l'ay escript, des plus notables en vail-
 lance & Cheualiers qui y feussent, & qui sont dignes
 de croire, le Comte de Neuers & tous les Seigneurs
 & Barons François, avec tous les François que ils
 auoient menez, arriuerent deuers le Roy tout à
 temps pour eulx mettre en tres-belle ordonnance,
 laquelle chose ils feirent si bien & si bel que à tel cas
 appartient. Et la banniere de nostre Dame que les
 François ont accoustumé de porter en bataille,

bailla le Comte à porter à Messire Jean de Vienne Admiral de France, pour ce que il estoit le plus vaillant d'entre eulx, & qui plus auoit veu: & feut mis au milieu d'entr'eulx comme il debuoit estre. Et de toutes choses tres-bien s'habillerent comme faire on doit en tel cas. Les Turcs d'autre part ordonnerent leurs batailles, & se meirent en tres-belle ordonnance à pied & à cheual: & feirent vne telle cautele pour deceuoir nos gens. Tout premierement vne grande tourbe de Turcs qui à cheual estoient se meirent en vne grand bataille tout deuant leurs gens de pied, & derriere ces gens à cheual, entre eulx & ceulx de pied, feirent planter grande foison de pieux aigus que ils auoient faict apprestre pour ce faire. Et estoient ces pieux plantez en biaillant, les pointes tournées deuers nos gens, si hault que ils pouuoient aller iusques au ventre des cheuaux. Quand ils eurent faict cest exploict, où ils ne meirent pas grand piece: car assez auoient ordonné gens qui de les ficher s'entremettoient, nos gens qui le petit pas ferrez ensemble alloiēt vers eulx estoient ja approchez. Quand les Sarrafins les veirent assez pres, adonc toute celle bataille de gens à cheual se tourna ferrée ensemble comme si c'eust esté vne nuée derriere ces pieux, & derriere leurs gens de pied que ils auoient ordonnez en deux belles batailles si loing l'vne de l'autre que ils meirent vne bataille de gens à cheual entre les deux de pied, en laquelle pouuoit auoir enuiron trente mille archers. Quand nos gens feurent approchez d'eulx, & qu'ils cuide-

rent aller assembler, adonc commencerent les Sar-
 rasins à traire vers eulx par si grand randon, & si
 drument, que oncques gresil ne goute de pluye ne
 cheurent plus espoissément du ciel que là cheoient
 flesches, qui en peu d'heure occirent hommes &
 cheuaux à grand foison. Quand les Hongres qui
 communément, si comme on dict, ne sont pas
 gens arrestez en bataille, & ne sçauent greuer leurs
 ennemis, si n'est à cheual traire de l'arc deuant &
 derriere tousiours en fuyant, veirent ceste entrée de
 bataille, pour peur du trait commencerent vne
 grande partie d'eulx à reculer, & eulx traire en sus
 comme lasches & faillis que ils feurent. Mais le bon
 Mareschal de France Boucicaut, qui ne veoid mie
 derriere luy la lascheté de ceulx qui se retrayoient,
 ce qu'il n'eust cuidé en piece, ny aussi ne veoid pas
 deuant eulx & au plus pres les pieux aigus qui là ma-
 licieusement estoient plantez, va dire & conseiller
 cōme preux & hardy qu'il estoit, Beaux Seigneurs,
 dit il, que faisons-nous icy, nous lairrons nous en
 ceste maniere larder & occire laschement? Et sans
 plus faire assemblons viftement à eulx, & les requie-
 rons hardiment & nous hastons, & ainsi escheue-
 rons le trait de leurs arcs. A ce conseil se teint le Com-
 te de Neuers à tout ses François, & tantost pour as-
 sembler aux Sarrasins frapperent auant & se emba-
 tirent incontinent entre les pieux dessus dictz qui
 fort estoient roides & aigus, si qu'ils entroient es
 pances des cheuaux, & moult occirent & mehai-
 gnerent des hommes qui des cheuaux cheoient.

Si feurent là nos gens moult empestrez , & toutes-
fois passerent oultre. Mais ores oyez la grande mau-
uaistié , felonnie & lascheté des Hongres , dont le
reproche sera à eulx à tousiours. Si tost qu'ils veirent
nos gens encheuestrez és pieux , & que traict ne au-
tre chose ne les gardoit que ils n'allassent courir sus
aux Turcs , adonc tout ainsi que nostre Seigneur
feut delaissé de sa gent si tost qu'il feut és mains de
ses ennemis , ne plus ne moins tournerent les Hon-
gres le dos & prirent à fuir. Si qu'il ne demeura onc-
ques avec nos gens de tous les Hongres fors vn grád
Seigneur du pays que on appelle le grand Comte
de Hongrie & ses gens , & les autres estrangers qui
estoient venus de diuers pays pour estre à la bataille.
Mais peu estoient contre si grande quantité. Mais
ne croyez que pourtant ils reculassent ne gauchis-
sent , ains tout ainsi comme le sanglier quand il est
atainct , plus se fiche auant tant plus se sent enuahy ,
tout ainsi nos vaillans François vainquirent la force
des pieux & de tout , & passerent oultre comme
courageux & bons combatans. Ha noble contrée
de François , ce n'est mie de maintenant que tes
vaillans champions se monstrent hardis & fiers en-
tre toutes les nations du monde. Car bien l'ont de
coustume dés leur premier commencement. Com-
me il appert par toutes les Histoires qui des faicts de
batailles où François ayent esté font mention , &
mesmement celle des Romains & maintes autres
qui certifient par les espreuves de leurs grands faicts
que nulles gens du monde oncques ne feurent trou-

96 HISTOIRE DV MARESCHAL
uez plus hardis ne mieulx combatans, plus constans
ne plus cheualeureux que les François. Et peut trouue
l'on de batailles où ils ayent esté vaincus que ce n'ait
esté par trahison, ou par la faute de leurs Cheuetains
& par ceulx qui les debuoient conduire. Et encores
osay-ie plus dire de eulx, que quand il aduient que
ils ne s'employent en faicts de guerre & que ils sont
à sejour que ce n'est mie leur coulpe: ains est la faulte
de ceulx à qui appartiendroit à les embesongner. Si
est dommaige quand il aduient que gent tant che-
ualeureuse n'ont chefs selon leur vaillance & har-
dieffe. Car choses merueilleuses feroient. Mais à re-
uenir à mon propos, les nobles François, comme
ceulx qui estoient comme enragez de la perte que
ja auoient faicte de leurs gens, tant du traict des Sar-
rasins, comme à cause des pieux, leur coururent sus
par si grand vertu & hardieffe que tous les espou-
uenterent. Si ne fault mie à parler comment ils feri-
rent sur eulx. Car oncques sanglier escumant ny
loup enragé plus fierement ne se abandonna. Là
feut entre les autres vaillans le preux Mareschal de
France Boucicaut qui se fichoit és plus drus, & s'il
eut deuil bien leur demonstroir. Car sans faille tant
y faisoit d'armes que tous s'en esmerueilloient, & si
durement s'y conteint, & tant y feit de Cheualerie
& d'armes diuerses, que ceulx qui le veirent dient
encores que l'on ne veid oncques nul Cheualier ny
autre quel qu'il feust faire plus de bien & de vaillan-
ces pour vn iour que il feit à celle iournée. Aussi feit
bien le noble Comte de Neuers qui chef estoit des
bons

bons François, qui tant bien s'y portoit que à tous les siens donnoit exemple de bien faire. Le vaillant Comte d'Eu ne s'y faignoit mie, ains departoit les grands presses auant & arriere. Si faisoient les nobles freres de Bar, qui de leur ieunesse qui encores grande estoit, moult s'y conteindrent vaillamment. Et le Comte de la Marche, qui le plus ieune estoit de tous, ne encores n'auoit barbe, y combatoit tant assurement que tous l'en priserent. Là estoit le vaillant Seigneur de Coucy, Cheualier esprouué, qui toute sa vie n'auoit finé d'armes suiure, & moult estoit de grand vertu. Si demonstroit là sa proüesse, & bien besoing en estoit. Car Sarrafins à grand massues de cuiure que ils portent en bataille, & à gisarmes, souuent luy estoient sur le col. Mais leurs collées leur faisoit achepter. Car luy qui estoit grand & corsu, & de grand force, leur lançoit si tres-grands coups que tous les destranchoit. Le cheualeureux Admiral de France restoit d'autre part, qui n'en faisoit mie moins. Le Seigneur de la Trimouille qui à merueilles estoit beau Cheualier, vaillant & bon, faisoit souuent Sarrafins titer en fus. Iceulx Barons & esprouuez Cheualiers, & de grand vertu, reconfortoient & donnoient hardiesse de fait & de parole aux nobles iouuenceaux de la fleur de lys qui là se combatoyent non mie comme enfans, mais comme si ce feussent tres-endurcis Cheualiers. Et besoing leur en estoit. Car tousiours croissoit sur eulx la presse & la foule. Les autres vaillans Cheualiers & Elcuyers François tant bien s'y portèrent que onc-

N

ques nulles gens mieulx ne le feirent. Si feit le grand Comte de Hongrie & tous les siens, à qui moult desplaisoit de la laide & honteuse departie que les Hongres auoient faicte. Aussi moult l'y efforcerent tous les autres estrangers. Helas! mais que leur valoit ce? Vne poignée de gens estoient contre tant de milliers. Car si peu estoient que ils ne pouuoient occuper fors seulement le front de l'une des susdictes batailles, où il y auoit de gens plus de trois contre vn d'eulx. Et toutesfois par leur tres-grand force, vailance & hardiesse, desconfirent icelle premiere bataille, où moult en occirent. Pour laquelle chose Bajazet feut tellement espouuenté que luy ne sa grand bataille de cheual n'oserent assaillir les nostres, ains s'enfuyoit tant qu'il pouuoit luy & les siens, quand on luy alla dire que les François n'estoient que vn petit de gens qui là ainsi se combattoient, & n'auoient aide de nuls. Car le Roy de Hongrie à toute sa gent s'en estoit fuy & les auoit laissez, si seroit grand honte à luy d'ainsi fuir à tout si grand ost deuant vne poignée de gens. Quand Bajazet ouït ce, adonc retourna à tout moult grande quantité de gens qui frais estoient & reposez. Si coururent sus à nos gens qui ja estoient foulez, natures, lassez, & n'estoit mie de merueilles. Quand le bon Mareschal veid celle enuahie, & que ceulx qui les debuoient secourir les auoient delaisé, & que si peu estoient entre tant d'ennemis, adonc cogneut bien que impossible estoit de pouoir resister contre si grand ost, & qu'il conuenoit que le meschef

tournast sur eulx. Lors feut comme tout forcené, & dict en luy mesme que puisque mourir avec les autres luy conuenoit que il vendroit chere à ceste chiennaille sa mort. Si fiert le destrier des esperons, & s'abandonne de toute sa vertu au plus dru de la bataille, & à tout la tranchante espée que il tenoit fiert à dextre & à senestre si grandes collées que tout abatoit de ce qu'il atteignoit deuant soy. Et tant alla ainsi faisant deuant luy que tous les plus hardis le redouterent & se prirent à destourner de sa voye: mais pourtant ne laisserent de luy lancer dards & espées ceulx qui approcher ne l'osoient, & luy comme vigoureux bien se sçauoit deffendre. Si vous poignoit ce destrier qui estoit grand & fort, & qui bien & bel estoit armé au milieu de la presse, par tel randon qu'à son encontre les alloit abatant. Et tant alla ainsi faisant tousiours auant, qui est vne merueilleuse chose à racompter, & toutesfois elle est vraye, comme tesmoignent ceulx qui le veirent, que il transpercea toutes les batailles des Sarrafins, & puis retourna arriere parmy eulx à ses compaignons. Ha Dieu quel Cheualier! Dieu luy sauue sa vertu. Dommage sera quand vieluy faudra. Mais ne sera mie encores, car Dieu le gardera. Ainsi se combati-rét nos gens tant que force leur peut durer. Ha quelle pitié de tant noble compaignée, si esprouuée gent, si cheualeureuse, & si excellente en armes, qui ne peut auoir secours de nulle part, ains cheurent en la gueule de leurs ennemis, si comme est le fer sur l'enclume. Car tous les enuironnerent

& enuahirent de toutes parts si mortellement que plus ne se peurent deffendre. Et quelle merueille! Car plus de vingt Sarrafins estoient contre vn Chrestien. Et toutesfois en occirent nos gens plus de vingt mille: mais au dernier plus ne peurent forçoyer. Ha quel dommaige & quelle pitié! Ne deust-on pendre les desloyaux Chrestiens qui ainsi faulsement les abandonnerent? Que male honte leur puisse venir: Car si de bonne volonté eussent aidé aux vaillans François & à ceulx de leur compaignée, il n'y feust demeuré Bajazet ny Turc que tout n'eust esté mort & pris, qui grand bien eust esté pour la Chrestienté. Si feurent là morts & occis de ceste chiennaille la plus grâde partie des Chrestiens. Et des Barons le Seigneur de Coucy, dont moult feut grand dommaige. Car vaillant Cheualier, saige & esprouué estoit. Aussi feut l'Admiral & maints autres. Mais nos Seigneurs du sang de France, & la plus grande partie des Barons, & plusieurs Cheualiers & Escuyers. feurent retenus prisonniers, qui avant ce moult vigoureuement se combatirent. Entre lesquels le Mareschal, lequel comme celuy qui tenoit sa vie pour perduë, & cher la vouloit vendre, auoit faict entour luy à force de coups si grand cerne de morts & d'abatus que nul ne l'osoit approcher pour le prendre. Car commelyon forcené qui rien ne redoubte sembloit que il feust entre eulx. Pour laquelle chose moult y eurent grand peine, & plusieurs des Sarrafins y conueint mourir auant qu'il peust estre pris: mais au dernier tant le presserent qu'à force avec les autres l'emmenèrent.

CHAPITRE XXVI.

*De la grand pitié du martyre que on faisoit
des Chrestiens deuant Baiazet, & comment
le Marechal fut respité de mort.*



LE LENDEMAIN de la douloureuse bataille, derechef feut la tres-grande pitié. Car Bajazet seant en vn pauillon emmy les champs, feit amener deuant soy le Comte de Neuers & ceulx de son lignaige, avec tous les autres Barons François, & les Cheualiers & Escuyers, qui estoient demeurez de l'occision de la bataille. Là estoit grand pitié à veoir ces nobles Seigneurs, ieunes iouuenceaux, de si haule sang comme de la noble lignée Royale de France, amener liez de cordes estroitement, tous desarmez en leurs petits pourpoints par ces chiens Sarrafins, laids & horribles, qui les tenoient durement deuant ce tyran ennemy de la foy qui là feoit. Si sceut par bons truchemens & par certaine information que le Comte de Neuers estoit fils de fils de Roy de France & cousin germain, & que son pere estoit Duc de grande puissance & richesse, & que les enfans de Bar, le Comte d'Eu & le Comte de la Marche estoient d'iceluy mesme sang, & parens prochains du Roy de France. Si se pensa bien que pour les garder auroit d'eulx grand trefor & financee: Et pource

N iij

delibera que iceulx & aucuns autres des plus grands Barons il ne feroit pas mourir: mais il les faisoit là tenir assis à terre deuant luy. Helas! tantost apres feit commencer le dur sacrifice. Car deuant luy faisoit amener les nobles Barons, Cheualiers & Escuyers Chrestiens tous nuds, & puis tout ainsi que l'on peint par les parois le Roy Herode assis en chaire, & les Innocens que l'on deltranche deuât luy, estoient là destranchez nos feaulx Chrestiens à tous grands gifarmes par ces mastins Sarrafins, en la presence du Comte de Neuers, à ses yeux voyans. Si pouuez sçauoir vous qui ce oyez si grand douleur auoit au cœur, luy qui est vn tres-bon & benin Seigneur, & si grand mal luy faisoit d'ainsi veoir martiriser les bons & loyaulx compaignons, & ses gens, qui tant luy auoient esté feaulx, & qui si preux par excellence estoient. Certes ie croy que tant luy en douloit le cœur que il voulust à celle mort estre de leur compaignée. Et ainsi l'un apres l'autre on les menoit au martyre, ainsi comme iadis on faisoit les benoists martyrs, & là on les fraploit horriblemēt de grands cousteaux par testes, par poitrines, & par espaules, que on leur abatoit jus sans nulle pitié. Si peult-on sçauoir à quels piteux visaiges estoient menez à celle piteuse procession. Car tout ainsi que le boucher traïsne l'aigneau au lieu de sa mort, estoient là menez sans nul mot sonner pour occire deuant le tyran les bons Chrestiens. Mais nonobstant que ceste mort feust moult dure, & le castres-piteux, toutes-fois tout bon Chrestien doibt tenir que tres-heureux

feurent & de bonne heure nez de telle mort recevoir. Car vne fois leur conuenoit mourir, & Dieu leur donna la grace que ils moururent de la plus sainte & digne mort que Chrestien puisse mourir, selon que nous tenons en nostre foy, qui est pour l'exaucement de la foy Chrestienne, & estre accompaignez avec les benoïsts Martyrs, qui sont les plus heureux de tous les Ordres des autres Saints de Paradis. Si n'est mie doubte que fils le receurent en bon gré, que ils sont Saints en Paradis. A icelle piteuse procession feut mené le Marechal de France Boucicaut tout nud, fors de ses petits draps. Mais Dieu qui voulat garder son seruant pour le bien qu'il debuoit faire le temps à venir, tant en vengeance sur Sarrafins la mort de celle glorieuse compaignée, comme des autres grans biens qui par son bon sens & à cause de luy debuoient aduenir, feit que le Comte de Neuers sur le point que on vouloit ferir sur luy, le va regarder moult piteusement, & le Marechal luy. Adonc prist merueilleusement à doubloir le cœur au dict Comte de la mort de si vaillant homme, & luy souuint du grād bien, de la prouesse, loyauté & vaillance qui estoit en luy. Si l'aduifa Dieu tout soubdainemēt de ioindre les deux doigts ensemble de ses deux mains en regardant Bajazet, & feit signe qu'il luy estoit comme son propre frere, & qu'il le repitaft : lequel signe Bajazet entendit tantost, & le feit laisser. Quand celle dure execution feut parfaicte, & que tout le champ estoit ionché des corps des benoïsts Martyrs, tant de François

104 HISTOIRE DV MARESCHAL
comme d'autres gens de diuerſes contrées, le mau-
dit Bajazer ſe leua de là, & ordonna que le Mareſ-
chal qui de mort auoit eſté reſpiré feust mené en
prison en vne grande bonne ville de Turquie ap-
pellée Burſe. Si feut faiët ſon commandement, &
là fut tenu iuſques à la venuë du dict Bajazer.

CHAPITRE XXVII.

*Comment les nouuelles veindrent en France de
la dure deſconfiture de nos gens.*



APRES ceste mortelle deſconfiture, fut
la grand pitié des Chreſtiens François
& autres qui eſtoient là allez pour ſer-
uir le Comte de Neuers & les autres
Seigneurs, Cheualiers & Eſcuyers, ſi
comme Chappellains, Clercs, varlets, paiges, & au-
tres gens qui ne ſ'armoient mie, & meſmemēt d'au-
cuns Gentils-hommes qui eſchapperent de la batail-
le. Si n'eſtoit pas petit l'eſbahissement de culx trou-
uer en tel party ſans chef, entre les mains des Sarra-
ſins. Si eſtoient comme brebis eſparſes ſans Paſteur
entre les loups. Adonc priſt à fuir qui fuir peut haſti-
uement au fleuve du Danube à refuge, comme ſi
ce feust lieu de leur ſauuement, comme gent eſper-
duë, & que peur de mort chaſſoit de peril en aultre.
Là ſe fichèrent és bateaux que ils trouuerent, qui
premier y peut venir; mais tant les chargeoient que
à peu n'enfondoient, & que tous ne periſſoient
ensemble.

ensemble. Les autres qui aduenir n'y pouuoient, despoüilloient leurs draps, & à nager se mettoient: mais la plus grand part en perit, pour ce que trop est ceste riuere large & courante. Si ne leur pouuoit durer haleine tant que ils feussent arriuez: Et des noyez en y eut sans nombre. De ceulx qui eschapperent en reueint en France aucuns Gentils-hommes & autres qui rapporterent les douloureuses nouuelles. Et aussi les propres messaigers que le Comte de Neuers enuoya au Duc de Bourgongne son pere, & les aultres Seigneurs aussi à leurs peres & parens. Quand ces nouuelles furent sceües & publiées, nul ne pourroit deuiser le grand deuil qui fut mené en France, tant du Duc de Bourgongne qui de son fils se doubtoit que pour argent ne le peust r'auoir, & qu'on le feist mourir: comme des autres peres, meres, parens & parêtes des autres Seigneurs, Cheualiers & Escuyers qui morts y estoient. Et commença le dueil grand par tout le Royaume de France de ceulx à qui il touchoit, & mesmement generallyment chascun plaignoit la noble Cheualerie, qui estoit comme la fleur de France, qui perie y estoit. Le Duc de Bourgongne avec le dueil qu'il menoit pour la doubte de son fils, moult plaignoit piteusement & regretoit ses bons nourris Gentils-hommes qui morts estoient en la compaignée de son dict fils. Le Duc de Bar grand deuil demenoit pour ses enfans, & faire le debuoit, car onques puis ne les veid: Les meres en estoient comme hors du sens. Mais aux piteux regrets de leurs femmes nul

O

autre ne se compare. La Comtesse de Nevers, la bonne preude femme, qui de grand amour aime son Seigneur, à peu que le cœur ne luy partoît : mais aucune esperance pouuoit auoir du retour. N'eut pas moins de deuil la faige & vaillante Dame la Comtesse d'Eu, fille du Duc de Berry, rien ne la pouuoit reconforter : car quoy que on luy dist, le cœur luy disoit que plus ne verroit son Seigneur; laquelle chose aduint, dont de deuil pensa mourir quand elle sceut son trespas. La belle & bonne Baronne de Coucy tant plora & plaingnit la mort de son bon Seigneur, que à peu que cœur & vie ne luy partoît, ne oncques puis qui que l'ait requise, marier ne se voulut, ne celuy deuil de son cœur ne partit. La fille au Seigneur de Coucy qui perdu y auoit son pere & son mary Messire Henry de Bar, dont elle auoit deux beaux fils, auoit cause de deuil auoir, & croy bien que elle n'y faillit mie, & tant d'autres Dames & Damoiselles du Royaume de France, que grand pitié estoit d'oïr leurs plaintes & regrets, lesquels ne sont mie à plusieurs d'elles, quoy que il y ait ja grand piece, encore finis, ne à leur vie croy que ils ne finiront. Car le cœur qui bien aime de leger pas n'oublie. Si firent tous Nosseigneurs faire le Service solemnelement en leurs Chappelles pour les bons Seigneurs, Cheualiers & Escuyers, & tous les Chrestiens qui là estoient morts. Le Roy en feit faire le solennel Service à nostre Dame de Paris, où il fut, & tous Nosseigneurs avec luy. Et estoit grand pitié à oïr les cloches sonner de par toutes les Egli-

ses de Paris, où l'on chantoit & faisoit prieres pour eulx, & chascun à larmes & plaintes s'en alloit priât. Mais peult bien estre que mieulx eussions besoing que ils priaissent pour nous, comme ceulx qui sont, si Dieu plaist, Saincts en Paradis. Le Duc de Bourgongne au plus tost qu'il peut enuoya les messaigers deuers Bajazet à tout moult riches & beaux presens, & aussi feit le Roy de France & les aultres Seigneurs, en le priant de mettre à rançon tost & briefuement les prisonniers, & que ils n'eussent par luy mal ne greuance: mais comme le chemin soit long ne furent pas les messaigers si tost arriuez, & moult ennuye à qui attend. Mais à tant de ce me tairay, & retourneray aux dicts prisonniers.

CHAPITRE XXVIII.

Comment le Comte de Neuers fut emmené prisonnier à Burse, & plusieurs autres.

Barons. Et de la rançon que on enuoya à Baiazet, & du bien faict du Marechal.

PE v de iours apres la dicte desconfiture, alla Bajazet à la ville de Burse, & mena avec luy le Comte de Neuers & les autres prisonniers. Si les feit mettre en bonne forte prison, & bien les feit garder. Quand ils eurent là esté vn espace de temps,

O ij

où ils auoient moult de mesaises, le Comte de Neuers se conseilla avec les siens. Si delibera par leur conseil que bon seroit que il enuoyast deuers Bajazet sçauoir s'il les vouldroit faire mettre à rançon. Pour faire ceste Ambassade fut ordonné le Mareschal & le Seigneur de la Trimouille. Si firent tant que ils furent mis hors de la prison, & allerent parfournir leur messaige deuers Bajazet; mais en ce perdirent leurs pas, car pour chose que ils sceussent dire, ne faire, n'y voulut entendre. Et quand ils furent retournez, & eurent rapporté ce qu'ils auoient trouué, leur ordonna le Comte de Neuers que ils retournassent derechef deuers Bajazet, & de par luy le priaissent cherement que il les voulust mettre seulement eulx deux à rançon, à celle fin qu'il les peult enuoyer pourchasser finance pour luy & pour sa compaignée, car grand besoing en auoient. Si retournerent les deux dessusdicts deuers Bajazet, & luy feirent la requeste du Comte de Neuers; laquelle chose il octroya assez volontiers, & les mit à rançon, & leur donna congé d'aller là où il leur plairoit par saufconduit. Quand ils furent retournez, le Comte de Neuers & sa compaignée eurent grand ioye de leur deliurance, & tantost leur ordonna où ils iroient pourchasser finance. Si s'apprestèrent le plus tost que ils peurent, & partirent pour aller à Rhodes. Quand ils furent là arriuez, maladie tantost print au Seigneur de la Trimouille, de laquelle il mourut dans peu de iours, dont il pesa moult au Mareschal, qui auoit faict tout son pouuoir de sa

guairison, & moult auoit esté de luy soigneux; Si le
feist ensepuelir le plus honorablement qu'il peust.
Et quand ce fut faict, il arma deux galées & s'en
veint à Metelin, & là parla au Seigneur de Metelin,
& le pria de par le Comte de Neuers & de par les au-
tres Seigneurs que il les voulust secourir de certaine
finance, & que bonne seurété luy en seroit faicte.
De ceste chose fait si grande diligence le bon loyal
Mareschal, & tant y met peine, & si gracieusement
& tant faigement parla au dict Seigneur de Mete-
lin que il eut de luy & d'autres riches marchans du
pays iusques à la somme de bien trente mille francs;
duquel argent luy mesme se obligea tres-estroite-
ment. Quand il eut ainsi faict sa finance il s'en re-
tourna hastiuement deuers le Comte de Neuers &
sa compaignée, qui furent moult esioüis & recon-
fortez de sa venue & de la finance que il leur auoit
apportée, dont grand besoing auoient. Et puis se
partit d'eulx, & alla deuers Bajazet payer la rançon
à quoy il l'auoit mis, & fut quitte de sa prison, & s'en
pouuoit aller où il luy plaisoit. Mais ne cuidez mie
que pourtant le tres-loyal Cheualier abandonnast
ne laissast le bon Comte de Neuers, ne sa compai-
gnée: ains se ralla bouter avec eulx en prison tout
aussi gayement que si prisonnier feust, de laquelle
chose moult luy sceurent bon gré. Et luy dit le
Comte de Neuers telles paroles, Ha Mareschal, de
quel couraige vous venez vous mettre derechef en
ceste dure & maudite prison, quand vous vous en-
pouuez aller franchement en France! Ausquelles

paroles il respondit, Monseigneur, la à Dieu ne
 plaïse que ie vous laisse en ceste contrée, ce ne sera
 mie tant que i'auray au corps la vie. A grand honte
 & à grand mauuaistié me deburoit tourner de vous
 laisser emprisonné en lieu si diuers, pour m'en aller
 aïsier en France. De ce le remercia moult le Comte
 de Neuers; si le renuoya deuers Bajazet pour pour-
 chasser leur deliurance & les meïtre à rançon. A la-
 quelle chose il meit moult grand peine. Car moult
 le trouuoit dur & reuesche, & sembloit qu'il n'y
 voulust entendre, ne on ne le pouuoit faire mettre
 à nulle raison. Si alla & reueint le Mareschal par plu-
 sieurs fois pour celle cause, & longuement dura ce
 traicté; Car Bajazet ne scauoit que faire de les faire
 tous mourir ou de les mettre à rançon: car il doub-
 toit s'il les laïssoit aller, que apres quand en France
 seroient retournez assemblaissent grand ost & r'al-
 lassent sur luy pour eulx venger, pour laquelle cause
 pourroit luy & son paysestre destruiët. Si trouuoit
 à son Conseil que le mieulx estoit que il les meïst à
 mort. Mais quand le faïge Mareschal eut senty ceste
 chose moult eut grand peur & doubte de la vie de
 ses bons Seigneurs & amis; Si se pensa que grand
 sens conuenoit à traicter accord auec Bajazet. Si se
 parforça encores plus de bel de parler à luy. Si luy
 disoit, Que par les deliurer acquerroit grandes ami-
 ties en France, & que maints beaux dons en recep-
 uroit, & grande finance en auroit, & par les retenir
 à force, ou s'il faisoit d'eulx autrement que raison,
 tous les Princes Chrestiens du monde, pour l'amitié

du Roy de France luy iroient courir sus, s'il le destrui-
roient. Telles paroles bien & faigement luy disoit le
Mareschal. Parquoy tant fait & tant traouilla, que au
dernier Bajazet qui doubta le mal qui enfuiure luy
en pouuoit s'il les faisoit mourir, commença à se
mectre en voye d'accord. Si entrerent en traicté de
la somme de la finance de la rançon, & tant fut celle
chose pourparlée, que nonobstant que Bajazet de-
mandast vn million de francs, si sage maniere sceür
tenir vers luy le Mareschal, que petit à petit & de
somme en somme le condescendit à cent cinquante
mille francs. A la charge que le Comte de Neuers
iureroit par tous les sermens de sa Loy, & aussi tous
les autres Seigneurs de son lignaige, que iour de leurs
vies eulx ny aucun de par eulx ne s'armeroiensq con-
tre luy. De ce serment faire conueint que feussent
les prisonniers d'accord, ou autrement iour de leurs
vies ne eussent esté deliurez. Et aussi pour celuy ser-
ment & seureté auoir de eulx se cōdescendit Bajazet
à moins de somme d'argent. Mais ne furent mie
longuement asseruis à celle conuenance: car assez
tost apres mourut Bajazet. Quand ceste chose fut
accordée ne musa pas le Mareschal, car moult auoit
grand peur que Bajazet trouuast autre conseil. Si
veint tantost deuers le Comte de Neuers, & luy dit
l'appointement du traicté, lequel il agreea, & les au-
tres aussi; nonobstant que eussent eu en volonté &
desir de eulx venger de Bajazet. Mais necessité n'a
Loy. Si furent adonc tirez hors de prison, & menez
deuant Bajazet, pour iurer & certifier ceste conue-

nance. Si furent reconfortez les prisonniers, si ne feust la mort du bon vaillant Comte d'Eu qui mourut en la prison, dont durement furent dolens, & moult le plaingirent & à plaindre faisoit. Car de grand vaillance & bonté estoit. Si enseuelirent le corps au plus honorablement que ils peurent, & apres fut porté en France. Le serment feirent les dicts Seigneurs deuant Bajazet & fort se obligerent. Et s'obligea pour le Comte de Neuers le Mareschal, que Bajazet prisoit & honnoroit moult pour le sens & bonté que auoit veu en luy, & avec ce leur conuenoit laisser bons ostaiges tant qu'il feust agréé. Si enuoya le Comte de Neuers le Mareschal à Constantinople faire finance d'argét, & la feit au mieulx qu'il peut, & luy mesme s'y obligea derechef. Et en ces entrefaictes arriuerent les messaigers de France, c'est à sçauoir Monseigneur de Chasteaumorant & le Seigneur du Vergy, & autres qui finance & nouvelles de leurs amis leur apportoint, & feurent receus à grand ioye. Et apres ce les dicts messaigers alerent deuers Bajazet, & luy presenterent de tresriches & beaux dons de par le Roy de France & de par les Seigneurs, & de moult gracieuses paroles, comme les plus beaux Aultours & Faucons que on peust veoir, & les gants à les porter, tous couuerts de perles & de pierres precieuses qui valoient moult grand tresor, escarlates, fins draps, riches toiles de Rheims, & toutes telles choses dont ils n'ont mie par delà: Et tout ce faisoit le Roy & les Seigneurs afin que plus fauorable feust aux prisonniers, & plus courtois

courtois à leur rançon. Si eut les dons bien agreables & la finance aussi que portée auoient. Si fut la rançon payée, & il les deliura & donna congé d'aller où ils voudroient. Si se partirent de luy & vindrent à Metelin, où le Seigneur du lieu les receut à grand honneur, & là se aiserent; car grand besoing en auoient. Apres que le Comte de Neuers & les autres prisonniers furent quittes à Bajazet, ils se partirent du Seigneur de Metelin qui maint bien leur auoit faict. Si se meirent en chemin pour venir en France, & tant errerent que ils approcherent de la Cité de Venise. Là acoucha malade Messire Henry de Bar en vne ville coste de Venise que on nomme Treuise, de laquelle maladie il trespassa, qui grand deuil fut aux François, & moult le plaignirent; Car bon & bel estoit, & tout l'honneur que au corps peurent faire ils feirent. Apres ce arriuerent à Venise, en laquelle ville teindrent ostage. Et furent que en la dicte ville, que en vne autre que on nomme Treuise, où ils se transporterent pour l'epidemie qui à Venise couroit, l'espace de quatre mois. Tant que on leur enuoya de l'argent de France, & que en partie se furent acquitez de ce que on leur auoit presté. Puis se partirent & veindrent en France, où ils furent du Roy & de tous receus à moult grand ioye. Si se loüa moult le Comte de Neuers au Roy & à son pere du bon Marechal, & dit que par son sens & bonté auoit sauué la vie à luy & à sa compaignée, & leur dit la peine que il auoit eüe pour les tirer hors de prison. Si luy en sceut le Roy & Nosseigneurs moult bon gré.

P

CHAPITRE XXIX.

Comment apres le retour de Hongrie le Roy enuoya le Mareschal en Guyenne, à belle compaignée de gens d'armes sur le Comte de Perigort, qui s'estoit rebellé contre luy. Si le prit & amena prisonnier au Roy.



PREs ce retour de Hongrie fut le Mareschal toute celle saison à repos. Car assez befoing en auoit. Si aduint en celuy temps que le Comte de Perigort se rebella contre le Roy de France, & meit les Anglois dedans ses chasteaux & forteresses sans qu'il eust nulle cause de ce faire. Et commença à faire grand guerre aux pays du Roy en Guyenne, & à bouter feu, à occire gent, & à faire tout du pis qu'il pouuoit. De ceste chose feurent portées les nouuelles au Roy, pour lesquelles offenses faire amender il y enuoya le Vicomte de Meaux & Messire Guillaume de Tignonuille, avec bonne compaignée de gens d'armes. Et quand ils feurent là arriuez, le dict Vicomte de Meaux feit commandement au Comte de Perigort que il se rendist au Roy, & cessast de la guerre & des oultraiges que il faisoit: Mais à ce ne voulut oncques obeir le dict Comte, ne du commandement ne fist force. Si s'en

retournerent sans rien faire quand vne piece y eurent esté. Et passa ainsi l'hyuer. Quand veint au renouvel de la saison le Roy ordonna que le Marechal iroit au dict pays, & avec luy meneroit huit cent hommes d'armes, & quatre cent Arbalestriers, & en prendroit deux cent qui estoient ja deuant pour la garde du pays, & par ainsi seroient mille homes d'armes qu'il auroit. Et avec ce luy fut baillé l'Arrest de Parlement qui auoit esté ietté contre luy pour ce que il ne s'estoit comparu à l'appel du Roy. Et ainsi se partit le Marechal à belle compaignée, & avec luy allerent le Vidame de Lannois qui ores est grand Maistre d'hostel du Roy, Messire Guillaume le Boutellier, Messire Bonnebaut, Parchion de Nangiac, & plusieurs autres Bannerets & vaillans Cheualiers. Si tost que le Marechal fut arriué en Perigort, il manda au Comte que il se meist en l'obeissance & volonté du Roy, & demanda pardon du grand mespris que vers luy faicte auoit. Et que si ainsi le vouloit faire, que luy mesme pourchasseroit sa paix vers le Roy, & le prieroit que il luy voulust pardonner. Mais de tout ce ne fait nul compte, ains espia son point & faillit sur les gens du Marechal à belle escarmouche. Mais toutesfois ce fut à son pis: car il fut laidement rechassé en sa forteresse: & non pourtant y fut blessé Messire Robert de Milly, qui estoit & est de l'hostel du Marechal. De ceste desobeissance & outrecuidance que le Comte de Perigort faisoit contre le Roy, fut moult indigné le Marechal, & dit qu'il luy vendroit cher sa folie. Si meit

tantost le siege par tres-belle ordonnance deuant le chastel de Montignac, qui est vne tres-forte place, & sembleroit comme imprenable, & là estoit le dict Comte, & manda querre engins & trait de par tout, & en fit faire tant qu'il en fut bien garny. Puis les feit dresser: Si prirent à lancer si grosses pierres d'engins & de canons contre les murs que tous les estonnerent, & si druement que l'un coup n'attendoit l'autre, dont ils abatoient la muraille à grands quartiers. Tant que en deux mois que dura le siege furent si bien battus que mieulx ne pouuoient. Et bien veirent ceulx de dedans que tenir ne se pourroient, & que remede n'y auoit qu'ils ne feussent pris par viue force. Si conseilлерent au Comte que il se rendist, laquelle chose quand plus n'en peut il feit, & se soubmist à la volonté du Roy & à l'ordonnance du Marechal. Et aussi se rendirent au Roy tous les chasteaux & villes, & le Marechal comme faige. Cheuetaine y meit tres-bonnes gardes & tres-bien les garnit. Et le Comte & ses sœurs qui avec luy furent prises enuoya en France au Roy, lequel luy pardonna ses mesfaicts, pour ce que il luy cria mercy, & promist d'estre de là en auant bon François. De laquelle chose il se parjura: car assez tost apres se partit sans congé, & s'en alla en Angleterre, dont puis ne retourna. Le Marechal demeura toute celle saison qui estoit hyuer en Guyenne, en la garde du pays, & puis l'Esté d'apres s'en retourna vers le Roy.

CHAPITRE XXX.

*Cy dict comment l'Empereur de Constantino-
ple enuoya requerir secours au Roy contre
les Turcs, & il y enuoya le Marechal
à belle compaignée.*



N CEL VY temps lors que le Marechal estoit en Guyenne comme dict est, l'Empereur de Constantinople qui est appellé Carmanoli, enuoya deuers le Roy vn sien Ambassadeur nommé Catotufeno, luy supplier que il le voulust secourir & ayder contre les Turcs, car il ne pouuoit plus resister à leur force. Si luy pleust luy estre en aide, à celle fin que luy & la noble cité de Constantinople ne cheussent es mains des mescreans, car plus n'y sçauoit remede. Oultre cecy pour celle chose mesme les Geneuois & les Venitiens qui de ce sçauoient la pure verité, enuoyerent pareillement leurs Ambassadeurs au Roy, le supplier que il voulust secourir le dict Empereur, & que eulx aussi l'ayderoient, c'est à sçauoir chascune Seigneurie de huiet galées. Et se faisoient forts de ceulx de Rhodes. Lors comme le Roy se conseilloit que il estoit bon à faire de ceste chose, arriua le Marechal deuers luy. Si fut regardé en Conseil que pour le bien dela Chrestienté, & pour ayder à l'Empereur qui au

P. iij.

Roy requeroit secours, bon feroit qu'il enuoyast le dict Mareschal. Car Capitaine plus propice n'y pouoit enuoyer. Si en fut le Roy d'accord, & luy ordonna quatre cent hommes d'armes & quatre cent varlets armez, & vne quantité d'Archers: De ceste commission fut ioyeux le Mareschal, & feit telle diligence, que luy & ses gens, & son nauire, & toutes choses necessaires pour iceluy voyage feurent prestes à la Sainct Iean d'esté à monter sur mer à Aiguesmortes, où le dict Mareschal arriua deux iours apres. Et là chargea quatre naues & deux galées, & de là se partit, & s'en allerent avec luy le Seigneur de Linieres & Messire Iean de Linieres son fils, le Seigneur de Chasteaumorant, Lermite de la Faye, le Seigneur de Montenay, Messire François Daubifsecourt, Messire Robin de Braquemont, Messire Iean de Torfay, Messire Louys de Culan, Messire Robert de Milly, Messire Louys de Ceruillon, Messire Renault de Barbasan, Messire Louys de Lugny, Messire Pierre de Grassay qui puis porta la banniere de nostre Dame, & autres plusieurs bons Cheualiers & Escuyers de grand renom allerent avec eulx, desquels ie passe les noms pour cause de briefueté. Ainsi alla par mer le Mareschal tant qu'il veint prendre port à Sauonne, & là feist toutes ses ordonnances, & ordonna ses Capitaines, & bailla à chascun telle charge que bon luy sembla, puis se partit de là pour aller à son voyage. Et ainsi comme il alloit luy fut rapporté comment cinq galées des gens de Messire Lancelot tenoient le siege deuant vne ville & bel

chastel qui sied en vne petite Isle pres de Naples appellée Capri, laquelle dicté ville & chastel se tenoient pour le Roy Louys. Si tost qu'il sceut ceste chose, il dit à ses gens qu'il vouloit aller secourir le chastel du Roy Louys, & que chascun se mist en ordonnance. Si tira celle part: mais quand il y fut arriué il trouua que ceulx du dict chastel f'estoient ja rendus, toutesfois leur offrit-il son ayde contre les autres, & que ils se retournassent deuers leur partie: mais le Capitaine le refusa comme traistre que il estoit au Roy Louys. Et bien le monstra: car il ietta hors certains François qui leans estoient, & le Marechal les recueillit & emmena avec luy. Mais il ne se teint mie à tant, ains alla pour escarmoucher les dictes galées, & icelles fuirent deuant luy. Et comme il s'en retournoit & estoit remis en son chemin, il rencontra le Comte de Peraude lequel tenoit le party de Lancelot, auquel il donna la chaste tant que par force les fit ferir en terre, & faillir hors & s'enfuir, & nos gens gaignerent le nauire & tout ce qui estoit dedans. Et ce faict se remeit en son chemin & tira au Royaume de Cecile, & alla descendre en vne Cité appellée Messine.

C H A P I T R E X X X I .

*Comment le Marechal s'en alla par mer à
belle compaignée, & l'affaire qu'il eut
aux Sarrafins.*

DE MESSINE se partit le Mareschal sans y faire longue demeure, & s'en alla descendre en la Ville & Isle de Scio, où il cuidoit par ce que on luy auoit donné à entendre, trouuer les huiët galées des Venitiens qui debuioient estre enuoyées au secours del'Empereur de Constantinople comme dict est. Mais il ne les y trouua pas, & luy fut dict que il les trouueroit en vn lieu appellé Negropont. Si se partit de Scio pour les aller là chercher, & en son chemin passa par le Seigneur de Metelin qui à ioye le receut. Toutes-fois il luy dit que il auoit faict à sçauoir aux Turcs sa venue, pour non rompre les conuenances & paches que il auoit avec eulx. Mais de ce ne fait compte le dict Mareschal, & dict que de par Dieu feust. Non pourtant dict celuy Seigneur de Metelin qu'il s'en iroit avec luy en ce voyage. Quand le Mareschal feut à Negropont il ne trouua pas les dictes galées, si voulut là vn peu attendre, & luy sembla que bon seroit de faire à sçauoir à l'Empereur sa venue, afin que il apprestast son armée pour aller tantost courir sus aux Sarrafins. Si fait monter sur deux galées, en l'vne le Seigneur de Chasteaumorant, & en l'autre le Seigneur de Torlay, pour aller à Constantinople faire le dict messaige. En la galée du Seigneur de Chasteaumorant fut entre les autres bons & vaillans vn noble Escuyer du pays de Bourgongne nommé Iean de Ony, Escuyer d'Escuyrie du Duc de Bourgongne, appert homme, hardy, & de grand vasselage en faict d'armes, & qui ja moult auoit trauaillé & f'estoit

& s'estoit trouué en maintes bonnes places, lequel pour tousiours croistre son pris & los de mieulx en mieulx, s'estoit mis en la compaignée du Marechal en iceluy voyage: pource que tant vaillant le scauoit, que il estoit certain que mieulx ne pouuoit employer son temps que avec luy. Mais pas n'y alla en vain, car auant le retour y esprouua son corps vaillamment, si comme en aucuns lieux cy apres sera dict. Au partir du port, afin que les dictes galées n'eussent empeschement, le Marechal les conuoya iusques à la veüe de Galipoli, & de là ne se bougea afin de les secourir si aulcune chose leur aduenoit. Et en ce monstra bien son bon sens & aduis, & grande bonté, de vouloir secourir ses gens si mestier estoit, & bien leur en fut besoing. Car les Turcs qui de sa venue estoient aduisez, pour luy courir sus auoient faict deux embusches de dixsept galées bien armées, dont l'une des embusches estoit dans le port de Galipoli, où il y auoit plusieurs vaisseaux, & l'autre au dessus de la ville au chemin de Constantinople. Si adueint que aussi tost que nos deux galées feurent passées outre Galipoli, la premiere embusche leur fut apres pour leur courir sus, c'est à scauoir sept galées, & tantost deuant eulx veirent venir contre eulx la dicte autre embusche, en laquelle y auoit autres dix galées, & par ainsi feurent au milieu de leurs ennemis. Si ne sceurent autre party prendre fors de retourner arriere deuers le Marechal; mais par leurs ennemis leur conuenoit passer, Si furent tost pelle-melle avec eulx, qui les assaillirent de tous

Q

costez , & les nostres comme vaillans & preux se preindrent à defendre vigoureusement , & par si grand vertu estriuerent contre eulx que oncques ne les peurent arrester , ains malgré leurs dents s'en veindrent tousiours combatant , quoy que les Sarasins taschassent à les faire demeurer. Mais ce ne fut mie en leur puissance, ains s'en veindrent ainsi combatant si pres que le Mareschal en ouyt l'effrainte, qui ne musa mie à leur estre au deuant, & moult tost se meit en belle ordonnance pour les aller aider. Et bien besoing leur estoit, car ja estoient si barus que mais aider ne se pouuoient. Car si grande quantité de Sarasins y auoit qu'il fut dict & conseillé au Mareschal que il n'y allast point, & qu'il valoit mieulx que deux galées perissent que tout. Duquel conseil le vaillant homme sceut mauuais gré à ceulx qui ce disoient, & leur respondit qu'il aimeroit mieulx estre mort que par son deffault veoir mourir & perdre sa compaignée, & que ja Dieu ne le laissast tant viure que tant de recreandise feust en luy trouuée. Le plus tost qu'il peut leur feut alencontre par telle contenance & maintien, que quand les ennemis le veirent venir ils abandonnerent tantost les deux galées, & se meirent en fuite au plus tost qu'ils peurent, & tant se hastoient que la plus grande galée des Turcs alla ferir en terre si grand coup, sans que ils y meissent conseil, que grand foison en y eut de morts & d'affollez. Et ainsi sauua le Mareschal les dictes galées, & s'en alla ceste nuit gisir au port de Tenedon deuant la grand Troye. Et le lende-

main matin les galées des Venitiens arriuerent, & deux de Rhodes, & vne galiote du Seigneur de Metelin. Et tost apres veint tout le nauire qui debuoit aller au secours de Constantinople. Si feut là faict le Mareschal chef & conduiseur de toute ceste compaignée, de la bonne volonté & assentement de tous, & là il feit ses ordonnances & bailla la banniere de nostre Dame par droict d'armes, comme à celuy qui plus auoit veu, & qui estoit vn vaillant Cheualier, à porter en celuy voyage, à Messire Pierre de Grassay. Et le lendemain apres que les Messes feurent chantées, le Mareschal se partit à tout sa compaignée, & n'arresta iusques à ce que il feust en Constantinople, où il feut receu de l'Empereur luy & sa compaignée à tres-grand honneur & ioye.

CHAPITRE XXXII.

La grand chere & ioye que l'Empereur feit au Mareschal & à sa compaignée, & comment ils allerent courir tost sus aux Sarrafins.



L'EMPEREUR qui bien auoit sceu la venue du Mareschal & de sa belle compaignée, auoit ja faict tout son apprest, & tous ses gens assembler, afin que aussi tost que il seroit venu n'y eust que à partir pour courir sus aux Sarrafins. Si ne sejourna pas là moult longuement le Mareschal depuis qu'il fut arriué: ains

Q ij

n'y auoit esté que quatre iours quand il feit assembler tous les gens de celle armée en vne belle plaine pour les veoir. Et feut trouué que ils estoient en nombre de six cent hommes d'armes, six cent varlets armez, & mille hommes de traict, sans l'ost & l'assemblée de l'Empereur, où il y auoit grand gent. Là leur ordonna comment il vouloit que ils allassent, & feit ses Cheuetains & Capitaines, & leur bailla charge de gens selon ce que il sçauoit que ils valoient, & que faire l'office chascun sçauoit en droit soy. Si monta sur mer l'Empereur à tout celle compaignée, & furent leurs vaisseaux par nombre vingt & vne galées complies, & trois grandes galées huillieres és quelles ils menoient six vingt cheuaulx, & six que galiotes que brigantins. Si partirent de Constantinople, & allerent arriuer en Turquie, & descendre par belle ordonnance en vn lieu que on dict le pas de Naretez. Si entrerent au pays de Turquie enuiron deux lieües, & preindrent à destruire, brusler & gaster tout le pays d'enuiron la marine, & partout où ils passerent, où il y auoit de moult bons villaiges & de beaux manoirs, & meurent à l'espee tous les Sarrafins que ils trouuerent. Et puis quand ils eurent faict ceste course ils s'en retournerent & retrahirent en Grece. Et peu de iours apres ils repasserent en Turquie, & allerent bien deux lieües loing de la marine pour destruire vn gros villaige qui sied sur le goulphe de Nicomedie appelé Diaschili. Mais là trouuerent grande assemblée de Turcs du pays qui cuiderent garder le villaige contre nos gens, &

tous arrengez se tenoient à pied & à cheual au deuant à telles armeures comme ils pouuoient auoir. Mais ce ne leur valut rien : car en peu d'heures eussent esté tous morts & pris s'ils ne s'en feussent fuis. Toutesfois ne sceurent si tost fuir que la plus grande partie d'eulx ne feust mise à l'espée. En ce villaige y auoit moult de beaux manoirs, & vn riche Palais qui estoit à Bajazer. Si bouterent nos gens le feu par tout, & destruirent le villaige & tout le pays à l'environ, puis se bouterent en leurs galées & allerent toute nuit. Et le lendemain quand ils voulurent descendre & prendre terre deuant vne cité appelée Nicomedie, les Sarrafins y cuiderent mettre empeschement, & leur feurent alencontre à grand quantité pour leur chalenger le port : mais ce ne leur valut rien. Car nos gens prirent port malgré leurs dents, & les repoulsèrent laidement & terre gaignerent sur eulx. Si allerent nos gens assaillir la ville par maniere d'escarmouche, & meirent le feu aux portes, mais ne peurent les brusler, pour ce que elles estoient toutes ferrées de lames de fer. Les eschelles furent apportées & dressées contre les murs qui à merueilles sont forts & beaux, & si haults que trop courtes furent plus de trois brasses. Si n'y peurent rien faire : mais ils occirent tous les Sarrafins qu'ils peurent trouuer, & bruslerent les faulxbourgs, tout le pays & les villaiges d'environ. Puis se retrahirent en leur nauire & cheminerent toute nuit, & le matin prirent port au plus pres qu'ils peurent d'un grand villaige champestre que on nomme le Serrail, qui

Q iij

126 HISTOIRE DV MARESCHAL
 estoit loing de la marine comme à vne grosse lieüe.
 Si s'assemblerent contre eulx tous les Sarrafins du
 pays, qui leur cuiderent defendre l'approcher de la
 ville; mais n'y peurent contredire, toute bruslerent,
 & la gent occirent qu'ils trouuerent, & tout le pays
 d'environ. Mais tandis que ils faisoient cest exploict
 les nouuelles en allerent par tout. Si s'assemblerent
 moult grand quantité de Sarrafins, & ainsi comme
 nos gens s'en retournoient en leurs nefes en moult
 belle ordonnance, comme bien besoing leur estoit,
 iceulx Sarrafins les poursuiuirent de si pres que par
 plusieurs fois feirent retourner l'arrieregarde pour
 cuider combattre à eulx. Car par plusieurs fois s'es-
 fayerent de mettre nos gens en desordonnance, &
 toutesfois ne les oserent plainement assaillir. Et nos
 gens ne voulurent plus la arrester pour la nuit qui
 ja s'approchoit. Si rentrerent en leurs galées & re-
 tournerent à Constantinople.

CHAPITRE XXXIII.

*Des villes & chasteaux que l'Empereur, le
 Mareschal & leur compaignée prirent
 sur Sarrafins.*



QUAND l'Empereur & le Mareschal à
 tout leur ost eurent sejourneé à Con-
 stantinople environ six iours, ils en par-
 tirent & retournerent en Turquie. Et
 allerent assaillir vn bel chastel qui seoit
 sur la mer majour, & estoit appelé Riuedroict. Au

poinct du iour furent là arriuez. Mais les Sarrafins qui de leur venuë auoient esté aduisez, & leurs espies auoient sur mer qui tost leur rapportèrent, failirent tantost en plains champs, & ne leur contredirent pas le descendre : ains se meirent en belle ordonnance deuant le chastel pour leur liurer la bataille, & estoient bien de six à sept mille Turcs. Et quand ils veirent que si grande compaignée de gens estoient, & en si belle estoffe, ils prirent avec eulx pour croistre leur ost tous les gens qui estoient en la garnison du dict chastel, excepté vne quantité de gens d'armes des meilleurs que ils eussent, qui leur sembla estre suffisante pour le garder pour vn iour contre tout le monde. Car tant estoit fort & hault de luy mesme que il estoit de legere garde. Et quand eurent ce faict, tous ferrez ensemble & bien sagement ordonnéz, ils se reculerent & tirerent vn peu en sus du chastel : afin que quand nos gens feroient à l'assault au pied du mur, & feroient esparpillez pour combattre le chastel, que ils veinssent si tost sur eulx que ils n'eussent le loisir de eulx assembler ne mettre en ordonnance. Et par la propre maniere que ils auoient ordonné, le cuiderent faire six ou sept fois la iournée. Mais le faige Marefchal auoit moult bien pourueu à ceste malice. Car quand il fut à terre avec tous ses gens, est à sçauoir que l'Empereur & les Cheualiers de Rhodes à tout grand compaignée de gens d'armes & d'arbalestriers, feit demeurer arrangez en moult belle bataille deuant le chastel, pour garder que les Turcs ne veinssent

empescher l'assault. Et en ceste bataille demeura la banniere de nostre Dame ainsi assise qu'elle debuoit. Et quand il eut faict toute celle ordonnance il alla combattre le chastel, & commença l'assault droict à Soleil leuant. Vne autre malice encores auoient faicte les Sarrafins pour empescher le dict assault. Car du costé dont nos gens les debuoient assaillir, ils auoient faict sur les murs & és faulses brayes des eschafaults couuerts de feurre & de ramille moüillée pour rendre grand fumée, dont aussi tost qu'ils veirent partir nos gens pour aller vers eulx ils bouterent le feu en ces eschaffaults; afin que ils ne peussent approcher pour les grands feux & pour la fumée. Mais tout ce ne leur valut rien: Car nonobstant ce en peu d'heures fut le Mareschal à toute sa gent au pied du mur, & tantost fait par force faire deux belles mines, & tant furent menées icelles mines, malgré tous leurs empeschemens, que le mur fut percé en deux lieux. Et là fut fort combattu: car les Sarrafins fort defendoient le passaige. Si y furent faict moult de belles armes, & moult s'y esprouuerent vaillamment nos bons François. Et bien y estoit present qui bon exemple de bien faire leur donnoit, c'est à sçauoir leur vaillant Cheuetaine qui mie ne s'y espargnoit, ains y tenoit si bien sa place que nul tant n'y traualloit. Et plusieurs fois celle iournée le Mareschal fait dresser ses eschelles: où maints vaillans hommes combattirent main à main par grand force contre ceulx du chastel, lesquelz tant s'efforcèrent de ietter grosses pierres de fais sur les eschelles

qu'elles ne peurent soustenir la charge & rompre les conueint. Et aussi la grand pesanteur des gens d'armes qui par grand desir de bien faire montoient dessus, les faisoit ployer & rompre. Quand le Mareschal qui toute la iournée ne s'estoit retraits de combatre, & qui tant y auoit faict d'armes que ce n'estoit que merueilles, veid que ses eschelles ne pouuoient durer, tantost & vistemment fait faire vne grande & forte eschelle de deux antennes de galées, & ja estoit Soleil couchant quand elle fut dressée contre les murs. Celle voulut-il garder de trop grand charge, & par grand diligence luy mesme s'en prenoit garde. Le premier monta sus Messire Guichart de la laille, qui par long espace combatit vaillamment main à main à ceulx du chastel, qui tant estoient sur luy que ils le desarmerent de son espée, pour laquelle cause & non mie par faulte de couraige le conueint abaisser dessous vn bon Escuyer, qui estoit le premier apres luy, qui est nommé Hugues de Tholoigny, lequel tant vaillamment se combatit que il entra par force le premier dedans le chastel, & le dict Messire Guichart apres. Et ceulx qui combatirent en la mine, comme dict est, aussi tant firent par force d'armes que ils y entrerent. En celle mine auec plusieurs aultres combatit moult vaillamment le bon Escuyer nommé Iean de Ony, duquel i'ay parlé cy deuant, tant que par sa force & la hardiesse de son bon couraige, malgré les ennemis qui toute peine mettoient à l'en garder, fait tant que il entra dedans tout le premier, & apres luy Messire

R

Foulques Viguiier, apres Messire Renauld de Barba-
fan, & plusieurs autres les suiurent. Si allerent ran-
tost secourir leurs compaignons qui par l'eschelle
estoyent montez, & grand besoing en auoient: car
ils n'estoient pas plus de dix ou de douze qui sur le
mur se combatoient, & estoit l'eschelle rompuë
pour le grand fais & charge des bons vaillans qui
par leur grand couraige s'efforçoient de monter sus.
Et par celle maniere fut le chastel pris qui tant estoit
fort qu'il sembloit imprenable. Si occirent tous les
Turcs qui dedans estoient. Et le lendemain le
Mareschal fist le chastel raser tout par terre, qui de
grand force estoit. Car de l'une des parts la mer y
battoit, & de l'autre vne grosse riuere qui vient de
Turquie, si que on n'y pouuoit venir que par vne
part. Mais à toute ceste chose ne meirent oncques
contredict les Turcs qui s'estoient mis en bataille
comme dict est deuant, car ils veirent bien que la
force n'eust pas esté de leur costé, ains s'en partirent
& laisserent la place. Et quand tout ce feut faict nos-
gens se partirent de là & rentrerent en leurs galées
pour eulx en retourner à Constantinople, & vein-
drent à passer deuant vne bonne ville appelée Al-
giro, qui sied à l'entrée de la bouche de la mer ma-
jour. Peu auant Soleil couchant y arriuerent, si y
geurent celle nuict. Quand veint au matin le Mares-
chal qui à autre chose ne pensoit fors à tousiours
greuer les Sarrafins de son pouuoir, fait armer sa
compagnée & trompetes sonner pour descendre
à terre & la ville assaillir. Quand les Turcs de la ville

qui deux iours deuant auoient veu & sceul'exploict qui auoit esté faict du chastel de Riue, veirent les apprests que on faisoit pour abatre leur ville, ils bouterent le feu tout en vn moment en plus de cent lieux, & tous s'enfuirent és montaignes qui là sont grandes & haultes. Le feu qui fut fiché par les maisons prit en peu d'heures à monter hault & à tout embraser. Le Marechal qui veid ceste besongne, voulut que de là ne se partissent iusques à ce que la ville feust toute arse. Et quand ce feut faict il dit que les Turcs auoyent eulx-mesmes faict vne partie de ce que il voyoit à faire. Et à tant s'en partirent, & ainsi comme ils s'en retournoient, nouuelles veindrent à l'Empereur que les Turcs estoient arriuez à tout bien vingt vaisseaux au dessus du pas de Narettes. Si faisoient moult de grands dommaiges à ceulx de Constantinople & à la cité de Pera, & comprenoient tout le pays, & se prenoient à tout gaster. Tantost que ces nouuelles feurent ouyes, le Marechal ordonna d'aller celle part. Si alla descendre sur eulx en tres-belle ordonnance; mais ils ne l'oserent oncques attendre, ains s'enfuirent, & nos gens bruslerent & destruirent tous leurs vaisseaux, & apres s'en reueindrent à Constantinople.

CHAPITRE XXXIV.

Comment apres que l'Empereur, avec l'aide du Mareschal et des François, eut tout environ soy descombred Sarrazins, s'en voulut venir en France pour demander aide au Roy, pour ce que argent & viures leur failloient. Et comment le Mareschal qui s'en venoit avec luy, laissa en la garde de Constantinople le Seigneur de Chasteaumorant, à tout cent hommes d'armes, bons & esprouvez, bien garnis de trait..

NE SÇAY à quoy plus ma matiere esloigneroye pour racompter tous les faicts, tous les chasteaux, toutes les villes prises, & toutes les emprises d'armes qui par le Mareschal feurent accomplies & mises à chef tandis qu'il feut en ce voyage; car à ennuy pourroit tourner aux lisans de tout compter. Et pour ce, afin d'escheuertoute narration, & pour dire en brief, tandis qu'il y feut ne sejourna ne prit aucun repos qui durast plus de huit iours, que tousiours ne feust sur les ennemis, où il prit tant de chasteaux, de villes, & de forteresses, que tout le pays d'environ qui tout estoit occupé de Sarrazins depescha & descombrea, & tant de bien y feit que nul ne lesçauoit dire. Parquoy l'Em-

pereur & tous les Barons , & generallyment tous-
ceulx de Constantinople & tous les Chrestiens l'ai-
moient & honnoroient. Encores plus de bien leur
feit. Car l'Empereur Carmanoli qui encores est en-
vie estoit adonc , & auoit esté par l'espace de huit-
ans en grand contens contre vn sien nepueu appel-
lé Caloiani , & s'entremenoient grand guerre. La
cause de ce debat estoit pource que le nepueu disoit
que il debuoit succeder à l'Empire , à cause de son
pere qui auoit esté aîné frere de l'Empereur , qui
par sa force s'estoit faisi del'Empire : & l'Empereur
le debatoit pour autres causes. Si auoit esté celle
guerre & contens comme cause de la destruction
de Grece , & tant estoient obstinez l'un contre l'au-
tre , & fermes en leurs propos , que nul n'y auoit
peu mettre paix. Et f'estoit le nepueu allié avec les
Tures , avec lesquels il menoit guerre à son oncle.
Entre ces deux , le Marechal considerant que celle
guerre estoit prejudiciable à la Chrestienté , & mal-
seante à eulx , prist à traicter paix : & tant la pour-
mena que par sa grand prudence les mit en bon
accord : tant que de faict luy mesme alla querir ce
nepueu & sa femme en vne ville appelée Salubrie ;
qui sied sur les frontieres de Grece , & le mena à
Constantinople vers son oncle qui le receut à bon-
ne chere , dont tous les Grecs feurent moult ioyeux ,
rendans graces à Dieu qui le Marechal auoit mené
au pays , qui ceste saincte paix auoit faicte , & par
qui tant de biens leur estoient ensuiuis. La auoit
demeuré le Marechal & sa compaignée pres d'un

an en Grece, si peut-on sçauoir que en pays qui tousiours est en guerre, ne peult que cherté de viures n'y soit. Si n'y auoit plus argent pour payer les gens d'armes, ny viures pour soustenir cest ost, & pour ce par contrainte conuenoit que le Mareschal en partist, dont moult luy pesoit, pour ce que il voyoit bien que tantost qu'il seroit party les Turcs leur viendroient courir sus. Mais sur toute chose en pesoit à l'Empereur & aux siens. Si delibererent pour le meilleur conseil que l'Empereur s'en viendrait avec luy en France deuers le Roy derechef luy demander secours; par si que il renonceroit en sa main l'Empire & la cité de Constantinople, mais qu'il luy pleust luy octroyer ayde pour la garder contre les mescreans. Car quant estoit de luy plus ne la pouuoit defendre contre la puissance des Turcs: & si le Roy de France ne luy aydoit, que il iroit à refuge à tous les autres Roys Chrestiens. Et fut ordonné que tandis que l'Empereur seroit au dict voyage, celui Caloiani qui estoit son nepueu demeureroit à Constantinople comme Empereur à la garde du lieu, iusques à tant que son oncle retourneroit à tout tel secours qu'il pourroit auoir. Mais de celle chose respondit Caloiani que il n'en seroit nullement d'accord si le Mareschal ne laissoit de ses gens d'armes avec luy & des gens de trait. Car il sçauoit bien que dès aussi tost que ils seroient partis, Bajazet viendrait à toute sa puissance assieger la ville, l'affamer & la gaster. Le Mareschal qui veid bien que voirement estoit en voye de perdition, s'il n'y auoit aul-

cune prouision, laissa pour la garde de la ville cent hommes d'armes & cent valets armez, de ses propres gens, & vne quantité d'Arbalestriers. De laquelle compaignée ordonna chef le Seigneur de Chasteaumorant, & les laissa pourueus & garnis de viures pour vn an, & argent suffisant en main de bons marchans pour les payer chascun mois tout le temps durant. Et en toutes choses donna bon ordre auant qu'il partist. Parquoy quand les Geneuois & les Venitiens qui là estoient veirent la saige & honorable prouision du Mareschal, feirent vn accord entre eulx que ils laisseroient huiët galées garnies avec ses gens pour la garde de la ville, c'est à sçauoir quatre de Genes & quatre de Venise. De ceste garnison feurent moult reconfortez ceulx de la ville, qui auant estoient comme en desespoir, & n'y sçauoient meilleur conseil que de eulx enfuir deuers les Sarrafins, & abandonner la bonne ville de Constantinople. Et à tant se partirent de Constantinople pour venir en France l'Empereur & le Mareschal qui vn an y auoit demeuré.

CHAPITRE XXXV.

Comment le Seigneur de Chasteaumorant feit bien son debuoir de garder Constantinople, & la famine qui y estoit, & le remede qui y fent mis.



LE SEIGNEUR de Chasteaumorant, que le Marechal auoit laissé Chef & garde de Constantinople, feit tant bien son debuoir de celle commission comme preud'homme enuers Dieu, & tres-vaillant Cheualier aux armes qu'il est, que à tousiours mais en debura estre honoré. Car tres-soigneusement il garda la ville, en laquelle tost apres que l'Empereur fut party, feut si tres-grand famine, que les gens estoient contraincts par raige de faim de eulx aualer par nuiet à cordes jus des murs de la ville, & eulx aller rendre aux Turcs. Pour laquelle chose Chasteaumorant estoit presques aussi diligent de faire bon guet : afin que la gent de la ville ne s'enfuit, comme pour la doubte des ennemis, aussi de peur qu'ils se rendissent à eulx. Si eut moult grand pitié de coste pestilence, & vn tel conuenable remede y trouua que il enuoyoit souuent & menu ses gens courir & fourraiger sur les Turcs, par tout où il scauoit que il y auoit gras pays, quand ils ne s'en donnoient de garde. Si leur portoit de grands dommages, & prenoit aucunes fois de bons prisonniers, & les rançonnoient nos gens, les vns à argent, les autres à viures. Et par celle voye & maniere feit tant que la ville, Dieu mercy, feut remplie & aisée de tous biens, ne il n'estoit vaisseau de Sarrafins qui là enuiron osast passer, qui tantost ne feust happé par ces galées qui tousiours estoient en aguet. Et par ainsi garentit la cité de mort, de famine, & des mains des ennemis, & la remplit d'abondance. Et par la diligence

gence qu'il y mettoit tousiours gaignoit quelque chose sur Sarrafins. Et ainsi la garda l'espace de trois ans contre la puissance des Turcs. Et à brief parler, tant y feit luy & les gens de sa compaignée, que ceulx qui en sçauent la verité dient que par luy & par les bons François qui avec luy estoient, a esté sauuée & garantie d'estre du tout destruite & perie la noble & ancienne cité de Constantinople. Laquelle chose n'est point de doubte est tres-agreable à Dieu, & grand honneur au Roy de France & aux François qui bien leur vertu y esprouuerent, & grand bien pour la Chrestienté. Et tout ce bien adueint par la saige preuoyance du bon Marechal quiles y laissa. Parquoy nul ne pourroit dire le tres-grand bien qui adueint de l'allée que le Marechal feit au dict pays.

CHAPITRE XXXVI.

Comment l'Empereur veint en France, & comment le Marechal y arriua deuant.



L'EMPEREUR & le Marechal tant errerent par mer depuis que ils furent partis de Constantinople, comme dict est cy dessus, que ils arriuerent à Venise. Et là voulut vn peu sejourner l'Empereur, pour certaines choses qu'il auoit à faire avec les Venitiens. Si se partit de luy le Marechal pour venir deuant en

S

France pour annoncer sa venue, & dire la cause qui luy amenoit. Si ne fina de cheminer tant qu'il fut deuers le Roy qui à moult grand ioye & honneur le receut, & moult le desiroit veoir, & aussi luy feirent moult grand feste tous nos Seigneurs & Cheualiers, & Escuyers, & toute gent. Car moult bien l'auoit defferuy. Si fut apres les bien viengnans vne bonne piece à sejour: car bien estoit temps qu'il preint vn peu de repos, & qu'il eust aucune ioye & esbatement: car de long temps peu en auoit eu. Combien que ja estoit si rassis & tant saige que gueres ne luy chailloit fors que des plaisirs que les vertueux prennent en bien faisant. Si estoit tous les iours entre les Seigneurs qui luy demandoient & enquerroient des aduantures & faicts qui estoient aduenus là où il auoit esté. Et il leur en racomptoit non mie à sa loüange, mais à celle de ses compaignons, à qui il donnoit l'honneur de tout ce qui auoit esté faict: mais en ce croissoit encore plus son los. Car renommée ne se taifoit pas de ses bons faicts, dont bien estoient informez. Et ainsi alla passant le temps tant que l'Empereur arriua à Paris, auquel le Roy & tous nos Seigneurs les Ducs allerent alencontre iufques dehors Paris à tout grand route de nobles gens, & à grand honneur le receurent & moult l'honnora le Roy comme raison estoit. Car sans faillir moult est l'Empereur Carmanoli Prince de grand reuerence, bon, prudent & saige, & est pitié dont il est en telle aduersité. Et se reposa & aisa à Paris, & le Roy luy entreteint tout son estat & le deffroya de

toute despence, tant comme il feut au Royaume de France. Et quand il eut assez reposé il dict bien & saigement au Roy, presens nos Seigneurs en plain Conseil, la cause qui le menoit en France. Si luy feut donnée responce bonne & gracieuse, & de bonne esperance. Et sur ce eut le Roy aduis avec son Conseil, & par plusieurs fois en fut parlé auant que la chose feust conclud. Toutesfois au dernier pour le bien de Chrestienté, & que tout Prince doibt ayder à soustenir l'un l'autre, & par especial contre les mescreans, luy octroya le Roy que il luy feroit ayde & secours de douze cent combatans payez pour un an. De laquelle compaignée le Marechal seroit chef & Capitaine. Car ce auoit requis de grace speciale l'Empereur, qui moult en fut ioyeux, & qui auoit maints grands biens dictz & rapportez de luy au Roy & au Conseil, & comment vaillamment il estoit porté au pays. Si remercia le Roy de l'aide que il luy auoit octroyée. Et partit de Paris: car ja y auoit bonne piece demeuré. Et voulut aller par les autres Princes Chrestiens semblablement requerir leur ayde & secours, tant de finance dont il auoit peu, comme de gens pour luy ayder à garder & à reconquerir son pays qui lors tout estoit es mains des ennemis de la foy, dont grand pitié estoit. Si fut deuers le Saint Pere qui donna grand pardon à quiconque luy feroit bien, & alla en Angleterre & vers plusieurs autres Roys Chrestiens qui tous luy ayderent, & en ceste queste feut l'espace de pres de trois ans.

S ij

CHAPITRE XXXVII.

Cy deuise comment l'Empereur de Constantinople eut paix avec Baiazet, Et comment le Tamburlan l'en vengea. Et de la mort de Tamburlan..



N CES entrefaictes que l'Empereur de Constantinople estoit hors de son pays & en la queste dessus dicte, & que le Seigneur de Chasteaumorant estoit garde de la cité de Constantinople, adueint comme il pleut à Dieu, lequel ne veult quenul mal demeure impuny, & qui estrangement vange ses amis des torts faicts & griefs que on leur faict, & quoy qu'il attende, tout ainsi que iadis il feist des enfans d'Israel que il laissa longuement en la seruitude de Pharaon, & au dernier preint cruelle vengeance du dict Roy Pharaon, & de ses mains deliura son peuple comme raconte la Bible, tout ainsi voulut-il venger par diuerse voye les bons Chrestiens qui auoyent esté occis en la bataille, & cruellement destranchez deuant Bajazet, comme nous auons dict cy deuant. Car vn grand Prince de Tartarie que on nommoit le Tamburlan, comme fleau de Dieu en preint la vengeance. Celuy Tamburlan estoit de si hault courage que il auoit intention de conquerir tout le monde si fortune luy eust.

voulu aider, mais il y faillit. Car comme dict le commun proverbe, Les hommes proposent, & Dieu ordonne. Toutesfois par le tres-grand trauail en armes que il prit, auquel mestier trente ans entiers n'auoit cessé ne reposé en bonne ville, fors tousiours aux champs, à tout si grand ost que c'estoit merueilles, & par si grande ordonnance que toutes les necessitez que il conuenoit pour fournir l'ost il menoit avec soy, & de bestes si grande quantité que merueilles estoit, & par si bon ordre qu'il n'y auoit si petite beste qui ne portast sa charge de quelque fardeau, mesmes les cheures & les moutons. Et les merueilles qu'il feit, & les grandes riuieres qu'il passa, & comment ses gens estoient endureis au trauail, ne seroit sinon merueilles raconter. Mais ie m'en passe, pource qu'il n'affiert à mon propos. Si croy bien que aulcunement conuiendroit que nos Chrestiens qui tant veulent estre à leur aise, suiussent celle voye s'ils vouloient estre grands conquereurs, conquist si grand pays en cest espace de temps, comme toute Egypte, & destruit la Cité de Damas, & subjugua toute la Syrie & toutes les terres d'environ, qui moult long pays s'estendent, puis en vein descendit sur la Turquie, & assaillit Bajazet de guerre. Adonc luy conueint par force laisser en paix les Chrestiens. Si commencerent les Tartares former à demarcher son pays, & à piller & gaster, & luy conueint deffendre & faire armée contre eulx. Et lors les Chrestiens qui estoient d'autre part, c'est à sçauoir le Seigneur de Chasteaumorant & sa

compagnée luy feurent au dos , qui mie ne luy estoient bons voisins, ains luy portoient souuent de grands dommaiges. Si se continua tant celle guerre que il fut desconfit en plusieurs batailles , & les gens morts & pris, & les forteresses, villes & citez prises & destruites, & ruées par terre, tant que à la parfin ne peut plus forçoyer contre luy. Et en vne bataille qu'il eut contre le dict Tamburlan fut desconfit, & route sa gent en fuite & prise. Et feut luy mesme pris & mené en prison, en laquelle mourut de dure mort. Et ainsi, & par ceste voye perit & finit la Seigneurie de Bajazet qui maints maux auoit faict à la Chrestienté, & par ceste maniere en fut vangé le Comte de Neuers & les nobles François, & aussi l'Empereur de Constantinople que il auoit desherité. Mais n'eust pas faict meilleure compagnie celuy Tamburlan aux Chrestiens que auoit faict Bajazet, si longuement eust vescu. Car ja n'eust esté saoul de conquerir terre. Mais Dieu qui à toutes choses sçait remedier, ne voulut mie souffrir que son peuple Chrestien feust soubsmis ne subjugué par les ennemis de la vraye foy. Si luy enuoya la mort qui toute chose mondaine trait à fin.

CHAPITRE XXXVIII.

Cy dit comment le Mareschal eut grand pitié de plusieurs Dames & Damoiselles qui se complaignoient de plusieurs torts que on leur faisoit, & nul n'entreprenoit leurs querelles, & pour ce entreprit l'Ordre de la Dame blanche à l'escu verd. Par lequel luy treiziesme portant celle deuise, s'obligea à la defence d'elles.



REVENIR à nostre premier propos, c'est à sçauoir de parler du bon Mareschal, duquel ne pourroient estre suffisamment représentées les grands bontez, tandis que l'Empereur de Constantinople estoit en France deuers le Roy, comme est deduiet cy deuant, & que le dict Mareschal estoit à sejour, adueint que aucunes complaints veindrent deuers le Roy, comment plusieurs Dames & Damoiselles, veufues & autres, estoient oppressées & trauaillées d'aucuns puissans hommes, qui par leur force & puissance les vouloient desheriter de leurs terres, de leurs auoirs & de leurs honneurs, & auoyent les aucunes desheritées de faict. Ainsi maints grands torts recepuoient, sans ce que il y eust Cheualier, ne Escuyer, ne Gentil-homme aucun, ne quelconque personne qui comparust

pour leur droict defendre, ne qui sousteint ne debast leurs iustes causes & querelles. Si venoient au Roy comme à fontaine de Iustice, supplier que sur ce leur feust pourueu de remede raisonnable & conuenable. Ces piteuses clameurs & complaints ouyt le Mareschal faire à maintes Gentils-femmes par plusieurs fois, si comme il estoit en la presence du Roy. Desquelles choses eut moult grand pitié, & de toute sa puissance estoit pour elles, & ramenteuoit leurs causes au Roy & en son Conseil, & les portoit & soustenoit en leur bon droict par moult grande charité, comme celuy qui en toutes choses estoit & est tel que noble homme doit estre. Si va penser en son couraige que moult grand honte estoit à si noble Royaume comme celuy de France, où est la fleur de la Cheualerie & Noblesse du monde, de souffrir que Dame ny Damoiselle, ne femme d'honneur quelconque eust cause de soy plaindre que on luy feist tort ne grief, & que elles n'eussent entre tant de Cheualiers & Escuyers nuls champiós, ny defendeurs de leurs querelles: par quoy les mauuais & vilains de couraige estoient plus hardis à leur courir sus par maints oultrages leur faire, pource que femmes sont foibles, & elles n'auoient qui les deffendir. Et avec ce disoit en soy mesme que moult estoit grand pitié, peché & deshonneur à ceulx qui mal leur faisoient, que femme d'honneur eust achoison de soy plaindre d'homme, lequel naturellement & de droict les doit garder & deffendre de tout grief & tort, à son pouuoir, s'il est homme naturel,

& tel

& tel qu'il doibt estre, c'est à sçauoir raisonnable. Mais pour ce que chascun ne veult pas vser aux femmes de tel droict, que quand estoit de luy par sa bonne foy il vouloit mettre cœur, vie & cheuance de toute sa puissance, à soustenir leurs iustes causes & querelles, contre qui que ce feust qui le voulust debatre, ne qui tort leur feist, au cas que son aide luy feust requis d'aucune. Ainsy deuisoit à part soy le bon Mareschal, Et quand sur ce eut assez pensé, adonc par sa tres-grande gentillesse, liberalité, & franchise de couraige, va mettre sus vn moult notable & bel Ordre, & tres-honorable à Cheualier, que il fonda & assist sur ceste cause. Et de ceste chose va dire sa pensée & sentence à aulcuns ses plus especiaux compaignons & amis, lesquels moult l'en priferent, & luy requirent que ils feussent compaignons & freres du dict Ordre, qui moult leur sembla estre iuste, bel, honorable & cheualeureux, laquelle chose il leur accepta de bonne volonté. Si feurent treize Cheualiers, lesquels pour signe & demonstration de l'emprise que ils auoient faicte & iurée, debuoient porter chascun d'eulx liée autour du bras vne targe d'or esmaillée de verd, à tout vne Dame blanche dedans. Et des conuenances que ils feirent & iurerent à l'entrer en l'Ordre, voulut le Mareschal, afin que la chose feust plus authentique, que bonne lettre en feust faicte, laquelle feust scellée des seaulx de tous treize ensemble, & que apres feust publié en toutes parts du Royaume de France, afin que routes Dames & Damoiselles en ouyssent

T

146 HISTOIRE DV MARESCHAL
parler, & que elles sceussent où se traire si besoing
en auoient. Si me tais de deuifer des conuenances
du dict Ordre, pour ce que tout au long on les peult
veoir par la declaration des propres lettres par eulx
certifiées & escriptes, dont cy apres s'ensuit la te-
neur. Et ne voulut le Marechal estre le premier
nommé és dictes lettres, pour ce que Monseigneur
Charles d'Albret qui est cousin germain du Roy de
France, voulut estre compaignon du dict Ordre.
Si n'en vouloit estre nommé chef par deuant luy.
Et pour ce est mention faicte d'eulx tous ensemble,
comme veoir se peult.

CHAPITRE XXXIX.

*Le contenu des Lettres d'armes, par lesquelles se
obligeoient les treize Cheualiers à defendre
le droict de toutes Gentils-femmes à leur
pouvoir, qui les en requerroient.*



TOUTES haultes & nobles Dames
& Damoiselles, & à tous Seigneurs,
Cheualiers & Escuyers, apres toutes
recommandations, font à sçauoir les
treize Cheualiers compaignons, por-
tans en leur deuise l'Escu verd à la Dame blanche.

PREMIEREMENT pour ce que tout Cheua-
lier est tenu de droict de vouloir garder & deffen-
dre l'honneur, l'estat, les biens, la renommée, & la

louange de toutes Dames & Damoiselles de noble lignée: Et que iceulx entre les autres sont tres-desirans de le vouloir faire, les prient & requierent que il leur plaise que si aulcune ou aulcunes est ou sont par oultrage, ou force, contre raison diminuées ou amoindries des choses dessus dictes, que celle ou celles à qui le tort ou force en sera faicte veuille ou veuillent venir ou enuoyer requerir l'un des dictes Cheualiers, tous ou partie d'iceulx, selon ce que le cas le requerra, Et le requis de par la dicte Dame ou Damoiselle, soit vn, tous ou partie, sont & veulent estre tenus de mettre leurs corps pour leur droit garder & defendre encontre tout autre Seigneur, Cheualier ou Escuyer, en tout ce que Cheualier se peut & doibt employer au mestier d'armes, de tout leur pouuoir, de personne à personne, iusques au nombre dessus dict, & au dessoubs, tant pour tant. Et en briebs iours apres la requeste à l'un, tous ou partie d'iceulx faicte de par les dictes Dames ou Damoiselles, ils veulent presentement eulx mettre en tout debuoir d'accomplir les choses dessus dictes, & si brief que faire se pourra. Et s'il aduenoit, que Dieu ne veuille, que celuy ou ceulx qui par les dictes Dames ou Damoiselles seroient requis, eussent esloine raisonnable; afin que leur seruice & besongne ne se puisse en rien retarder qu'il ne prist conclusion, le requis ou les requis seront tenus de bailler prestement de leurs compagnons, par qui le dict faict seroit & pourroit estre mené à chef & accompli.

T ij

ITEM si aucuns Seigneurs, Cheualiers ou Escuyers de noble lignée, & sans vilain reproche, ont volonté de faire aucune requeste, ou ont fait ou font aucuns vœus de faire ou accomplir aucunes armes, quelles que elles soyent ou fussent, honorables & deües de faire, pource qu'il est à penser certainement que les dicts requeste & vœus ils ont grand volonté de les mettre à chef pour eulx oster de peine, & afin que plus legerement ils puissent trouuer l'accomplissement de leur desir, iceulx Cheualiers dessus nommez, tous ou partie d'iceulx, à qui iceulx voüians & requerans voudra ou voudront adresser leurs dicts vœus & requeste, à l'aide de Dieu seront ou sera prest celuy ou ceulx qui en fera ou seront requis, tous, vn, ou partie d'iceulx selon ce que le cas le requerra, de faire & accomplir les dictes armes à eulx requises. Et pour mettre le fait à execution deüe, veulent trouuer Iuge à leur pouoir dedans quarante iours apres la requeste à eulx faite, & la deuise des armes, & plus tost si faire se peut. Et apres que le dict Iuge sera trouué d'estre prest au chef de trente iours, quelque iour que le Iuge voudra, donner tout accomplissement du dict fait. Et au cas que iceulx ne pourroient trouuer Iuge, si celuy ou ceulx qui aura ou auront fait les dictes requestes & vœus le veulent pourchasser conuenable tel que par raison doibue suffire, le dict Cheualier ou Cheualiers dessus nommez sera ou seront prests de partir pour y aller trente iours apres que l'on leur aura fait à sçauoir qui sera le Iuge. Et

fil est besoing d'auoir saufconduit ou aultre seureté, ceulx qui trouueront le Iuge seront tenus de le faire auoir tel comme au cas appartiendra.

ITEM pource qu'il pourroit aduenir que plus d'un pourroit adresser son vœu & requeste à aulcun des Cheualiers dessus nommez, iceluy Cheualier sera tenu de l'accomplir à celuy qui premier luy aura faict à sçauoir. Et cela faict &ourny, si Dieu le gardoit d'essoine, apres l'accompliroit à l'autre.

ITEM au cas que aucun ou aucuns des dicts Cheualiers dessus nommez auroit ou auroient essoine raisonnable & honneste de non pouuoir accomplir les choses à luy requises, il seroit ou seroient tenus de bailler vn de leurs compaignons, lequel qu'il luy plairoit, pour donner tout accomplissement au dict faict.

ITEM s'il aduenoit que de tel nombre comme les Cheualiers dessus nommez sont, ils feussent requis tous ensemble d'accomplir aucunes armes quelles que elles soyent ou feussent, & vn ou aulcun d'iceulx feussent en voyage, ou eussent aucune essoine raisonnable, parquoy ils ne peussent estre bonnement au iour qui empriseroit, la partie à qui on le feroit à sçauoir, puis qu'il ne pourroit recouurer à temps leurs compaignons, seroient tenus de leur pouuoir d'en mettre avec eulx pour parfournir le nombre dessus dict, pour accomplir toutes choses à eulx requises. Et s'ils estoient en lieu que ils ne peussent recouurer leurs compaignons comme dict est, ne autre compaignée pour fournir le dict nom-

150 HISTOIRE DV MARESCHAL
bre, iceulx qui là seroient, ou qui se pourroient bon-
nement trouuer ensemble , seroient tenus de tel
nombre comme ils seroient de faire & accomplir
toutes choses comme dessus est dict.

ITEM si aduenoit que aucune ou aucunes Da-
mes ou Damoiselles eussent requis le secours & ay-
de de l'un de tous ou de partie des dicts Cheualiers,
& apres la requeste faicte de par les dictes Dames
ou Damoiselles aucun ou aucuns Seigneurs, Che-
ualiers ou Escuyers, pour leur requeste & vœus ac-
complir, s'adressassent à eulx d'aucunes armes quel-
les que elles soyent ou feussent, comme dessus est
dict, les dicts Cheualiers ou aucuns d'iceulx seroient
tenus, comme raison est, de faire & accomplir pre-
mierement le secours de la dicte Dame ou Damoi-
selle, & cela faict, donner tout accomplissement
aux dictes armes de quoy on se seroit à eulx adressé.
Et si ainsi estoit que aucun ou aucuns Seigneurs,
Cheualiers ou Escuyers, pour leurs vœus & requ-
stes accomplir, se feussent adressez d'aucunes armes
à aucun des Cheualiers dessus nommez, & depuis
aucune Dame ou Damoiselle requist pour son ay-
de celuy mesme Cheualier, en ce cas il pourroit esli-
re lequel qu'il luy plairoit, & apres, si Dieu le gardoit
d'essoine, donner tout accomplissement au surplus.

ITEM si aucun ou aucuns des dicts Cheualiers
dessus nommez, vn, tous, ou partie d'iceulx, estoient
ou feussent requis pour aucuns vœus ou requestes
accomplir, de faire aucunes armes, depuis la requ-
ste à eulx faicte, aucun ou aucuns autres Seigneurs,

Cheualiers ou Escuyers s'adressassent à iceluy ou à ceulx mesmes Cheualiers de combatre à oultrance, les requis, vn, tous, ou plusieurs, s'il leur plaist, peuvent delaisser leurs armes pour prendre la bataille.

ITEM si aucun ou aucuns des dictz Cheualiers ou Escuyers s'adressoient pour leurs vœus accomplir, de leur volonté, ou autrement à iceulx treize Cheualiers, ou à l'vn d'eulx, pour combatre à oultrance, comme dict est, & requissent que les vaincu ou vaincus feust ou feussent prisonniers des vainqueur ou vainqueurs, en celuy cas, & tout auant œuvre, seroit aduisée vne somme d'argent du consentement des parties, & par l'ordonnance du Iuge deuant qui ils combatroient: Et celuy ou ceulx qui seroit ou seroient oultre & desconfits, demeureroit ou demeureroient prisonnier ou prisonniers en la main du Iuge dessus dict, iusques à ce que il auroit payé & contenté, payez & contentez celuy ou ceulx qui les auroit ou auroient oultre, d'icelle somme rant seulement qui parauant auroit esté ordonnée: Et icelle payée, s'en pourra ou pourroient aller tous quittes.

ITEM si aucun ou aucuns mouroit en bataille, ou tost apres, pour achoison d'icelle, il seroit en ce cas quitte de payer aucune finance.

ITEM si aucun ou aucuns des treize Cheualiers dessus dictz, le temps durant de leur emprise, alloit ou alloient de vie à trespassement, ou eust ou eussent esoine raisonnable de non pouuoir plus bonnement porter armes, les autres compaignons en ce

152 HISTOIRE DV MARESCHAL
cas feroient tenus de mettre d'autres avec eulx pour
remplir & fournir tousiours le dict nombre.

ITEM les Cheualiers dessus nommez ont em-
ply & veulent donner tout accomplissement à tou-
tes les choses dessus dictes & escriptes, de tout leur
loyal pouuoir, à l'ayde de Dieu, & de nostre Dame,
par l'espace de cinq ans; à commencer à compter
du iour de la datte de ces presentes, & porter leur
deuise le dict temps durant. Et afin que toutes celles
& ceulx qui de ces choses oiront parler, sçaichent &
tiennent fermement que les volonteiz des dictz Che-
ualiers sont fermes de toutes ces choses accomplir,
& aussi que l'on y adioust plus grand foy, ils ont
faict seeller ces presentes chascun du seel de ses ar-
mes, & chascun y a mis son nom par escript, qui
feurent faictes le iour de Pasques fleuries l'onzieme
1399. iour d'Auril, l'an de grace mille trois cent quatre
vingt dixneuf.

MESSIRE Charles d'Albret. Messire Bouci-
caut, Marechal de France. Boucicaut son frere.
François d'Aubiffecourt. Iean de Ligneris. Cham-
brillac. Castelbayac. Gaucourt. Chasteaumorant.
Betas. Bonnebaut. Colleuille. Torfay.

ET à tant feray fin de la premiere Partie de ce
liure, & en poursuivant ma matiere par ordre com-
me les choses adueindrent de rang au contenu des
faicts du Marechal de France Boucicaut, commen-
ceray la seconde Partie, en delaisant toutes les cho-
ses dessus dictes, & entrant en aultre propos, lequel
à l'aide de Dieu bien & bel me ramenera à ma ma-
tiere.

tiere. Or me doit Dieu grace de la commencer, moyennier & finir, que ce soit au plaisir de Dieu, qui point ne defend que on loüe les bons, & que aussi ce soit à l'honneur & los de celuy qui bien en est digne, & de qui ie parle.





CY COMMENCE
LA TABLE DES RVBRI-
QUES DE LA SECONDE PARTIE
de ce Livre, laquelle parle depuis
le temps que le Mareschal eut
le Gouvernement de Gen-
nes iusques au retour
de Syrie.



- PREMIEREMENT parle de l'ancienne
coustume qui court en Italie de Guelphes
& Guibelins. I.
- Item dit de la Cité de Gennes, & de la tri-
bulation où elle estoit auant que le Ma-
reschal en feust Gouverneur. II.
- Item comme la Cité de Gennes se donna au Roy de Fran-
ce. III.
- Item dit comme Vertu plus que autre chose doibt estre cau-
se de l'exauſſement de l'homme. IV.
- Item comment le Mareschal pour sa vertu & vaillance
fut esleu pour estre Gouverneur de Gennes. V.
- Item comme le Mareschal alla à Gennes, & comment il
y fut receu. VI.

Item dit comment saigement le Marechal parla aux Geneuois au Conseil. VII.

Item dit les saiges Establissemens & Ordonnances que le Marechal feit à Gennes. VIII.

Item comment le Marechal feit edifier deux forts chasteaux sur le port de Gennes, & l'autre autre part, & comment il prist à mettre en estat les choses ruineuses & perdues. IX.

Item dit comment apres que le Marechal eut mis en estat la Cité de Gennes, il y feit aller sa femme, & comment elle y fut receüe. X.

Item comment nouuelles veindrent au Marechal que le Roy de Cypre auoit mis le siege deuant Famagouste, laquelle Cité est aux Geneuois, & comment il partit de Gennes pour y aller à grande armée. XI.

Item dit de l'ancien contens qui est comme naturelente les Geneuois & Venitiens. XII.

Item comment le Marechal donna secours à l'Empereur de Constantinople pour s'en aller en son pays. XIII.

Item comment le Marechal arriua à Rhodes, & comment le grand Maistre de Rhodes le receut, & le pria que il allast en Cypre pour faire paix & traicter. XIV.

Item comment le Marechal alla en Turquie deuant vne grosse Cité que l'on nomme l'Escandelour. XV.

Item comment le Marechal assaillit l'Escandelour par belle ordonnance. XVI.

Item les escarmouches que faisoient tous les iours les gens du Marechal aux Sarrasins, & comment ils les desconfirent & chasserent. XVII.

Item comment la paix fut faicte entre le Roy de Cypre &

le Mareschal, & comment il voulut aller deuant Alexandrie. XVIII.

Item comment les Venitiens auoient faict sçauoir par les terres des Sarrafins que le Mareschal alloit sur eulx, & comment il alla deuant Tripoli. XIX.

Item dit la belle ordonnance du Mareschal en ses batailles, & comment il desconfit les Sarrafins deuant Tripoli. XX.

Item comment on sceut certainement que les Venitiens auoient faict à sçauoir aux Sarrafins la venuë du Mareschal, & comment il preint Boton & Barut. XXI.

Item comment le Mareschal alla deuant Sayette, & sa grande hardiesse & vaillance contre les Sarrafins. XXII.

Item comment le Mareschal alla deuant la Liche, & les embusches que les Sarrafins auoient faictes pour le surprendre. XXIII.

Item comment le Mareschal, pource que ja se tournoit vers l'hyuer, s'en voulut retourner à Gennes. XXIV.

Item comment les Venitiens assaillirent le Mareschal, & la fiere bataille qui y fut, & comment le champ & la victoire luy en demeura. XXV.

Item comment les Venitiens, pour auoir achoison de faire ce qu'ils feirent, apres s'alloient plaignans du Mareschal, & de la prise de Barut. XXVI.

Item comment les Venitiens assaillirent le Mareschal, & la fiere bataille qui y feut, & comment le champ & la victoire luy en demeura. XXVII.

Item comment le Mareschal s'en alla à Gennes irrité contre les Venitiens, & des prisonniers qui furent amenez

d'un costé & d'autre.

XXVIII.

Item de la pitié des prisonniers.

XXIX.

Item comment les prisonniers mettoient grand peine par leurs lettres vers les Seigneurs de France, que le Marechal ne feist guerre contre les Venitiens, afin que leur deliurance n'en feust empeschée.

XXX.

Item comment les Venitiens senuoyerent excuser deuant le Roy de ce qu'ils auoient faict.

XXXI.

Item la teneur des lettres que le Marechal ennoya aux Venitiens apres la bataille.

XXXII.



C H A P I T R E I.

Cy commence la seconde Partie de ce present Liure, laquelle parle du sens & prudence du Mareschal de Boucicaut, & des vaillans & principaux biensfaiets que il feit depuis le temps que il feut Gouverneur de Genes iusques au retour de Syrie. Premièrement parle de l'ancienne coustume qui court en Italie des Guelphes et des Guibelins.



OMME il est notoire & assez sceu par toutes les contrées comment au pays & en la terre d'Italie court d'ancienneté la diabolique ancienne coustume semée entre eulx par l'ennemy d'enfer, comme mesmement plusieurs d'eulx tiennent, laquelle chose, comme les vengeances de Dieu soyent merueilleuses, peut-estre que telle persecution leur consent nostre Seigneur pour cause des horribles pechez qui peuuent estre en aucuns d'eulx, & en certaines contrées. Car comme tesmoigne la sainte Escripiture, aulcunes fois pour le mesfaiet d'un seul sont plusieurs punis. Ceste peruerse coustume, de laquelle nul ne sçait proprement la naissance & droict commencement, ne par quelle achoison veint la semence, quoy que plusieurs en dient, est iusques à ceste heure par tout le dict paystant enra-

cinée & accreüe, que toutes les villes & generale-
ment la terre en est empoisonnée & corrompue.
Ceste playe & maudisson est vne generale destruc-
tion par effusion de sang, laquelle est entre eulx,
& l'ont continuée depuis si long temps que du con-
traire n'est memoire. Et est telle celle pestilence que
és Citez principalement, dont mainte en y a de
moult notables, riches & belles, aultant que en pays
du monde, si en paix feussent, les hommes y sont
diuisez & ennemis mortels les vns contre les autres
par lignaiges, & s'appellent les vns Guelphes, & les
autres Guibelins, lesquels sans chalenge de terre,
d'acquerir Seigneurie ne autre chose, ains seulement
par dire Tu es du lignaige Guelphe, & ie suis du
Guibelin: Nos deuanciers se hayrent, aussi ferons
nous. Et pour celle cause seulement, & sans sçauoir
autre raison s'entreoccient & meshaignent chascun
iour comme chiens, les fils comme feirent leurs pe-
res, & ainsi d'hoir en hoir continuë la meschanceté,
ne il n'est Iustice qui remedier y puisse. Car eulx
mesmes qui soustiennent celle coustume ne souffri-
roient mie que pour celle cause Iustice y feust faicte
pour icelle mortelle haine. Si comme les vns gai-
gnent sur les autres, font és Citez souuent Seigneu-
ries nouuelles. Et de ce sont venus les Tyrans d'ice-
luy pays, esleus à voix de peuple, à volonté, & sans
raison ne loy de droict. Car telle coustume ont
communément, que quand vne des parties gaigne
sur l'autre, & est la plus forte, adonc crient ceulx qui
se voyent au dessus, Viue tel, viue tel, & meure tel.

Et lors eslisent l'un d'entre eulx, & occient s'il ne s'enfuit cil qui estoit deuant. Et quand il aduient que l'autre partie regaigne, & a à la fois l'aduantage, autant leur en font, & à fureur de peuple, dont Dieu nous garde, tout est taillé en pieces. Et par ceste maniere se destruisent entre eulx Cité contre Cité, Chastel contre autre, tout en vn pays, & voisins contre voisins. Par ceste voye se deffont à present aultant ou plus que oncques mais feirent. Et est dommaige d'iceluy pays & grand pitié, qui est vn des meilleurs, plus gras & plus riches qui au monde soit, si paix y estoit. Dont il aduient souuentefois & est aduenue que quand l'une des parties se sent si au bas, que elle veoid bien que venger ou soustenir contre l'autre ne se pourroit, ils quierent & demandent Seigneuries estrangeres, & les procurent, & à icelles se donnent, en espoir que ils soyent soustenus & portez. Mais qu'en aduient-il. Icelles gens inconstans & variables en tels propos, pour bien petit d'achouison, ou quand ils s'ennuyent d'icelle Seigneurie, leur face ores cil qui sera Seigneur tant que il sçaura de bien, ou ceulx qui seront commis de par luy, si ne les tiendra-il ja en paix, ainçois se rebelleront & occiront luy & ses deputez s'ils peuuent, & recrieront & esliroint vn autre de nouuel. Pour laquelle chose, veüe ceste generale coustume du pays, sans faillir me semble trop grand folie à celuy ou à ceulx qui prennent d'eulx la Seigneurie, quoy qu'ils s'y donnent ou baillent, tant sçachent promettre d'estre bons & loyaux, d'en entreprendre le gouuer-

gouuernement, quelques grands Seigneurs ou puissans qu'ils soyent, si tousiours entre eulx ne se tiennent les plus forts, tant de gens d'armes comme de bastons. Car soyent certains que ils se rebelleront quand ils pourront, & ne s'y fie nul, & qui autrement le faict, en vain se trauaille & deceu s'en trouue. Mais à traire à nostre propos, ainsi par la diuision d'entre eulx, comme deuant est dict, souuent aduiuent que iceulx malheureux sont contraincts d'appeller Dominations estrangeres pour les gouuerner & seigneurier. Or notez vous qui ce oyez quelle maudisson, & si oncques iadis eut en Egypte plus diuerse playe.

CHAPITRE II

Cy dit de la Cité de Gennes, & de la tribulation où elle estoit auant que le Marechal en feust Gouverneur.




OV R descendre au propos pour lequel i'ay faict ceste narration, & à quoy principalement veux tendre, est à sçauoir que comme entre les autres Citez d'Italie soit la riche, noble & ancienne Cité de Gennes, fondée iadis par Ianus, descendu des haultes lignées Troyennes, icelle entre les flammes & feu maudict & maling dessus dict, ardoit comme les autres Citez d'icelle pestilence, & tellement estoit ja con-

X

fumée que en la ville n'y auoit plus bon homme,
 personne d'estat, ne qui aimast vie honorable. Car
 n'est mie à entendre, quoy que ie die de ceste dou-
 loureuse coustume qui court entre les Italiens, qu'il
 n'y ait de tres-vaillans Gentils-hommes, & de bons
 & honnestes preud'hommes qui ne voudroient fors
 bien, & qui dolens sont de ceste persecution. Car
 sans faillir si a maint & grand foison, & qui volon-
 tiers y remedieroient s'ils pouuoient : mais l'arro-
 gance & l'orgueil que là a pris le commun peuple,
 en qui communément n'a grand raison, ne laisse
 aux bons & saiges vsr de leurs vertus. Si n'auoit
 mais en ladite cité demeuré fors robeurs, mauuai-
 ses gens, & sans honneur. Et adonc estoit la puissan-
 ce de Gennes toute aneantie. Mais comme Dieu
 pourueoit estrangement aux choses quand il luy
 plaist, par le regard de pitié, par aduanture pour le
 bien faict d'aucun de leurs predecesseurs, ou peult-
 estre à la priere ou pour le merite de quelque bonne
 personne du pays qui deuotement en pria, ou peult-
 estre pource que ne voulut pas Dieu pour le bien de
 Chrestienté que telle noble Cité feust destruite,
 ou en luy rendant le merite de ce que plusieurs fois
 les ennemis de la foy ont esté par elle guerroyez, l'a-
 voulu Dieu releuer & traire hors de l'arsure des sus-
 dictes perilleuses flammes, & luy administrer reme-
 de & restauration de mort à vie.

CHAPITRE III.

*Cy dit comment la Cité de Gennes se donna
au Roy de France.*

 I A D V E I N T enuiron l'an de grace mille trois cent quatre vingt dixsept, que 1397.
les Geneuois, ainsi comme ils ont d'ancienne coustume de gouverner leur Cité & le pays qui leur appartient sous l'obeissance d'un chef que ils eslisoient entre eulx avec le Conseil d'un nombre des anciens de la Ville, selon leurs Statuts esleurent pour Duc celuy qui leur sembla homme plus propice & idoine à les bien gouverner. Celuy Duc estoit nommé Messire Antoine Adorne, & encores que il feust du peuple, & non mie Gentil-homme d'extraction, si estoit-il saige, & bien & prudemment les gouuernoit & tenoit en Iustice. Mais ainsi comme deuant est dict, comme il soit comme impossible tenir en paix les communes & peuple d'icelle nation, qui ne se peut souffrir pour leur grand orgueil à nul suppediter, si par force n'est, ains veulent tous estre maistres, se rebellerent contre iceluy leur Duc & le chasserent. Mais apres fait tant par amis que il feut rappelé à la Seigneurie, en laquelle quand il eut vn peu esté d'espace, luy qui sage estoit, considera la grande variété de ses citoyens, lesquels il sentoit ja murmurer & machiner contre luy. Si veid bien que longuement ne la pourroit garder ne tenir pour la diuision d'eulx, qu'il

X ij

conuenoit tenir & gouuerner sous grande puissance. Si faduifa celuy Duc pour le bien de la dicte Cité d'une faige cautele. Car il feit tant par dons, grandes promesses, & belles paroles, que les principaulx des nobles, & qui debuoiert auoir les plus grandes dominations en la ville, dont ceulx du peuple les auoient chassiez, ne y demeurer sinon peu d'eulx n'osoient, feurent d'accord d'eulx donner au Roy de France. Et ceste chose agréerent mesmement des principaulx de ceulx du peuple. Quand il eut toute ceste chose traictée & bastie, il le manda hastiuement par ses messaiges en France. Le Roy eut Conseil que ce n'estoit mie chose à mettre à neant. Et que bon seroit pour luy d'estre saisy & reuestu de si noble ioyau comme de la Seigneurie de Gennes, par laquelle sa puissance & par mer & par terre pourroit moult accroistre. Si enuoya vn Cheualier de France avec belle compaignée de gens pour en recepuoir les hommaiges, & gouuerner pour le Roy la dicte Cité. Mais iceluy ne leur fut pas longuement agreable, ains conueint qu'il s'en partist. Et ainsi semblablement plusieurs des Cheualiers de France y feurent enuoyez, & mesmement le Comte de Sainct Pol. Mais aucuns par aduanture pour les cuider tenir en amour, leur estoient trop mols & trop familiers, & frequentoient avec eulx souuent, & dansoient avec les Dames. Si n'est pas la maniere de gouuerner ceulx de delà. Parquoy tousiours il conuenoit que iceulx Gouverneurs s'en partissent.

CHAPITRE IV.

*Cy dit comment Vertu plus que autre chose
doibt estre cause de l'exaucement
de l'homme.*

P O V R plus conuenablement entrer en la matiere dont nous esperons parler, pouuons traire à propos vn petit Prologue de vaillance cheualeureuse, tant en baillant exemples, comme en alleguant raisons. Quant au regard de raison, aduisons quelle chose doibt estre cause de l'exaucement de l'homme. Ceste chose bien au vif considerée me semble, selon que ie treuve mesmement és anciens escripts, & par raisonnable iugement, que ce doibt estre Vertu & non autre cause. Et à ce s'accorde Aristote, semblablement Senecque & tous les autres Saiges., selon le contenu de leurs dictz. Mais en quelle maniere seront apparentes les vertus de l'homme? Sans faillir tout ainsi que le fin or ou fin argent ne se peult parfaictement congnoistre s'il n'est mis en la fournaise en laquelle il s'affine, semblablement ne se peut purement appercevoir la vertu de l'homme, si ce n'est en la fournaise de l'exercice de tres-grands & pesans affaires, esquels il demonstre sa prudence quand il les sçait bien conduire & ordonner au mieulx pour traire à bon chef, resister aux fortunes qui suruiennent, &

X iij

aduifément pourueoir à celles qui peuuent aduenir, constamment porter grand fais & grand charge, diligemment en auoir cure par grand force de couraige, entreprendre faigement grandes choses, ne les delaisser pour peu d'achoisson, par grád soing & sçauoir les conduire, & ainsi des autres choses. Lesquelles vertus seroient mussées en l'homme, quoy que elles y feussent, s'il n'estoit à l'esprouue comme dict est. Et quand l'homme esprouué en telle force & vaillance est esleu ou esleué en dignité d'honneur, c'est chose deüe & qui doibt estre, & que par exemple aussi se peut prouuer que les vertus soyent & doibuent estre cause des promotions & exaulcemens des hommes vertueux. Ne fut-ce pas doncques grand honneur que iadis à Scipion le vaillant Cheualier, qui depuis feut surnommé l'Africain, comme racompte Valere en son liure, feit le tres-grand ost des Romains estant en Espaigne és conquestes des terres estrangeres qui faisoient adoncques les dicts Romains, quand ils enuoyerent leurs messaigers à Rome requerir au Senat & aux Princes qui gouuernoient la Cité, que le dict Scipion leur feust enuoyé pour les gouverner? Car tous les Cheuetains de l'ost luy donnoient leur voix par grand desir, & toutesfois estoit celuy Scipion pour lors moult ieune homme pour telle charge auoir. Mais comme dict iceluy Valere, Ieunesse d'aage ne doibt tollir à vertu son loyer où que elle soit trouuée. C'est à dire que si le ieune homme est vertueux on ne doibt mie regarder au faict de sa promotion

à l'aage, mais aux vertus. Car iceulx Cheualiers & gens d'armes auoient autres fois veu par espreuuele cheualeureux sçauoir & force de couraige, avec la hardiessse de celuy qu'ils requeroient, pour laquelle fiance ils le desiroient pour estre pourueus de tres-conuenable Duc & conduiseur, duquel desir ne feurent mie fraudez. Car comme leur demande feust exaussée, feurent conduicts, gouuernez & menez par celuy Scipion si vaillamment que ils feurent vainqueurs en toutes leurs emprises.

CHAPITRE V.

*Cy dit comment le Mareschal pour sa vertus
& vaillance fut esleu & estably pour estre
Gouuerneur de Gennes.*



IN SI comme i'ay dict & prouué cy deuant comme par vertu l'homme doibt estre esleué en honneur, comme fut iadis le vaillant Cheualier Scipion l'Africain, à nostre propos traire ce qui est dict, ne fut mie moindre honneur au Mareschal de Boucicaut dont nous parlons, quand pour ses vertus les Geneuois qui n'estoient mie de sa parenté, nation, ny affinité, comme ceulx de Rome estoient à Scipion, mais estranger de toutes choses, parquoy nulle faueur ne pouuoit estre cause de celle eslection, l'enuoyerent requérir au Roy de

France pour estre leur Gouverneur , nonobstant que il feust encores assez ieune homme pour telle charge auoir. Car comme les dicts Geneuois qui de leur vsaige frequentent communément les parties d'outre mer, l'eussent veu au dict pays en plusieurs voyages , tant en la compaignée du Comte d'Eu prochain parent du Roy de France , comme au voyage de Hongrie, en celuy de Constantinople, & maints autres où il feut, comme est dict cy deuant en la premiere Partie de ce Liure , les dicts Geneuois qui par longue main & grand aduis auoient veu, consideré & aduisé la bonté du dict Mareschal, tant en bon sens & preud'homme, comme en Cheualerie & vaillance de corps & de hardiesse, parquoy selon leur iugement leur apparoissoit & sembloit bien digne en toutes choses de recepuoir charge d'aucun grand gouuernement. Et par ce non mie tost ne par soubdain aduis, mais par grande deliberation de Conseil, & par le commun accord d'entre eulx enuoyerent au Roy par leurs honorables messaiges requerer & prier que la charge du gouuernement de Gennes luy feust establee, & que enuoyé leur feust. Car de commun accord l'auoient esleu, si au Roy plaisoit. De ceste chose eut conseil le Roy de France. Car nonobstant leur demande iuste & droicturiere , n'estoit mie petite chose au Royaume de France eslongner la presence du Mareschal si preud'homme, pour laquelle chose furent entre les saiges plusieurs opinions pour & contre , de faire ou de laisser. Toutesfois à la fin, consideré

consideré que le Royaume n'estoit mie pour le temps oppressé de grandes guerres, & aussi que c'estoit chose deüe de pourueoir à la ruine de la Cité & pays de Gennes, qui adonc estoit moult malade, & adonc au bas & grand disete auoit de saige repareur, laquelle dicté Cité en espoir d'auoir secours & aide à sa miserable douleur, l'estoit mise & rendüe és bras du Roy de France comme à souuerain Prince, feut deliberé que il iroit. Adonc par le Roy feut commis au bon & saige Mareschal Boucicaut le Gouuernement de Gennes & de tout le pays qui aux Geneuois compete & appartient, & feut faict propre Lieutenant du Roy, representant sa personne, & ayant l'Administration & Baillie de tout en tout, & tenus à faicts & dictés tous ses Establissemens, Ordonnances, & Commandemens, comme si le Roy feust en personne; comme le Roy luy certifia par ses Lettres patentes, passées, signées & sceillées present son Conseil.

CHAPITRE VI.

*Cy dit comment le Mareschal alla à Gennes,
& comment il y fut receu.*



LE MARESCHAL qui eut par le Roy la commission & Gouuernement de Gennes, comme dict est, appresta son erre au plus tost qu'il peut. Et luy qui en toutes choses scait estre pourueu, saigement confi-

Y

dera que avec le bon sens & aduis qu'il conuient auoir à bien gouuerner les gens de delà, estoit aussi necessaire pour reparer la ruine & deschéement du lieu, de l'ayder de force & de puissance contre les diuerses volonteiz & contraires opinions qui par la diuision d'entre eulx communément y font. Et pour ce par la volonté du Roy se pourueut de bonnes gens d'armes, en telle quantité comme par bon conseil eut aduis que il luy conuenoit. Quand tout son erre eust appresté, adonc preint congé du Roy & des Seigneurs. Si se partit à belle compaignée, adressant sa voye droict à Gennes, en allant par la Cité de Milan, laquelle diète Cité sied comme à deux iournées de Gennes. Là arresta aucuns iours, tant que vers luy feurent arriuez belle compaignée de gens d'armes qu'il attendoit. Et en ce lieu luy veindrent au deuant des principaux & des greigneurs de la Cité de Gennes, qui humblement luy feirent la reuerence, & grand semblant de ioye feirent de sa venuë. Les aucuns d'eulx par aduenture le faisoient feintement, pource que ils veoient que la maistrise n'estoit mie leur : & les autres de bonne volonté estoient de luy ioyeux, & le desiroient, en espoir qu'il les meist & teint en paix, & reparaist la ruine de leur Cité : Et le Mareschal les receut toutes-benignement. Si se voulut informer, & ja auoit faict couuertement de plus longue main, lesquels d'entre eulx il pouuoit reputer pour preud'hommes, & en qui il se peust fier, & quels contents se tenoient de la Seigneurie du Roy de France, &

quels estoient amateurs de paix & d'equité. Et aussi se voulut-il informer quels estoient seditieux & mettans discorde entre eulx, & rebelles à la Seigneurie du Roy. Si fut de tout ce bien & suffisamment informé, par quoy il luy veint à congnoissance comment aucuns des plus grands & des plus notables de tous s'estoient voulu attribuer la Seigneurie, & estoient machinateurs de trahisons & de discorde, & par especial l'un d'eulx, si comme cy apres sera dict. Quand il sceut des bons & des mauuais toute la verité ne l'oublia mie, & bien leur sçaura monstrier en temps & en lieu. De Milan se partit pour venir à Gennes, & au seur qu'il alloit luy venoient nobles hommes citoyens & gens du peuple de toutes parts au deuant, faisans feste, quelque courage que les aucuns d'eulx eussent, & tous luy venoient faire la reuerence, tant que tous bons & mauuais faillirent hors de la Cité. Et ainsi entra dedans Gennes la veille de la feste de la Toussaincts, l'an de grace mille quatre cent & vn, où à grand ioye feut receu. Si fut mené & conuoyé à belle compaignée tant de gens d'armes comme des gens de la ville & du pays au Palais, qui moult est bel & notable, & qu'ils auoient bien & bel & richement faict pour son estat ordonner, & pourueoir de toutes choses conuenables. Si croy bien qu'il y en eut de tels que quand ils veirent son redoutable maintien, & la maniere de sa venuë, & comment il estoit accompagné, que quelque chere que ils feissent n'estoient pas bien à seur; car coupables se sen-

toient. Mais les bons de rien ne s'en effrayèrent, ain-
gois plus asseurez feurent que deuant. Car lors estoit
venu celuy qui les defendroit contre les mauuais &
contre tous ennuis. Tantost qu'il fut arriué fait faire
commandement par toute la Ville que tout hom-
me de quelque estat qu'il feust rendist les armes, &
les portaist au Palais, sans nulle retenir, sous peine
de la teste, & que nul ne feust si hardy de point en
auoir, ne tenir en sa maison, ne porter couteau, fors
à couper pain. Si leur conueint à ce obeir, quoy que
il leur pesast. Or peurent à ceste fois congnoistre les
Geneuois que main de maistre les gouuernoit. Si
veissiez incontinent porter au Palais à grans presses
harnois de toutes parts, dont moult en y auoit &
grand foison de beaux & de riches. Et le saige Gou-
verneur les fait bien & bel mettre en sauueré, & les
bien garder. Et aussi leur fait deffence sur la dicte
peine que nul ne feust si hardy de tenir couteau, ne
eulx assembler en parlement, en Eglise, ne aultre
part.

CHAPITRE VII.

*Cy dit comment le Mareschal parla saigement
aux Geneuois au Conseil.*

LE LENDEMAIN sans plus de demeure
feurent tous les plus notables & princi-
paux hommes de Genes assemblez avec
le Marechal à Conseil. Et adonc parla à eulx par

faige maintien, & en discrettes & rassises paroles leur dit comment le Roy son souuerain Seigneur l'auoit là enuoyé à leur requeste, dont il les remercioit de la bonne opinion & fiance que ils auoient en luy, & que pour secourir à la desolation en quoy ils estoient pour cause de ceux de mauuaise volôté qui estoient entre eulx, lesquels persecuroient les bons, estoit là enuoyé afin de punir les mauuais, & les bons tenir en paix, & faire Iustice à tout homme. Pour laquelle chose accomplir vouloit forces auoir, & toute sa puissance sans nulle espargne y employer, à l'honneur du Roy & de luy, & au profit d'eulx. Et pource les requeroit & prioit que vrais & loyaux subiects voulussent estre tousiours au Roy de France comme ils anoint promis, & que si ainsi le faisoient ils feussent leurs & certains que il les defendroit de toute sa puissance, à l'aide de Dieu, contre tous ennemis, maintiendrait Iustice, & en paix & equité les tiendrait, & à son pouuoir accroistrait le bien & vtilité publique. Mais au cas que il pourroit sentir, sçauoir ou apperceuoir le contraire en eulx ou en aucun d'eulx, & quelque machination d'aucune trahison ou forfaiture contre la Royale Majesté ou contre luy, que ils sceussent de vray & tous leurs se reussent que il n'y auroit si grand que il n'en fait telle punition que les aultres y prendroient exemple, mais si preud'hommes & loyaux subiects vouloient estre, que ils ne doublassent point de luy. Et nonobstant que il feust estably leur Gouverneur & chef, ne pensassent que il voulust enuers eulx vser

d'arrogance ne maistrise rigoureuse , par voye de faict & à sa volonté. Car ce n'estoit mie son intention , ains vouloit estre avec eulx paisible comme citoyen & amy de Gennes, & vser de leur loyal conseil , sans lequel rien ne pensoit d'establi ne faire chose quelconque touchant la police & gouvernement du pays. Telles paroles & assez d'autres belles & bonnes leur dit le saige Gouverneur , pour lesquelles , & pour son bel & honorable maintien, reputerent & priserent moult son sçauoir , & tres-contents en feurent. Si le remercierent moult , & offrirent corps & biens, & feauté & loyale obeissance, comme bons subjects du Roy de France leur Seigneur , & à luy son Vicaire & Lieutenant leur Gouverneur. Apres ces paroles parlerent de plusieurs choses. Et là luy feurent acculez les principaux conspirateurs & machinateurs de trahisons , & qui tousiours auoient esté cause de rebellion , & mesmes de tels y auoit qui luy estoient allez au deuant & faict la reuerence des Milan. Et par especial vn nommé Messire Baptiste Boucanegra , qui auoit traicté de faire occire tous ceulx qui estoient à Gennes de par le Roy , & s'estoit voulu attribuer la Seigneurie de Gennes. Iceluy Boucanegra & aucuns des autres ses complices des principaulx ordonna le Gouverneur prendre. Lequel commandement feut tost executé, dont celuy feut moult esbahy quand il veid mettre la main à soy de par le Roy & de par le Gouverneur. Car pour la grande autorité dont il se reputoit ne pensoit que nul osast s'adresser à luy:

mais tout cerien né luy valut. Mais le saige Gouverneur qui bien sçauoit que par delà les lignaiges s'entrehayent, & ont enuie les vns sur les autres, ne voulut pas pour quelque accusation que on feist d'eulx leur garder rigueur de Iustice sans suffisante information de leurs faicts, laquelle fut faicte tres-diligemment, & bien fait examiner les dicts prisonniers. Lesquels apres le rapport de la suffisante enqueste, & la confession de leur propre bouche, furent trouuez coupables. Pour laquelle chose iceluy Baptiste, tant feust-il de grande auctorité, afin que les aultres exemples y preinssent, & deux aultres avec luy, feurent decapitez en la place publique. Dont ceulx de la ville qui iamais ne l'eussent cuidé, pour le lignaige & autorité dont il estoit, feurent tous espouuentez; & tant que chascun eut depuis peur de mesprendre: & mesmement les propres gens du Gouverneur. Et moult redoubterent la rigueur de sa Iustice, parce que ils veirent & apperceurent que son intention estoit de n'espargner nul malfaieteur quel qu'il feust. Car à vn de ses Cheualiers propres feist-il trancher la teste pour cause que vn de ces dicts prisonniers qu'il luy auoit commis à garder luy estoit eschappé. Si commença à faire raison & Iustice à toute gent, & punition des mauvais selon ce que ils auoient desseruy, sans espargner grand ne petit, ne quelconque homme de quelconque estat qu'il feust. A ceulx qui auoyent esté traistres & rebelles du Roy de France & à sa Seigneurie, faisoit publiquement trancher les testes, pendre

les larrons & meurtriers, brusler les bougres, couper membres selon les meffaiçts, bannir les seditieux & mauuais, les vns à temps, les autres à perpetuité, selon que le cas le dormoit. Et aussi faisoit misericorde & pardonnoit aux humbles & aux ignorans, quand leur cas estoit digne de pitié. Si faisoit comme le bon pasteur qui trie & separe les bestes rongneuses d'entre les saines, afin que la maladie ne se prenne par tout, & ainsi que faict le bon Medecin qui tranche la mauuaise chair de peur que elle empire la bonne. Si n'estoit favorable à nul par corruption, ne par quelconque familiarité tenir part ne bande. Et vraiment cestuy noble Gouverneur ensuiuant la voye de droicte & Iustice que il tenoit, sembloit que il feust appris à l'eschole de Cheualerie que tenoient iadis les Romains, comme raconte Valere, qui dict que tant estroicement gardoient les regles de droict, lesquelles regles Valere appelle Discipline de Cheualerie, que ils n'espargnoient point leurs affins & parens, ne leurs plus prochains de les punir quand ils mesprenoient contre les dictes regles. La sainte Escriture compare le droicteur Iusticier à la vertu diuine, & dict Salomon, Celuy qui n'espargnera Iustice sera donneur de paix & de tranquillité, c'est à dire que là où Iustice est bien gardée, là est paix & ioye. Si feut depuis le sage & droicteur Gouverneur si craint pour la grande Iustice que il tenoit, sans espargner le priué non plus que l'estranger, ny le grand non plus que le petit, que chascun eut peur de cheoir en faulte.

Adonc

Adonc commencerent à venir de toutes parts les bons anciens & les nobles hommes qui parauant n'osoient venir ny habiter en la ville, & que les populaires & les robeurs & mauuais gens qui ne viuoient fors que de pillerie & d'occisions les vns sur les autres auoient chassez. Si se retirerent deuers le Gouverneur, faisans feste de son ioyeux aduenement, & il les receut tres-benignement, & les mauuais qui coupables se sentoient prirent à fuir & à eulx absenter, & mussier par destours. Mais par sus montaignes & par bois, comme on faiët aux loups, & en leurs tasnières & repaires fait chasser à eulx le prudent Gouverneur, tant que ores par force & puis par cautele preint les principaulx chefs, & d'iceulx pour les autres espouenter feir iustice.

CHAPITRE VIII.

Cy dit les saiges Establissemens & Ordonnances que le Mareschal feir à Gennes.



S I FEIT tantost le saige Gouverneur ses establissemens, & ordonna que sur la place de la ville, laquelle est grande & belle deuant le Palais, auroit iour & nuit sous diuerses bannieres & Capitaines gens d'armes en suffisante quantité pour la garde du Palais & de la ville. Apres ce fut bien informé quels estoient tenus les plus saiges & plus preud'hommes de la ville, & iceulx esta-

Z

blit sur le faict de la Iustice. Et bien leur enchargea que sans espargner homme quel qu'il feust, grand ou petit, Iustice gardassent par telle regle de droict qu'il n'y peust appercevoir nulle fraude, ne que plainte en ouist. Et si en aucun d'eulx pouuoit appercevoir faueur nulle à vne partie plus que à l'autre, feussent tous leurs que il les en puniroit, que les autres y prendroient exemple. Et avec ce, afin que fraude n'y peust auoir, ordonna que on peust appeller du Iuge deuant luy. La auoit estably ceulx qui seroient de son Conseil, où il preint des plus saiges anciens & des plus autorisez, & par iceulx se conseilloit selon leurs Statuts & anciennes manieres de gouverner le faict de la police à leurs coustumes. Item feit crier par toute la ville, & faire deffence sur peine de mort, que nul ne feust si hardy de courir sus l'un à l'autre, ne mouuoir sedition pour cause des parts de Guelphes & de Guibelins : mais feist chascun sa marchandise & son mestier, vescuissent en paix, & n'eussent autre soing. Et que si nul leur faisoit tort, s'en plaignissent à la Iustice, & si Iustice ne leur faisoit droict, veinsent à luy, & droict leur seroit faict. Adoncques veissiez les bons marchans & hommes de bonne volonté, qui souloient mussier le leur de peur d'estre robez de mauuaise gent, mener grand ioye, & mettre hors leurs marchandises à plain, & par mer & par terre. Et les changeurs qui leur argent souloient tenir mussé, & leur change clos : (car s'ils les eussent ouuerts, tantost eussent esté robez,) prirent à ouurir changes, & leurs finances

mettre dehors, & le faict des monnoyes tenir, comme il est de raison, apertement & à plain, sans peur ne crainte d'estre desrobez, & leurs riches ioyaulx mettre en public sur celle belle place, où ces belles haultes tours & maisons toutes de pierres de marbre sont à l'enuiron. Et veissiez ouurir de tous costez boutiques de toutes marchandises, & mettre dehors les tresors qui auoient esté mussés par grand piece. Et ceulx de mestier, dont les plusieurs fouloient estre robeurs, conueint s'ils vouloient viure eulx prendre à leurs labeurs & mestiers. Et ainsi se preint chascun à faire ce qu'il sçauoit. Et par celles voyes & ces regles la Iustice bien gardée, & le tout bien ordonné par le sens & preud hommie du bon Gouverneur, se preint tantost la Police à bien amender.

CHAPITRE IX.

Cy dit comment le saige Mareschal fait edifier deux forts chasteaux, l'un sur le port de Gennes, l'autre autre part. Et comment il repreint à remettre en estat les choses ruineuses & perduës.



VEC ces belles Ordonnances dessus dictes, le saige Gouverneur qui bien sçauoit ce que dict est, Que à bien gouverner les gens de par delà conuient que on se monstre estre le plus fort, & aussi que on le soit. Afin que les Geneuois peust mieulx seigneurier, c'est à dire les rebelles, non mie pour leur faire extortions, ne griefs, ne pour vser enuers eulx de nulle tyrannie, ne les tenir en indeüe subjection, mais seulement pour leur oster toute hardiesse de eulx rebeller comme ils auoyent accoustumé, si volonté leur en venoit, tantost feït chercher ouuriers & maïstres de massonnerie bons & propices à l'œuure que faire vouloit. Si feït bastir & hault leuer deux beaux & forts chasteaux en la ville de Gennes, dont l'un est assis sur le port de Gennes, là où les galées & le nauire sont & arriuent, que on appelle la Darfe. Si est moult bel & fort à deux grosses tours. Si le feït afin que le dict nauire en feust plus seurement contre tous ennemis, & tous griefs qui aduenir pourroient. Ce dict œuure feut bien aduancé, tant que selon le deuis & ordonnance du dict Gouverneur feut le chastel accompli & parfaict, grand, fort & bel, comme aujourd'huy on le peut veoir. Quand ce feut faict, le saige Gouverneur le feït tres-bien garnir d'artillerie & de toute maniere de trait, & de choses qui à deffence appartiennent, & de bonnes gens d'armes. Et ainsi s'en teint saisy, tant que dedans & dehors peut aller à sa poste, quelque chose que aduenir peust, & nul

n'entrer ne issir sans son congé. L'autre chastel feist edifier en la plus forte place de la ville, & est appellé Chastellet, qui tant est fort que à peu de deffence se tiendroit contre tout le monde. Si est faict par telle maniere que ceulx d'iceluy chastel peuuent aller & venir maugré tous leurs ennemis, en l'autre chastel qui sied sur le port que on diët la Darse. Deux autres beaux chasteaux feist-il depuis edifier dehors la cité, l'un en un lieu que l'on diët Chaury, & l'autre à Lespesse. Avec ces choses tous les chasteaux & forteresses de dehors la cité, qui sont appartenans à la Seigneurie de Gennes, dont moult en y a de beaux & de notables, lesquels plusieurs des plus forts d'entre les Geneuois s'estoyent attribuez, & saisis s'en tenoient, feist tantost rendre & restituer à la diëte Seigneurie, par ce que il enuoya gent faire commandement sous peine de mort que tantost & sans delay feussent rendus. Auquel commandement feut obey sans contredit. Item feist monter sur mer gens saiges & bons, lesquels il enuoya de par le Roy & de par luy faire visitation sur toutes les terres & Seigneuries des Geneuois, pour sçauoir de leur estat & gouuernement. Et tiennent les diëts Geneuois tres-grandes & notables Seigneuries és parties du Leuant, sur la mer majour, & en autres parties. Comme Capha en Tartarie, qui est vne grosse ville marchande. Et en Grece tiennent la cité de Pera, qui est moult belle ville, & sied coste Constantinople. Item l'Isle de Scio où croist le mastig, au droit de Turquie. En Cypre tiennent Famagouste, qui

182 HISTOIRE DV MARESCHAL
moult est bonne cité. Et tirant à la Tane, en la mer
majour, outre Capha, & par de là Constantinople
quatorze cent milles, tiennent grand pays & foison
de forteresses. Sans les Isles, dont en y a plusieurs là
& autre part bien habitées & riches, & autres terres
qui long seroit à dire, qui toutes sont sous la Sei-
gneurie de Gennes. Et adueint environ ce temps
que vne Isle bonne & bien peuplée, qui sied assez
pres de Gennes, appelée l'Isle d'Elbe, meut guerre
contre les Geneuois. Si y enuoya le Gouverneur
quatre galées bien garnies de gens d'armes, qui mie
n'y allerent en vain. Car tant y feirent que l'Isle
gaignerent.

CHAPITRE X.

*Cy dit comment apres que le Mareschal eut
mis la Cité de Gennes en bon estat, il y feit
aller sa femme, & comment elle y
feut receüe.*



PRES que toutes ces choses feurent
faicte & accomplies, & que la Cité de
Gennes commençoit ja à reluire en
prosperité, & que ses nobles & riches
citoyens plus ne mussoient leurs puis-
sances, ains demonstroient leurs richesses publique-
ment & à plain, tant en estat tenir, comme en ri-
ches robes & habillemens, & que ces nobles Dames

de Gennes vous reprirent leurs riches ornemens, atours, & vestures de velours, d'or, de soye, de perles & pierreries de grand valeur, selon l'vsaige de par delà, & qu'ils se prirent tous à viure ioyeuſement, & en paix, ſoubs les ailles du ſaige Gouverneur, & en ſa fiance mettre nauire ſur mer à cauſe de leur marchandiſe, en plus grande quantité que ils ne ſouloient, & à tirer gain de toutes parts, ſi que ja eſtoient entrez en leur tres-grande proſperité. Quand tout ce veid le ſaige Gouverneur, adonc luy ſembla temps de faire venir vers ſoy ſa tres-chere & aimée eſpouſe, la belle, bonne & ſaige Madame Antoinete de Turenne, laquelle ne viuoit pas aiſe loing de la preſence de ſon Seigneur, ne luy ſembablement: car ils ſ'entreament de grand amour, & moult meinent enſemble belle & bonne vie. Mais alors vn peu de temps eſtre loings conuenoit: Lors par Cheualiers notables, & gens de grand honneur, enuoya la querir en ſon pays en moult bel eſtat, comme il appartenoit. Et quand de la ville feut approchée comme à vne iournée, luy allerent alencontre belle compaignée, tant de Cheualiers & Gentils-hommes des gens du Mareſchal, comme des plus notables hommes de la Cité. Et ainſi au ſeur que elle approchoit, luy alloient gens au deuant en moult riches atours, car tous ſe veſtirent de robes de diuerſes liurées, depuis les plus grands qui de velours & nobles draps eſtoient veſtus, iuſques aux artiſans que nous diſons gens de meſtier. Tant que toute la Communauté ſaillit hors à cheual celle iournée, &

184 HISTOIRE DV MARESCHAL
tous luy allerent faire la reuerence, & à ioye la receu-
rent. Et ainsi en moult riche & grand arroy tant d'a-
tour comme de robes & montures, & belle compai-
gnée de Dames, de Damoiselles, de Cheualiers,
d'Escuyers, & nobles bourgeois & peuple de Gen-
nes, entra en la ville, où tres-ioyeusement de son
Seigneur qui au Palais l'attendoit feut receüe, & de
toutes autres gens. Si y eut grand feste demenée &
icelle venue, & feut adonc la ioye encommencée
plus grande à Gennes. Car le bien, l'honneur, la
courtoisie & le sens d'icelle noble Dame accroissoit
encores plus le plaisir & bien que ils prenoient en
leur bon Gouverneur. Car semblablement trouue-
rent en elle tout sens, toute benignité, grace & hu-
milité. Et ces Dames de Gennes la preindrent à visi-
ter à grands compaignées, & à elles offrir toutes à
son seruice & commandement, & la Dame de bon-
naire les receuoit tres-doucement, & tant vers elles
estoit benigne, que tres-grandement toutes s'en
loioient.

CHAPITRE XL

*Cy dit comment nouuelles veindrent au Ma-
reschal que le Roy de Cypre auoit mis le siege
deuant Famagouste, laquelle Cité est aux
Geneuois, & comment il se partit de
Gennes à grand armée pour y aller.*



LA AVOIT gouverné enuiron vn an
 la cité de Gennes le bon Mareschal,
 auquel espace de temps l'auoit adonc
 remise au chemin de prosperité com-
 me dict est, quand nouuelles luy vein-
 drent que le Roy de Cypre auoit mis le siege deuant
 Famagouste, laquelle est vne riche cité qui sied
 mesmes en la terre de Cypre, & est aux Geneuois
 comme dessus est dict, & l'ont possedée tousiours,
 & encores font depuis qu'ils l'eurent conquise con-
 tre le Roy de Cypre, successeur du bon Roy Pierre,
 auquel eurent guerre. Pour laquelle dicte cité cui-
 der recouurer s'il eust peu, auoit le dict Roy de Cy-
 pre qui à present regne assiegé icelle. Adonc le che-
 ualeureux Gouverneur qui ces nouuelles ouït, & à
 qui moult eust pesé si en son temps les Geneuois
 feussent descheus en rien de leurs Iurisdiccions &
 Seigneuries, lesquelles à son pouuoir desiroit &
 vouloit soustenir & accroistre, pour cause que au
 Roy de France en appartient la souueraineté, au
 nom duquel il a le Gouvernemen, dit que ainsi ne
 demeureroit mie, & que bien & tost remedié y fe-
 roit. Si feit hastiuement son erre apprestier, pour en
 propre personne y aller. Toutesfois luy qui en nul
 faict ne veult vser de volonte sans grande delibera-
 tion & sans raison, s'aduisa pour le mieux se mettre
 en tout debuoir, & enuoya deuers le Roy de Cypre
 auant que il allast sur luy, l'enhorter & prier que il
 ostant le siege, & qu'il se deportast de faire ennuy
 ne grief à la Cité du Roy de France. Et que ce vou-


Aa

lust-il faire par bien & par amour, & que cherement l'en prioit, ou sinon qu'il se teint seur qu'à luy au-
 roit guerre, & que tel oist luy ameneroit que dom-
 maige luy porteroit. Quand d'ainsi le faire eut deli-
 beré avec son Conseil, feust commis à ce messaige
 parfournir le saige & bon Cheualier qui tout son
 temps a esté vaillant en armes, preud homme en
 conscience, & discret en conseil, l'Ermite de la Faye.
 Si feit le Mareschal tost apprestier vne galée, où
 monta sus le dict Ambassadeur. Apres ce, nonob-
 stant que le Mareschal ne voulust point aller courir
 sus au Roy de Cypre iusques à tant que sa responce
 eüst ouye, son noble couraige plain de Cheualerie
 desira employer son corps és faicts sans lesquels
 Cheualier n'est honoré. C'est à sçauoir en exercice
 d'armes, comme le temps passé auoit accoustumé.
 Mais mieux ne luy sembla pouuoir employer son
 temps que sur les ennemis de la foy. Et pource deli-
 bera son voyage à double intention. C'est à sçauoir
 sur le Roy de Cypre, au cas que à raison ne se met-
 troit, & puis contre les mescreans. Si feit tantost ap-
 prester son nauire, & bien garnir de toutes choses à
 guerre conuenables. Et quand il eut tres-bien faictes
 ses ordonnances de garder & gouuerner la Ville
 tant qu'il seroit hors, (Pour laquelle chose faire laissa
 son Lieutenant le Seigneur de la Vieuille tres-bon
 Cheualier & saige, bien accompagné de gens
 d'armes, & de tout ce qu'il conuenoit,) se partit le
 1403. troiesme iour d'Auril, l'an mille quatre cent trois,
 accompagné de huit galées chargées de bons

gens d'armes, d'arbalestriers, & de toute telle estoffe & garnison qui en guerre appartient. Si singla en peu d'heures en mer, car bon vent le conduisoit, tenant son chemin droict à Rhodes.

CHAPITRE XII.

Cy dit de l'ancien contens qui est comme naturel entre les Geneuois & les Venitiens.



VANT que plus outre ie die du dict voyage que feit le Mareschal en Cypre, & és parties de delà, pour mieulx reuenir au propos où ie veux tendre, c'est à sçauoir que ie compte sans rien oublier toutes les principales aduâtures & faicts qui au preux & vaillant Mareschal adueindrent en iceluy voyage, me conuient vn petit delaisser ceste matiere, & entrer en vne autre, laquelle comme ie ne puisse bien tout dire ensemble, me ramenera à mon propos comme i'espere. Vray est, & chose assez notoire & sceüe, cōme ja de trop long temps, ainsi comme communément aduient, que Seigneuries de semblable ou esgale puissance, ou presques pareille, qui sont voisines & prochaines les vnes des autres, ne s'entr'aiment mie: Et ce aduient par l'orgueil qui court au monde, qui tousiours engendre enuie, qui donne couraige aux hommes de suppediter les vns les autres, & surmonter en cheuance & honneurs. Pour ces causes les Geneuois &

Aa ij

les Venitiens n'ont mie esté bien amis, laquelle inimitié par longue coustume de diuers contens & guerres meües entre eulx est tournée comme en haine naturelle, comme communément aduient en tel cas. Car estre ne peult que apres grands guerres, où que elles soyent, quoy que la paix soit apres faicte, que le record rancuneux n'en demeure aux terres blessées & dommaigées, là où les traces apparoissent des occisions, des feux boutez, & des ruines & dommaiges qui leur en demeurent. Lesquelles choses representent aux enfans qui apres viennent les maulx & les griefs que les ennemis de la contrée feirent à leurs predecesseurs, dont ils se sentent. Et ces choses souuent renouvelées ne sont mie cause de nourrir amour entre les parties, qui par guerre sentregreuent, ou sont greuez. Or est-il ainsi que moult de fois, pour plusieurs debats & chalenges de terres, de chasteaux & de Seigneuries, comme ils ont leurs Iurisdicions en Grece & autre part, & grandesterres les vns & les autres assez marchissans ensemble, que maintes guerres ont esté entre les Geneuois & les Venitiés, par lesquelles maintes fois à tant se sont entremenez, que à peu a esté qu'ils ne se soyent destruits. Et puis quand ainsi bien batus festoient, apres par quelque bon moyen cessoit leur guerre par forme de paix, & non mie toutesfois ostée de leurs couraiges la haine ou rancune, laquelle, comme i'ay dict, est & demeure comme naturelle entre eulx. Si est vray que quand le haineux veoid son ennemy bien au bas, soit par luy,

soit par autre, son ire est aussi comme amortie, & plus n'y daigne penser. Mais s'il aduient que par quelque bonne fortune il se recouure & retourne en force & prospérité, adonc reuient la haine & redouble l'enuie. Tout ainsi estoit-il des Venitiens enuers les Geneuois. Car jaçoit que ja pieça apres moult grande & mortelle guerre, ils eussent faict paix, ne feut mie pourtant, comme dict est, estainte en eulx couuerte rancune. Mais icelle rancune n'a par long temps entre eulx porté nul mauuais effect. Car comme les Geneuois longue piece eussent tant esté oppressez de diuerfes douleurs par leur mesme pourchas, & par leurs diuisions, comme dict est, que nul n'auoit cause d'auoir sur eulx enuie. (Car chose où n'y a fors malheureté n'est point enuieée) dormoit lors & estoit coye du costé des Venitiens la dicte rancune. Mais quand Dieu & fortune leur est apparu propice par le bon moyen du Roy de France, par lequel ont eule secours du bon & sage Gouverneur; adonc fut raiuée l'ancienne enuie & inimitié qui tant au cœur les poignit que volontiers se feussent peinez de desaduancer la grande prospérité où ils veirent les Geneuois entrez. Laquelle dicte prospérité & bonne fortune ils repouterent estre à leur prejudice, en tant que si ainsi montoient & alloient croissant, pourroient estre en puissance, Seigneurie & honneur plus grands qu'eulx: & par ainsi pourroient par aduanture encores estre par les Geneuois renouvellez les anciens contens au grand grief des Venitiens. Ces choses considerées, moult

Aa iij

se voulurent peiner, s'ils pourroient desaduancer celuy qui estoit le chef & le gonfanon de leur prosperité, c'est à sçauoir leur saige Gouverneur : car bien leur sembla que s'ils pouuoient à ce attaindre, le surplus petit priferoient. Mais ceste chose conuenoit faire par grande dissimulation & aduis, tellement que leur dessein ne feust apperceu tant que aucune achoison trouuassent de ce faire. Ceste pensée garderent entre eulx iusques au point que ils cherchoient. Dont il adueint que quand ils sceurent que le Mareschal estoit party pour aller oultre mer, comme i'ay dict cy deuât, adonc leur sembla temps de trouuer moyen de meêtre leur dessein à effect. Si armerent hastiuement & sans reueler leur intention treize galées, & bien & bel les garnirēt de bons gens d'armes, d'arbalestriers, & de tout ce qui appartient par mer en faiêt de guerre. Quand tres-bien se feurent garnis, vistement se meirent en mer, & tirerent apres le Mareschal. A reuenir à mon premier propos, n'auoit pas le dict Mareschal passé le Royaume de Naples, quand luy veindrent les nouuelles de l'armée des Venitiens, mais pourquoy c'estoit faire on ne sçauoit. Adonc luy comme prudent Cheuetaine qui sur toutes choses doibt auoir regard, pensa sur ceste chose sçauoir mon si ce pourroit estre pour luy faire aucune greuance. Mais à la parfin, comme c'est la coustume d'un chascun preud'homme cuidoer que les autres veüillent loyauté comme luy, osta de soy tout soupçon, considerant qu'il auoit bonne paix & de pieça, sans auoir rompu en rien les con-

uenances entre les Geneuois. & les Venitiens. Si creut que ce ne pouuoit estre pour sa nuifance; si n'en feit nul compte & tousiours teint outre son chemin. Quand tant eut erré par mer qu'il feut venu comme à vingt milles pres de Modon, qui est aux Venitiens, luy veindrent nouuelles que les dictes treize galées estoient au port de Modon. Si feut derechef aulcunement pensif pour quelle emprise les Venitiens telle armée pouuoient auoir faicte. Si s'arresta en vne Isle pres d'illec, & pour sçauoir la verité de ceste chose enuoya vne galée à Portogon, & Montjoye le Herault qui saige & preud'homme est, & subtil en son Office, dedans la dicte galée, pour enquerir s'il pouuoit de leur dessein. Lequel apres que il en eut faict toute diligence rapporta ce qu'il auoit trouué, C'est à sçauoir que voirement y estoient les dictes galées; mais pour quelle emprise, ne sçauoit. Adonc entra le Marechal en grande pensée & soupçon de ceste chose: car il ne pouuoit imaginer ne apperceuoir que les Venitiens eussent caulé par chose qui luy apparust d'auoir faict telle armée: toutes-fois son tres-hardy couraige de rien ne s'en espouuenta, nonobstant que il eust beaucoup moins de gens & de nauire. Et delibera que supposé que celle assemblée feust pour luy courir sus, que rien ne les doubteroit, & que à bataille ne leur fauldroit mie. Et de ceste chose delibera avec son Conseil: Mais toutesfois pource que la verité de leur faict ne pouuoit sçauoir, & n'estoit mie certain que contre luy feust, deffendit à

tous les siens que ils se gardassent que le premier mouuement ne veint d'eulx; car il ne vouloit estre cause d'esmouuoir contens, ne que Venitiens peussent dire que par luy feust. Mais bien leur dict & enhorta que si par les autres la meslée venoit, que ils se portassent comme vaillans. Le lendemain matin le Mareschal feit mettre ses galées & ses gens en tresbelle ordonnance, & tous apprestier de combattre si befoing estoit, & mettre deuât les arbalestriers tous prests de tirer, & les gens d'armes demonstrier toute apparence de bon visaige de eulx defendre contre qui les assauldroit. Et ainsi que feut ordonné, se partit le Mareschal à tout ses huit galées pour venir au port de Modon. Et quand il feut assez pres, il enuoya deuant vne galée pour sçauoir des nouuelles. Et quand les Venitiens veirent venir la dicte galée, ils l'accueillirent à grand ioye & feste, & se monstrent ioyeux de la venuë du Mareschal qui pres estoit. Si se partirent du port, & ioyeusement luy vindrent au deuant, & grand recueil luy feit le Capitaine des dictes galées qui se nommoit Messire Carlo Zeni, & tous les autres, & le Mareschal à eulx, & ainsi amis se trouuerent. Si retournerent toutes ensemble au dict port de Modon. Et fut le dict Mareschal du tout hors du soupçon qu'il auoit eu.

CHAPL.

CHAPITRE XIII.

*Comment le Marechal donna secours à
l'Empereur de Constantinople pour
s'en retourner en son pays.*



QUAND le Marechal feut arriué à Modon , là trouua les messaigers de l'Empereur de Constantinople nommé Karmanoli qui l'attendoient , par lesquels il luy mandoit que pour Dieu , & en l'honneur de Cheualerie & Noblesse, il ne voulust point passer outre sans que il parlast à luy. Car il estoit en la Morée vingt milles en terre, si le voulust vn petit attendre , & il viendroit à luy. Le Marechal receut les messaigers à tel honneur qu'il leur appartenoit, & leur dict benignement que ce feroit-il tres-volontiers. Si ordonna tantost pour luy aller au deuant le Seigneur de Chasteaumorant à tout sa gent , & Messire Iean d'Oultremarin Geneuois, à tout vne galée, & luy l'attendit à vn port appellé Baselipotano. Quand le Marechal sceut que l'Empereur approchoit, il luy alla à l'encontre, & receut à grand honneur luy , sa femme & ses enfans qu'il auoit amenez, comme raison estoit. Le dict Empereur le requist moult benignement , en l'honneur de Dieu & de Chrestienté, que il luy voulust donner confort & passaige iusques à Constantinople. Le

Bb

Mareschal respondit que ce feroit tres-volontiers, & tout ce que pour luy pourroit faire. Si ordonna tantost pour le conduire quatre galées, lesquelles il bailla en gouuernement au bon Seigneur de Chasteau-morant. Si se partit à tant l'Empereur, & le Mareschal le cōuoya iusques au cap sainct Angel. Quand là feurent arriuez veindrent au Mareschal les mesfaigers des Venitiens, qui auoient sceu comme il auoit baillé quatre de ses galées pour conuoyer l'Empereur. Si dirent que ils estoient deliberez si leur conseilloit d'en bailler aultres quatre pour plus feurement le mener où il vouloit aller. A ce respondit le Mareschal que ce seroit tres-bien faict, & grand honneur à la Seigneurie de Venise & au Capitaine d'icelles galées. A tant preint congé l'Empereur du Mareschal & moult le remercia, & aussi les Venitiens. Si s'en partit, & teint son chemin droict à Constantinople. Et le Mareschal à tout ses quatre galées sans plus tira vers Rhodes. Et les Venitiens qui demurerent à neuf galées allerent avec luy, & telle compaignée luy tenoient, que quand il alloit ils alloient, quand il arrestoit ils l'arrestoient, & ainsi le firent iusques à l'Isle de Nicocie. Adonc le Mareschal, tousiours tendant au bien de la Chrestienté, & à l'exaucement & accroissement de la foy, comme celuy qui desiroit la confusion & desaduancement des Sarrafins, se pensa d'un grand bien. C'est à sçauoir que si le dict Capitaine à tout son armée vouloit estre avec luy, & que tous d'un bon vouloir allassent courir sus aux mescreans, qu'ils estoient

belle compaignée de bonnes gens pour leur faire vne tres-grande enuahie & greuance. Si manda par son messaiger bien emparlé & faige au Capitaine des dictes galées toute ceste chose, & comme c'estoit son intention que au cas, au plaisir de Dieu, il auroit paix avec le Roy de Cypre, son desir & volonté estoit de greuer les ennemis de la foy quelque part que de leur courir sus verroit son point. Si luy sembloit ceste emprise bonne & belle, & honorable, & que si au dict Capitaine plaisoit que à ceste besongne feussent ensemble, il seroit participant au preu & en l'honneur qui en istroit. Car il auoit esperance que à l'aide de Dieu ils feroient belle & honorable besongne. Le Capitaine respondit au messaiger que grand mercy rendoit moult de fois à Monseigneur le Gouverneur du bien & de l'honneur qu'il luy annonçoit & offroit, & que quand il seroit à Rhodes, où il alloit dedans deux ou trois iours, tellement luy en respondroit que il s'en tiendrait pour content.

CHAPITRE XIV.

Comment le Marechal arriua à Rhodes, & comment le Grand Maistre de Rhodes le receut, & le pria qu'il allast en Cypre pour traicter paix.



TANT s'approcha de Rhodes le Marechal, & quand le Grand Maistre du lieu qui est nommé Messire Philebert de Nillac sceut que il estoit pres, adonc luy alla au deuant à belle compaignée de Cheualiers & de bonne gent, & le receut tres-ioyeusement & à moult grand honneur. Et ainsi le mena en son chastel qui moult est bel & hault, assis au dessus de la ville; lequel il auoit fait bien & richement ordonner pour sa venuë. Là mangerent ensemble, & parlerent de plusieurs choses, & de maintes aduantures & nouuelles. Et tost enuoya ses messaigers au Marechal le Capitaine des dictes galées des Venitiens, par lesquels il luy faisoit responce, Que de ce que il l'auoit enhorté d'aller avec luy sur les Sarrafins, il n'auoit mie commission de la Seigneurie de Venise, sans laquelle il n'oseroit entreprendre de faire aucune nouuelleté, si l'en voulust tenir pour excusé, car aultre chose pour lors n'en pouuoit faire. Si n'en teint plus plaide le Marechal. Si est vray que quand le Seigneur de Chasteaumorant se partit de luy pour conuoyer l'Empereur, comme dict est, il luy ordonna pour cause de croistre son armée que il luy amenaist toutes les galées & galiotes que de la Seigneurie de Genes & de tous leurs alliez pourroit trouuer. De laquelle chose toute diligence meit de ce accomplir, tant que plusieurs en eut assemblées. C'est à sçauoir vne galée & vne galiote du pays de Payre, & vne galée & vne galiote d'Ayne, vne galée &

Une galiote de Methelin, & de Scio deux galées. Et à tout le dict nauire veint à Rhodes deuers le Marechal qui là attendoit l'Ermite de la Faye que il auoit enuoyé deuers le Roy de Cypre, comme deuant est dict, pour sçauoir sa responce. Ne demeura pas moult que l'Ermite veint, & à brief parler rapporta que il n'auoit peu trouuer le Roy de Cypre en nulle raison d'accord de paix, pour quelconque cause qu'il luy sceust auoir monstrée que il le deust faire. Quand le Marechal entendit ce, dit que puisque le Roy de Cypre ne se vouloit desister & oster de son tort, & venir à raison, que il ne faudroit mie à luy faire bonne guerre. Adonc feut tantost appresté son nauire, & remonter ses cheuaults, & toute son armée mettre en ordonnance. Quand le Grand Maistre de Rhodes, à qui moult pesoit pour le mal qui ensuiure en pourroit, que guerre y eust entre le Roy de Cypre & les Geneuois, veid que c'estoit à bon, & que plus remede n'y auoit, requist moult le Marechal que vn don luy voulust donner, lequel l'octroya volontiers. Ce feut qu'il ne voulust mie aller descendre en Cypre iusques à tant que luy mesme eust esté parler au dict Roy de Cypre. Ceste chose accorda le Marechal. Si monta tantost le Maistre de Rhodes sur sa galée, & l'Ermite de la Faye avec luy, lequel feut monté sur la sienne, & encores la galée de Methelin avec eulx, Et ainsi à trois galées allerent deuers le Roy de Cypre.

CHAPITRE XV.

*Cy dit comment le Mareschal alla en Turquie
deuant une grosse Cité que on nomme
Lescandelour.*



VAND le Grand Maistre de Rhodes feut party pour aller en Cypre, comme dict est, le bon Mareschal qui estoit demeuré ne voulut mie tandis que le traicté se feroit perdre temps, ains pour la grande volonté qu'il auoit de nuire aux mescreans desira employer sa gent de faire aux dicts Sarrafins aucune enuahie. Si se conseilla aux Cheualiers du pays & aux Geneuois en quel lieu leur sembloit plus conuenable d'aller faire guerre sur les ennemis de la foy. Si luy dirent que s'il alloit en Turquie deuant vn bel chastel & ville que on nomme Lescandelour, il pourroit faire celle part belle & honorable conqueste, & aussi c'estoit son chemin en approchant vers Cypre. Adonc sans plus attendre fait ses galées ordonner. Si monta sus avec sa belle & noble compaignée de tres-bons gens d'armes, tous de nom & d'elite, & tres-desireux de bien besongner & d'accroistre leur renommée. De Rhodes se partit en belle ordonnance. Et comme il alloit par mer rencontrerent vne grosse naue de Sarrafins, laquelle tantost ils combairent

tant que elle fut prise, & groslement y gaignerent. Si alla tant par plusieurs iournées qu'il arriua deuant Lescandelour droict à vn Dimanche, à l'heure de None. Adonc preint à aduiser la dicte ville, laquelle sied en partie sus la marine, & y a vne grosse tour qui garde le haure, & puis va s'estendant au hault d'une montaigne où sied au chef vn fort & hault chastel qui garde la ville, laquelle est partie en deux parties, puis au bas est de l'autre costé la terre plaine venant sur la marine, où il y a moult beau pays & grands manoirs & iardinaiges. Adonc saillirent hors des nefz les bonnes gens d'armes par belle ordonnance, comme le faige Marechal leur auoit ordonné. Et quand ils eurent gaigné terre, & feurent tous assemblez sur la plaine, adonc feit le Marechal plusieurs Cheualiers nouueaux, dont d'aucuns me souuient des noms & non de tous. C'est à sçauoir le Barrois, le fils du Seigneur de la Choletiere qui nepueu estoit du dict Marechal, le Seigneur de Chasteau-neuf en Prouence, Messire Menaut, Chacagnes, Messire Louys de Montigian qui y mourut, & grand nombre d'autres. Et y leuerent bannieres plusieurs autres vaillans Cheualiers & Escuyers, tous de grande volonté de bien faire. Si se trouuerent sur ceste place huit cent Cheualiers & Escuyers tous duits à la guerre, & gens de grande eslite, vaillans & renommez de nom & d'armes, & pouuoient estre en tout enuiron trois mille combatans, tous tresardens & courageux de faire prouesses & vaillantes pour l'exaucement de la foy Chrestienne, &

200 HISTOIRE DV MARESCHAL
pour accroistre leurs renommées. Et entre eulx
estoit le tres-vaillant Mareschal comme preux Che-
uetaine qui les mettoit en ordonnance, & par ses
bons & cheualeureux enhortemens les admone-
stoit qu'ils se portassent comme vaillans. Car il auoit
esperance en Dieu, en nostre Dame, & en Saint
George, que ils feroient bonne iournée. Ha qu'il
faisoit bel veoir ceste belle compaignée, en laquelle
estoint assemblées tant de bannieres de renom-
mée, C'est à sçauoir la banniere de nostre Dame,
celle du Mareschal, celle du Seigneur Dacher, celle
du Seigneur de Chasteaumorant, celle du Seigneur
de Chasteaubrun nommé Messire Guillaume de
Nillac, la banniere du Seigneur de Chasteauneuf,
celle du Seigneur de Puyos, & autres que nommer
ne sçay !

CHAPITRE XVI.

*Cy dit comment le Mareschal assaillit Lesca-
delour par belle ordonnance.*



LE MARESCHAL ordonna son af-
sault en trois parties, c'est à sçauoir com-
meit le vaillant Seigneur de Chasteau-
morât à tout belle compaignée à com-
batre du costé de la marine, son Mareschal appelé
Messire Louys de Culan à tout cent hommes d'ar-
mes, cent arbalestriers & cent varlets, meit pour
garder

garder vn pas par où secours pouuoit venir en la ville, & luy avec le Seigneur de Chasteaubrun, & l'autre partie de ses gens, assaillirent du costé de la porte. Quand toute l'ordonnance feust faicte, qui feut comme à heure de None, adonc pour commencer l'assault, prirent trompettes à sonner si hault que tout en retentissoit. Lors commencerent à assaillir de toutes parts, & ceulx de dedans à eulx defendre par grand vigueur, & ainsi ne finirent de donner & de receuoir des coups, tant qu'il y en eut de morts & de naurez grand foison d'un costé & d'autre. Moultrouua grand force & grand defence du costé de la marine le Seigneur de Chasteaumorant. Car la tour qui gardoit le haure estoit fort garnie de trait & de gens d'armes qui moultrien bien la defendoient, & espoissément lançoient à eulx. Mais vous veissiez nos gens comme preux, par grand vigueur, nonobstant toute defence, agrapper contremont ces murs & dresser eschelles, & là estriuer l'un contre l'autre à monter sus des premiers, & à qui mieulx mieulx s'alloient là esprouuer. Si feut combatu en eschelle par grande hardiesse & moultrien vaillamment: mais trop feurent leurs eschelles courtes, pour laquelle cause conueint ainsi demeurer celle iournée. Le bon Messire Louys de Culan qui gardoit le pas, comme dict est, n'y trauailla mie en vain. Car tant s'y peina à tout l'estendart du Marechal, & la bonne compaignée qu'il auoit, que nonobstant que il y eust fort combatu, & qu'il y trouuaist qui bien luy deffendist, si gaigna-il le pas mal-

Cc

gré tous les ennemis, dont il doit grand honneur auoir. Car tant est celuy pas forte place, que le bon Roy de Cypre, qui autresfois à le prendre s'estoit traouillé, oncques n'en peut venir à chef. Si fut profitable la prise, car par ce eussent affamé la ville, si encores y feussent demeurez. Et ainsi dura cest assaut, où assez eurent nos gens bien exploicté iusques à tant que la nuit veint qui les departir. Le lendemain derechef prirent à assaillir, & par deux fois l'assaut donnerent par moult grand fierté, & moult aussi trouuerent qui bien se defendit, mais toutesfoisant se peina le vaillant Chasteaumorant à toute sa gent que le haure à tout le bas de la ville feut prins, & entrerent au port malgré la deffence de la tour. Là estoient les boutiques des marchandises, que ils appellent magasins, bien garnies de toutes marchandises. Car moult est celle ville marchande. Tout prirent ce que emporter peurent, & au nauire qui y estoit, c'est à sçauoir quatre fustes, deux galées, vne galiote, & deux naues, bouterent le feu, & tout ardirent.

CHAPITRE XVII.

*Les escarmouches que faisoient tous les iours
les gens du Mareschal aux Sarrazins,
& comment ils les desconfirent
& chasserent.*



A V TEMPS que ceste chose adueint, le Seigneur de Lescandelour auoit guerre contre vn sien frere, & tenoit les champs à tout grand ost à cinq iournées de là. Mais quand il ouït dire la venuë de nos gens, tantost veint vers eulx, & tant s'approcha en intention de les combatre que veoir les peut. Mais la grande hardiesse & le maintien que il veid au vaillant Cheuetaine, & en sa cheualeureuse compaignée, luy osta la hardiesse de venir leuer le siege. Et pour ce se logea à demy mille de l'ost, & le contresiegea: car trop le redoubtoit. Mais toutesfois quand son point cuïdoit veoir, venoit escarmoucher nos gens comme à costé. Mais à qui se venoient-ils iouer? Car ils ne faillirent mie à estre bien receus. Si y auoit souuent grande & fiere escarmouche: mais tousiours y laissoient les Sarrafins ou plume, ou aïlle, & bien y estoient batus. Le Marechal desiroit moult les combatre, mais ils ne l'attendoient mie: ains s'enfuyoient, & s'alloient retirer & rafraischir és iardinaiges drus & espais qui coste la ville sont. Il voulut moult trouuer voye s'il eust peu de les faire saillir de là, & les attraper dehors. Pour laquelle chose s'aduïsa d'une telle cautele. Il ordonna que l'on tirast de nuict quatre vingt cheuaux d'une naue, & iceulx fait cacher dedés les tentes. Quand ce veint au lendemain, le Marechal fait aller à l'escarmouche vne partie de ses gens, & leur ordonna que ils feissent semblant d'auoir peur, si fuissent, & tout de gré se laissassent rebouter. Et ils le feirent, & pa-

reillement le soir deuant l'auoient faict. Laquelle chose moult accreust le cœur aux Sarrafins, tellement qu'ils veindrent avec nos gens iusques à la banniere de nostre Dame, puis s'en retournerent. Mais pour la chaleur du Soleil qui hault estoit, s'alerent rebouter ésdicts iardinaiges pour eulx rafraichir, en intention de retourner à l'escarmouche apres la chaleur du iour. Quand le faige Mareschal les veid là ficher, & que ils n'entendoient que à eulx ventrouiller par l'herbe fresche és ombrages, adonc fait tirer hors lesdicts cheualx & gens bien armez dessus, les lances és poings, & les ordonna en deux parties, dont il prit l'une avec soy, & l'autre com-
meit au Seigneur de Chasteaumorant, avec ce ordonna vne bataille de gens de pied legerement armez, d'archers & de varlets. Et quand cest arroy eust tout faict, lequel il auoit de longue main bien appointé, adonc tout à coup alla d'une part environnant les dicts iardinaiges, & Chasteaumorant de l'autre. Et les gens à pied se ficherent dedans si appertement, que les Sarrafins qui desarmez festoyent ne peurent auoir espace de reprendre leurs harnois. Si se ficherent nos gens entre eulx, & tous les occirent de traict & à bonnes espées. Adonc qui veid esbahis ceste chiennaille grand ris en peust auoir: car ils ne scauoient se mectre en defense, ny n'osoient faillir dehors, pour ceulx à cheual que ils voyoient. Non pourtant se meirent plusieurs à la fuite, qui de nos gens feurent receus aux pointes des lances. Et ainsi feurent tous occis, excepté aucuns

qui à force de course de cheuaulx eschapperent, & se tapirent en quelques destours. Et par ce le Seigneur de Lescandelour à tout son ost feust si espouventé, pour la grande perte qu'il auoit faicte, & des plus grands & vaillans de sa compaignée, que il s'enfuit és montaignes, & depuis n'osa descendre, ne se monstrier vers nos gens. Et le preux & vaillant Mareschal, apres celle desconfiture, rassembla ses gens, & ne voulut mie que longuement suiussent les fuitifs, ains meit les siens en belle ordonnance, & en belle bataille. Car il ne scauoit si le Seigneur de Lescandelour rassembleroit sa gent pour luy reuenir courir sus par grande ire & desdaing. Si se pourueut de deffence auisément, & auoit ainsi ordonné ses batailles. Il estoit en plains champs à tout vne bataille, & le Seigneur de Chasteaumorant en vne autre, pour secourir les aultres, si mestier en auoient. Et puis l'ost estoit à tout la bāniere de nostre Dame, qui gardoit le pas de l'entrée de la ville. Et en ceste maniere & ordonnance attendit le Mareschal longue piece. Mais assez pouuoit attendre. Car les Sarrafins n'auoient intention ny volonté fors de fuir. Et ainsi se passa celle iournée. Le lendemain au matin le Mareschal ordonna vne belle compaignée de gens d'armes pour aller gagner vne montaigne où les Sarrafins s'estoyent retirez: mais si tost que les ennemis les sentirent venir, ils s'enfuirent d'autre part, & se ficherent és bois. Adonc nos gens descendirent en la plaine, & gasterent tout le pays à l'environ, où il y auoit de moult beaux Palais, de grands

manoirs, & beaux iardinaiges, par tout bouterent le feu, & tout allerent gastant. Quand le Seigneur de Lescandelour veid que nos gens ne faisoient semblant de eulx desloger, il enuoya ses messaigers deuers le Marechal, & luy manda en se complaignant, que moult estoit esmerueillé pourquoy il luy faisoit si grand guerre, veu que oncques il n'auoit porté dommaige à luy ne à nul des siens, ne mesmement aux Geneuois, parquoy ils deussent ce faire, & que s'il luy plaisoit auoir paix avec luy, que à tousioursmais seroit son amy, & aux Geneuois aussi, en tout le seruice que il pourroit faire, & que il presentoit luy, sa puissance, & Seigneurie, pour estre avec luy contre le Roy de Cypre, & contre qui il luy plairoit. Apres ces nouuelles, le faige Marechal, qui toutes choses desiroit faire au mieux, aduisa que il ne scauoit s'il auroit guerre au Roy de Cypre, & que s'il y auoit guerre, celle contrée estoit bonne & assez pres pour eulx refraischir, & pour auoir viures. Si eut de ceste chose aduis avec son Conseil, où il fut deliberé que le meilleur estoit de faire paix, puis que si humblement le requeroit. Et ainsi le feirent, & tantost apres le Marechal, qui quatorze iours auoit demeuré au lieu, se retira à tout son ost en ses galées.

CHAPITRE XVIII.

*Comment la paix fut faicte entre le Roy de
Cypre & le Marechal, & comment il
voulut aller deuant Alexandrie.*




VAND le Marechal se retira en ses galées, luy veindrent nouuelles que paix estoit faicte entre luy, les Geneuois, & le Roy de Cypre, si la maniere des conuenances luy plaisoit. Si appella son Conseil, & feut veu que les conditions des dictes conuenances estoient toutes telles que ils demandoient. Si agreea la paix, de laquelle auoir fut assez ioyeux, afin de mettre à effect le bon desir qu'il auoit de porter dommaige aux mescreans, & fut son intention d'aller en Egypte deuant Alexandrie. Adonc manda querir tous les patrons de naues & de galées. Si leur dict l'intention qu'il auoit, & ce qu'il voyoit à faire, si vouloit que partie du nauire allast deuant. Les dicts patrons luy respondirent que à partir de là pour prendre leur adresse tout droict en Alexandrie, le vent leur estoit trop contraire, parquoy ils ne pourroient nullement prendre le port d'Alexandrie: mais leur conuenoit retourner à Rhodes, & de là prendre l'adresse du vent. De laquelle chose faire leur en donna le Marechal licence. Et luy à tout ses galées s'en retourna vers

Cypre, pour certifier & confirmer la paix, telle que le grand Maistre de Rhodes l'auoit bastie & faicte avec le Roy de Cypre. Si alla tant qu'il arriua à vn port de galées qui s'appelle Pandée, où le dict grand Maistre de Rhodes & le Conseil du Roy de Cypre l'attendoient. Et fut là iurée & confirmée la dicte paix. Et quand ce feut faict, par la priere du dict grand Maistre; & aussi des gens du Roy de Cypre, il alla plus oultre, où le Roy de Cypre & luy se trouuerent ensemble. Et luy veint le dict Roy au deuant, lequel le receut à tres-grand honneur & chere, & le mena en ses chasteaux & citez, où il auoit faict grand appareil pour sa venuë. Si voulut donner de tres-grands dons au MareŒchal, & vingt-cinq mille ducats comptant. Mais il ne les voulut oncques prendre, ains l'en remercia grandement, en disant que il ne l'auoit point deŒseruy, & qu'il n'en auoit pas besoin, car le Roy de France son souuerain Seigneur luy donnoit assez. Mais s'il luy plaisoit l'aider de ses gens d'armes, & des souldoyers qu'il auoit en son pays, & de ses galées luy voulust prester, pour aller avec luy sur les mescreans, que ce prendroit-il volontiers, & grand gré luy en Œcauroit. Et le Roy luy respondit que ce feroit-il volontiers. Si luy bailla deux de ses galées chargées de gens d'armes, combien que l'vne s'enfuit; car c'estoient courŒaires. Là auoit esté le MareŒchal quatre iours. Si ne voulut plus Œjourner, adonc preint congé du Roy, & s'entredonnerent de leurs ioyaulx. Si entra à toute sa gent en ses galées, en intention d'aller droict

droiçt en Alexandrie. Tost feurent en mer, mais n'eurent pas grandement erré, comme les mariniens tiroient à tourner enuiron l'Isle de Cypre, pour tenir leur chemin en Alexandrie, apres les naues que le Marechal y auoit deuant enuoyées, qu'il commença vn vent contraire si tres-grand, que pour sens & puissance que mettre y sceussent ne pouuoient auant aller, combien que de tout leur pouuoir s'en efforçassent & estonnassent. Ne leur dura pas petit cest estrif, ains y feurent trois iours entiers, & si n'auoient mie à aller plus de six milles à estre en l'adresse du vent qui les conduisit droiçt en Alexandrie. Quand les mariniers veirent que de toute leur puissance ne pouuoient auant aller, dirent au Marechal que oncques en leur vie telle chose n'auoient veu, & quant estoit d'eulx ils pensoient que c'estoit miracle de Dieu, qui ne vouloit mie pour aucun grand bien, ou pour le sauement de luy & de ses gens, que il allast celle part: car selon qu'il leur sembloit ce vent n'estoit taillé de cesser d'vn grand temps. Si eut en conseil que il laissast celle voye, & allast aultre part. Adonc eut aduis d'aller en Syrie deuant Tripoli, car là seroit ce voyage bel & bon, & si auoit en poupe vent propice. Si voulut là aller, nonobstant que les Geneuois luy cōseillassent de s'en retourner à Genes, & disoient que il auoit assez faict. Mais ce ne voulut-il mie faire. Si alla tant que il arriua à Famagouste: mais pour celle fois gueres n'y arresta. Si prit là vne galée, & le lendemain au matin arriua deuant Tripoli.

CHAPITRE XIX.

*Comment les Venitiens auoient faiët sçauoir
par les terres des Sarrafins que le Mareschal
alloit sur eulx; & comment le dict Mares-
chal alla deuant Tripoli.*



R N O V S conuient retourner à la narration que cy deuant ay dicté & représentée de la haine couuerte d'entre les Venitiens & les Geneuois. Pour laquelle, comme deuant est dicté, par l'enuie que auoient les dictés Venitiens contre les Geneuois, moult se voulurent peiner s'ils eussent peu de desaduancer leur prosperité: mais que si cautelement feust que on ne l'apperceust. Et par trouuer voye de leur tollir leur bon Gouverneur, par le sens & valeur duquel montoit leur gloire de mieulx en mieulx, leur sembloit bien que plus grand meschef & desaduancement ne leur pouuoient faire. Mais toutesfois de leur courir sus ouuertement n'osoient, encores que ils feussent trop plus de gens. Et pour attaindre à leur intention, auoiët cerché vne aultre tres-faulse voye, & par c'en'y cuidoient mie faillir. Mais ce que Dieu garde est bien gardé. Car ils auoient enuoyé leurs messaigers par toutes les terres des Sarrafins sur la marine de là enuiron, tant en Egypte, comme en

Syrie, & par tout aultre part, pour annoncer & faire sçauoir la venuë du Mareschal, & dire que ils feussent sur leur garde: car il alloit sur eulx à grand ost. Et qu'il soit vray que la venuë du Mareschal feirent sçauoir les Venitiens aux Sarrafins, feut certainement sceu, comme il sera cy apres dict, & comment ce fut. Si en paroissoient bien les enseignes là endroiçt, & autre part, que aduisez en auoient esté, & de longue main. Car tout le port & le riuage de Tripoli estoit couuert de Sarrafins, qui tous armez là l'attendoient à receuoir aux pointes des lances. Laquelle chose ne peult estre que là eust telle assemblée, si auant le coup n'en eussent esté aduisez. Car ils estoient en moult bel arroy de combatre, par grands batailles à cheual & à pied. Et y auoit des gens du Tamburlan bien enuiró six cent cheuaulx, armez & couerts tant richement de fin veloux & drap d'or, & de tous habillemens riches, que oncques homme ne veid en bataille ne en faiçt d'armes plus belle chose, & ceulx qui dessus estoient, estoient armez de beaux paremens, & monstroient semblant d'estre gens de grand vigueur, & auoir desir de combatre, & sembloient estre personnes de grand honneur & de grand estat. Quand le preux & vaillant Mareschal veid celle assemblée, laquelle chose en piece n'eust pensé, feut moult esmerueillé: mais non mie pourtant esbahy ne espouuanté. Ains dict à visaige hardy que pourtant ne lairroit à descendre, à l'ayde de Dieu, nonobstant que son Conseil luy feist la chose moult doubteuse, pource

D d ij

que peu de gens estoient contre tant de Sarrafins: mais il dict que pourtant ne lairroient. Adonc le Mareschal enuoya Montjoye le Herault par les galées dire à tous qu'ils s'appareillassent de descendre à terre par belle ordonnance, comme il leur auoit ordonné. Apres ce tantost & vistemement fait le dict Mareschal ferir des proues à terre. Si preindrent haultement trompettes à sonner, & les arbalestriers qui tous feurent rangez sur les galées, preindrent druement à tirer pour faire retirer les Sarrafins, en sorte que nos gens peussent arriuer. Et semblablement tiroient vers les nostres leurs archers: mais leur trait ne feut mie pareil, ne de telle force. O Dieu, comme on pourroit là veoir bonne gent à l'espreuve, & comment l'effect de leurs hardis couraiges comme de lyons se demonstroit. Et vrayement dict l'on bien vray, Selon Seigneur maigñée duire. Car leur bon conduiseur par ses biensfaicts leur accroissoit le cœur, leur donnoit hardiesse, & leur ostoit toute peur. Adonc veissiez commencer dur estrif contre ceulx qui les premiers descendoient, & contre eulx venoient les Sarrafins pour defendre le port, & les repousser à pointes de lances. Mais là veid-on hardiment saillir ces gens d'armes en l'eau, & entrer iusques au col pour aider à leurs compagnons. Ha Dieu que on doibt bien priser, aimer & honorer si noble gent, qui leurs corps & leurs vies exposent pour le bien de la Chrestienté, & bien doibt-on prier Dieu pour eulx & pour leurs semblables. Car quand ils sont bons, & font leur debuoir, c'est

le sauvement d'un pays contre tous ennemis. Et certes on ne peult trop honorer ne faire de bien à un vaillant homme d'armes; car moult en est le mestier perilleux. Et de tant que plus y a de peine & de difficulté, de tant en est-il plus digne de grand honneur & de grande remuneration. Ainsi comme vous voyez fut là grand estrif: car les Sarrafins fort se defendoient, & les Chrestiens par grand vigueur les assailloient. Si vous assure que là peust-on veoir faire maintes belles armes, main à main, & maint tour de bataille. Et là veid-on qui feut hardy, & qui bien s'y esprouua, & qui pris d'armes deust auoir. Car n'y conuenoit mie petite force au port gaigner contre telle defense, où estoient bien fix Sarrafins contre un Chrestien. Si y souffrirent moult nos gens, & moult en y eut de morts & de blesez. Et non pourtant la bonne fiance que ils auoient en Dieu, & nostre Dame, & la vaillantise & prouesse de leur bon conduiseur qui là n'estoit mie oiseux; ains estoit fiché es plus drus coups, & là faisoit tant d'armes comme homme plus faire peut, leur donnoit force & couraige. Pour laquelle chose, à l'ayde de Dieu, tant s'y peinerent, & tant y ferirent & travaillerent, que malgré tous les Sarrafins preindrent terre, & gaignerent le port & la force du trait des arbalestriers, & des canons qu'ils leur lançoient de dedans les galées, feit les Sarrafins retirer. Si se reculerent assez loing du port, & allerent prendre place pour donner la bataille à nos gens.

D d iij

CHAPITRE XX.

La belle ordonnance du Mareſchal en ſes batailles, & comment il deſconfit les Sarraſins.



ADONC les Sarraſins arrégerent leurs gens en belle bataille, & en tres-belle ordonnâce. Les gens de cheual, comme j'ay dict deſſus, ſe meirent deçà & delà és deux aiſles de la bataille de pied: & là ſe teindrent de pied coy. Le vaillant Mareſchal de France feit vn petit prendre haleine à ſes gens; car moult auoient ſouffert de peine à gagner le port. Si les feit boire vn coup & eulx rafraiſchir: car grand chauld faiſoit, & puis les admoneſta que ils feuffent bonnes gens: car il auoit eſperance en Dieu, & en la vierge Marie, que ils auroient bonne iournée. Si ſe mit en ordonnance, & en belle bataille. Et ainſi le petit pas tous ioints & ferrez enſemble, les lances ſur les cols, allerent vers les Sarraſins qui au champ les attendoient. Quand ils furent approchez, trompettes preindrent à faire grand bruit, adonc commença le trait grand & fier d'vn coſté & d'autre. Mais nos gens pour leur trait ne laiſſerent que ils ne leur allaſſent courir ſus fierement, & de hardy couraige, par telle vertu que tous les Sarraſins eſpouuenterent. Ha qu'eſt-ce que de

vaillante gent ? Vn en vault mille , & mille faillis n'en vaillent vn bon. Et vrayement est-il bien vray ce que diët Valere en parlant du faiët des Romains, que cinq cent bons hommes peuuent & suffisent, telle fois aduient , contre dix mille. Et que petite quantité de bonne gent puisse forçoyer aulcunes-fois contre grand foison , appert par ces vaillantes gens icy , par ce que il s'en ensuiuit. Car dés l'assembler monstrent-ils leur fierté , quand oncques ne s'esbahirent pour la quantité d'ennemis qu'ils voyoient contre eulx qui si peu de gens estoient. Si coururent sus aux Sarrafins par grand vertu , & leur bon Duc & conduiseur estoit entre sa gent qui leur donnoit exemple de ce que faire debuoient , & les ennemis d'aulture part ne s'y faignoient. Si fut dure & aspre la bataille, où maints perdirent la vie de chascun costé. Mais trop auoient Sarrafins du pire. Car la hardiesse & force de nos gens , & le grand trait des arbalestriers les abatoit morts druëment , & ainsi dura grand piece. Mais que vous dirois-je des armes que chascun feist, ne des coups que donna vn chascun. Trop ma matiere en eslongneroye. Mais pour ramenteuoir en bref, sans faillir tant bien & tant vaillamment le feist le preux Mareschal , que mieux ne peust. Aussi feit le Grand Maistre de Rhodes, nommé Messire Philebert de Nouillac, Messire Remond de Lesture, Prieur de Thoulouze, Messire Pierre de Boffremont, Cheualier de Rhodes, & toute la compaignée du diët Grand Maistre. Si feit Chasteaumorant au cœur

vaillant & fier, l'Hermite de la Faye, qui de voyager ne feut onc recreant, Messire Louys de Culan, Mareschal de l'ost, & maints autres bons & vaillans Cheualiers, dont pour cause de briefueté ie tais les noms. Des Escuyers Tercelet de Cheles, Jean de Nenny, Richard Monteille, Guillaume de Tolleigny, & Huguenin son frere, Guillemain de Labesse, le bastard de Rebergues, Jean Dony, Regnauld de Camberonne, le Barois, & plusieurs autres vaillans Escuyers, tous tant y feirent à la force de leurs bras, & à la vigueur de leurs couraiges, que à tousiours mais eulx & tous ceulx qui là de leur compaignée se trouuerent, en doibuent à tousiours estre honnorez. Et à brief parler, l'effect de leur loüange appert à l'œuvre. Car ceulx qui n'estoient pas plus d'enuiron deux mille combatans, se trouuerent en ceste bataille tenir pied & estail à plus de quinze mille Sarrafin. Voire par telle vertu, que nonobstant leurs beaux cheualx richement parez, & ceulx qui dessus estoient bien armez, qui estoient en nombre bien sept cent, qui de toute leur force mie ne s'y faignirent de rompre nos gens, & leur bataille, si ne peurent-ils souffrir le fais tant du traiect des arbalestriers, comme des coups des bons Chrestiens; ains leur conueint desplacer & se retirer, tant que petit à petit prirent à eulx departir & laisser la bataille. Mais ce ne fut mie sans leur tres-grand dommaige, car moult en y eut de morts & d'affolez. Et ainsi se departirent les Sarrafin, qui partir peut. Et nos gens moult ne les suiurent, ains se teindrent là tout coys. Et les
ennemis

ennemis tant par force comme par cautele s'esloignerent de la marine: car ils cuiderent que les Chrestiens les suiussent, & penserent que quand ils seroient loing de leur nauire, ils se mettroient entre eulx & le nauire. Et ainsi les enclorroient. Mais le faige Marechal, à qui rien d'armes ne conuenoit apprendre, fut tout aduisé de leur cautele, pour ce ne les voulut suiure. Mais ores oyez grande hardiesse de Cheualier, & courageuse volonté de vaillant Cheuetaine. Quand les Sarrafins feurent eslongnez, il meit derechef ses batailles en ordonnance, & defendit sur peine de perdre la vie que nul ne feust tant hardy de retourner en galée, ne de deguerpir la place. Si feit son nauire tirer arriere, & dit, que sans faillir il combatroit derechef les Sarrafins. De ce propos ne peut estre desmeu, nonobstant que plusieurs luy conseillassent que plus n'en feist. Car assez y auoit acquis honneur, ce leur sembloit. Mais à ce ne voulut-il entendre. Si feut ordonnée son auantgarde, puis la grosse bataille, & apres l'arriere-garde, & aux Cheuetains bien commeit ce qu'ils debuoiēt faire, si les pria & enhorta de eulx y bien porter. Quand les Sarrafins veirent le faige appareil, & la grande hardiesse du vaillant Cheuetaine & de sa gent, ils doubterent, & grand semblant en feirent. Car ils se partirent de là où ils estoient, & allerent prendre place coste les iardins de Tripoli, qui moult sont drus & espais, afin que si besoing eussent de fuir se fichassent dedans. Là ordonnerent en leur bataille les gens à pied, & és deux ailles les gens de

E c

218 HISTOIRE DV MARESCHAL
cheual. Le Mareschal enuoya l'auant-garde premie-
rement assembler, & la conduisit Messire Louys de
Culan son Mareschal, & illa suiuiot de pres à tout sa
bataille. Quand ils feurent approchez des Sarrafins,
de beau traict les saluèrent, & au reciproque les Sar-
rafinseulx, & puis vistement les allerent assaillir, &
iceulx fort se defendirent: mais nos gens de pres les
requirent, & si fort les presserent que ils prirent à
chanceler. Quand ceulx de cheual veirent les leurs
qui se prenoient à reculer, ils se departirent, & cui-
derent venir enclore la bataille du Mareschal, mais
ceulx de l'arriere-garde par tel randon les prirent à
seruir de bon traict, que oncques enfoncer ne les
peurent. Adonc leur courut sus le fier Mareschal à
tout sa bataille, & main à main prirent à combattre.
Et là y eut assez d'hommes & cheuaulx abatus, qui
depuis ne releuerent. Si feurent toutes les batailles
assemblées, où il y eut fiere mellee, & des morts &
des naurez largement de tous costez. Mais à quoy
plus long compte vous en ferois-ie? A tant alla la
chose, que plus n'eurent pouuoir les Sarrafins de
tenir estail, ne de souffrir, & fuir les conueint pour
garentir leurs vies. Si leur feirent les iardins bon
mestier, esquels desconfits se ficherent ceulx qui
eschapper peurent. Si guerpirent la place, & fuit qui
peut: mais maint en y eut qui si pres feurent pris,
qu'espace n'eurent de fuir: ains y laisserent les vies,
& ainsi se cachèrent là les fuitifs de la bataille & le
demeurant des morts. Le Mareschal qui ainsi les
voyoit là fuir à garant, à peu qu'il n'enrageoit dont

iceulx luy eschappoient, & tant estoit sur eulx acharné qu'apres eulx és iardins ficher se vouloit. Mais ceulx qui l'aimoient le prierent pour Dieu que il ne le feist: car trop y sont les lieux diuers & destournez, parquoy s'ils y fichoient iamais pied, n'en retourneroit. Si s'arresta là, & se teint au champ grand piece pour attendre & veoir si de nulle part Sarrafins sauldroyent pour le combattre, & si ceulx qui fuïs estoient se rassembleroient: mais de ce n'auoient ils garde, car nul n'en auoit vouloir. Et quand assez eut attendu, & que chascun luy disoit qu'il s'en retournast en son nauire, & qu'il auoit eu belle iournée, s'en reueint en belle ordonnance l'auant-garde deuant, & la bataille apres, & puis l'arriere-garde. Et en tel arroy, & en louant Dieu se bouta en son nauire.

CHAPITRE XXI.

Cy dit comment on sceut certainement que les Venitiens auoient faict sçauoir aux Sarrafins la venue du Marechal, & comment il print Botun & Barut.

NE FEVT mie encores saoulé de greuer les Sarrafins le vaillant Marechal, quoy que on luy dist que à grand honneur retourner s'en pouuoit, car bien auoit exploicté. Mais de ce ne feut pas d'accord. Si se partit de Tripoli,

Ee ij

comme dict est, & au partir de là il ouït nouuelles que vne naue de Sarrafins estoit au chemin de Barut. Si commeit tantost pour y aller le Seigneur de Chasteaumorant, & avec luy de bons gens d'armes, à tout deux galées. Si allerent tant que ils veinrent assembler aux Sarrafins, & si dure escrime leur liuerent que tous les occirent, & prirent la naue : puis liés & ioyeux s'en retournerent. Le Mareschal s'en alla à Boton, qui est vne grosse ville champestre ; qui tost feut pillée, & les Sarrafins qui y feurent trouuez tous mis à mort, & par tout mis le feu, & de là teint son chemin droict à Barut. Et à reuenir à ce que deuant i'ay dict, comment certainement on sceut que les Venitiens auoient notifié & faict sçauoir aux Sarrafins la venue du Mareschal, adueint que ainssi comme il approchoit la dicte ville de Barut, il veid partir du port vn vaisseau appellé Gripperie, lequel s'en cuidoit fuir vistemement auant que le Mareschal arriuaist, & ne pensoit que nul s'en donnast garde : & pour mieulx cuider eschapper sans que on l'apperceust, prit le large de la mer, & fuyant s'en alloit. Mais le Mareschal qui l'apperceut enuoya apres tantost vne galée qui tost le prit. Si l'amena deuers le Mareschal, lequel s'enquit quelles gens y auoit, & sceut que c'estoient Venitiens. Si feit venir deuant soy le principal de ce vaisseau, & moult l'interrogea tant par amour que par menaces pour quelle cause ainssi s'enfuyoit. Et à brief parler, quoy que il le celast au premier, tant feit le Mareschal, sans luy faire mal ne grief, que il confessa & recongneut que sans fail-

lir il n'auoit cessé d'aller par mer par grande diligence, pour annoncer en toutes les terres & contrées des Sarrafins de là enuiron, c'est à sçauoir de Syrie & d'Egypte, & de ces marches, la venue du Marefchal, & qu'ils s'apprestassent contre luy: Car il leur venoit courir sus à grande armée, & que ce auoit-il annoncé à Barut, & par tout aultre part. Si passoit par là pour veoir comment ils auoient exploicté. Ceste chose racompta iceluy au Marefchal, & ce luy tesmoignerent les compaignons, & que à ce faire estoient commis de par la Seigneurie de Venise. De ceste tres-grande mauuaisie, laquelle iamais n'eust cuidé, feut moult esmerueillé le Marefchal, & feut en grande deliberation si ceulx qui venoient de bastir ce mauuais œuvre il feroit lancer en la mer. Toutesfois delibera que non; car ils luy auoient racompté debonnairement, & aussi le meffaict n'estoit mie si grand à eulx comme à ceulx qui enuoyé les y auoient. Si ouura adonc de la tres-grand franchise de son noble cœur, comme celuy qui n'en daigna faire compte, & les laissa aller. Laquelle chose peu d'autres eussent faict: mais ne vouloit nullement que par luy ne à son occasion fut meu debat entre les Venitiens & les Geneuois. Si teint son chemin droict à Barut. Mais si tost ne fut arriué, que bien s'apperceut de l'ouuraige que les Venitiens auoient basti. Car deuant luy voyoit tout le port couuert de Sarrafins arrangez en bataille, pour luy defendre le saillir hors. Mais de ce n'etrent-ils mie le pouuoir. Car tantost le hardy combatant comme

Ee iij

lyon feit de grand randon ferir de proüe en terre, & les arbalestriers tirer druëment à celle chiennaille qui là brayoient comme enragez, & si bien les seruirent de traict que plusieurs en larderent. Si leur conueint se retirer malgré leurs dents, & les nostres faillirent hors encouragez de leur courir sus par grand vertu. Mais quand les Sarrafins veirent leur ordonnance, ne les oserent attendre, ains s'enfuirent, & nos gens feurent là tous ordonnez pour donner la bataille: mais ne trouuerent à qui parler. Si alla le Marechal deuant Barut, & feit assaillir la ville par telle force que les Sarrafins qui dedans estoient feurent espouuâtez, si que plusieurs d'eulx s'enfuirent par autre costé; & ceulx qui dedans demurerent la defendirent de tout leur pouuoir. Toutesfois à la fin par force feut prise, & mis à l'espée les Sarrafins qu'ils y trouuerent, & tout fourragé & pillé ce qu'il y auoit: Mais guerres n'y trouuerent, pource que aduisez en auoyent esté, parquoy la ville estoit vuide de tous biens & de toute marchandise, que ils auoient retirez & mussez és bois & és montaignes, comme il feut rapporté au Marechal. Si feit le feu bouter par tout, & au nauire qui estoit au port, & ce faict se retira en ses galées.

CHAPITRE XXII.

*Cy dit comment le Marechal alla deuant
Sayete, & la grande hardiesse et vail-
lance de luy contre les Sarrafins.*



PRÉS ce se partit de Barut le Maref-
 chal, & teint son chemin en Egypte
 pour aller deuant Sayete, en intention
 de la prendre s'il eust peu. Et quand il
 feut approché du port; tout ainsi que
 és autres lieux auoit faict le trouua bien fourny de
 Sarrafins, qui en belle bataille l'attendoient: mais
 n'estoient mie en petite quantité; car plus de douze
 mille en y auoit tant à pied que à cheual. Mais de ce
 ne fait cas le faige Marefchal, qui sa fiance auoit
 toute en Dieu; ains fait ferir en terre, & saluer les
 Sarrafins de bons viretons & de bombardes, si sou-
 uent & menu, que oncques ne trouuerent si mor-
 telle rencontre. Si en y eut là tant de morts, que tout
 le grauier en feut couuert. Et tant estoient iceulx de
 grande volonté contre nos gens, que trop enuis se
 desplaçoient. Mais toutesfois force leur feut de fuir,
 ou mal'eust esté pour leurs peaulx. Car si là se feuf-
 sent longuement tenus, leur troupeau feust de moult
 appetissé. Si leur conueint reculer à toutes fins. Nos
 gens ne dormirent mie, ains faillirent contre eulx
 par grande hardiesse à qui mieulx mieulx, & com-
 me sangliers se fichoient en la marine iusques au
 ventre pour leur courir sus. Et feut tout le premier
 qui y faillit le bon Escuyer Iean de Ony cy dessus
 nommé, qui par son bien faire bon exemple donna
 aux autres, & les Sarrafins qui grād couraige auoient
 contre eulx se trauailloient de les repousser. Mais
 oyez la grande fortune contre nos gens, qui leur
 doibt tourner à grand los & pris. Car droit à celle

heure se leua vn vent si grand & si contraire qu'il n'estoit mie en la puissance de eulx que toutes les galées peussent arriuer, ne tout le nauire, pour aller aider à ceulx qui combattoient: dont les combatans eurent grand honneur. Parquoy telle fois estoit que la grand presse & quantité des Sarrafins si fort les chargeoit, que à peu leur conuenoit rentrer en la marine. Mais adonc reuenoit à grand tas le traict des galées de bombardes & de viretons, qui abattoient à tas les plus huppez. Ainsi dura cest estrif par longue piece. Mais que vous en dirois-ie? A la parfin tant vaillamment l'y porterent nos gens, & tant bien le feirent, que à tres-grand peine le port prirent, mais auant moult y souffrirent. Ha quel honneur à vne poignée de gens, qui n'estoient pas plus de cinq cent contre telle multitude! Le vaillant Cheualier Leonidas à tout trois cent Cheualiers sans plus, deffait l'ost de Xerxes le grand Roy de Perse, quand il le preit à despourueu en ses pauillons. Car iamais n'eust pensé que iceluy Leonidas à si peu de gens eust eu telle hardiesse, & les Histoires en font grand compte & à bon droict. Mais pourquoy ne dirons-nous abyisme de hardiesse & de proüesse estre en celuy vaillant Mareschal, & en sa noble compaignée, qui ne prit pas les Sarrafins despourueus en leurs pauillons; mais luy feut trouué despourueu de gent, mais non pas de force & de hardiesse, contre si grande multitude de gent, voire en tel faict comme de prendre port si mal à son aduantage; Et toutesfois il vainquit, & si il ne pouuoit
auoir

auoir secours des siens. Car la mer deueint si grosse que les galées ne pouuoient approcher de terre, comme dict est. Mais orés oyez derechef la vigueur de la tres-grande hardiessse de son couraige, lequel ne s'espouuenta pas de se trouuer avec si peu de gent contretant d'ennemis, ains tout ainsi que si ils eussent esté dix mille, alla prendre place en plaine terre deuant la bataille des Sarrafins, qui s'estoyent retirez de la marine tous arrangez comme pour combatre; mais si pres d'eulx s'alla mettre, que les Sarrafins tiroient de belle visée de leurs arcs dedans la bataille de nos gens. Et ainsi demeura en celle place de pied coy en despit d'eulx l'espace de cinq heures, en attendant que la mer feust accoisée, & qu'il eut route sa gent, afin de combatre les dicts Sarrafins, & assaillir la ville, ainsi qu'il auoit proposé; dont moult estoit troublé de l'empeschement que le vent faisoit à arriuer son nauires: mais nonobstant toutes ces choses-là, se tenoit de tel semblant que oncques Sarrafins n'oserent venir contre luy de plain eslans. Et plusieurs fois s'essayerent de rompre la bataille au front de deuant, & aucunes fois aux bouts & aux costez; mais pour la tres-belle & faige ordonnance que le Mareschal tenoit, tant en arballestriers qui estoyent enuiron deux cent, & és gens d'armes qui gueres plus n'estoyent, qui tous se tenoient ioincts & ferrez ensemble comme vn mur, n'eurent oncques les Sarrafins la hardiessse de venir enfoncer, & tant comme ils en approchoient c'estoit à leur grande confusion. Car maints en-y eut

Ff

226 HISTOIRE DV MARESCHAL
d'occis & d'affolez du traict & du ject des lances.
Et ainsi comme vous oyez le Mareschal se teint là
tant que ja approchoit la nuit. Et quand il veid
que la mer ne s'appaisoit point, parquoy il peult
auoir sa gent, dont moult grandement luy pesa
d'ainsi faillir à parfournir son intention, en partit
en tres-belle ordonnance, & rentra en son nauire.
Et iugez entre vous qui ce oyez, si il doit de ceste
valeur & grande hardiesse grand honneur auoir,
d'oser tenir pied contre tant d'ennemis, pour le sem-
blant duquel & fiere contenance, & la grande reso-
lution dont ils le voyoient, nonobstant que ils feus-
sent en grand nombre, les espouuantoit, & ostoit
cœur & hardiesse. Mais il n'est pas de doubte que si
aucun signe de recreandise ou de peur y eussent
veu, luy eussent couru sus, ne iamais pied n'en feust
eschappé.

CHAPITRE XXIII.

*Cy dit comment le Mareschal alla deuant la
Liche, & les embusches que les Sarrafins
auoient faictes pour le surprendre.*



LE MARESCHAL se partit adonc, &
tant erra par mer, nonobstant le grand
vent qu'il faisoit, qu'il veint deuant vne
grosse ville qui sied comme à vne lieüe
de la mer, nommée la Liche: Mais quand il veint

deuant le port, ne trouua pas en sa compaignée le quart de ses galées: car le grand vent qu'il auoit fait la nuit les auoit esloignées & séparées les vnes des autres, & desuoyées de leur chemin: & pour les grands feux que les Sarrafins faisoient sur la marine en faisant grand guet, ne pouuoient choisir l'adresse des galées qui deuant alloient. Si demeura là tout le iour le Marechal, & ne vouloit descendre sans tous ses gens. Car grande partie de ceulx qu'il auoit avec luy estoient malades & blesez; Et y feut iusques à basses Vespres, en attendant son nauire, dont moult luy ennuyoit. Car il ne voyoit mie sur le port plus de trois mille Sarrafins, & d'eulx cuidoit-il bien venir à chef. Et adonc arriua son nauire: mais il estoit trop tard pour descendre. Ha Dieu, comment est vray le Prouerbe qui dict, Ce que Dieu garde est bien gardé, & l'Escripture sainte qui dict, Si Dieu est pour nous, qui sera contre nous? Car manifestement on peult veoir en ceste occasion que Dieu vouloit garder le Marechal comme son cher seruiteur, & sa compaignée aussi, par ce qui a apparu ainsi, côme compter orrez. Le Marechal, qui auoit esperance le lendemain au matin besongner, feit mettre en vne galée Messire Iean d'Outremarin Geneuois, & Messire Choleton, pour bien aduiser deux tours qui siéent sur le port de Liche, en espoir de les assailir le lendemain, & se tira vn peu loing, comme Dieu de sa grace l'en aduifa. Quand les Sarrafins veirent que il se retiroit, ils cuiderent que il se departist, adonc manifestement descouurirent leur em-

228 HISTOIRE DV MARESCHAL
busche, & saillirent hors de deux parts. C'est à sçauoir de derriere vne montaigne & d'un bois, qui estoit entre la ville & le port, bien trente mille Sarrafins, & à pied & à cheual, qui tous veinrent sur la marine crians & brayans comme diables d'enfer. Et quand le Mareschal & sa compaignée les veirent en telle quantité, louierent nostre Seigneur de la grace que il leur auoit faicte dont l'aduanture estoit aduenüe, par quoy le iour n'estoyent descendus, & le repouterent comme à miracle de nostre Seigneur, qui de sa grace les auoit voulu sauuer.

CHAPITRE XXIV.

Comment le Mareschal, pour ce que ia se tiroit vers l'Hyuer, s'en voulut retourner à Genes.

DE LA Liche se partit le Mareschal, Car bien veid que impossible seroit à si peu de gens qu'il auoit de forçoyer tant d'ennemis, veu que encores moult estoient les siens foibles, & que moult en y auoit de malades & blessez. Si s'en retourna derechef en Cypre à Famagouste, pour laquelle Cité auoit esté le debat d'entre le Roy de Cypre & les Geneuois, comme dict est, ausquels elle demeura paisiblement. Et pour ce feut necessité qu'il la visitast. Si ouit de leurs causes & questions, & determina de

leurs querelles au mieulx qu'il peut, selon le temps qu'il y arresta, qui ne fut pas plus de huiet ou dix iours. Si establit Officiers, & leur donna Ordonnances de gouuerner, & bien leur chargea que bonne iustice feissent. Puis vint à Rhodes, où le grand Maistre du dict lieu moult l'honnora & festoya, & là sejourna environ dix ou douze iours. En celuy espace de temps que il sejourna, il ordonna que trois de ses naues feussent apprestées, & là dessus feit monter tous les malades & blessez de sa compaignée, dont il y en auoit grand foison, tant Cheualiers & Escuyers, comme arbalestriers, varlets, & mariniers. Tant que pour la grande quantité des dictes malades conueint que le Mareschal reteint petite compaignée pour luy. Car il meit le plus de ses gens d'armes sur les dictes trois naues, pour les conduire & gouuerner. Si estoit demeuré si mal armé, que avec ce que il auoit peu de gens, à peine auoit-il de douze à quatorze cent arbalestriers. Des dictes trois naues les deux se partirent aussitost comme luy, dont il ne se peut ayder, & l'autre sejourna à Rhodes vn mois, & puis à son retour perit en Sicile, dont dommaige feut & pitié, pour les bonnes gens qui dessus estoient. Et ainsi se partit le Mareschal du dict grand Maistre, & par le conseil de ses gens qui moult l'en admonestoient, delibera de s'en retourner à Genes, sans plus faire pour celle saison. Car ja tiroit vers le temps que la mer souuent s'engrosse, pour cause de la mutation des vents, c'est à sçauoir del'Hyuer. Si se meit en mer à si petite

230 HISTOIRE DV MARESCHAL
compagnée, comme dict est. Tant alla sans mal,
ne sans encombrer, que il veint iusques en la Mo-
rée. Et quand il feut là venu, cuidant paisiblement
s'en venir le demeurant de son chemin, quand il
feut au port, que on dict le cap Saint Ange, adonc
luy veinrent deux des naues qu'il auoit laissées à
Rhodes, moult bien garnies de bonnes gens d'ar-
mes & d'arbalestriers à grand foison, desquels il ne
preit nuls, pour ce que il n'esperoit point en auoir
à faire.

CHAPITRE XXV.

*Comment les Venitiens, pour auoir achoison
de faire ce qu'ils feirent apres, se alloient
plaignans du Mareschal de la prise
de Barut.*



RME conuient derechef tour-
ner au faict & à la matiere des
Venitiens, pour conclurre & ter-
miner ce que i'ay dict deuant,
c'est à sçauoir en quelle maniere
creua l'enfleure de l'enuie portée
en leurs couraiges ja par long temps, & le venin qui
en saillit laid & abominable. Quand les Venitiens
veirent que tout ce qu'ils auoient basti vers les Sar-
rasins contre le Mareschal ne leur auoit rien valu,
determinerent entre eulx, que comment qu'il feust,

tandis que ils auoient lieu & commodité, fils pouuoient viendroient à leur intention. Car s'il arriuoit à Gennes, à peine iamais y auendroient, si d'aduanture n'estoit que si à point le trouuassent, veu que il estoit moult petirement accompaigné, parce qu'il auoit enuoyé grande partie des galées & du nauire de son armée, & que il n'auoit soupçon de nul encombrer, & de tout ce se prenoient-ils moult bien garde, comme ceulx qui autre chose ne guetoient que de sçauoir tout son dessein, pour leur poinct mieulx aduiser. Mais par cautele, pour plus couvrir leur mussée volonté, voulurent trouuer aulcune achoison & couleur de cause raisonnable, & vont semer voix & paroles par maniere de plaintes à plusieurs gens, que ils voyoient bien que le Mareschal vouloit prendre debat à eulx, & que bien leur auoit monstre en la prise de Barut, auquel lieu leur auoit fait trop grand dommaige en leurs marchandises à grand foison que là auoient, & sans leur faire à sçauoir l'allée: De laquelle chose trop se tenoient mal contents d'ainsi estre desrobez & pillez, & le leur auoir perdu. Tant allerent ces paroles, que par aucuns des amis & bienueüillans du Mareschal luy feurent rapportées là où il estoit en la Morée, & que bon seroit qu'il se gardast d'eulx: Car il estoit à doubter que ils ne l'aimoient mie. De ceste chose feut moult esmerueillé le Mareschal, si respondit que il ne pouuoit nullement croire ne penser que ce feust vray que ils luy voulussent mal, ne que ils se plaignissent de luy. Car oncques en sa vie ne leur

auoit meffaict ; ains les auoit traictez en tous lieux où trouuez les auoit , aussi amiablement ou plus comme les propres Geneuois , comme ceulx que il reputoit ses amis , & aussi pour tousiours tenir & nourrir paix entre eulx & les Geneuois , & que aussi les Venitiens partout où ils le trouuoient luy monstroient tant de signes d'amour qu'il s'en tenoit tres tenu à eulx. Et quand du faict de Barut , ne pourroit croire que malcontents s'en teinsent. Car ils sçauoient bien que plus d'un an deuant il auoit enuoyé defier le Souldan , pour ce qu'il auoit pris des marchans Geneuois qui estoient au Kaire , à Damas , & en Alexandrie , & les auoit rançonnez contre son faufconduit. Laquelle chose il auoit mandée aux dictz Venitiens , & faict sçauoir , afin qu'ils tirassent leurs biens & marchandises hors du pays , bien dix mois auant que il partist de Gennes. Et que ce ne pouuoit estre que ils eussent de leurs marchandises en la dicte ville de Barut. Car toute la trouuerent vuide. Et d'autre part , tant comme il y fut , ne deuant , ne apres , ne trouua Venitien , ne autre de par eulx qui luy notifiast ne dist que il y eust rien du leur. Car s'il eust sceu que ils y eussent rien eu , ne mesmement autres Chrestiens , ja à leurs choses n'eust souffert toucher. Car pour greuer Chrestiens n'estoit mie allé : mais seulement aux ennemis de la foy. Et encores s'il estoit ainsi que ils s'en teinsent mal contents , & ils luy faisoient à sçauoir que es choses prises il y eust eu du leur , sans faillir tout leur feroit rendre , & icelle responce leur feroit si aucune clameur

clameur ou plainte luy en venoit, de laquelle chose encores de leur part n'auoit oüy nouuelles. Et quant est que il eust volonté de prendre debat à eulx, ou que eulx se voulussent prendre à luy, s'il en eust eu quelque pensée, il n'eust pas renuoyé quatre de ses galées & autres galiotes de son armée, veu que ses gens estoient tous foibles encores, & que moult il auoit perdu de ses arbalestriers. Si ne faisoit mie semblant de vouloir nul greuer, ne que il eust doute aussi que nul le greuaist. Car s'il l'eust pensé, autrement se feust garny. Car bien en auoit eu le temps & commodité: mais s'en alloit son chemin simplement, comme celuy qui à nul ne vouloit nuire, & pensoit semblablement que nul nuire ne luy vouloit. Ces choses respondit le Marechal à ceulx qui luy en parloient. Et tantost arriua au port que on dict le port des Cailles, & là veint coucher. Si adueint en celle nuit vn peu auant le iour, que il arriua vn petit vaisseau que on nomme Brigantin, & estoit Venitien, & cuidoient ceulx qui dedans estoient que ce feussent les galées des Venitiens. Car elles n'estoyent pas loing de là, comme oïir pourrez. Celuy apportoit plusieurs lettres de par les Venitiens au Capitaine de leurs galées, & à autres de sa compaignée, Et feurent ces lettres par ignorance baillées és mains du patron des galées du Marechal, les cuidant celuy auquel elles auoyent esté recommandées bailler en la main du Capitaine Venitien. Mais quand il s'aduifa & apperceut que il n'estoit pas là où il cuidoit, si feut tant esbahy que il ne sça-

G g

uoit que dire, ne que faire. Quand le patron le veid esbahy, il luy demanda où il cuidoit estre: Il dict que aux galées des Venitiens: mais il voyoid bien que non estoit. Et adonc le dict patron porta les lettres & mena le messaiger au Mareschal, lequel vn petit l'interrogea: mais quand il le veid tant espouuanté, adonc de sa tres-grande liberalité, noblesse de cœur & franchise, & afin que les Venitiens ne peussent trouuer nulle cause de eulx plaindre de luy, luy dist debonnairement, Mon amy, n'ayez doute, vous estes entre vos amis, & raurez vos lettres toutes telles que les auez baillé. Adonc les luy rendit toutes telles que elles estoyent liées en vn fardeau, & luy dit que s'il luy failloit rien que il le dist, & que il le recommandast au Capitaine & à sa compaignée, & ainsi s'en partit. Quand il feut iour, le Mareschal se remeit en son chemin, & celle iournée ne trouua aduanture qui face à compter. Si vint gesir deuant la ville de Modó, de coste vne Isle qui est appelée l'Isle de Sapience. Quand il feut là, il feut ietter le fer, & ancrer celle part. Tâtoft que ce feust fait, vint vne espie des Venitiens en vne barque où il y auoit cinq ou six hommes, lesquels pour sçauoir la route du Mareschal, & veoir s'il se doubtoit de rien, & en quel arroy il estoit, demanderent quelles gens c'estoyent. Et il leur feut respondu que c'estoit le Mareschal & les Geneuois, & l'on leur demanda des nouvelles, & s'ils vouloient aucune chose que le Mareschal peust, ils dirent que grand mercy, & que nulles nouvelles ne sçauoient. Si les fait-on boire, & à tant se partirent.

CHAPITRE XXVI.

Comment les Venitiens assaillirent le Marefchal, & la fiere bataille qui y feut. Et comment le champ & la victoire luy en demeura.



LE DIMANCHE septiesme iour d'Octobre, bien matin, se partit le Marefchal du port de Sapience deuant Modon, & se meit en voye pour tenir son chemin droict à Gennes. Mais ores estoit temps que plus ne feust cachée la felonnie volonté des Venitiens, qu'ils auoyent tant gardée celément. Or leur semble veoir temps & lieu de la mettre à effect. Car assez despourueu le pouuoient prendre, & eulx au contraire estoient bien garnis, & de leur faict aduisez. Si n'eust pas le Marefchal erré enuiron deux milles, quand il veid partir de derriere l'Isle de Sapience le Capitaine des Venitiens accompagné de onze galées, lequel alla tout droict à Modon, & là preit deux grosses galées de marchandises qui estoient dedans le port, toutes chargées de gens d'armes iusques au nombre de mille hommes, & avec ce bien dixhuiet ou vingt vaisseaux tous chargez de gens d'armes & d'arbalestriers: Et à tout cela & leurs onze galées que auparauant auoyent tresbien armées & chargées de gens d'armes & d'arba-

Gg ij

lestriers, apres le Marechal tirerent tant comme ils peurent: & feurent mis en tres-belle ordonnance, comme pour donner la bataille. Et avec ce par terre faisoient aller selon la marine grande foison de gens d'armes à pied & à cheual, afin que le Marechal & sa compaignée ne peussent eschapper par nulle voye, au cas que par peur ou par quelque aduanture pour se sauuer vers terre se retirast. Le Marechal qui voyoid de loing toute celle ordonnance, n'auoit pourtant contre eulx nul soupçon, ains cuidoit que ils se departissent en telle forme du pays de delà, pour eulx en venir droict à Venise. Car iamais n'eust peu penser que sans le desier, ou luy faire à sçauoir, luy veinssent par telle voye courir sus & l'assaillir. Si exploicterent tant leur erre les Venitiens, que en peu d'heures feurent moult approchez. Adonc les gens du Marechal qui en tel arroy venir les veirent, luy dirent que sans faillir les Venitiens venoient contre eulx en trop mauuaise contenance d'amis: Car ils estoient tres-grand nombre de gens armez en toute ordonnance de bataille, les arbalestriers tous prests de tirer, & les gens d'armes les lances droictes, & toutes choses apprestées comme il appartient pour assembler & pour combatre. Et pour Dieu qu'il y aduisast, si que de son opinion ne feust mie deceu, par quoy se trouuast surpris desarmé & despourueu. Quand le Marechal veid la maniere, & que c'estoit à certes, adonc n'eut-il en luy que courouer. Si feit hastiuement ses gens armer, si peu qu'il en auoit: car mal en estoit garny. Et trop

luy pesoit de ce que deux iours deuant auoit congedié deux des naues de son armée toutes chargées de gens d'armes & d'arbalestriers, & s'il eust cuidé ceste aduanture bien s'en feust gardé, mais iamais ne l'eust pensé. Et à tout ce auoyent bien pris garde les Venitiens, & pource le surprirent à leur aduantaige. Si meit ses genstantost en ordonnance, & ses arbalestriers, si peu qu'ils estoient, & tantost feittourner vers les Venitiens les proües de ses galées, & tout appareiller pour assembler, si besoing estoit. Toutesfois il feit expresse defence que nul ne feist semblant de tirer à eulx bombarde, ne autre traict. Car encores ne pouuoit du tout croire que en mauuaïse intention contre luy veinssent, & ne sçauoit si ils venoient pour parler à luy pour aucune restitution du faict de Barut, si comme on luy auoit diét que ils s'en tenoient malcontents, ou pour autre chose, si ne vouloit nullement contre eulx commencer debat. Quand ils feurent assez approchez, adonc s'arrestèrent tout coys, pour eulx du tout mettre en arroy de combatre, comme il affiert en mer, & leurs voïlles prirent à ployer, à ce que elles ne leur nuisissent: & à toutes leurs choses bien appointer. Semblablement estoit arresté le Marechal avec tous les siens, pour les mettre en arroy tout au mieulx que faire se pouoit. Et adonc veid bien que c'estoit à certes. Si pria moult & enhorta ses gens que ils se defendissent vigoureusement. Car il auoit esperance en Dieu que ainsi comme autresfois leur auoit aidé, à ce besoing ne leur fauldroit point, & ainsi le

Gg. iij

manda en toutes les galées. Quand les Venitiens feurent bien mis en arroy, adonc prirent à nauiger à effort tant comme ils peurent vers le Marechal, & luy qui oncques ne s'esbahit, semblablement veint de randon vers eulx. Si s'escrierent iceulx Venitiens, en disant Bataille, Bataille, & avec ce saluèrent les nostres de bonnes bombardes, & commencerent les premiers. Mais nos gens ne leur gauchirent mie, ains lancerent vers eulx de bombardes & de traiçt sans nulle espargne. Si preirent à approcher, ainsi tirans les vns aux autres si druëment que plus ne pouuoit estre, tant que si pres feurent que ils veinrent au pouffer des lances, & que les galées s'entreioignirent. Lors commença la bataille dure & aspre, & mortelle, & à bonne lance les vns contre les autres, dont maints y perdirent la vie. Apres les lances s'entrecoururent sus main à main à dagues, & à haches & espées. Et là veissiez nos gens fort enuahis & durement assaillis: mais leur grand vaillance qui autres fois & en tant de lieux s'estoit grandement demonstrée, ne fut mie adonc amortie; ains tant vigoureusement se defendirent, que oncques gens mieulx ne le feirent. Si n'estoit mie le ieu esgal quant à la quantité de gens; car pour vn quatre y en eut des ennemis, & presques le double de nauire. Si eurent les nostres moult à souffrir pour la foison de gens d'armes & traiçt qui feut contre eulx. Mais comme ils se combatoient par grand vertu ce n'estoit merueilles s'il y en eut moult d'occis & de naurez, & maints en verserent le iour en la marine noüertous

armez avec les poissons. Et les veissiez faillir apertement, & courir par grand vertu aux galées & au navire de leurs aduersaires, nonobstant que moult les greuassent les deux grosses galées qui les surmontoient de hauteur, qui trop leur nuisoit. Mais ire & desdaing de ce que se voyoient ainsi surpris accroissoient leurs forces & leurs couraiges, parquoy à merueilles s'aduanturerent pour eulx venger, si faisoient là merueilles de leurs corps. Helas ! & si esgaulx feussent de nombre, comme tost feust la chose par eulx expédiée : mais trop estoit grande l'assemblée de leurs ennemis, & y auoit moult bons gens d'armes souldoyers. Car les Venitiens qui bien congnoissoient la vaillance & prouesse du Mareschal & de sa compaignée, auoient pris gens d'élite, tous les meilleurs que finer peussent. Longuement dura ceste bataille par la vigueur de nos gens, que les autres taschoient à desconfire : mais il ne leur feut mie leger à faire ; car trop y trouuerent grande resistance. Si furent toutes les galées entremeslées, qui main à main se combattirent si durement, que grande cruauté estoit de veoir deux parties qui oncques meffaiçt n'auoient les vns aux autres, que telle occision feust entre eulx. Car aussi mortellement s'entre-enuahissoient, comme si ce feust pour la vengeance de pere ou de mere morts, ou de perte perpetuelle. Et le tout par l'iniquité & l'enuie de l'une des parties, comme dict est. Ha faulxe enuie, que tu as basti de males œuures, & maints as liuré à honte ! Mais ce ne feras-tu mie de ce vaillant Mareschal pour ceste fois, ne

iamais, si Dieu plaist. Car Dieul'a en sa garde. Entre les aultres que vous diroye du dict preux combatât, & de ceulx de la galée où son corps estoit, qui fut accouplée à celle du Capitaine des Venitiés? Car Dieu sçait comment luy & les siens vaillammēt le feirent. Luy pour conforter les bons combatans, & eulx par son exemple, & pour garder & defendre leur bon Cheueraine & Seigneur. Ce n'estoit sinon merueilles à veoir, & leurs ennemis aussi moult les requeroient. Car comme dict est, gens estoient en armes tres-esleus & esprouuez: mais nonobstant ce, ceulx de la dicte galée du Mareschal, comme loups affamez ou enragez, failloient en celle du Capitaine si druement, & couroient parmy, faisans les traces de leurs coups, que si tost n'eust esté secouruē moult petit eust eu de durée. Mais les dictes deux galées grandes & hautes qui aux deux lez la targerent, feirent au Mareschal & aux siens trop d'encombrier. Car de là sus lançoient les ennemis à eulx qui moult en occirent. Et à brief parler, à quoy plus long compte vous tiendroye? Bien l'espace de quatre heures dura ceste meslée, qui moult est grand merueille comment ce peut estre que tant durast. Ainsi comme oïir pouuez feut moult dure ceste bataille, où le Mareschal & sa gent si vaillamment se porterent, comme dict est, que en fin le champ leur demeura. Mais à dire toutes les vaillantises que chascun endroiēt soy y feist, long seroit à racompter. Et pour l'honneur d'eulx & de leurs lignées, & pour exemple de bien faire à ceulx qui nommer les oïront, est
bien

bien raison que les noms soyent ramenteus en cest endroict des principaulx qui vaillamment s'y gouuernerent. Le premier que par droict nommer deb-uons est leur vaillant Cheuetaine le bon Mareschal, par la force duquel, hardiesse & sçauoir en eurent l'honneur. Là feut aussi le bon Chasteaumorant, qui de bien faire ne s'y faignit, comme il y parust à luy & à ses ennemis, Messire Louys de Culan, Messire Iean Dome, Messire Robinet Fretel, Messire Iean le Loup, & des Escuyers Guichart de Mage, Robert de Tholigny, Regnauld Descambronne, Richard Monteille, Iean de Montrenart, Charlot de Fontaines, Odart de la Chassaigne, & Iean de Ony, lequel en ceste bataille entre les aultres y feit tant de sa part, que il emporta au dict des amis & des ennemis à merueilles grand los. Et s'il y besongna bien y parut à son corps, lequel nonobstant que il feust bien armé, feut nauré de plusieurs playes comme mortelles. Et avec les dessus dictz nommez plusieurs autres, qui long seroit à racompter, tres-vail-lamment s'y porterent, & generalement tous les François, & plusieurs Geneuois & autres. Et à la parfin les ennemis qui ja estoient lassez, & qui veirent que nonobstant tout leur effort & toutes leurs cauteles, pour neant s'efforçoient de desconfire le preux combatant, & que trop y perdoient des leurs, moult se voulurent retirer s'ils eussent aulcunement peu à leur honneur, & en gagnant ou recouurant quelque chose de leur perte. Adonc tant s'efforcèrent que ils enclouïrent entre eulx trois des galées du

Hh

242 HISTOIRE DV MARESCHAL
Mareschal, qui sur eulx trop s'estoyent aduanturées,
& des aultres les separerent, & icelles trois tant pour-
menerent que prises les emmenerent, & laisserent le
champ au vaillant combatant à tout le demeurant
de sa gent, qui grand honneur en doit auoir. Tou-
tesfois toutes ne s'en allerent les galées des ennemis:
Car malgré eulx en reteint vne. Et les autres comme
vaincus laisserent la place, & fuyant s'en allerent re-
tirer & ficher en leur ville de Modon, dolens & mar-
ris dont auoyent failly à leur intention. Et le Maref-
chal & les siens de la place ne se bougerent iusques à
ce que ils en eurent perdu la veüe.

CHAPITRE XXVII.

*Comment le Marechal s'en alla à Genes,
irrité contre les Venitiens; Et des prisonniers
qui furent emmenez d'un costé
& d'autre.*



IN SI comme vous oyez demeura le
champ de la bataille au preux Maref-
chal à tout le demeurant de sa gent
& les Venitiens comme vaincus se
retirerent & le laisserent. Mais tant
demeura dolent & indigné de ceste aduanture,
dont iamais ne se feust donné de garde, & de ce que
ainsi auoit esté pris au despourueu, & aussi de la per-
te que il auoit faicte de sa gent, que nul ne pourroit

dire comment son cœur feut gros & enflé contre les Venitiens. Mais ceste trahison cuida-il bien venger. Si dict que à ce ne fauldroit-il point, si Dieu luy donnoit vie. Si se partit à tant de la place, & enuiron soy rassembla ses gens & ses galées au mieulx qu'il peut. Mais bien vous promets que ils ne sembloient mie gens venans de feste ou danse : car à merueilles estoyent lassez, naurez & desrompus, & n'estoit mie de merueilles. Si les reconforta & visita par grand amour & pitié le bon Mareschal : Et non pourtant quatre iours apres la bataille dessus dicte, comme le Mareschal tenoit son chemin droict à Genes, rencontra deux naues des Venitiens, sur icelles voulut en partie venger son ire, si les fait tap-toft assaillir si durement que gueres ne durerent, ains feurent tost prises, & les emmena avec luy à Genes. Si estoyent les dictes naues bien garnies de biens & de bons prisonniers, lesquels il reteint iufques à ce que les Venitiens luy rendirent les siens. Mais avec ce moult luy estoit le cœur dblent de ses bien-aimez Gentils-hommes qui feurent emmenez prisonniers, où moult auoit de vaillans gens, dont le principal d'eulx estoit le vaillant & bon Cheualier Chasteaumorant, qui le iour auoit souffert & moult faict d'armes, & avec luy trente quatre Cheualiers & Escuyers, tous gens d'eslite, de grand honneur & renommée, & autres plusieurs bons & notables Geneuois, & autres, qui feurent prisés deux autres galées. Aussi y auoit grand foison de Gentils-hommes de renommée & de grand

Hh ij

honneur en la galée qui par nos gens feut prise comme dict est. Et que tels feussent, y parut quand vint au faict de leurs rançons & deliurances, si comme oïr pourrez. Et ainsi arriua le Marechal à Genes, où il feut à si grand honneur & ioye receu de tous les plus grands, & generalmente de tout le peuple, que oncques Seigneur ne feut receu à plus grand feste. Mais à tant vous lairrons du Marechal, & dirons du Seigneur de Chasteaumorant & des autres prisonniers que on menoit à Venise.

CHAPITRE XXVIII.

De la pitié des prisonniers François.



QUAND Chasteaumorant avec la compaignée des autres prisonniers feurent arriuez à Venise, adonc on les ficha en bonne forte prison, & selon la coustume en tel cas ie croy qu'ils n'eurent mie toutes leurs aises: Car dur giste & petit repas, & du mal assez leur faisoit compaignée. Helas si n'en eussent-ils mie eu mestier: Car naurez, malades & blesez plusieurs d'eulx estoient. Et si oncques eurent eu aise, ioye & repos, adonc en eurent-ils souffreté: Mais ainsi sont souuent servis ceulx qui honneur quierent & pourchassent, & bien doibuent estre hault esleuez les bons qui si chere chose vont poursuivans. Or feurent ainsi là à grand tourment & meschef de cœur, de corps & de


pensée. Car bien sçauoient que le Marechal estoit tant indigné contre les Venitiens, & à bon droict, que pour rien n'eust laissé de leur faire guerre & de s'en venger. Si ne sceurent que faire, ny quel conseil prendre. Car bien feurent informez des coustumes des dictz Venitiens, c'est à sçauoir que au faict de leurs guerres iamais les prisonniers que ils prennent ne sont deliurez iusques à ce que la guerre soit faille, qui peult aucunes fois durer tout l'aage d'un homme. Si pouuez penser, vous qui ce oyez, en quel soucy ces bons Gentils-hommes debuoient estre. Le bon Chasteaumorant, le saige, au cœur constant, en qui ne default vertu que bon, vaillant & preux doibue auoir, lequel pour male fortune ne se trouble, ne pour la bonne moult ne s'esioüist, feut entre eulx comme leur chef. Si les reconfortoit par ses bons admonestemens, & leur mettoit Dieu en memoire, comme celuy qui l'aime, sert & craint, & leur disoit que à luy retournassent & y eussent fiance, & que sans faillir point perir ne les lairroist: & avec ce, que ils eussent cœurs de Gentils-hommes forts & endurcis, & qui pour rien ne se doibuent douloir, ne delaisser bonne esperance, ne cheoir en desconfort. Et ainsi souuent les reconfortoit, & iceulx prenoient grande consolation. Mais ne croyez mie que le bon vaillant Marechal oubliast ses bons amis; pourtant s'il ne les voyoit, & s'ils estoient encharrez, comme souuent sont oubliez des Princes, dont est pitié, ceulx qui sont à cause de leurs guerres pris & destruits. Nenny certes. Mais au plus tost qu'il

Hh iij

246 HISTOIRE DV MARESCHAL
peut les enuoya reconforter de faict & de paroles.
Car argent assez & largement leur enuoya, & man-
da que de rien n'eussent melancolie. Car il ne leur
fauldroit iour de sa vie, dont ils feurent moult re-
confortez.

CHAPITRE XXIX.

*Comment les prisonniers mettoient peine par
leurs lettres vers les Seigneurs de France,
que le Mareschal ne feist guerre contre
les Venitiens, afin que leur deli-
urance n'en feust empeschée.*

 O V T ainsi qu'il est de coustume que
toute personne qui se trouue en aulcune
maladie ou desolation, cherche volon-
tiers sa saluation & santé, & cherche dili-
gemment voye de la trouuer; iceulx par plusieurs
fois vers Chasteaumorant à conseil se meirent, pour
aduiser qu'ils pourroient faire pour estre tirez hors
de celle caige. Si en disoit chascun son bon aduis, &
sembloit aux aulcuns que bon seroit d'escrire piteu-
sement de leur estat à leur bon maistre le Mareschal,
que pour Dieu il eust pitié de ses bié-aimez Gentils-
hommes, & que il voulust aulcunement fleschir à
son grand & hault couraige, nonobstant la grande
iniure faicte à luy par les Venitiens; parquoy pour
compassion d'eulx qui en setoyent destruits &

morts par aduantage par longue dure prison, ou autrement, se voulut deporter d'entreprendre la guerre. Les autres disoient, que bon seroit que ils escriussent aux Princes de France, en les suppliant humblement pour Dieu que ils voulussent mettre paix & accord entre le Marechal & les Venitiens, ou sinon ils estoient perdus. Ces deux voyes leur semblerent bonnes: Mais non pourtant les plus aduisez doubterent que la grande ire, propos & volonté du Marechal de faire guerre aux Venitiens ne peust estre desmeüe, ne pour pitié d'eulx, ne pour quelconque priere de Prince, ne autrement, si n'estoit seulement par vne voye, c'est à sçauoir par le seul commandement de son souuerain Seigneur le Roy de France, à qui de rien ne voudroit desobeir, bien le sçauoient, & s'ils pouuoient aduenir par leurs prieres & piteuses requestes que le Roy luy mandast expressément par ses lettres: par ce poinct feroient guairis. Tel appointment leur sembla bon, & à celle conclusion se teinrent, & d'ainsi faire le conclurent; & mesmement avec ce que ils se ayderoient des autres deux voyes dessus dictes. Adonc les veissiez tous ensemble escrire lettres au Marechal pour ceste requeste, dont l'un ramentreuoit l'amour que autres fois auoit trouué en luy, l'autre comment il auoit veu sa grande pitié demonstrier par diuers cas, l'autre assignoit raison que ainsi il le debuoit faire pour escheuer plus grand mal, l'autre qu'il feroit aumosne & grand bonté de souffrir pour les reschapper de mort. Et ainsi diuer-

fement tant piteusement à luy se recommandoient, comme ceulx que grand desir menoit, que quand les lettres veindrent és mains du Marechal, il ne feust oncques en la puissance de son noble couraige que les larmes ne luy couvrissent la face, pour la pitié & amour qu'il auoit à ses bons amis. Mais pourtant ne se pouuoit desmouuoir de non vouloir la guerre, pour laquelle s'apprestoient tant & hastiue-ment comme il pouuoit. Mais les pauvres prisonniers reconfortoit par ses messaigers, & fait parler aux Venitiens de les mettre à rançon aux guises de France: mais rien n'y valut. Car ils dirent que ce n'estoit pas leur vñance. Adonc veüssiez les pauvres prisonniers escrire en France aux Seigneurs ausquels ils estoient de seruite. Car les aucuns estoient au Roy, les autres au Duc de Berry, autres au Duc d'Orleans, ou de Bourgogne, ou de Bourbon, & ainsi à plusieurs; & chascun supplioit humblement son Seigneur & maistre que pour Dieu ne les voulust oublier, ne laisser là pourrir en prison. Lesquelles requestes meurent les Seigneurs à grand pitié, si qu'ils escriuissent hastiement au Marechal de ceste chose, & firent tant que le Roy luy escriuist que il n'en feist plus iusques à ce que il auroit deliberé en son Conseil ce qu'il voudroit qu'il en feust fait. De ceste defence feut moult dolent le Marechal; mais ne voulut desobeir, si se souffrit à tant pour celle fois. Et en ces entrefaictes se entremeirent aucuns bons moyens de traicter paix & delaisser la guerre, & singulierement pour cause des dictz prisonniers. Long
feut

feut le traicté de ceste paix: Car le Marechal iura qu'il n'y seroit veu ny oüy: mais puis qu'il plaisoit au Roy, & à Nossseigneurs, il consentoit bien que les Geneuois accordassent selon leur bon plaisir, & il ne leur contrediroit. Si feut à la parfin paix faicte entre eulx, dont les Venitiens eurent grand ioye. (Car ils n'en estoient mie sans soucy & peur,) à condition que prisonniers pour prisonniers seroyent rendus, & qu'il n'en y eust plus. Et ainsi feut accordé & faict. Et à tant feurent deliurez nos prisonniers, qui feurent huiet mois entiers és prisons des Venitiens. Mais comme par diuine volonté les choses viennent aulcunes fois pour le mieulx, on doit Dieu louer de celle prinse: car elle escheua la guerre, dont grand mal & meschef s'en feust ensuiuy.

CHAPITRE XXX.

Comment les Venitiens s'enuoyerent excuser enuers le Roy de ce que ils auoyent faict.



PRES ces choses, les Venitiens qui doubterent la malegrace du Roy de France, & des Princes François, pour l'achoisson de ce qu'ils auoient faict, & dont les François auoient tenus prisonniers, pour eulx excuser enuoyerent leurs Ambassadeurs deuers le Roy, qui portoient lettres de la Seigneurie de Venise avec leur creance. Par ces

lettres & Ambassadeurs se enuoyoient moult excuser de ce faict, disans: Que le Marefchal leur auoit faict trop grand tort & dommaige à Barut, & pris leurs biens & marchandises. Et auec ce, quand ils s'en venoient vers luy pour luy dire & remontrer amiablement, & prier que restitution leur feist de leurs biens, que il leur courut sus, & premier les assaillit. Et eulx comme contrains se meirent en defence: pour laquelle chose Dieu leur auoit donné la victoire, si comme il apparust. Et pource ne leur debuoit sçauoir le Roy, ny Nosseigneurs, nul mauuais gré. Telles choses & assez d'autres mensongeres pour leur excuse dirent au Roy & à Nosseigneurs: mais n'en feurent pourtant creus, ne grand foy on n'y adiousta. Et ainsi s'en allerent à petite chere, & à froide responce. Le Marefchal qui par ses amis de par deçà entēdit ceste nouuelle, lesquels luy auoyent enuoyé la coppie des lettres que on auoit apportées au Roy, en feut tant fasché que plus ne se peut, & lors luy sembla bien auoir achoison de mououir noise & debat comme il desiroit aux Venitiens. Et pour celle cause, & pour monstrier leur tort & mensonge, leur escriuit les lettres qui cy apres s'ensuiuent, auxquelles les Venitiens n'oserent oncques faire responce. Et vrayement comme en armes il demonstroit sa vaillance, & au gouuernement sa prudence, pareillement en escriture apparoiſſoit son sçauoir au contenu d'icelles, lesquelles par luy sans autre feurent dictées, si bien, & en si bel & notable style, comme on peut veoir, & comme nul Clerc Rhetor-

ricien pourroit faire, selon le langage plain & bien ordonné de quoy on doit user au deuis du faict d'armes. Si pouuons conclure par ce qu'il nous apert, iceluy Marechal estre és graces comprises en sens & faicts vaillans tout remply.

CHAPITRE XXXI.

*Cy ensuit la teneur des lettres que le Marechal
enuoya aux Venitiens.*



V N O M de Dieu qui toutes choses a faictes, & qui congnoist toutes personnes, & qui sur toutes choses aime verité & hait mensonge, le Jean le Maingre, dict Boucicaut, Marechal de France & Gouverneur de Gennes, à vous Michel Steno Duc de Venise, & Carle Zeni Citoyen d'icelle Cité, fais à sçauoir que j'ay receu la coppie d'vnes lettres que vous Michel Steno auez enuoyées en France au Roy mon souuerain Seigneur, escrites à Venise le penultiesme iour du mois d'Octobre dernier passé. Du contenu desquelles, si ce ne feust l'usage & coustume de vous, & vos predecesseurs tenans le lieu que vous tenez, ie me donneroie grand merueille, pource qu'elles sont toutes fondées sur mensonge, sans y auoir mis nul mot de verité, & ausquelles i'eusse faict pieça responce, si n'eust esté pour doubte d'empescher la deliurance des Fran-

çois & Geneuois, que contre droict & raison auez detenus prisonniers. Et pour ce maintenant la vous fais, & respons aux articles contenus en icelles en la maniere qui s'ensuit.

ET premierement à ce que en vos dictes lettres est contenu que au mois d'Aoust dernier passé, environ le dixiesme iour, ie courant par la marine de Syrie, avec les Geneuois, ay desrobé les biens & marchandises de vos Venitiens estans à Barut, & qu'il ne profita point que par vos Venitiens m'eust esté dict les dicts biens & marchandises estre leurs, & d'autres Venitiens, & que en oultre ay prins aultres vos naues: Je vous respons, que il est vray que quand les Ambassadeurs que i'auois enuoyez deuers le Roy de Cypre eurent faict la paix, & ie me trouuay en Cypre avec l'armée que adonc auoye, non voulant perdre la saison, regardant le tort & oultraige que le Souldan auoit faict aux marchans, & biens des Geneuois, & au commun de la cité de Gennes, (laquelle cité i'ay en gardé & gouuernement pour le Roy mon souuerain Seigneur,) & que à bonne & iuste cause i'estoye tenu de faire guerre & dommaige au dict Souldan, & à ses pays & subiects, ayant volonté d'aller en Alexandrie, & pour le temps & vent contraire ne pouuant accomplir le desir que i'auois, ie deliberay d'aller és parties de Syrie, où ie les trouuay bien aduisez de la venuë de moy & de mon armée, par les lettres & messaigers que vos Venitiens leur auoyent enuoyé, qui estoit contre Dieu, contre loyauté, & contre tout ce que

bon Chrestien doit faire.

ET enuiron le iour que en vos dictes lettres est contenu, veins descendre au dict lieu de Barut, ou pres. Parauant ma quelle descende voyant vne griperie partant du port, enuoyai vne de mes dictes galées apres elle, & feut prise & emmenée la dicte griperie, laquelle estoit de vos Venitiens, qui par l'ordonnance de vostre Conseil de Nicocie estoit allée plusieurs iours auoit au dict lieu de Barut, pour faire à sçauoir aux Sarrafins la venue de moy & de ma dicte compaignée. Et neâtmoins peu de temps apres que ie l'eus faict prendre, pour monstrier amitié enuers vous plus que tenu n'y estoye, feis deliurer la dicte griperie & les hommes qui dessus estoyét, sans leur faire nul dommaige en l'auoir, ne en leurs personnes. De laquelle chose ie fais grande conscience, & que tous les Venitiens & gens qui estoient dessus ne feis pendre ou iecter en la mer, pource que l'œuvre que ils auoyent faicte & faisoient estoit traistresse à Dieu & à la Chrestienté.

ET quant aux biens & marchandises qui au dict lieu de Barut feurent trouuez, il est bien à penser & doit-on croire fermement que puis que vos Venitiens y auoient faict sçauoir ma venue, comme dict est, qu'ils auoient bien pourueu à leuer les biens & marchandises que ils y auoient. Et bien est vray que moy estant à la terre comme en terre d'ennemis, abandonnay à prendre ce qui s'y pourroit trouuer: laquelle prise feut petite, pour ce que il s'y trouua peu. Apres laquelle prise & demeure faicte en la

248 HISTOIRE DV MARESCHAL
fement tant piteusement à luy se recommandoient,
comme ceulx que grand desir menoit, que quand
les lettres veindrent és mains du Marechal, il ne
feust oncques en la puissance de son noble couraige
que les larmes ne luy couurissent la face, pour la pi-
rié & amour qu'il auoit à ses bons amis. Mais pour-
tant ne se pouuoit desmouuoir de non vouloir la
guerre, pour laquelle s'apprestoient tant & hastiue-
ment comme il pouuoit. Mais les pauvres prison-
niers reconfortoit par les messaigers, & fait parler
aux Venitiens de les mettre à rançon aux guises de
France: mais rien n'y valut. Car ils dirent que ce n'e-
stoit pas leur vñsance. Adonc veilliez les pauvres pri-
sonniers escrire en France aux Seigneurs auxquels ils
estoyent de seruite. Car les aucuns estoyent au Roy,
les autres au Duc de Berry, autres au Duc d'Orleans,
ou de Bourgongne, ou de Bourbon, & ainsi à plu-
sieurs; & chascun supplioit humblement son Sei-
gneur & maistre que pour Dieu ne les voulust ou-
blier, ne laisser là pourrir en prison. Lesquelles re-
questes meurent les Seigneurs à grand pitié, si qu'ils
escriuirent hastiement au Marechal de ceste cho-
se, & feirent tant que le Roy luy escriuit que il n'en
feist plus iusques à ce que il auroit delibéré en son
Conseil ce qu'il voudroit qu'il en feust faict. De
ceste defence feut moult dolent le Marechal; mais
ne voulut desobeir, si se souffrit à tant pour celle fois.
Et en ces entrefaictes se entremeirent aucuns bons
moyens de traicter paix & delaisser la guerre, & sin-
gulierement pour cause des dictz prisonniers. Long
feut

feussent nauires de Geneuois.

ET quant à ce que en vos dictes lettres est contenu, que enuiron le septiesme iour d'Octobre dernier passé, moy accompagné de onze galées me trouuay autour de Modon, & que là vos Carle Zeni, Capitaine des galées des Venitiens, delibera-
stes de vous monstrier amiablement à moy & à mes galées, pour vous complaindre & requerer satisfaction des choses qui par moy & ceulx de ma dictée compaignée auoyent esté ostées à Barut & ailleurs aux marchans Venitiens, & que lors moy & mes galées tournasmes les proües encontre vous, & les vostres monstrans & tenans maniere d'ennemis. Et que vous ce voyant, comme contrainct, & ne pouuant autrement faire, feistes le semblable vous & vos galées encontre moy & les miennes, & tant que par mon default & coulpe feust dure bataille entre les parties, en laquelle bataille feurent prises trois de mes galées, & les autres se meirent à la fuite. Je vous respons en la maniere qui s'ensuit: Il est vray que au retour de mon voyage ie m'en veins vers Rhodes, duquel lieu de Rhodes ie partis avec onze galées pour venir en ma compaignée. Et ces miennes galées, pour le long voyage que faict auoye, où i'auoye eu & laissé plusieurs de mes gens morts, blessez & malades, estoient tres-mal armées, tant de marini-
ers, comme de compaignons, arbalestriers, & encores moins de gens d'armes. De laquelle chose pour les mieux armer, ne appareiller, nonobstant que bien l'eusse peu faire de gens, comme vous sca-

uez qu'il y en auoit beaucoup & de bons au dict lieu de Rhodes, ie ne me soucioye. Pource que ie n'auoye soupçon en mon retour de vous, ne d'autres Chrestiens, que ie tenois tous amis; & par especial de vos Venitiens, pour les belles bourdes polies, & paroles menfongeres que vous Carle Zeni m'auiez dictes & par plusieurs fois mandées, combien que ie sceusse bien que és dictes parties de Modon vous estiez avec les galées des Venitiens. Ainsi doncques accompagné des dictes onze galées, m'en veins mon chemin pour venir droict arriuer au dict lieu de Modon, deuant lequel lieu, c'est à sçauoir en l'Isle de Sapience, moy & mes dictes galées iectasmes le fer le Sabmedy sixiesme iour du dict mois d'Octobre, cuidans estre en lieu d'amis. Et pour donner à chascun congnoissance de la volonté & intention ferme que i'auoye de non offenser nulle de vos galées, ne naues, ne autres choses Venitiennes, & que si i'eusse eu autre volonté & intention, ie l'eusse bien peu faire: Il est vray que peu de iours auant que i'arriuasle au dict lieu de Sapience, i'auois licentié deux galées de Scio qui estoient en ma compaignée, vne galée & vne galiote du Seigneur de Metelin, vne galée & vne galiote de Pera, vne galée du Seigneur Desne, vne autre de mes galées que i'auois enuoyée en Alexandrie, & deux ou trois galiotes. Toutes lesquelles galées & galiotes, si i'eusse eu enuers vous autre volonté que bonne, i'eusse amenées avec moy. Car il ne le me failloit que commander. Et en oultre le iour
auant

auant que ie arriuaſſe au dict lieu de Sapience, moy eſtant au cap Sainct Angel, me veinrent trouuer deux des naues de mon armée bien fournies de gens d'armes & arbaleſtriers ; en l'vne deſquelles eſtoient bien huit cent hommes armez ou plus. Leſquels gens d'armes & arbaleſtriers, ſi i'euſſe voulu, ie pouuoie prendre & leuer, & les departir ſur mes dictes galées à ma volonté. Et d'autre part, en ce meſme lieu, pres du dict cap Sainct Ange, veint vn voſtre brigantin, ou griperie de Candie, vn peu deuant le iour, arriuer à mes galées, cuidant que feuffent les voſtres, lequel apportoit pluſieurs lettres à vous Carle Zeni, & à ceulx de voſtre compaignée. Le porteur deſquelles eſtant ſur ma galée, & icelles lettres baillées en la main de mon patron, me demanda mon dict patron que ie vouloye qu'il en feiſt, auquel ie reſpondis que ie vouloye qu'il les luy rendiſt ſans les ouurir, & que ie ne vouloye point que à luy ne autres Venitiens quelſconques, ne à leurs biens feuiſt aucunement faiſt tort ou deſplaiſir, & qu'il le licentiaſt courtoieſement. Et ainſi feut faiſt. Et encores celle meſme nuit que i'arriuay au dict port de Sapience, peu apres ma venue, veint vne voſtre barque, aux gens de laquelle moy faiſant parler par aucuns des miens, & demander des nouuelles, feut par eulx reſpondu, Que vous Carle Zeni eſtiez à tout onze galées à Portogon, & que deux groſſes galées eſtoient à Modon, avec pluſieurs autres nauires grans & petits, de l'vne deſquelles groſſes galées celle meſme barque eſtoit, comme ils

K k

dirent. Laquelle barque, apres toute courtoisie à luy offerte, ie feis courtoisement licencié. Et le lendemain, qui feut le Dimanche septiesme iour dessus dict, me partis bien matin du dict port de Sapience avec mes dictes galées, pour m'en venir mon chemin deuers Gennes; en volonté de leuer au port de Ion eaüe, dont mes dictes galées estoient mal fournies. Et ainsi comme ie feusse allé deux ou trois milles tirant droict au dict lieu du port de Ion, pour leuer eaüe, comme dessus est dict, vous monstrastes vous Carle Zeni à tout onze galées parties du dict lieu de Portogon, & allant vers Modon, en quoy ie ne pris nul soupçon. Auquel lieu vous ayant faict comme nulle demeure, vous apparustes derechef, & monstrastes à tout vos dictes onze galées, & à tout les deux grosses dessus dictes qui parauant ne s'estoient à nous montrées, en laquelle chose ne preins semblablement soupçon ne pensée aucune, fors que de veoir amis. Et mes galées, côme dict est dessus, estant petitement armées, & parce pouuans peu exploicter de chemin, moy n'ayant aussi en ce trop grande volonté, pource que lors ie m'appensay que vous estiez party pour prendre vostre chemin droict à Venise, ou que vous auiez volonté de parler ou faire parler à moy, vous qui la trahison & mauuaistié que auiez intention de faire auiez longuement bastie, exploictastes de chemin en telle maniere que en peu d'espace feustes bien prochain de moy & de mes dictes galées. Laquelle vostre venue ie voyant hastiue sur moy & sur ma dicte

compaignée, & aussi voyant vos dictes onze galées & les deux grosses venans en bataille & ordonnance, chargées outre ce qu'il est de coustume de tres-grand nombre de gens d'armes, dont les lances, har-nois & personnes se pouuoient clairement veoir, ayant aussi faiët tous habillemens qu'il conuient à guerre & bataille, & mesmement vous Carle Zeni à tout vostre galée estre mis au milieu des dictes deux grosses pour vostre plus grâde seureté. Voyant en outre venir avec vous sept ou huiët brigantins ou palestarmes de naues fort chargées de gens d'armes & d'arbalestriers, qui ne sembloit pas maniere de venir demander aulcune restitution, comme en vos dictes lettres est escript: mais droicte maniere & manifeste semblance d'ennemis, qui sans parole & sans aucune sommation ou requeste à nous impourueus veniez courir sus. Mesmement que par terre selon la marine faisiez venir grand nombre de gens d'armes, tant de cheual, comme de pied, de laquelle terre nous estions prochains. Comme contrainët & par pure necessité feis tourner les proües de mes dictes galées contre vous, defendânt premierement que par nulle de mes galées ne feust faiët offense à vous ne à aucun des vostres de bombardes, de traiët, ne d'autres armeures ou habillemens, ne autrement en aulcune maniere, iusques à ce que de moy en eussent signe ou commädement. Laquelle deffence feut bien obseruée. Mais vous qui la volonté traistreuse de long temps auiez en vostre couraige, qui à ce faire auiez mis toute dili-

gence & cure; & pour celle cause auiez pris & mis sur vos dictes treize galées & sur vos brigantins ou palestarmes dessus dicts tres-grand nombre de soul-doyers, de gens d'armes, & de traict, tant de ceulx de Modon, de Coron, comme de ceulx qui debuoient aller à la garde de Candie, & aussi de ceulx qui estoient es nauires qui pour lors estoient à Modon, dont il en y auoit tres-grand nombre, comme dessus est dict, en grande ordonnance, avec bombardes, arbalestriers, & autres choses à bataille necessaires, auant que mes dictes galées peussent estre bien en arroy, ne que ce peu de gens que i'auoye peussent estre armez, qui encores ne l'estoyent, pour l'esperance que iusques lors moy & eulx auions eu enuers vous d'amitié, & non de inimitié, me veinistes courir sus & inuestir. Voyant laquelle chose, ie feis signe & commandement à tous les miens que chascun feist à son pouuoir, comme en tel cas appartenoit. Pourquoi tous ceulx qui en ont ouï ou orront parler, & qui à verité adioustent foy & non à menzonges, peuuent clairement veoir & apperceuoir que de vostre tres-malicieuse volonté & trahison pourpensée, non pas par contrainte, comme faulxement est contenu en vos dictes lettres, entraistes & esmeustes la bataille, & que moy & les miens par vostre default & coulpe, & non pas par la miennne, entraismes en icelle bataille comme contraincts & defendeurs. Mesmement que si la bataille dessus dicté i'eusse désirée, ie vous feusse plus tost allé trouuer à Portlong, où vous n'auiez que onze

galées, que ie n'eusse vous laisser fortifier des dictes deux grosses, & des brigantins ou palestarmes dessus dicts. Laquelle chose m'estoit assez legere à faire, si i'en eusse eu la volonté.

ET touchant ce que en vos dictes lettres est escript, que apres la dure bataille entre nous feurent prises trois de mes galées, & les autres se meirent à la fuite. De la dureté de la bataille, ie m'en rapporte à ce qu'il en feut, & à ce que vous Carle Zeni, si vous en vouliez dire la verité, en pourriez dire, qui sçauiez que deux fois le iour par ma galée la vostre feut couruë & mise comme à desconfiture. Et si la besongne eust esté à partir à nous deux, & que ma galée n'eust eu à autres galées à faire qu'à la vostre, si ie l'eusse legerement depeschée: nonobstant vos traistreux pourpensemens & dessein de longue main, tant en grand nombre de gens d'armes, d'arbalestriers, comme autres choses, oultre le nombre & vlsance accoustumée, comme dessus est dict.

ET quant aux prises des galées, il est vray que par mes galées feut prise vne des vostres, & par vos galées feurent prises trois des miennes. Et se deburoit-on donner grand merueille, que vous qui estiez en nombre de gens comme ie croy trois fois plus que nous n'estions, & en nombre de nauires plus que le double, & qui de faict à pensé auiez appoincté vostre besongne, nous estans impourueus & mal fournis, & non sçachans, ne ayans aucun soupçon, toutes nos galées par les vostres ne feurent prises. Mais Dieu qui à tard laisse trahisons & mauuaistiez

accomplir à ceulx qui les entreprennent, nous garda & defendit, avec la peine que nous y meismes, que vostre orgueilleuse & traistresse intention ne veint à effect.

ET quant à la fuite que vous avez escripte par mes autres galées auoir esté faicte, ie me donne grandement merueille, comme d'une chose où il y auoit tant de gens; & dont la verité peult estre si clairement sceüe, comme de ce vous osez si apertement mentir. Car vous Carle Zeni & vos galées, fustes celles qui apres que nous feusmes departis d'ensemble, (laquelle departie feut faicte principalement par vous & par grand part de ceulx de vostre compaignée, de tout vostre pouuoir, lors que nous estions les vns deuant les autres,) honteusement & à grand vergongne vous allastes retirer en vostre port de Modon, nous tousiours demeurans en nostre place iusques à ce que vous feustes au dict port. Et de nostre place nous ne bougeasmes iusques à tant que par vostre entrée faicte au dict port, eusmes perdu la veüe de vous. Laquelle chose à vous & à tous ceulx de vostre dicte compaignée doit estre reprochée à vne tres-grande lascheté de couraige & defaillance d'honneur.

ET pour venir à la conclusion de ceste mienne lettre, ie dis ainsi & le veux maintenir, que au cas que vous Michel Steno auriez donné à Carle Zeni congé, licence ou commandement d'auoir faict ce qu'il a faict encontre moy & ma dicte compaignée, eu esgard à la bonne paix qui estoit entre le commun

de Gennes & le vostre, que vous auez faißt comme faulx traistre & mauuais, ensemble tous ceulx qui le vous ont conseillé. Et au cas que vous Carle Zeni l'aurez faißt sans le congé ou commandement du dict Michel Steno, qui est vostre Duc & Superieur, ie dis de vous le semblable que de luy & de tous ceulx qui le conseil vous en auroient donné.

Et pour ce qu'il est d'vltance que tout Gentilhomme extraict de franche & noble lignée, doit vouloir mettre à clarté & effect les choses par luy parlées, par especial touchans son honneur, & que moy qui sçay la verité de ceste chose le veüil semblablement faire, pour monstrier la faulte & coulpe à ceulx qui l'ont desseruy, & afin que ceste mauuaitié congnüe, chascun se garde doresnauant d'en faire vne pareille, ou autre, le dis & diray, & veüil prouuer & maintenir, comme tout noble homme doit faire, que toutes les choses que vous Michel Steno auez escriptes au Roy mon souuerain Seigneur, ou que vous, & vous aussi Carle Zeni pourriez auoir escriptes à autres, ou dictes touchant ceste matiere, au contraire de ce que en ceste mienne lettre est contenu, qui est la pure verité, sont faulses & mauuaises mensonges, & que faulusement & mauuaiselement auez menty, & mentirez toutes les fois que au contraire en escrirez ou direz aulcune chose. Et pour prouuer & monstrier que ainsi soit, ie vous offre, s'il y a nul de vous deux qui veüille ou ose dire le contraire, de luy monstrier de mon corps contre le sien par bataille, & luy faire confesser & recon-

gnoistre à l'aide de Dieu la verité estre telle comme
 iela dis. Et si ce party nul de vous deux n'osoit pren-
 dre, comme ie croy ; pour monstrier plus grande
 preuue de ma bonne raison & verité, me confiant
 entierement en Dieu, en nostre Dame, & en Mon-
 seigneur Sainct George, ie vous offre moy cin-
 quiesme combattre lequel que ce sera de vous deux
 luy sixiesme, moy dixiesme celuy de vous luy dou-
 ziesme, moy quinziemes celuy de vous deux luy
 dixhuietiesme, moy vingtiesme celuy de vous deux
 vingt-quatriemes, ou moy vingt-cinquiesme celuy
 de vous deux luy trentiesme. Par ainsi, que tous
 ceulx qui de vostre costé seront soyent tous Veni-
 tiens, & que ceulx de mon costé soyent François &
 Geneuois. Pource que aux François & Geneuois
 ensemble auez faicte la trahison que faicte auez. Et
 pour estre teneur de la place & Iuge de ceste batail-
 le, si de vostre part l'olez faire & accomplir, ie se-
 roye content plus que de nul autre que ce feust le
 Roy mon souuerain Seigneur, si de sa grace le vou-
 loit faire. Et au cas qu'il ne voudroit, ou que vous
 ne le voudriez accepter, de quelque autre Roy
 Chrestien que voudriez eslire ou choisir, i'en seray
 content, & semblablement de maint autre moin-
 dre que Roy. Et si la bataille s'accomplit, comme si
 fera, si Dieu plaist, si par vous ne default, mon in-
 tention est que chascun soit armé de telles armes &
 harnois comme il est accoustumé de porter com-
 munément en guerre & bataille, sans autre malice
 ou malengin desraisonnable. Et si nulle desdictes
 deux

deux offres ne voulez accepter ne accóplir, pour ce que vostre guerre & vos œuures auez tousiours plus pratiquées par mer que par terre, ie vous offre & suis content que l'un de vous lequel que voudrez prendre vne galée, & moy vne autre, veüe premierement la vostre par aucuns des miens à ce de par moy commis, & aussi la mienne par autres des vôtres que voudrez semblablement à ce commettre, afin que les dictes galées soyent semblables, & que icelles galées chascun puisse armer à sa volonté, en tel nombre & quantité de gens comme bon luy semblera. A la charge que tous ceulx d'icelle vostre galée soyent Venitiens, & ceulx de la mienne François & Geneuois, pour les causes dessus dictes. Et que en certain lieu par nous accordé nous trouuions à toutes nos dictes deux galées, pour combattre iusques à tant que l'une d'icelles par l'autre soit outrée & vaincue. Toutesfois auant que la dicte bataille se face, ie voudrois auoir bonne feureté, que en nulle maniere par vous, ne par vostre pourchas, occultement, ne paloisement, fors seulement par la galée qui seule à moy se deburoit combattre, & par les gens qui dessus icelle seroyent, ne me soit faict offense, & semblablement ie le vous veulx faire. Et si l'une de ces trois offres vous est agreable, ie voudroye que l'effect d'icelle que mieulx voudriez feust brief. Pource que tout faict de guerre & de bataille se doit plus mener par œuures que par paroles. Et eüe vostre responce, à l'ayde de Dieu, de nostre Dame, & de Monseigneur Sainct George, en bref ie seray

prest de l'accomplir. Et pour monstrier que ceste chose vient de ma certaine science & pure volonté, & que j'ay entier vouloir & parfaict desir de l'accomplir à mon loyal pouuoir, j'ay seellé ces lettres du seel de mes armes; faictes & escriptes au Palais

1404. Royal à Gennes, le sixiesme iour de Iuin, mille quatre cent & quatre.





CY COMMENCE

LA TABLE DE LA TROI-

SIESME PARTIE DE CE LIVRE,

laquelle parle des faicts que le Mares-

chal feit depuis le temps qu'il fut

retourné du voyage de Syrie

iusques à ores.



PREMIEREMENT parle des Seigneurs Italiens qui desiroient auoir l'acointance du Mareschal, pour les grands biens que ils oyoient dire de luy. I.

Item comment le ieune Comte de Milan emprist guerre au Mareschal, dont mal luy en ensuiuit. II.

Item comment le Mareschal laboura, afin que il peust mettre paix en l'Eglise, & que les Geneuois se declarassent pour nostre Saint Pere le Pape. III.

Item comment le Mareschal assambla à Conseil les plus saiges de Gennes, & les paroles que il leur dit sur le faict de l'Eglise. IV.

Item comment le Mareschal tendoit à ce que l'Eglise fust en vnion, & sous l'obeissance d'un seul Pape esleu par Concile general. V.

Ll ij

Item commence à parler comment les Pisains se rebellerent contre leur Seigneur, & comment le Mareschal se peina de y mettre paix. VI.

Item comment les Pisains feirent entendre au Mareschal par feintise que ils vouloient estre en l'obeissance du Roy de France, & deuenir ses hommes, & de la mauuastie que ils luy feirent. VII.

Item comment le Mareschal se travailloit tousiours que ceulx de Pise se donnassent au Roy. VIII.

Item comment le Mareschal dit & manda aux Pisains que s'ils ne se donnoient au Roy, que leur Seigneur les vendroit aux Florentins. IX.

Item l'accord qui feut faict entre le Mareschal & les Florentins du faict de Pise. X.

Item comment le Mareschal enuoya par escripts au Roy de France, à Nosseigneurs, & au Conseil, l'accord que il auoit faict avec les Florentins du faict de Pise, lequel le Roy & Nosseigneurs agréerent par leurs lettres. Et comment depuis par feintise les Pisains se voulurent donner au Duc de Bourgongne. XI.

Item comment le Duc d'Orleans & celui de Bourgongne sceurent mauuais gré au Mareschal pour ce que il n'auoit esté en l'ayde des Pisains contre les Florentins. XII.

Item monstre par exemples comment les bons sont communément enuiez. XIII.

Item preuue par raison que on ne doit mie tousiours adjoyster foy ne croire en paroles & opinion de peuple.

XIV.

Item comment le Mareschal, par la vaillance de son couraige, entreprit d'aller prendre Alexandrie, & des

messagers que il enuoya pour ceste cause au Roy de Cypre.

XV.

Item encores de ce mesme, & de l'instruction que le Marechal bailla à ses Ambassadeurs de ce que dire deuoient au Roy de Cypre.

XVI.

Item de ce mesme deuise la grand chere & belle responce que le Roy de Cypre feit aux Ambassadeurs du Marechal.

XVII.

Item deuise comment le Roy de Cypre s'excusa deuers les messagers du Marechal de non aller sur Alexandrie.

XVIII.

Item deuise du faict de l'Eglise, & comment le Marechal voulut empescher le Roy Lancelot que il n'allast prendre Rome.

XIX.

Item de ce mesme, & comment Paul Vrsiri Romain, meit le Roy Lancelot à Rome, par argent que il receut.

XX.

Item comment le Marechal, en venant par mer de Genes en Prouence, combatit quatre galées de Mores, où grand foison en yent d'occis.

XXI.

Item comment Messire Gabriel Marie, bastard du Duc de Milan, cuida vsurper sur le Roy la Seigneurie de Genes, & comment il eut la teste couppee.

XXII.





CY COMMENCE LA TROISIESME PARTIE DE CE LIVRE,
laquelle parle des faicts que le Maref-
chal feit depuis le temps que il feut
retourné du voyage de Syrie
iusques à ores.

CHAPITRE I.

*Premierement parle des Seigneurs Italiens qui
desiroient auoir l'accointance du Maref-
chal, pour les grands biens que ils
oyoient dire de luy.*



PRES que ces choses feurent toutes
appaisées, & que le Marefchal estoit à
sejour à Gennes, comme la renom-
mée feust ja grande en toutes parts de
ses vertus & biensfaicts; & toute Italie
en feust plaine, feurent aucuns Seigneurs du dict
pays, qui moult l'aimèrent, & desirerent son ac-
cointance. Entre lesquels feut le Seigneur de Pa-
doüe, qui moult estoit de grande bonté, vaillant
aux armes, & bien morigené; & pour ce aimoit-il
le Marefchal. Car cōme dict le Prouerbe commun,
Chascun aime son semblable. Et pour le grand

amour qu'il luy portoit, & le desir qu'il auoit de le voir, veint vers luy à Gennes, apres ce que par plusieurs fois luy eust escript. Si le receut le Marechal à grand honneur, & moult grand chere luy feit. Laquelle il eut tant agreable, & tant le prisà & aima, que tous les François prit à aimer pour l'amour de luy. Et adonc le bon loyal Marechal, qui tousiours taschoit à accroistre l'honneur & le bien de son souverain Seigneur le Roy de France, ne musa mie: ains tant faigement se gouerna avec le dict Seigneur de Padoüe, que par ses bons admonestemens feit tant qu'il deueint homme du Roy, & recongneut de luy la Seigneurie de Padoüe & de Verone, qui sont deux grosses Citez, & de tout son pays, & en feit hommaige au Roy en la personne du Marechal, lequel le receut ioyeusement. Semblablement comme auoit faißt le Seigneur de Padoüe, se tira deuers le Marechal, pour la renommée de sa grande bonté, la Comtesse de Pise, & son fils Messire Gabriel Marie, & de leur volonté & propre mouuement feirent hommaige au Roy en la personne du Marechal, de la Seigneurie de Pise & de tout le Comté. Et moult se offrirent à luy faire tout le seruice que faire luy pourroient, si besoing en auoit. Et il les en remercia grandement, & moult les honora & festoya tant que avec luy feurent. Si doit bien auoir cher tout Roy ou Prince tel seruiteur, & loyal Lieutenant & Cheuetaine, qui tousiours est en soin d'accroistre, augmenter & multiplier le preu & l'honneur de son Seigneur.

CHAPITRE II.

*Comment le ieune Duc de Milan entreprit
guerre au Mareschal, dont mal luy
en ensuiuit.*

NVIRON ce temps adueint que le ieune Duc de Milan, & son frere le Comte de Pauie, apres la mort de leur pere, qui auoit esté le premier Duc de Milan, prirent contens aux Geneuois, tant que ils les assaillirent de guerre, & auoient à leur folde & en leur ayde Facin Kan, lequel comme assez de gens sçauent a esté long temps & encores est le plus grand Cheuetaine de gens d'armes, & le plus renommé & craint qui soit, ne ait esté en Italie bonne piece a, & qui meilleures gens soubz soy communément a. Mais nonobstant sa force & hardiesse, & tout ce que il peut faire, ne toute la puissance du Duc de Milan, grande greuance ne receurent mie de eulx les Geneuois. Car leur bon Cheuetaine & Gouverneur bien les en sceut garder. Car n'auoient mie à faire à enfant: mais à celuy qui tout duiët & maistre estoit de mener telles danſes, & qui peu les craignoit. Si feit assemblée contre eulx tantost le Mareschal, & n'attendit mie que ils le veinſſent chercher, ains alla sur leur pays, & par telle vigueur prit à faire ce que à guerre appartient que toute leur terre espouuenta, & en

& en peu de temps leur porta grand dommaige. Et pour dire en brief comment la chose feut demenée, & puis terminée, car long procès seroit à tout dire, & à racompter toutes les enuahies & faicts d'entre eulx, ils se trouuerent par plusieurs fois main à main ensemble. Mais sans faillir oncques n'assémblèrent que ce ne feust tousiours au pire & au grand dommaige du Duc de Milan, & qu'il n'y perdist moult de ses gens. Et malgré toute sa deffence le Mareschal alla assieger ses chasteaux & forteresses, & par force & de bel assault en preit plusieurs, quoy que ils se defendissent de toute leur puissance, & que par maintes fois Facin Kan veinist sur eulx pour cuider leuer le siege: mais tout ce rien ne leur valoit. Pour laquelle chose tant y fait & tant y exploicta le Mareschal, que à brief parler le Duc de Milan feut tout ioyeux de pourchasser la paix, à laquelle moult se peina auant qu'il la peust auoir; car à son grand tort la guerre auoit commencée. Toutesfois à la parfin le Mareschal, qui en nul cas n'est trouué desraisonnable, s'y condescendit. Et ainsi feust faicte la paix entre le Duc de Milan & les Geneuois, au profit du Roy, & à l'honneur du Mareschal, & au bien des Geneuois.

M.m

CHAPITRE III.

*Comment le Marefchal laboura, afin que il
peust mettre paix en l'Eglise, que les Geneuois
se declarassent pour nostre Sainct
Pere le Pape.*



NOSTRE les autres biens que le Marefchal dont nous parlons a faicts sur terre, ne faict mie à oublier, mais à ramenteuoir, comme chose à tousiours digne de grand memoire, la grand peine & trauail, & mise de ses propres deniers, que il a employez pour le bien de la Chrestienté au faict de l'Eglise, en laquelle ja par si long temps, dont c'est dommaige & pitié, a eu & encores a douloureux schisme & diuision, comme chascun sçait. Et qui est celuy en vie auiourd'huy Prince ne autre qui plus ait trauaillé au bien d'vnion & paix que a le dict Marefchal? Certes nul. Et c'est chose notoire. Et pour venir à celle fin, c'est à sçauoir de paix, comme tres-chrestien, prudent & saige, a tenu subtile maniere de ce qu'il luy a semblé que bon feust à faire, comme sçauoir se peut manifestement. Mais afin que le temps aduenir ses faicts soyent tousiours cause de bon exemple, il est bon que cy soit representé tout au long. Il est à sçauoir que apres que le Marefchal feut retourné du voyage de Syrie, com-

me i'ay dict cy deuant, quand il se veid vn peu à repos, luy qui oncques temps n'employa en oisiveté, voulut adonc vacquer à mettre à effect le bon desir que tousiours auoit eu en l'esprit. C'estoit de trouuer voye comment vnion & tranquillité peust estre au faict de l'Eglise. Et pour à ce aduenir, se pensa que moult grand bien seroit s'il pouuoit tant faire que il peust aduenir à deux conclusions. L'une estoit qu'il peust à ce tourner les Geneuois, lesquels croyoient en l'Antipape de Rome, que ils se declarassent pour nostre Sainct Pere, & luy rendissent obeissance: L'autre conclusion estoit, que il se peust tant traouailler que nostre dict Sainct Pere, pour le bien de paix en la Chrestienté, feust d'accord de ceder toutes les fois que on auroit trouué voye, ou par force, ou par amour, que l'Antipape cedast. Si aduisa temps & lieu au plus brief que il peut de arraisonner les Geneuois de ceste chose. Et vn iour assembla à conseil tous les plus saiges & les plus suffisans Gentils-hommes, bourgeois & marchans d'entre eulx. Là leur preint à dire par moult belles & saiges paroles, que il leur auoit à proposer aulcunes choses, lesquelles le grand amour que il auoit à eulx le mouuoit à ce faire. Si ne voulussent auoir à mal ce que il leur diroit; ains leur pleust le receuoir à la bonne fin & intention qui le mouuoit. Lors commença à dire tout ainsi que le bon pasteur qui a le gouvernement de ses brebis doit auoir soin de prendre garde que elles ne se fouruoyent; luy qui estoit estably, encores qu'il n'en feust digne, pour estre

M m ij

leur garde & Gouverneur, auoit grand pitié de ce que par si long temps auoyent esté endormis en l'erreur, & encores y perseueroient, de croire, obeir, & adjouster foy à l'Antipape de Rome: Mais par aduanture c'estoit parce que suffisamment n'auoyent mie le temps passé esté informez de la verité du faict, comme on auoit esté en France, & pour ce les en vouloit informer. Et qu'apres ce qu'il auroit faict son debuoir de les faire certains de la verité, de laquelle chose s'il ne le faisoit il feroit grand conscience, & s'il ne les enhortoit de leur sauement, comme il debuoit, ils feroient neantmoins par eulx, quand tout diët leur auroit, ce que bon leur sembleroit. Car à chose qui touche l'ame & la conscience, on ne doit homme contraindre par force, ne aussi faire ne le voudroit. Car ce doit venir de pure franche volonté, ny Dieu ne veult estre seruy à force. Et que à tout le moins il en feroit quitte envers Dieu, quand son pouuoir & debuoir auroit faict de leur suffisamment monstrier & dire.

CHAPITRE IV.

Comment le Mareschal assembla à conseil les plus saiges de Gennes, & les paroles que il leur dit sur le faict de l'Eglise.



A D O N C le Mareſchal commencea à parler, & prit ſa narration dès le commencement du Schiſme, & diſt, que comme ceſte douloureuse peſtilence en l'Egliſe, qui ja auoit duré l'eſpace d'environ trente ans, dont c'eſtoit grand meſchef, commenceaſt du temps & au viuant du tres-Chreſtien & ſaige Roy Charles cinquieſme du nom, lequel par les merites de ſa iuſte vie, & la grande vertu & prudence qui en luy eſtoit, a eſté tenu, eſt & tousiours ſera le plus iuſte Prince, le plus ſaige & de meilleure vie que Roy qui feust en France depuis le temps de Saint Louys, ne meſmement autre que on ſceust au monde en ſon viuant, & qui le plus vſoit de conſeil, ſans lequel ne feiſt que'conque choſe. Si fut vray que dès que les premieres eleſtions eurent eſté faiſtes, qui feurent comme chaſcun ſçait aſſez pres l'vne de l'autre, C'eſt à ſçauoir la premiere à Rome, & puis tantost enſuiuant l'autre par deça, le Roy Charles eut par pluſieurs fois lettres des Cardinaux qui luy notifierent toutes ces choſes, & les cauſes des aduenemens des faiſts par eulx executez. Mais quoy que ils luy certiſiaſſent la ſeconde eleſtion eſtre iuſte & vraye, & la premiere de nulle valeur, le ſaige Prince ne ſe teint mie à tant: ains voulut par grand ſoin ſ'informer de la maniere de toutes les deux eleſtions, pour auoir aduis & conſeil pour lequel des deux il ſe debuoit declarer. Et pour eſtre de ceſte choſe certainement & au clair informé; afin que il ne peult errer, enuoya certains

M m iij

preud'hommes Prelats de son Conseil en Auignon, deuers les Cardinaux qui adonc là estoient, pour bien les interroger de la maniere, & pour prendre & auoir les sermens d'eulx, que sans faueur diroient la verité du faict, & lequel des deux esleus debuioit estre tenu pour vray Pape. Si feut ainsi que quand les dicts enuoyez de par le Roy eurent faict comme ils deurent leur legation aux Cardinaux, adonc les dicts Cardinaux tous iurerent l'un apres l'autre sur le corps de Iesus Christ sacré, & prirent sur la charge & damnation de leurs ames de dire verité. Apres prirent à dire que comme ils estoient à Rome enclos au Conclau, en intention d'eslire sans nulle faueur, mais comme Dieu leur administreroit par la voye du saint Esprit, les Romains par maligne volonté, & à grand fureur de peuple, s'assemblerent autour du Palais, & preindrent à crier sur eulx par grands menaces que ils vouloiēt auoir vn Romain, ou au moins vn Italien. Si les tenoient là assiegez les dicts Romains, qui sans cesser cryoient à leurs oreilles, pour laquelle cause eulx tous troublez d'iceluy tumulte, pour escheuer peril de mort, où ils se voyoient, conclurent entre eulx que ils feindroient auoir esleu l'Archeuesque de Bari, qui estoit Italien. Et ainsi le feirent, & par celle voye les Romains furent appeaisez: Mais bien estoit leur intention, que au plus tost que ils pourroient se partiroient de là, & laisseroient le dict esleu, qui par force auoit esté mis en la chaire, & non mie par droicte voye. Si ne le reputoient point pour Pape, nonobstant qu'ils luy

eussent faict toutes les ceremonies qui y affierent, pource que ce auoit esté par contraincte, & ainsi qu'ils auoiét proposé de le laisser le feirent. Et quand ils feurent venus en Auignon, adonc ils se meirent ensemble, & par bõne & saincte deliberation esleurent vn autre: le quel ils affermoient sur leur part de Paradis, & sur le peril de leurs ames que celuy estoit droict & vray Pape, & que à iceluy debuoir toute la Chrestienté obeir comme au vray Pasteur. A toute ceste certification & lettres seellées des seaulx de tous les Cardinaux, qui ainsi estre vray le tesmoignoient, s'en retournerent vers le Roy les dicts Ambassadeurs, qui luy rapporterent ce qu'ils auoient trouué. Mais encores ne se teint pour satisfait le courage du Roy, & ne luy suffit à tant; ains voulut luy mesme oüir parler aucuns d'eulx, C'est à sçauoir de ceulx qui estoient reputez pour les plus dignes, & les plus saiges preud'hommes Cardinaux, & autres Prelats, qui és dictes eslections auoyent esté. Si les enuoya querir & fait venir vers luy à ses propres cousts & despens. Et pour les oüir quand venus feurent, il assemble le Conseil de tous les Prelats, & des plus saiges Maistres en Theologie de son Royaume & d'ailleurs. Si feurent à celuy Conseil moult examinez les dicts Cardinaux & les Prelats de tous les poincts qui pouuoient toucher la conscience sur le dict faict, ausquels ils respondirent sur chascun article si suffisamment que il n'y eut que dire. Si feut la chose moult bien discutée, comme il affiert à si pesante besongne, & non mie tost ne hastiuement:

mais proluxement, & en long temps: afin que point d'erreur n'y peust estre meussée soubz dissimulation, ne que aucun scrupule peust demeurer en conscience. Toutesfois à la parfin, par le conseil de tous les Prelats, & des susdicts solempnels Maistres en Theologie, & de tous les saiges que il peut assembler, feut conclu, que toutes choses regardées & bien discutées, le Roy & toute la Chrestienté se debuoient declarer & tenir à la seconde eslection, & ainsi l'affermoient pour verité, & iuroient & prenoient sur leurs ames que faire se debuoit. A laquelle chose à bonne cause le Roy adjousta foy, en disant qu'il n'estoit pas à croire ne vray semblable que tant de preud'hommes se voulussent damner pour la faueur d'un tout seul homme. Et ainsi delibera & manifestement se declara pour la deuxiesme eslection. Laquelle chose il escripuit à tous les autres Roys & Princes Chrestiens ses alliez, comme en Espagne, en Arragon, en Escosse, & ailleurs, lesquels, considerée l'autorité de sa preud'homme & de son grand sçauoir, adjousterent foy à l'enqueste qu'il en auoit faicte, & pareillement se declarerent. Toute ceste narration feit le Marechal aux Geneuois en iceluy Conseil, & plusieurs autres choses à ce propos leur dir, que ie laisse pour briefueté. Si feit apres sa conclusion, en disant que par ainsi pouuoient veoir & congnoistre que sans grande deliberation & aduis ne s'estoyent pas condescendus les François à rendre obeissance à la seconde eslection. Et que s'il leur cheoit au cœur, & sembloit que si digne per-

sonne

sonne que estoit le saige Roy Charles en eust faicte
suffisante information & enqueste comme il leur
auoit recordé, (Laquelle chose estoit assez notoire
que maintes gens encores viuans sçauoient, & luy
mesme certainement le sçauoit, car ce auoit esté de
son temps, nonobstant que il feust moult ieune
adonc; mais assez de fois l'auoit depuis oüy recor-
der,) que ils se voulussent semblablement declarer
pour nostre partie, si leur conscience s'y adonnoit.
Quand le Marechal eut finy sa parole, les Geneuois
qui bien & bel auoient noté ce qu'il auoit dict, res-
pondirent que bien l'auoient entendu, mais que la
chose leur estoit moult nouuelle, & si touchoit con-
science, & ne debuoit estre deliberée sans grand ad-
uis, si penseroient sus, & puis luy en respondroient,
& il dict que ce luy plaisoit bien. Et à tant se depar-
tirent: mais depuis par plusieurs fois en feurent as-
semblez ensemble, & tant que à dire en brieuf, à la
parfin de leur tres-bonne volonté & sain consente-
ment, comme Dieu pour le bien de Chrestienté le
voulut, se declarerent pour nostre partie, & rendi-
rent vraye obeissance au Pape. De laquelle chose le
Marechal feut moult ioyeux, & en remercia nostre
Seigneur. Et ainsi en veint à chef par son grand sça-
uoir & prudence. Car c'estoit la nation de toute Ita-
lie qui depuis le Schisme plus soustenoit en faicts &
dicts le party de l'Antipape. De quoy tous les saiges
& les Clercs de la Seigneurie de Genes dient & tes-
moignent que ils sçauent de vray que si tous les
Roys, Princes & Clercs du monde les eussent de ce

282 HISTOIRE DV MARESCHAL
enhortez, suppliez & requis, que ja n'y feussent ad-
uenus pour sermons, ne dons, ne offres que leur
sceussent auoir faiët. Si doibt estre reputée ceste
chose, comme ils dient, & il est vray, entre les grands
faiëts du dict Mareschal, comme miraculeule. Car
par delà ils tiennent que c'est la plus grand merueil-
le, & le plus grand faiët d'en estre venu à chef, que
de chose qui adueint au pays d'Italie passé a deux
cent ans.

CHAPITRE V.

*Comment le Mareschal tendoit que l'Eglise
feust en union, & sous l'obeissance d'un
seul Pape esleu par Concile general.*



RESTOIT venu le Maref-
chal à l'une des conclusions que
long temps auoit desirée à attain-
dre, qui estoit de rendre les Ge-
neuois obeissans à nostre Pape,
comme dict est deuant. Si voulut
rendre s'il pouuoit à l'autre conclusion qu'il desiroit.
Il est à sçauoir que il auoit bien en memoire &
estoit informé comme le dict Roy Charles, auant
que il trespassast, comme bon & iuste Roy & tres-
Chrestien, qui auoit sur toute chose à cœur le faiët
de l'Eglise, voyant que il ne pouuoit mettre toute
Chrestienté en l'obeissance d'un seul Pape, comme

elle doibt estre, & que grand meschef estoit de telle diuision entre Chrestiens, aduisa & considera que bon seroit pour appaiser ce maudit Schisme, que Concile general feust faict de tous les Prelats de Chrestienté ou de la plus grand partie assemblez en aucune part, où au mieulx seroit regardé: Et que là feust deliberé & ordonné que tous les deux elleus cedassent, & que si par amour ne le vouloient faire, que à tout l'ayde & le port des Princes terriens, qui tous en feussent d'accord, on les y contraignist par force. Et que quand ce seroit faict, adonc bien & dignement feust vn seul esleu par voye du saint Esprit, comme faire se doibt. Telle estoit l'intention du bon Roy, qui l'eust traicté à chef, mais la mort l'en desaduancea, au grand dommaige & prejudice de toute la Chrestienté, & singulierement de son Royaume. Ceste chose sçauoit le Mareschal, & aussi comment le Roy qui à present regne, fils & successeur d'iceluy, & Nosseigneurs les Princes de France, ont tousiours depuis pretendu à celle voye, pour venir au faict d'vnion. Et pource que bien luy sembloit que ce chemin tenir estoit iuste, ne par autre ne pouuoit estre mise paix en l'Eglise, à son pouuoir vouloit trauailler que ceste chose peust estre terminée, & traictée à chef de paix. Et c'estoit la cause principale & singuliere qui l'auoit meu à tant desirer & trauailler que les Geneuois se declarassent pour nostre Saint Pere. Car son intention estoit que quand il auroit tant faict à l'aide de Dieu comme il feist, que les Geneuois feussent obeissans

Nn ij

au Pape, que adonc par l'ayde de eulx qui est moult grande, & par les autres d'Italie, aucuns se pourroient pareillement conuertir. De laquelle chose se voulut traualier, comme il feit apres du Seigneur de Padoüe, & de celuy de Pise, dont cy dessus est parlé, & d'autres, dont mention sera cy apres faicte, que il iroit courir sus aux Romains, si besoing estoit: au cas qu'ils ne voudroient souffrir que l'Antipape cedast, ou qu'il ne le voulust faire. Plus feit encores le Marechal. Car comme dict est cy deuant, pour sa grande renommée & bonté il attiroit plusieurs nobles hommes à son amour, dont il adueint que mesmement vn des plus principaulx Cardinaulx qui feust à Rome de la parcie del'Antipape, appellé le Cardinal de Flisco, l'aima tant & pris a que il desira son accointance, & luy escriuit plusieurs lectres, & le Marechal à luy, dont à la parfin tant bien y ouura le Marechal que il se soubstrahit del'Antipape, & s'en partit, & laissa bien la valeur de seize mille francs de benefices que il tenoit, si rendit obeissance à nostre Pape. Mais à parler de l'autre conclusion où il tendoit, pour venir par ces deux à vne seule fin, c'est à sçauoir de vnion, par la premiere il entra en l'autre. Car nostre Sainct Pere luy sceut merueilleusement bon gré de ce qu'il auoit mené les Geneuois qui plus luy souloient estre contraires que gens du monde à son obeissance. Si l'en beneitt moult & pria pour luy. Mais encores feit plus pour luy le Marechal: car pour tousiours le tirer à plus grand amour, luy presta en ses affaires de grands deniers,

& luy feit maint secours à ses propres despens. Et tant alla la chose que le Pape alla vers luy, & le Marefchall luy feut à l'encôtre, & le receut à tres-grande reuerence & honneur, comme il debuoit faire. Et lors quand il le teint à sejour avec luy, le prist à enhorter que pour le bien & la paix de l'Eglise, & de toute Chrestienté, il voulust estre d'accord, comme il auoit autresfois promis à Nosseigneurs de France, de ceder toutes les fois que on auroit tant faict ou par force ou par amour, (à laquelle chose il trauiilleroit de toute sa force & puissance,) que celuy de Rome cedast, & que requis en seroit. De ceste chose timonna le Marefchal tant le Pape, que il luy promeit & iura que ainsi feroit-il sans faulte. Et ainsi parueint le dict Marefchal à ses deux conclusions, dont si grand bien en est ensuiuy, que les Romains qui ont bien veu & sceu son intention, ont si redoubté & redoubtent sa vaillance, force & puissance, que apres la mort du dernier leur Antipape trespassé, voulurent eulx mesmes & requirent de leur bonne volonté, sans contrainte, c'est à sçauoir les Cardinaulx de delà, par le consentement de ceulx de la cité, que vn que ils eleurent cederoit & delaifseroit la chaire toutes les fois que le nostre ainsi le feroit: afin que par sainte & iuste voye vn seul pasteur feust esleu. Toutesfois ceste sainte volonté de ceder & de pretendre à vnion, qui est venu à nos aduersaires, c'est à sçauoir aux Cardinaux de Rome, ie tiens que ce soit œuvre du saint Esprit, qui a pitié de son espouse la sainte Eglise, qui tant est desolée,

286 HISTOIRE DV MARESCHAL
si la veult mettre en paix. Laquelle chose, si Dieu
plaist, briefuement sera, & non par quelconque
autre œuvre d'homme mortel. Combien que nous
auons couleur de penser que le Mareschal, comme
dict est en soit cause, par ce que oncques mais, fors
quelors que ils sceurent son intention, ne s'y voulu-
rent consentir. Si peut bien estre que ce y a valu. Si
ne sera au plaisir de Dieu nul besoing de mouuoir
guerre, & aurons vraye vnion, que Dieu nous
oütroye par sa grace. Et combien que le faulx hypo-
cite que les Cardinaux de la partie de delà esleurent
dernierement, se monstra au premier bonne &
sainte personne, (Car il voüa & promeit de faict
deuant tous que il cederait tantost & sans delay tou-
tes les fois que le nostre le feroit, & ainsi le certifia
par ses lettres à tous les Roys & Princes Chrestiens.)
toutesfois ce ne feut fors que hypocrisie & feintise.
Car sa volonté estoit toute plaine de fallace, com-
me à la fin y parut, & comme ie diray cy apres.

CHAPITRE VI.

*Cy commence à parler comment les Pisains
se rebellerent contre leur Seigneur, &
comment le Mareschal se peina
d'y mettre paix.*



PORCE que tout ne se peut dire ensemble, conuient racompter les matieres l'une apres l'autre, combien que plusieurs des choses dont nous parlons soyent aduenües en vn mesme temps. Si est vray que en l'an mille quatre cent cinq les Pisains se rebellerent contre leur Seigneur, & le chasserent de la Seigneurie de Pise, selon la generale coustume qui est au pays de delà de non eulx tenir longuement sous vne Seigneurie, quand ils se trouuent les plus forts. Donc quand iceluy Seigneur se veid ainsi debouter de son heritaige par les mauuais subjects, pour ce que il sentoit que il n'auoit mie assez de gens & force pour les remettre en subjection, se va retirer vers le Mareschal, comme à Lieutenant du Roy de France son souuerain Seigneur, à qui il auoit faict hommaige de son dict heritaige, luy requerir ayde au nom du Roy, comme Seigneur doit au besoing secourir son vassal qui le requiert à son ayde. Quand le Mareschal entendit ceste chose moult luy en pesa. Si luy respondit que auant que on allast sur eulx par voye de faict & de punition, que luy mesme se mettroit en toute peine pour les remettre en accord & en bon amour. Car si par armes destruisoit son pays, le dommaige luy en demeureroit, pour ce ne luy conseilloit, si iroit parler à eulx. Et adonc se partit de Gennes, & alla en vn lieu qui est assez pres de Pise, que on appelle Portouenere. Si feit sçauoir aux Pisains qu'il estoit là venu pour parler à eulx. Adonc veindrent vers luy les principaulx

1405.

d'entre eulx, & grand peuple en leur compaignée. Lors leur prit à dire le Marefchal par amiables paroles, que il estoit bien courroucé de ce que ainfi se-
 ftoient rendus desobeiffans & rebelles à leur Seigneur, qui tant leur auoit esté & estoit bon & amiable, & qui si cherement luy & sa mere Madame Agnes les auoit aimez & gardez soigneusement de tous encombriers à leur pouuoir, comme bon Seigneur doibt faire ses subjects, & encores auoit volonté de leur faire de mieulx en mieulx. Si se voulussent aduifer & venir vers luy à misericorde & à mercy, & luy amender ceste grande offense; & il feroit tant vers luy que il les prendroit à mercy & leur pardonneroit son maltalent. Car pour mettre paix entre eulx estoit-il là venu. En ceste maniere les prescha le Marefchal, & moult leur dict de belles paroles. Et quand il eut dict, ils respondirent à brief parler qu'ils n'en feroient rien, & que plus ne vouloient de la Seigneurie: mais que ils le supplioient que luy mesme voulust estre leur Seigneur, & accepter & prendre la Seigneurie de Pise & de tout le Comté. Car luy seul auoient agreable, & non autre: car ils sçauoient bien que par luy seroyent gardez, portez & defendus, & que si prendre les vouloit ils luy obeiroient doucement, & loyauté, honneur & amour luy porteroient si loyaument comme bons & loyaux subjects doibuent faire à leur Seigneur, si ne voulust mie refuser cest offre que de bon cœur luy faisoient. Le Marefchal respondit que iamais telle pensée ne leur veinst au cœur, car ce n'estoit
 mie

mie l'vsaige des François d'vser de tels tours, & ne le feroit pour mourir : mais les prioit que ils le voulsent croire, & retournassent vers leur Seigneur, & feussent bons subjects & vrais obeissans, & que il leur promettoit que si ainsi le faisoient il seroit leur amy, & leur aideroit, & les porteroit contre tout homme, tout en la maniere que s'ils feussent à luy proprement, & mesmement contre leur Seigneur, s'il luy venoit à congnoissance que il voulust sur eulx vser d'aucun tort. Que plus en diroye ? Les Pisains respondirent que pour neant en parloit, & que jamais Messire Gabriel ne seroit leur Seigneur pour chose qui peust aduenir ; & que ainçois tous se laisseroient destrancher. Mais puis que luy mesme ne vouloit estre leur Seigneur, & les prendre à subjects, ils le prioient que il allast à vn chastel qui sied sur la mer que on appelle Ligourne, & là est le port de Pise, & que là iroient à luy, & se donneroient au Roy de France tout en la maniere que auoient faict les Geneuois.

CHAPITRE VII.

Comment les Pisains feirent entendre au Marechal par feintise que ils vouloient estre en l'obeissance du Roy de France, & deuenir ses hommes, & la mauuaistié qu'ils feirent.

Oo



VAND le Mareschal veid que pour prieres, ne sermon, ne belles paroles qu'il sceust dire aux Pisains, ne pour offre que il leur feist ne se vouloient desister de la mauuaise volonté que ils auoient vers leur Seigneur, & que remede n'y pouuoit mettre, ny aucun accord, il se partit de là : & manda vers luy le dict Messire Gabriel, & luy dit tout ce qu'il auoit trouué vers eulx, & comment absolument luy auoient respondu que plus ne s'attendist d'auoir la Seigneurie de Pise : car ja n'y auendroit. De ceste responce feut moult dolent Messire Gabriel, & le Mareschal luy dit qu'il regardast ce qu'il vouloit faire de ceste chose, & que puis que ainsi estoit que il n'y auoit remede que iamais il en iouïst, & ils se vouloient donner au Roy de France, que mieulx vauldroit que le Roy les eust que autre Seigneur estrange, considéré que luy mesme luy en auoit faict hommaige. Toutesfois, que il ne vouloit mie que on peust dire que le Roy voulust s'attribuer les terres & Seigneuries de ses vassaulx, feaulx & subjects. Et pource, si de sa bonne volonté & accord se demettoit de la Seigneurie de Pise & de tout le Comté és mains du Roy, & luy transportoit son droit, que il le feroit recompenser de aultant de terre & de Seigneurie, & de reuenue autre part. Et de ce que il se chargeoit de ceste chose, feut d'accord & bien content Messire Gabriel. Et parce le Mareschal alla au chastel de Ligourne, comme les Pisains luy auoyent dict, en intention

que là veinssent à luy pour eulx donner au Roy, & qu'il en receust d'eulx les hommaiges. Mais eulx qui oncques ne l'eurent en pensée, & qui ne taschoient que à mauuaistié, & toute trahison & deceuance, comme apres bien le monstrent, auoient pris autre conseil, & luy dirent quand ils feurent deuers luy, que auant que ils se donnassent au Roy ils vouloient que les gens de Messire Gabriel, qui estoient en vne forte place de la cité de Pise, que on nommoit la Citadele, vuidassent, & que le Mareschal l'eust en sa main, & que lors ils feroient ce qu'ils auoient dict. Et ainsi luy promeirent & iurerent de faire sans nulle deceuance. Et le Mareschal encores leur agrea ceste chose, & en fait tantost aller les gens qui tenoient la dicte Citadele, & la fait garnir des siens, desquels feut chef Messire Guillaume de Muillon. Mais pour ce que les viures y estoient ja comme faillis, il fait charger vne galée & vne grand barque de tous viures. Et avec ce, pour plus renforcer la garnison de la forteresse, enuoya avec son propre nepueu le Barrois, & la plus grand part des Gentilshommes de son hostel, & aussi foison de Gentilshommes & de citadins de Gennes : Et menoient avec eulx vne grand partie des meubles & des habillemens du corps du Mareschal qui y pensoit aller, & deux mille escus en or que il enuoyoit aux gens de Messire Gabriel, afin qu'ils se teinssent pour contents & bien payez, & plus volontiers deliurassent la place, ne plaindre ne se peussent. Et ainsi se partit du port la dicte galée & la barque, & cuidoient aller

en terre d'amis, & de nul encombrer ne se donnoient garde. Mais quand ils se feurent bourez en la riuere de Pise, & ja feurent arriuez pres de la Citadele, les desloyaux Pisains, qui bien les auoyent aduisez, s'assemblerent : mais ce feut coyement, qu'ils ne les apperceussent, & se meirent en embusche. Et quand nos gens eurent pris port, & feurent tous descendus en terre, sans auoir quelconque doubte de nul, ainçois cuidoient que si les estrangers les venoient assaillir, que les Pisains qu'ils reputoient amis, & à qui oncques n'auoyent mesfaict, les veinssent ayder, il alla tout aultrement. Car ils leur vindrent courir sus plus de six mille. Et acourut là tout le peuple à grand cry & à grand fureur, disant grandes vilenies du Roy de France, du Mareschal, & des François, & comme chiens enragez les enuironnerent, dont nos gens se trouuerent moult esbahis, car en piece ne l'eussent pensé. Si prirent, batirent, nurerent & tuerent aucuns, & menerent en obscure & vilaine prison. La galée & la barque pillerent, & pour plus les iniurier prirent la banniere du Roy de France qui sur la galée estoit, & l'allerent traïnant au long des boïes, & marcherent & cracherent sus, disans, comme dessus est dict, tres-grandes vilenies du Roy & des François. Et en faisant ce vilain exploict, venoient par deuant la dicte Citadele à tout grande procession de peuple pour faire despit aux gens du Mareschal, tant François que Geneuois, qui là dedans estoient, que ils alloient menaceant, & disant que ainsi feroient-ils d'eulx. Si faict icy à

noter leur grande trahison & mauuaistie: car onques le Marechal ne les siens ne leur auoyent mesfaict, ains leur auoit faict maints biens. Car les Florentins si tost que ils auoient sceu que ils estoient en diuision avec leur Seigneur leur voulurent courir sus, & il les en auoit gardez ja par deux fois, & les desloyaux plains d'ingratitude le scauoient bien, & comment tousiours auoit rendu à leur bien, si luy en rendoient mauuais guerdon.

CHAPITRE VIII.

Comment le Marechal se traualloit tousiours que ceulx de Pise se donnassent au Roy de France.

QVAND les desloyaux Pisains eurent faict cest exploict, ils doubterent l'ire du Marechal, & que il leur voulust courir sus pour les destruire, comme bien l'auoyent desseruy, & que faire le vouloit. Mais pour dissimuler & couvrir leur mauuaistie, & pour en faire encores vne plus grande, enuoyerent des principaulx d'entre eulx en Ambassade deuers luy: lesquels luy dirent que pour Dieu il ne se voulust mie courroucer contre eulx, & que ce qui auoit esté faict oultrageusement & à leur grand tort, que ce auoit faict le menu peuple sans le consentement des principaux, & qu'ils estoient tous

prests de luy en faire telle satisfaction & amende qu'il sçauroit demander , & que ils estoient bien d'accord de eulx donner au Roy, comme ils auoient promis. Le Marefchal qui ainsi les ouït parler, ne voulut mie vser enuers eulx de grand rigueur, pour ce que il tendoit tousiours que il peust tant faire que il les teint subjects du Roy. Si leur dict que voirement tant auoyent meffaiçt que plus ne pouuoient, & plus luy pesoit de ce que le Roy auoient iniurié, que de luy, ne de ses gens: mais que au fort tout leur seroit pardonné; mais que ils se donnassent au Roy, ainsi que promis auoyent. Et ils dirent que si feroient-ils sans faillir. Si retourneroient par son bon congé deuers les autres citoyens de Pise, leur dire la benignité qu'ils auoient trouuée en luy, & qu'ils veinssent là pour du tout confirmer la chose. Mais que pour Dieu ils le prioient que pendant ce traicté il ne voulust aucunement proceder rigoureusement contre eulx, & il leur promet que non feroit-il. Et à tant partirent les desloyaulx, qui tout ce ne faisoient que pour le tenir en paroles, pour tandis mettre à fin le desloyal exploict où ils tendoient. Car au temps que ce traicté duroit, de toute leur puissance assailloient la Citadele de iour & de nuict d'engins de traict, & de canons. Et plus grande mauuaistié feirent. Car chascun iour à force d'engins iectoient en la forteresse plus de cent cacques plains des ordures de la ville, de poisons, de charongnes pourries, & de toutes punaïssies. Si feirēt grands fossez entre eulx & la Citadele, & la separerent de la

ville. Et pource que elle sied à vn des bouts de la cité, comme faiët le chastel de la Bastille Saint Anthoine à Paris, ils les enfermerent du costé des champs à fossez & bastilles que ils fortifierent, afin que ils ne peussent auoir secours. Et ainsi les assiegerent de toutes parts, & s'efforçoient sans cesser de les prendre par force. Mais ce n'estoit mie legere chose; car moult est la place forte. Et avec toutes ces choses, bien faisoient garder tous les passaiges, afin que le Mareschal n'en peust auoir nulles nouuelles. Plus grande trahison voulurent encores bastir & faire. Car ils enuoyerent leurs Ambassadeurs à Florence garnis de belles lettres de puissance de pouuoir donner à la dicte Seigneurie de Florence quatre chasteaux lesquels ils voudroient prendre & choisir en leur Seigneurie de Pise, & avec ce les affranchir de toutes les marchandises que ils feroient iamais en leur Seigneurie, mais que ils voulussent aller à toute leur puissance avec eulx mettre le siege deuant le chastel de Ligourne, où le Mareschal estoit, & leur Seigneur Messire Gabriel avec luy, & faire tant que ils feussent pris & liurez à eulx. Mais à ceste chose ne voulurent point les Florentins se consentir. Et en ces entrefaictes que ils bastissoient ceste chose, les Ambassadeurs de Pise retournerent deuers le Mareschal, afin que il ne s'apperceust de rien de ce que ils faisoient; afin que ils peussent tandis que ils le tiendroient en paroles prendre la Citadele, & aussi trouuer voye s'ils pouuoient de l'assieger à Ligourne. Si luy dirent que les Pisains estoient tousiours bien

296 HISTOIRE DV MARESCHAL
d'accord de eulx d'ôner au Roy comme ils auoyent
promis: mais ils vouloient que ainçois qu'ils s'y don-
nassent, que le Marefchal leur baillast & deliurast
trois chasteaux en leurs mains, c'est à sçauoir la Cita-
dele, le chastel de Ligourne, & celuy de Librefai-
cte, que tenoit encores Messire Gabriel en sa main.
Et le Marefchal leur respondit adonc que voulez-
vous faire de la Citadele? Et ils respondirent, nous la
voulons raser par terre, & tenir les autres deux cha-
steaux en nos mains. Quelle Seigneurie ce dict le
Marefchal aura doncques le Roy sur vous, ne quel
pouuoir auroit-il de iusticier les mauuais & de les
punir? Nous ne voulons ce dirent-ils que il y ait au-
tre Seigneurie fors que le nom d'en estre Seigneur.
Peu de chose, ce dict le Marefchal, seroit au Roy
celuy tiltre, mais donnez-vous y comme ceulx de
Gennes ont faict, ou ainsi que vous vous donnastes
à Messire Girard de Plombin, duquel le Duc de
Milan eust depuis la Seigneurie & le tiltre. A donc
respondirent les Pisains vne fois pour toutes que
rien n'en feroient, & à tant se departirent. Si veid
bien & apperceut le Marefchal que leur faict n'e-
stoit fors toute tromperie, & que pour le mener à la
longue l'auoient ja tenu en paroles l'espace de vingt
deux iours. Et Messire Gabriel qui voyoit que tout
ce n'estoit que deceuance, prit à traicter avec les
Florentins de leur vendre Pile & tout son droict du
Comté. Mais le Marefchal qui tousiours y auoit la
dent, encores se voulut mettre en son debuoir de
fessayer auant que aux Florentins aulcune vendi-
tion

tion en feust faicte. Si enuoya six des plus notables de la ville de Genues deuers eulx, pour leur remon-
strer & dire qu'ils ne se voulussent pas eulx-mesmes
destruire. Car leur Seigneur estoit en paroles de les
vendre aux Florentins, lesquels ils sçauoient bien
que point ne les aimoient, & qui mal les traicte-
roient, si se aduifassent bien, & se donnassent au
Roy comme ils auoyent promis, & grand bien &
profit leur en viendroit, si viuroient en paix & à
leur. Tandis que ces Ambassadeurs estoient allez à
Pise, les Florentins enuoyerent au Mareschal la cop-
pie des lettres du pouuoir que les Pisains auoient
baillées aux Ambassadeurs de Pise, pour faire tant
auec les Florentins que ils allassent assieger le Mares-
chal à Ligourne, comme dict est. Et ce mesme iour
eust messaige & nouuelles de son nepueu le Bar-
rois, & des autres prisonniers, comme vilainement
estoyent traictez, & que on les auoit mis à rançon,
& que pour Dieu, nonobstant que la rançon feust
assez grande, que il les voulust deliurer de celle char-
tre : car ils estoyent à grande souffreté & peril de
leurs corps. De ceste chose feut moult dolent le Ma-
reschal, & bien luy estoit manifeste la grande trahi-
son & mauuaistié des Pisains. Et si ne feust que il
auoit ja mandé en France au Roy & à son Conseil
que ceulx de Pise s'estoyent donnez à luy, il n'eust
pour rien tant attendu de leur courir sus, & de leur
monstrer leur trahison & mauuaistié. Mais il aimoit
plustost souffrir que les enuieux, dont bien sçauoit
que assez en auoit en France & ailleurs, peussent

P p

298 HISTOIRE DV MARESCHAL
dire que le Roy eust par son arrogance perdu la Seigneurie. Si ordonna tantost de la deliurance des prisonniers. Et les messaigers Geneuois qui feurent enuoyez à Pise n'y feirent rien : ains leur respondirent les Pisains telles paroles. De tout ce que vous nous requerez nous ne ferons rien, & ne nous en parlez plus, mais faiçtes mieulx, ostez la Seigneurie à vostre Roy, & tuez Boucicaut & tous ses François, & viuez en Republique comme nous, & soyons tous vnis comme freres vous & nous, & vous ne ferez que saiges. Ceste responce rapporterent les dicts Ambassadeurs, qui autre chose n'en peurent tirer.

CHAPITRE IX.

Comment le Marechal dit & manda aux Pisains que s'ils ne se donnoient au Roy leur Seigneur, les vendroit aux Florentins.

LE SEIGNEUR de Pise qui veid que il n'y auoit plus d'attente que les Pisains se consentissent à vouloir estre subjects du Roy, prist adonc fort & ferme à continuer son traicté avec les Florentins de la vendition de Pise, c'est à sçauoir de leur transporter son droit entierement. Si pourparlerent tant ceste chose, que ils feurent d'accord ensemble pour quatre cent mille florins que les Florentins debuoiert bailler à Messire Gabriel. Mais toutesfois les Florentins vouloient

tout auant ceuvre que le Mareſchal conſentift, iuraſt & agreaſt ceſt accord, ou autrement marché nul. Si le veint dire Meſſire Gabriel au Mareſchal, & luy requiſt que il luy rendiſt la Citadele que il tenoit encores, laquelle il luy auoit iuré & promis de luy rendre ſans contrediſt, au cas qu'il ne ſeroit d'accord avec les Piſains, ſi ne le pouuoit ny debuoit reſuſer. Le Mareſchal reſpondit que il luy tiendroir ſans faillir ce qu'il luy auoit promis ja n'en doubtaſt. Mais quand eſtoit de accorder les conuenances qu'il auoit faiſtes avec les Florentins de la vendition de Piſe, iour de ſa vie il ne ſeroit d'accord que le Roy perdiſt ſa Seigneurie, dont luy meſme luy auoit vne fois faiſt hommaige, & eſtoit entré en ſa foy. Et que il vouloit veoir les lettres de l'accord & des conuenances qu'il auoit faiſtes avec les Florentins, & il dit que volontiers les luy bailleroit. Et quand le Mareſchal les teint, & que bien les eut viſitées, il en enuoya la coppie à Piſe, & manda aux Piſains que nonobſtant toutes les trahiſons & mauuaiſties que ils luy auoyent faiſtes & voulu faire, ſi auoit-il grand pitié du grand meſchef qui leur eſtoit à aduenir, & de leur deſtruction, où eulx-meſmes par leur follie ſe fichoient. Et que pour eulx aduiſer leur enuoyoit la coppie du Traicté qui eſtoit ja tout conſommé & parſaiſt entre leur Seigneur & les Florentins, auquel il ne ſ'eſtoit pas encores voulu conſentir. Afin que Dieu, ny le monde ne le peuſt accuſer que il n'euſt ſuffiſamment faiſt ſon debuoir de les bien aduiſer auant que ils ſeuſſent deſtruits. Si les admo-

300 HISTOIRE DV MARESCHAL
nestoit derechef que ils se donnassent au Roy com-
me ils auoient promis, & il les ietteroit hors de celle
tribulation, & les mettroit en paix, & que ceste fois
pour toutes leur disoit. Car plus ne pouuoit dilayer
ne empescher la dicte vendition, & que si alors ne
l'accordoient, deux iours apres passez iamaïs plus
n'y pourroient aduenir. Car il luy conuenoit con-
sentir la chose, & promis auoit à leur Seigneur que
il s'y consentiroit, au cas que ils ne se vouldroient
donner au Roy, si le tenoit de si pres de sa promesse
que plus reculer ne pouuoit. Si feussent certains que
quand il l'auroit consenty, iuré & promis, que iour
de sa vie n'iroit au contraire. Si deliberaissent à ceste
fois ce que faire en vouldroient. A ceste chose res-
pondirent les Pisains que brief & court rien n'en fe-
roient, & que plus on ne leur en parlast.

CHAPITRE X.

*L'accord qui fut faict entre le Mareschal &
les Florentins du faict de Pise.*



ADONC voulut parfaire Messire Ga-
briel son traicté avec les Florentins:
mais le Mareschal s'y opposa, & dict
que il ne consentiroit point que autres
eussent la Seigneurie de l'heritaige
dont vne fois auoit esté faict hommaige au Roy, &
que plustost il feroit bonne guerre aux Pisains, & les
conquerroit par force. Quand Messire Gabriel veid

ce, il se conseilla avec les Florentins. Si conclurent vn tel appointment ensemble, que afin qu'il s'y consentist les dictz Florentins deuiendroient hommes & feaulx du Roy de la Seigneurie de Pise, tout en la maniere que l'estoit Messire Gabriel. Et quand ainsi l'eurent appointé, ils le veindrent dire au Marechal, lequel leur respondit, que quelque chose que il accordast, ils feussent seurs que iour de sa vie ne cōsentiroit que le chastel de Ligourne issist hors de ses mains, ne allast en Seigneurie estrangere. Car ce seroit au prejudice des Geneuois, desquels il deuoit garder & accroistre les iurisdiction & puissance. Mais au surplus il y penseroit, & le lendemain retournerassent. Adonc va dire Messire Gabriel qui là estoit, que deslors desia vouloit & se consentoit, & belles lettres luy en feroit, que quelque marché que il feist avec les Florentins, ou à aultre, que le dict chastel de Ligourne feust nuëment & absolument au Marechal. Car tant auoit pour luy trauaillé & faict de bien, que assez l'auoit defferny. Et iceulx respondirent que pour celle cause il n'y auroit debat entre eulx. Celle nuit pensa le Marechal à ceste chose, & aduifa que au fort par celle maniere que ils luy auoient offert le Roy n'y perdoit rien; ains y gagneroit. Car il auroit pour vne puissance & Seigneurie deux, c'est à sçauoir Pise, voulsissent les Pisains ou non, & les Florentins avec, qui moult est grande puissance, qui feroient par cest accord hommes du Roy. Si delibera que il s'y accorderoit, mais que ils voulussent encores luy conceder &

octrôyer aulcunes choses que il leur requerroit. Es-
 quelles requestes le bon Chrestien n'oubloit point
 sa mere Sainte Eglise, de laquelle tousiours & sans
 cesser en auoit à cœur la paix & vnion, comme dict
 est deuant. Le lendemain quand ils feurent retour-
 nez vers luy, il leur dict que à ce dequoy ils luy
 auoyent parlé s'accorderoit assez, c'est à sçauoir que
 les Florentins teinssent Pise, la Citadele, & toutes les
 appartenances du Comté, excepté le dict chastel de
 Ligourne, & que ils en feissent hommaige au Roy,
 & deueinssent ses hommes liges: mais que ils vou-
 lussent accorder, promettre, iurer, & eulx obliger,
 que à tousiours & à jamais ne feroient marchandise
 sur mer, fors sur les naues & vaisseaux de Gennes, &
 des Geneuois. Item, que vn mois apres que ils au-
 roient gaigné la Seigneurie par force, ou autrement,
 ils se declareroient pour nostre Saint Pere le Pape,
 & feurent chargez d'y faire obeir les dicts Pisains.
 Item, que six mois apres la dicte conqueste, si l'es-
 leu de Rome estoit encores en son erreur, & y vou-
 lust perseuerer, que ils fussent obligez de luy faire
 guerre avec les François & Geneuois, si mestier
 estoit, & si on les en requeroit, & manifestement se
 monsttraissent ses ennemis. Item, que posé que ils luy
 accordassent toutes ces choses, que il vouloit que la
 maniere de leur accord & traicté feust enuoyée en
 France au Roy & au Conseil, sans lequel assente-
 ment il ne vouloit point passer la chose, ne que ce
 feust du tout à sa charge, Et que ce debuoyent-ils
 bien vouloir. Car si la chose estoit passée par le Roy

& par son Conseil, plus grande seureté à tousiours seroit pour eulx. Et que s'ils se vouloient tenir à cest accord, que il se faisoit fort de leur en faire auoir lettres passées & seellées du Roy & de son Conseil, & de Nosseigneurs de France. Quand le Marechal eust tout dict, les Ambassadeurs de Florence dirent que ils iroient sçauoir la volonté sur ces choses de leur Seigneurie, & puis retourneroient luy dire la responce. A brief parler ils retournerent à tout lettres de puissance de pouuoir passer le dict accord que ils agreoient entierement. Si fut là Messire Gabriel, & bien cent des plus suffisans Gentils-hommes & Citadins de Genes, que le Marechal y auoit faict venir. Car il vouloit que ils feussent presens, & que la chose feust faicte par leur accord & bon vouloir. Si fut adon la chose du tout accordée, iurée & promise à tenir entre eulx, sans iamais aller à l'encontre, & belles lettres passées, seellées & certifiées au gré des parties.

CHAPITRE XI.

Comment le Marechal enuoya par escript au Roy de France, à Nosseigneurs, & au Conseil, l'accord qu'il auoit faict avec les Florentins du faict de Pise; lequel le Roy & Nosseigneurs agréerent par leurs lettres. Et comment depuis par feintise les Pisains se voulurent donner au Duc de Bourgogne.



E DICT accord faict & passé, tantost le Marechal l'escriuit au Roy, à son Conseil, & à Nostreigneurs les Ducs, & manda par escript toutes les clauses & la maniere des conuenances, en suppliant au Roy, que au cas que par son Conseil seroit veu que le dict accord luy feust bon, profitable & honorable, & que nos dicts Seigneurs l'eussent agreable, que il luy pleust le ratifier & confirmer par ses lettres, seellées & passées par son Conseil, presens ses dicts oncles, delquels il requeroit aussi auoir les certifications & verifiement par leurs seaulx autentiques. A celle fin que la chose feust stable & ferme à tousiours, & sans que iamais nulle des parties repentir se peust, ne desdire le dict accord. Quand ces nouuelles furent venües au Roy, fut en Conseil regardée la chose. Si fut par le Roy, par nos dicts Seigneurs & tous les saiges moult loué le Marechal, de sa prudence & de son sçauoir, qui si saige maniere auoit tenuë que il auoit amené au Roy deux Seigneuries pour vne, qui moult pouuoit estre chose valable à ce Royaulme, grand honneur & grand bien pour l'Eglise, & profit pour la Seigneurie de Gennes. Et pour toutes ces choses, & les autres biens que le dict Marechal auoit acheuez & acheuoit chascun iour par son grand sçauoir, moult le louèrent, & grand gré luy en sceurent, & ainsi l'agrèerent. Si confirma le Roy la chose par ses lettres patentes, tout en la maniere que le Marechal l'auoit accordé, & Nostreigneurs pareillement, qui tous iurerent de n'aller iamais à l'encontre,

l'encontre, & ainsi le certifierent par leurs sceillez. Et feurent les dictes lectres de certification enuoyées au Marechal, qui tantost les bailla aux Florentins, qui grand ioye en eurent, & pour contents s'en teindrent. Toutes ces choses faictes, tantost & sans delay les Florentins enuoyerent le vidimus des lettres de leur achapt aux Pisains, & leur manderent que ils obeissent à leur Seigneurie, comme faire le deuoient, comme apparoir leur pouuoit, ou ils leur meneroient guerre, & par force les conquerroient. Si leur seroient de tant plus durs, comme plus rebelles les auroient trouuez. Les Pisains de tout ce ne firent compte, ains respondirent que rien n'en feroient, & que qui guerre leur feroit, bien & bel se defendroient, & qu'ils ne craignoient à me. Adonc fort & ferme les Florentins les assaillirent & coururent sus, & en peu de iours moult les endommaigerent. Et de faict assiegerent Pise & les Pisains moult bien se defendirent, si que n'estoit mie legere chose à les conquerir. Quand la guerre eut duré ja plus d'un an, les Pisains qui bien voyoient que au dernier tenir ne se pourroient contre la force des Florentins, & de leurs aydes, voulurent pour auoir secours vser de cauteles & malices que autresfois auoient faict. Si enuoyerent leurs messaigers à Lancelot, qui se dict Roy de Naples, & luy manderent qu'ils se donneroient à luy, mais que il les veint secourir à grande armée, & leuer le siege qui les tenoit enclos. Il respondit que si feroit-il sans faulte. Et par l'esperance que il leur donna se teindrent plus forts. Mais ce fut.

Q'q

en vain : Car autre occupation le destourna ; si qu'il n'y peut venir ny enuoyer. Et tousiours alloit affoiblissant la force des Pisains, & estoit merueilles comment tenir se pouuoïet ; car plus de deux ans auoient ja souffert celle pestilence, où on leur liuroit souuent de durs assauts. Si preindrent moult à diminuer : car la famine de dedans fort les destraignoit, & la guerre de dehors mal les menoit. Si ne sçauoient quel tour prendre : car ils disoient que plustost se donneroient aux Sarrafins si faire le pouuoient, ou que tous plustost mourroient que ils se rendissent aux Florentins. Si voulurent derechef vser de leurs cauteles, en esperance de faillir par celle voye hors du meschef qui les contraignoit. Adonc enuoyerent leurs Ambassadeurs en France garnis de belles paroles, & manderent au Duc de Bourgongne que ils se donnoient à luy entierement : mais que il les voulust secourir contre les Florentins, & faire tant que le siege feust leué. Le Duc n'accepta pas tost ceste chose, veu l'accord deuant dict que il auoit agreeé, & ne debuoit aller à l'encontre. Parquoy les dicts Ambassadeurs qui assez sçauoient le tour de leur baston, se retirerent deuers aucuns des Conseillers du Duc d'Orleans frere du Roy, & largement leur promeirent, si tant pouuoient faire que aucun remede feust mis en ceste chose. Dont il f'ensuiuit que par l'enhortement d'iceulx Conseillers, le dict Duc d'Orleans & le Duc de Bourgongne cousins germains, se tirerent deuers le Roy, & le prierent que il leur voulust donner licence d'accepter icelle dona-

tion, & leur transporter tel droict qu'il y pouuoit auoir. A bref parler tant l'en rimonnerent, que luy qui enuis rien n'eust refusé à son frere, & aussi conseillé par aucuns de ce faire, le va octroyer. Parquoy tantoist & sans delay ils escripirent à ceulx de Florence que ils se departissent du siege, & se deportassent de plus guerroyer les Pisains. Pareillement ils escripirent au Marechal que plus ne donnaist confort ne ayde aux Florentins, ains aydast de toute sa puissance à ceulx de Pise qui à eulx s'estoyent donnez, & fissent tant par force qu'il leuast le siege. Quand le Marechal entendit ceste chose il feut moult esmerueillé, veul l'accord qu'ils auoyent agréé, & que luy mesme auoit iuré & promis de non aller à l'encontre. A laquelle chose, comme preud'homme qu'il est, pour mourir ne se voulut parjurer, ne aller contre son seellé. Si respondit que ce ne pouuoit-il pas faire sauf son honneur. Si n'estoit pas legere chose de forçoyer contre si grand puissance comme estoit celle des Florentins. Car moult y conuiendroit grand foison de gens d'armes, dont mal estoit garny pour l'heure, & grande finance d'argent pour telle chose entreprendre. Si conuiendroit que par especial à ces deux choses pourueussent, s'ils vouloient la chose encommencer, pour en venir à leur intention. De leurs lettres les Florentins ne teindrent compte, ny ne se deporterent de la guerre, ains procederent de plus en plus, nonobstant que plusieurs Capitaines & François se departissent du siege, & de l'ayde des Florentins, pour non encourir le mal-

308 HISTOIRE DV MARESCHAL
talent de nos dicts Seigneurs. Et à brief parler, tant
continüerent la guerre, que plus ne se pouuoient les
Pisains tenir, qui souuent enuoyoit en France
requerir secours: mais c'estoit parce que plus n'en
pouuoient, & on les secouroit de lettres enuoyer
aux Florentins que ils se deportassent, où ils encour-
reroient leur ire. Mais tout ce rien n'y valoit, ains
s'en mocquoient, & disoient que c'estoit ieu d'en-
fant d'octroyer & puis vouloir retollir, & que ainsi
n'iroit mie. Et n'estoit pas grand honneur à la Mai-
son de France telle variation, comme d'aller contre
ce qui estoit promis & seellé. Ainsi arguant, tant
continüerent la guerre les Florentins, que ils vein-
rent à chef de leur emprise, & par force preindrent
la cité de Pise, & entrèrent dedás malgré les Pisains,
nonobstant que le Roy à l'instigation de nos dicts
Seigneurs les eust enuoyez defier pour celle cause.
Si pouuons dire & penser qu'il en est aux Florentins
de tenir ou non les conuenances du susdict traité;
puis que le Roy auoit reuocqué l'accord fait avec
eulx, & depuis sont venus à leur intencion. Ainsi &
par ceste maniere que j'ay racomptée au vray, qui
que aultrement le voudroit dire, fut commencé &
terminé le fait de Pise subjuguée par les Floren-
tins.

CHAPITRE XII.

Comment Nosseigneurs les Ducs d'Orleans & celui de Bourgongne sceurent mauuais gré au Marechal, pource qu'il n'auoit esté en l'ayde des Pisains contre les Florentins.

DE CESTE chose ont sceu mauuais gré nos dicts Seigneurs d'Orleans & de Bourgongne au Marechal, & eulx & leurs adherans en ont parlé en le blasfant. Et pource plusieurs gens qui ne scauent point le faict au long, en parlent & ont parlé à l'aduanture : comme on faict de maintes choses sans scauoir la verité ne les causes de la chose, & ont dict que par son default nos dicts Seigneurs ont perdu la Seigneurie de Pise, qui seroit vne belle chose à auoir pour eulx. Mais vrayement ils veulent tourner à blasme ce de quoy grand bonneur luy appartient, & si autrement eust faict, reproche seroit à luy. Car homme qui va contre ce que par delibéré sens & bon loyal conseil a vne fois accordé, iuré & promis, encourt reproche d'inconstance & deffault de foy. Ce que nos dicts Seigneurs en ont dict & faict, & le mauuais gré qu'ils luy en ont sceu, ie tiens fermement qu'il n'est venu de leur premier mouuement ; mais d'aucuns flateurs enuieux d'entour

Qq iij

d'eulx, comme assez de telles gens a en Cour communément, qui bien vouldroient trouuer maniere s'ils pouuoient de desaduancer la bonne fortune & prosperité du Mareschal ; mais si Dieu plaist à ce n'aduiendront ja. Car Dieu gardera son seruant, & iceulx descherront en leur iniquité. Si pouuez veoir & noter vous qui celiure lisez en ce pascy, ou oyez, que homme ne peult estre si parfaict, ne tant de biens faire & dire, qu'il puisse auoir la grace d'un chascun. Et tout ce vient par le vice d'enuie qui court sur la terre, qui destourne de son pouuoir que vaillance, preud'homme, loyauté & bonté n'ait le los & la gloire qui luy affiert. Car telle est la nature de l'enuieux, que il taschera tousiours de tourner à quelque mauuaise fin ou intention ce que le preud'homme faict pour grand bien & vtilité. Mais Iesus Christ, duquel la benoiste vie a toute esté en ce monde pour nostre enseignement, voulut luy mesme, pour donner exemple aux bons d'auoir sur telles choses patience, estre diffamé par les enuieux. Comme il appert par l'Euangile, qui dict que les miracles qu'il faisoit par la vertu diuine, & par la puissance de luy mesme, les faulx enuieux ministres de la loy disoient que c'estoit par art du malin esprit & de l'ennemy, & qu'il estoit mauuais, où il estoit tout parfaict. Si seroit toutesfois mal regardé & grande ingratitude de hayr sans cause ce preud'homme cy le Mareschal, par le sens duquel se sont ensuiuis tant de biens, qu'il a gardé entre les autres biens qu'il a faicts de destruire si noble cité & pays

comme est celui de Gennes, & non mie seulement gardé de destruction, mais remis en la meilleure conuallescence & estat qu'il feust depuis que la dicte cité feut fondée. Et non pourtant n'est mie d'aujourd'huy ne d'hier que la force des enuieux ingrats à nuict aux bons. Car de ce sont les Escriptions toutes plaines.

CHAPITRE XIII.

*Cy deuise par exemples comment les bons
sont communément enuiez.*



CE propos racompte Valere de Scipion l'Africain le premier, lequel tant augmenta & accreut le bien public des Romains, que il feit Rome Dame de Carthage & du pays d'Afrique, qui par long temps auoit guerroyé les Romains, & leur auoit porté tant de dommage que quasi les auoit tous destruits: mais par la vaillance & proïesse du dict Scipion la fortune retourna tellement sur les Carthaginois, que ils feurent subjugués & destruits par les dicts Romains. Mais la grande abondance de vertus qui estoient en celui vaillant homme, embrasa tellement les enuieux contre luy, que ils feirent tant que les Romains ingrats & non reconnoissans recompenserent au dernier ses dignes ceuures d'injures & de vilainies. Car ils adjousterent plus grande foy aux mesdisans

312 HISTOIRE DV MARESCHAL
enuieux, qui faulſement l'accuſoient de choſes con-
trouuées, que ils ne regarderent aux grands biens
que il leur auoit faiçts. Si l'enuoyerent en exil en vne
pauvre cité entre palus & deſerts que on appelloit
Linterne, & là vſa ce noble hōme la vie qui moult
auoit eſté honnorable, & tout fut par enuie. Car il
n'eſt choſe qui ſoit plus griefue à l'enuieux mauuais
que de veoir deuant ſoy ou de oïr loïer le bon &
vertueux. Mais à reuenir au propos du Mareſchal,
ſont aucuns qui dient aujourd'huy que la plus grād
partie des Geneuois n'aiment mie le Mareſchal, &
bien luy ont cuidé monſtrer, par ce que pluſieurs
fois l'ont les aucuns d'eulx voulu trahir & emprison-
ner, & que au dernier le bouteront hors, & par ceſte
raiſon concluent les dictſ meſdifans que ce n'eſt
mie ſigne qu'il ſoit bon ne droiturier, & que ſi
conuenablement les gouuernoit tous l'aimeroient.
Mais ceſt argument n'eſt mie bon ne vray. Car qu'il
ne ſoit aimé de la plus grand partie ce peult bien
eſtre; car communément en vne communauté de
gens, plus en y a de mauuais que de bons. Et il n'eſt
rien que les mauuais & les larrons hayent tant com-
me Juſtice, & ceulx qui la tiennent & font. Mais ſans
faillir tous les bons de Gennes l'aiment comme leur
ame. Et pourquoy ne feroient-ils? Car il les a gardez
d'eſtre peris par les mains des mauuais. Et poſons
que il feult ores de tous hay, ſi ne ſ'enſuit-il pas
pourtant qu'il ſoit virieux ne defaillant, comme on
peult prouuer par exemples. Ne dict pas Valere &
racompte du bon Lycurgus Roy de Lacedemone,
lequel

lequel feut si vaillant homme, que les saiges dirent de luy que il auoit mieulx nature diuine que humaine, & par son grand sçauoir fait Loix & Establissements moult droicturiers, lesquels il bailla aux Lacedemoniens, qui parauant nullo n'en auoient, & viuoient comme bestes, & les garda & defendit de maints grands inconueniens, & augmenta & accroist moult la Seigneurie du pays. Mais nonobstant tous ses biensfaits & bonnes vertus, & l'amour qu'il auoit eüe & auoit au pays, & ses belles loix tant subtilement trouuées ne le peurent garantir qu'il ne trouuast ses citoyens si haineux & mal-veüllans à luy, que à la premiere fois le chasserent du Palais, & l'autre fois le bouterent hors de la ville comme tous forcenez, & finalement le chasserent du pays. Pour lesquelles choses Valere dict, Et qui aura doncques fiance aux Communautéz des autres Citez & pays, quand la Cité de Lacedemone, qui s'attribuë la souveraine loüange d'attempance & recongnoissance, fut si ingrate enuers celuy qui tant de biens luy auoit faits? Et à ce propos encores de l'ingratitude des Communautéz des villes, donnons-en derechef exemple, afin que nul ne s'y fie, ne croye que leurs iugemens soyent droicturiers, & que à iuste cause hayent & exilent les hommes. Parle encores Valere de l'ingratitude des Arheniens contre Aristides le tres-sainct & iuste homme, duquel il est parlé en toute l'Histoire des Grecs pour sa tres-grâde bonté, mais le merite que il eut pour ses biensfaits feut que ils le bouterent hors du pays, pource qu'il estoit trop

Rr

314 HISTOIRE DV MARESCHAL
iuste. Dont Valere dict ces paroles, Aristides qui
meit à la mesure de iustice tout le pays de Grece, &
qui feut le miroüier de continence & de vertu, feut
bouté hors d'Athenes, avec lequel s'en alla toute
droiture.

CHAPITRE XIV.

*Cy preuue par exemples que on ne doit mie
touſiours croire ne adiouſter foy en paro-
les & opinions de peuple.*

UE BAILLE ces exemples pour preu-
ue que les iugemens de Communauté
de peuple ne ſont mie touſiours à ap-
prouuer: mais ſont ſouuentefois à re-
prouuer comme deſraiſonnables. Ce
qui eſt toutesfois contre vn Prouerbe que aucuns
dient, qui dict Voix de peuple, voix de Dieu. Mais
ie dis que ſouuentefois eſt voix de diable. Comme
apparut quand le peuple ingrat de Hieruſalem cria
contre noſtre Seigneur Ieſus Chriſt, Crucifiez-le,
crucifiez-le. Et qu'il ſoit vray que raiſon n'y ait au
iugement du peuple, Valere le teſmoingne, lequel
entre les autres exemples que il donne à ce propos,
dit que vn ſolemnel Muſicien que on nommoit
Antigenidas auoit vne fois moult bien introduit vn
ſien diſciple en la dicte Science de Muſique, ſi
ioüoit par tres-grand art d'un Inſtrument de bou-

che. Le Maistre feit venir son disciple ioüer deuant le peuple; afin que son sçauoir feust congneu & apperceu: mais le rude peuple vilain & mal enseigné, qui en telle Maistrise ne se congnoissoit, & qui telle melodien'auoit appris à oüir, n'en feit compte, ains despriserent son sçauoir. Quand le dict Maistre veid ce, il dit à son disciple Tourne toy vers ma face, & chante à moy & aux Sciences. Comme s'il eust voulu dire, Ces gens cy sont bestiaux, ils ne sont pas dignes d'oüir telles choses. Et à vray dire, tout ainsi aduient-il souuentefois que maints vaillans gens, & bons en prouësse ou en sçauoir, sont & se trouuent en maintes places où leurs faicts & leurs dicts ne sont point congneus ne reputez selon qu'ils ont merité, mais semble que on n'en tienne compte. Mais non pourtant les bons & les saiges qui les voyent bien faire & bien dire, & qui se congnoissent en tels œuures, ne les prisent pas moins, ains les honnorent & loüent grandement, comme il appartient. Car vertu & vaillance, ou parfaicte Science, tant soit-elle foulée, ne laisse pas pourtant d'auoir d'aucuns la loüange que elle doit auoir, & que en soy mesme la personne qui bien faict ne iuge que l'œuure soit bon.

Rr ij

CHAPITRE XV.

*Cy dit comment le Marefchal par la vaillance
de fon couraige entreprit d'aller prendre
Alexandrie. Et des meſſaigers qu'il
enuoya pour ceſte cauſe au Roy
de Cypre.*

1407.



EN L'AN mille quatre cent ſept le bon Mareſchal, qui ne penſe à autre choſe fors comment touſiours augmenter & accroître le bien de la Chreſtienté, & l'honneur de Cheualerie, aduiſant la grand pitié & honte aux Chreſtiens que les Sarraſins ſoyent Seigneurs & ſubjuguent les nobles terres d'oultre mer, qui deuſſent eſtre propres heritaiges des Chreſtiens, ſi mauuaistié & laſche couraige ne les deſtournoit de les aller conquerir, luy va venir vne haulte empriſe au couraige. C'eſt à ſçauoir que faiſable choſe ſeroit & aſſez legere qui l'oſeroit entreprendre, & par bon moyen, que la Cité d'Alexandrie, qui tant eſt noble & de grande renommée, feust priſe & oſtée des mains des Sarraſins: laquelle choſe ſil aduenoit ſeroit grand honneur aux conqueteurs, & tres-grand profit à toute la Chreſtienté. Si propoſa que en ceſte choſe mettroit corps, cheuance & pouoir, & vne ſaiſon y employeroit, & plus lóg temps ſi meſtier eſtoit. En ce temps eſtoit venu à Genes

vn Ambassadeur de la part du Roy de Cypre, le tres-noble & reuerend Messire Raymond de Lesture, Prieur de Thoulouze, & Commandeur de Cypre, homme de grand honneur, saige, preud'homme, & expert en toutes choses. Si pensa le Mareschal que il se descouvroiroit à luy de ceste chose, tant pour en ouïr son bon aduis, comme pource que il auoit hanté le pays & grand piece frequenté avec les Sarraïns en la dicté ville d'Alexandrie. Si le pourroit aduïser d'aucun bon point. Et comme le Mareschal a de coustume de ne rien entreprendre sans premierement y appeller le nom de Dieu, & son ayde, alla vn iour en pelerinaige à vne deuote Eglise qui est à vne lieüe de Gennes, que on appelle nostre Dame la couronnée, & là manda le Prieur de Thoulouze. Et apres la Messe qu'il feit dire à grande solemnité, luy descouurit le dict secret & toute son intention de ceste chose, De laquelle le dict Prieur feut tresioyeux, & moult l'en reconforta. Et dit que sans faillir par ce que il luy pouuoit estre aduis estoit chose tres-faisable, & que luy mesme volontiers y ayderoit de son corps, de gens & de cheuance. Car l'emprise estoit agreable à Dieu, proffitable à la Chrestienté, & tres-honorable à qui s'y employeroit. Si fut de ceste chose encores plus reconforté le Mareschal. Et quand toute la maniere de ce faire eut bien aduïsee & tout deliberé en son couraige, & aduïsé ceulx qui propices & bons luy sembloient pour descouurir ceste chose, & enuoyer en Ambassade là où conuenable luy sembloit, comme sera dict cy apres, il les

Rr iij

fait appeller, C'est à sçauoir vn tres-noble & notable Religieux de l'Ordre de Saint Iean, appellé frere Iean de Vienne, & son Escuyer Iean de Ony cy dessus nommé. Et leur dit toute son intention, & leur deuifa ce qu'il luy plaisoit que ils feissent. Mais pour ce que memoire ne peult bonnement toutes choses que les oreilles oyent si enclorre en soy que retenir les puisse, affin que rien n'oubliaissent de leur Commission, leur bailla par bel memoire escripte la maniere que il vouloit que ils teinsent. Laquelle dicté Instruction & memoire, affin que rien ien'y adjousté du mien, comme elle veint de luy, celle mesme par articles, comme elle m'a esté baillée, ay incorporée & mise cy endroit, comme il s'ensuit.

C'EST l'Instruction de toutes les choses que nous Iean le Maingre dict Boucicaut, Marechal de France, auons donné en commission de poursuiure de par nous és lieux cy apres declarez, le septiesme iour du mois d'Aoust, en l'an de nostre Seigneur
 1407. mille quatre cent sept, à vous noble Religieux frere Iean de Vienne, Commandeur de Belleuille, & à vous Iean de Ony, nostres-feaux & bien aimez.

PREMIEREMENT voulons & vous enjoignons que ceste chose teniez secreete sur toute chose, par telle maniere que personne quelconque apperceuoir ne le puisse, & à nul soit descouuerte fors au Roy de Cypre, vers qui vous enuoyons, & à aulcun de son Conseil. Pource que si apperceüe estoit, nous pourroit tourner à destourbier. Et que vous partis de nous, au plaisir de Dieu, avec la charge que nous

vous commettons & ordonnons, pour accomplir nos desirs, comme ceux en qui spécialement nous nous fions, que mettiez toute diligence & peine de à vos pouuoirs l'accomplir, selon la forme & maniere de vostre Instruction. Et supposé que vous auons tres-bien informez des besongnes selon nostre volonté, lesquelles sçauons bien que vostre bon sens les aura tres-bien en memoire, & que les mettrez à effect tres-diligemment selon vos pouuoirs: neantmoins pour vostre seureté, & affin que ayez plus parfaicte memoire de nous & de nostre plaine intention, vous baillons par escript ce qu'il nous plaist estre par vous accompli au dict voyage.

Tout premierement vous en irez à Venise, & là prendrez vostre passaige iusques à Rhodes. Si nous plaist bien que là puissiez demeurer de huit à neuf iours, si bon & expedient vous semble, & visiterez Monseigneur le Grand Maistre de Rhodes, auquel nous recommanderez, & aux autres Seigneurs, & de nos nouuelles leur direz, l'estat de par deça, & que la cause de vostre allée est pour aucunes besongnes qui bien nous touchent, c'est à sçauoir pour les ioyaux du Roy de Cypre, qu'il bailla en gage aux Geneuois au temps que nous feusmes en Cypre, pour recompense de trente mille ducats de despens que les dicts Geneuois auoyent faict en l'armée de Famagouste, laquelle Ville le Roy cuida vsurper & tollir aux dicts Geneuois, & par la paix & accord que nous feismes la rendit, & s'obligea à la dicte somme de deniers pour nos frais. Et luy di-

ctes la forme & la maniere que nous auons tenuë avec le Prieur de Thoulouze, & la somme de deniers que luy auons baillée pour rachepter les dicts ioyaux au nom du Roy. Et en cest espace de temps vous pouruoyez de nauire pour vous porter en Cypre, & si par aduanture ne le trouuez; vous prierez de par nous le dict Monseigneur le Grand Maistre qu'il luy plaise le vous faire auoir.

ESTANS partis de Rhodes, quand il plaira à Dieu que soyez en Cypre, tout droict vous en irez à l'hostel de Sainct Ieā en Nicosie, & par le Lieutenāt du Prieur de Thoulouze ferez sçauoir au Roy de Cypre vostre venue, & quād luy plaira que luy alliez faire la reuerence. Et de luy oüye la responce, & venus en sa presence, nous recōmanderez à sa Seigneurie, & à Messieurs les freres, puis luy baillerez nos lettres de creance. Et quand son bon plaisir sera d'oüyr vostre creance, priez-le de par nous que ce soit si secretement que nul fors que luy entendre le puisse, ne s'en donner de garde. Et vous mesmes soyez bien aduisez que si secretement soit que ne puissiez estre entendus.

ET tout premierement le prierez de par nous tres à certes, que les choses que luy aurez à declarer veuille bien tenir secretes, pour les perils qui l'en ensuiuroient, & pour son propre honneur & exaussement. Apres commencerez vostre narration, en disant que la bonne renommée qui en France & par tout le monde court desia de ses grands biens-faicts, des belles enuahies qu'il a par plusieurs fois
faictes

faictes sur les Sarrazins, & chascun iour faict, en s'efforçant de les greuer, en quoy comme il appert n'espargne corps, vie, ne auoir, par tres-grand diligence, le faict tenir aujourd'huy vn des ieunes Princes du monde qui le plus bel commencement a, & qui plus faict à loüer. Parquoy on espere que il veult & a desir d'ensuiure en hault honneur & pris de Cheualerie ses tres-nobles predecesseurs, qui tant acquirent de los en terre par les merites de leurs vertus, & des grandes guerres & nobles emprises que ils feirent en leur propres personnes contre les mescreans, & ennemis de la foy de Iesus Christ, qu'à tousiours mais avec les viuans sera memoire de leurs grands bontez & vaillance. Et pource nous qui desirons de tout nostre cœur l'honneur & exauissement de son noble Estat & Seigneurie: pour laquelle chose voudrions exposer corps & auoir, par plus grande affection que pour Prince qui viue, apres la personne du Roy de France & de nos Seigneurs de son sang, pour les dicts grands biens qui sont dicts de son bel & bon gouuernement és terres voisines, & en toute part desirans d'estre cause que tousiours sa belle ieunesse continuë de mieulx en mieulx, auons aduisé vne haulte & noble emprise digne de memoire à tousiours mais, & de souuerain los pour luy, si Dieu par sa grace la donnoit venir à bonne fin, ainsi que elle est bien faisable, si à ce luy plaist entendre. Et pour ceste cause, c'est à sçauoir pour luy annoncer la chose que auons bien discutée en nous mesmes auant que deliberée l'ayons, laquelle nous

Sf

semble agreable à Dieu, & proffitable à toute Chrestienté, si Dieu la donne acheuer, vous auons enuoyez deuers sa Royale Majesté. Et adonc vous enuoyez de par nous descouurirez au dict Roy de Cypre tout le dessein que pris auons sur la prise de la Cité d'Alexandrie. Et tousiours bien luy notez & repliquez si mestier est où il escherra, que pour ce que nous voyons sa bonne volonté, voulons employer nostre propre personne, & celles de nos parens, amis, & seruiteurs, en sa compaignée, avec nostre cheuance. Et que à ce faire nous meuent quatre principales raisons. La premiere est, pour le pur amour de nostre Seigneur, voulons nous employer à son seruice, & le bien & exaussement de Chrestienté. La seconde, pour acquerir merite à nostre ame. La tierce, pour ce que nous voudrions estre cause, comme dict est, que sa force & sa belle ieunesse s'employast à tout bien faire: parquoy los à tousiours luy en demeure. Et la quarte, pour la cause qui doit esmouuoir tout Cheualier & Gentilhomme que son corps incessamment employe en la poursuite d'armes, pour acquerir honneur & renommée. Et apres ces choses dictes, pour mieulx animer & accroistre le desir du dict Roy à entendre à ceste chose, luy monstrerez par bonne maniere comment Dieu luy monstre grand signe d'amour, quand il luy met en main si haulte chose, sans grand coust de sa part, mais le plus aux despens & labeur d'autrui. Et que s'il le refusoit, peur deburoit auoir que Dieu s'en courrouçast, & que aussi iamais nul

n'auroit fiance que de grand & hault couraige feust ne entreprenant.

CHAPITRE XVI.

Encores de ce mesme, de l'instruction que le Marechal bailla à ses Ambassadeurs de ce que dire debuoient au Roy de Cypre.



PRES que vous aurez dict bien & bel ordonnément toutes ces choses au dict Roy de Cypre, vous prendrez bien garde au changement de son visaige, mesmement quand vous parlerez à luy. Car par ce pourrez aduiser si la besongne luy plairra, ou non, & par ce pourrez estre plus aduisez de parler. Et si luy vous demande comment se pourroit faire ceste entreprise sans qu'il feust sceu, & où seroit prise si grand finance comme il y conuendroit. A ces deux choses vous respondrez, en luy demonstrent comment il pourroit faire son armée en son pays, tenant maniere que ce feust pour la guerre que il a au Souldan, & nous prest au temps & au terme que luy mesme vous diroit. En telle maniere que quand nous luy ferions sçauoir nostre venuë montast sur mer, se partist, & feist semblant de venir à Rhodes. Et adonc luy serions au deuant à Chastel rouge, & là nous assemblerions, & partirions à tout nostre ost au nom de Dieu tout-puissant, &

Sf ij

riendrions nostre chemin vers Alexandrie. Et aussi
 feroit bien au fait, que il trouuast maniere d'en-
 uoyer secretement vn Cyprien ou vn Armenien
 demeurer au dict lieu d'Alexandrie, par lequel il
 sceust toutes nouuelles, & feist à croire à celuy mes-
 me que ce seroit pour la guerre qu'il a au dict Soul-
 dan, & ceste voye seroit bonne. Et quant à la mise
 qu'il y conuiendrait, luy direz que nous sçauons
 bien que soustenir ne pourroit si grands charges &
 despens que feirent ses predecesseurs, par lesquels la
 dicte Cité feut autre fois prise, mesmes de nostre
 aage. Car trop a esté du depuis le pays greué. Et
 pour ce tout ainsi que le voulons ayder de nos per-
 sonnes & de gens, semblablement nous plaist le fai-
 re de nostre cheuance. Et affin que il voye & sçache
 que ceste chose auons bien en tous les points adui-
 sée, nous semble que pour ce faire telle quantité de
 gens d'armes suffiroit, toutesfois selon nostre aduis,
 lequel remettons tout en sa bonne ordonnance &
 discretion. Tout premierement mille hommes d'ar-
 mes de bonne estoife, mille varlets armez, mille ar-
 balestriers, deux cent archers, deux cent cheualx,
 sans ceulx que nous prendrions par delà. Item de
 nauire cinq grandes naues, deux galées, & deux ga-
 lées huissieres, garnies de viures pour six mois. Apres
 ces choses dictes, vous luy pourrez dire la despence
 qu'il conuient, laquelle n'est pas grande selon l'ef-
 fect, & peult monter enuiron cent trente deux mille
 florins. Les deux galées & les deux dictes huissieres
 valent de naule pour mois cinq mille florins, qui

monte pour quatre mois vingt mille florins. Les mille arbalestriers valent pour mois cinq mille florins. Les deux cent archers valent pour mois mille florins, qui monte pour quatre mois quatre mille francs. Les mille hommes d'armes, avec les mille varlets, & les deux cent cheuaux, valent par mois douze mille florins; font pour quatre mois quarante huit mille florins. Item pour les viures dix mille florins, & pour l'artillerie & autres habillemens necessaires dix mille florins. Somme pour toutes choses cent trente deux mille francs. Laquelle finance conuiendroit toute auoir en la ville de Gennes, qui feust preste enuiron le mois de Decembre prochain venant, affin de faire les prouisions comme il appartiendroit, nonobstant que toutes ne seroient mie prises à Gennes, mais en plusieurs lieux, affin que la chose ne peust estre imaginée. Et conuiendroit que la dicte armée partist de par deça enuiron le mois d'Auril. De ceste dicte finance que mettre hors conuiendroit vouldrions de bon cœur payer nostre part; mais veu & considéré que ceste chose viendra tout à l'honneur & renommée du dict Roy, nous semble que bien est droict que à tout le moins en paye la moitié, qui seroit en somme soixante six mille florins. Et encores au cas qu'il ne pourroit fournir à ceste dicte somme, payast soixante mille. Mais besoing seroit que le plustost que faire se pourroit que on les eust à Gennes. Car le mieulx seroit tost que tard. Et encores s'il n'auoit toute la dicte somme preste à temps, que au besoing on le sup-

porteroit iusques à ce qu'il feust retourné en son pays iusques à la somme d'environ dixhui& ou vingt mille florins: mais que faulte n'y eust que lors on les trouuaist prests. Et sur ce point dire au Roy comment Monseigneur de Thoulouze, qui tant l'aime & desire loyaument le bien, l'honneur & exauſſement de sa personne, loüe ceste chose plus que autre chose du monde, auquel il pourroit enuoyer fiablement la dicte finance; Et mesmement si le Roy ne l'auoit, le dict Monseigneur de Thoulouze en feroit finance au nom du Roy par deça, ayant de luy le commandement & puissance. Car de ce faire pour l'autorité de luy est iuffisant, & de plus grande chose, si mestier estoit. Ainsi & par ceste forme direz au dict Roy de Cypre. Et s'il repliquoit que il eust aucune doubte d'aucun de son Royaume, pourquoy pourroit estre peril pour luy à aller hors, respondre luy pourrez que il mene avec luy tous ceux de qui doubter se pourroit. Item, s'il disoit qu'il ſçait bien que les Geneuois ne l'aiment mie, si se doubteroit de la quantité des Geneuois qui viendroient en la dicte armée. Responce, que tous les gens d'armes, varlets & archers qui seroyent de France, seroyent tous à son commandement & obeissance, de ce ne feist nulle doubte. Et s'il aduenoit que le Roy feust bien d'accord de ceste chose, & que il voulust y mettre plus grande mise du sien, & plus grande quantité de gens d'armes & de nauire qu'il n'est deuisé: dire luy pourrez que de tant que plus y mettroit, de tant prendroit-il plus en bu-

tin, & raison feroit. Car qui plus y mettra, plus prendra. Par ceste maniere direz toutes les choses sus escriptes au Roy de Cypre. Et du surplus que il escherra à dire, si mestier est, nous en attendons à vostre bonne discretion; & tenons à faict & dict ce que vous en ferez.

CHAPITRE XVII.

Cy deuise la grande chere & belle responce que le Roy de Cypre fait aux Ambassadeurs du Mareschal.



EL que i'ay deuisé fut le Memoire de la Commission baillée du Mareschal au Commandeur de Belleuille, & à Jean de Ony, enuoyez au Roy de Cypre, pour l'emprise d'aller prédre Alexandrie. Lesquels deux Ambassadeurs se partirent de leur Seigneur, & à brief dire tant exploicterent de leur erre, que ils arriuerent au dict pays de Cypre, où ils parfournirent bien & bel & saigement leur Ambassade, tout en la maniere que commis leur estoit. Si nous conuient dire la responce que on leur fist. Le Roy de Cypre si tost qu'il sceut la venue des Ambassadeurs, tantost les enuoya querir, & à tres-grand honneur & chere les receut. Et quand il eut assez demandé de l'estat & santé du Mareschal, & de l'estre de Genes, & qu'il les eut à certains iours

où y parler tout au long, respondit à ioyeuse chere en telle maniere, & par moult belles paroles. Comment il debuoit bien remercier Dieu qui si grand grace luy donnoit, que si noble & haulte entreprise luy estoit annôcée de si vaillant homme que estoit le Mareschal, & que il apperceuoit bien la grace, amour, & affection que il auoit à luy & à son aduancement, & le desir que il auoit que luy qui estoit ieune, & encores de petit sens & vaillance, se peust aduancer en pris & los, & que il y paroïssoit bien, quand luy mesme en personne, ses amis & son auoir y vouloit employer. Si ne le pouuoit assez loüer ne remercier à la centiesme partie de ce grand benefice, ne jamais faire chose qui y peust suffire. Et que moult auoit grand ioye de ceste chose, laquelle estoit notable & de grande entreprise, & pour ce ne se debuoit encommencer sans grand aduis & deliberation. Si penseroit sans cesser la voye & la maniere comment seroit le meilleur d'en faire, & tost & en bref leur en rendroit si bonne responce, que son honneur y seroit, & que pour contents s'en tiendroient, & que ils feissent bonne chere, que tresbien feussent venus, & que si rien leur failloit que ils prissent le sien comme le leur propre. Adonc luy demanderent les Ambassadeurs si c'estoit son plaisir que vn de son Conseil qui nommé estoit Perrin le ieune, que il moult aimoit, sceust ceste chose. Car au cas que il luy plairroit, ils luy bailleroient vnes lettres que le Mareschal luy auoit escript de ceste besongne. Car il sçauoit que le Roy l'aimoit moult, & se fioit

se fioit en luy. Si respondit qu'il luy plaisoit tres-bien. Les dictes lettres presentées de la part du Marechal à iceluy, & la chose descouverte, & tous les points monstrez comme au Roy auoient faict, fait semblant que de ceste besongne eust vne merueilleuse ioye. Et sur tout remercioit le Marechal de toute son affection de ce qu'il luy en auoit daigné escrire, & que il luy plaisoit que il le sceust. Si y tiendrait si bien la main, en monstrant au Roy que comment que il feust ne feust refusant à si grand offre, que on s'en apperceueroit bien. Ne demeura gueres apres que le Roy arraisonna les dicts Ambassadeurs, & leur prit à compter l'achoisson que il auoit eüe de faire guerre au Souldan, & que auant la guerre il souffroit ses gens marchander, & aller & venir en sa terre & pays paisiblement, iusques à ce que Messire Raimond de Lesture, Prieur de Thoulouze, & Commandeur de Cypre, fut detenu en Alexandrie, & mené au Kaire. Pour laquelle detenuë & encombrer il escriuit au dict Souldan que il le voulust deliurer, & moult luy recommanda, desquelles lettres ne fait nul compte, ne rien n'en fait. Parquoy ce dict le Roy, quand ie veis cela, considerant que i'auois faict autres fois aux siens de grandes courtoisies, ie fus moult indigné, & pourluiuus tant qu'il en feut hors moyennant vingt cinq mille ducats que il paya. Et apres en despit de ce enuoyay deffier le dict Souldan, qui peu de compte en teint. Si enuoyay tantost vne galée courir sur le pays du dict Souldan, qui moult grad dommaige luy porta,

T t

& prit la plus belle naue que ils eussent chargée de marchandises. Et ainsi pays gastant , & prenant proyes, alla ceste galée courir contremont le Fleuve du Nil bien quinze milles. Parquoy i'apperceus leur lascheté, & depuis leur ay porté maint dommaige, dont ie remercie nostre Seigneur Dieu qui a voulu que i'aye eu achoison de leur faire guerre, & affin que ie les prise & doubte moins, m'a donné cause de les congnoistre auant que l'emprise que annoncée m'auex me veint entre mains. Car ie fais moins de compte d'eulx cent mille fois que deuant ne faifoye, & plus les essaye & moins les redoubte. Car des plus lasches & plus foibles, encores qu'ils soyent grand nombre, les trouue, tant que ie veoys bien que pour multitude de gens que ils soyent, on ne les doibt accompagner à vn peu de bonnes gens. Si congnois bien que nonobstant que soye pecheur, & non digne que Dieu m'aime, qu'il veult qu'en moy soit releuée & renouvellee la renommée de mes vaillans predecesseurs, qui ceste mesme entreprise acheuerent, ausquels de tout mon cœur ie desire ressembler. Et Dieu m'en doint la grace. Car quant est du coust & mise ie n'en fais compte, ne de quelconque autre peine.

CHAPITRE XVIII.

*Cy deuise comment le Roy de Cypre s'excusa
vers les Messaigers du Marechal de non
aller sur Alexandrie.*



VR ceste forme & maniere parla au commencement de leur venuë le Roy de Cypre aux dicts Ambassadeurs du Marechal. Mais auant que gueres de iours passassent apres, il ne se parforçoit pas moult de leur tenir compte de la dicte besongne. Parquoy ils peurēt bien apperceuoir que autre conseil l'auoit desmeu, & que celuy Perrin dessusdict, à qui les lettres de par le Marechal auoient baillées, n'auoit pas bien tenu ce qu'il leur auoit promis. Si commencerent à solliciter le Roy que responce absolue de son intention leur voulust bailler: car ja auoyent assez demeuré, & ainsi plusieurs fois luy dirent, & luy aucunes fois leur faisoit responce, qui leur donnoit esperance que il y voulust bien entendre. Mais il disoit que il y conuenoit grand regard, pour la chose qui estoit moult pesante. Et autres fois faisoit responce assez froide, pour les doubtes que il y mettoit. Toutesfoistant le solliciterent, que le vingt quatriesme iour d'Octobre, l'an dessus dict, leur feit absolue responce, qui fut telle. Il dist que sans faillir depuis leur venuë n'auoit cessé de penser à celle beson-

T t ij

332 HISTOIRE DV MARESCHAL
gne, comme à la chose en ce monde à quoy il desi-
roit plus entendre. Mais que moult luy estoit grief-
ue, & de grand poids pouuoit bien estre, pour sa
petite congnoissance. Car ce qui seroit par aduantu-
re leger à vne aultre, & de briefue deliberation à vn
Saige, estoit vn grand trauail & obscur pensement
à luy pour son ieune aage, qui excusoit son petit
sens. Et pour ceauoit conclu, non obstant que il sça-
uoit bien que son tres-cher & especial amy le Mares-
chal l'auoit imaginé & pensé pour sa tres-grande
vaillance, & luy auoit annoncé loyaument pour
son bien & aduancement, que il n'y entendroit mie
pour ceste fois. Et que à ce le mouuoient trois prin-
cipales raisons. L'une estoit le tres-grand peril où il
se mettroit de laisser son pays, veu & considéré les
Turcs qui luy sont voisins, qui sont gens de grande
puissance, qui pourroient tandis courir son pays, &
par aduanture l'en desheriter. Combien que de ce
premier point se departiroit assez legerement. Mais
quant au deuxiesme, que il doubteroit plus la guerre
couuerte que la guerre ouuerte. Car il sçauoit bien
que luy party de son pays, il y en auoit maints par
aduantage que on cuideroit qui feussent ses meil-
leurs amis, lesquels ne se faindroient mie de luy tol-
ler sa Seigneurie, & ainsi pourroit perdre le seur
pour le non seur. La tierce raison estoit pour le
doubte que il auoit des Geneuois, qui de long temps
l'auoient si mal traicté, comme chascun pouuoit
sçauoir, & pis luy eussent faict, ce sçauoit-il bien,
si ne feust son bon amy le Mareschal qui les en auoit

gardé. Et que ainsi cest trois principales raisons, avec leurs dependances, c'est à sçauoir le doubte du faict de guerre, dont nul ne peult sçauoir la fin, fors Dieu, ne à qui la victoire en sera, luy font sembler la chose trop perilleuse & doubteuse pour luy. Et veu mesmes que le Marechal ne seroit mie à Gennes, qui garder peust les dictz Geneuois de luy porter dommage. Et que ce n'estoit mie par faulte de couraige, ne lascheté, ne de petit desir de n'y vouloir entendre, mais seulement pour les susdictes doubtes. Car feust le Marechal certain que la chose ne luy partiroit du cœur iour de sa vie, quoy que pour le present n'y entendist. Mais que au plaisir de Dieu mettroit toute peine de disposer tellemēt & de longue main ses besongnes, qu'encores vn temps viendroit qu'il y entendroit. Et que il prioit le dict Marechal, en qui il auoit fiancee sur tous les hommes du monde; que il ne voulust departir son cœur de ceste chose, ains luy pleust l'ayder à se preparer & ordonner, comme il le pouuoit bien faire. Si que eulx deux peussent encores vser leurs vies ensemble au seruice de nostre Seigneur. Et que il luy pleust le reputer & tenir à fils. Car quant à luy il le tenoit pour pere, & par son bon conseil se vouloit gouuerner. Et pour conelusion, que il se reputoit tant tenu à luy de ce que tel soin auoit de son bien & aduancement, & des grandes offres que il luy faisoit, que iamaïs meriter, remercier, ne guerdonner assez suffisamment ne le pourroit. Et à tant se teut le Roy, & les dictz Ambassadeurs prirent congé de luy, & au plus tost

334 HISTOIRE DV MARESCHAL
que ils peurent s'en retournerent à Genes vers le
Mareschal, & tout luy racomptèrent ce que trouué
auoyent.

CHAPITRE XIX.

*Cy parle du faict de l'Eglise, & comment le
Mareschal voulut empescher le Roy Lance-
lot que il n'allast prendre Rome.*



N LA maniere dessus dicte le bon
Mareschal a employé son aage & tout
son temps en bien faire perseveram-
ment de mieulx en mieulx. De laquel-
le chose n'est encores lassé, ny ne sera
toute sa vie, si comme on peut par raison penser.
Car le Prouerbe commun lequel est vray dit, La
bonne vie attraiet la bonne fin. Si ne pourroye ra-
compter toutes les choses belles & notables en faicts
& dictz que il a faictes, & continuellement & par
chascun iour & heure faict & font par luy termi-
nées: Car tant en y a que c'est vn abyfme. Si me
passe seulement de dire grossement & en general les
principales emprises, & les aduantures qui luy ad-
uiennent, & où il se treuve; afin de continuer mon
propos, qui est de monstrier sa grande vaillance,
pour ce que ce peult estre vn exemple à tout noble
Cheualeux qui ouïr le pourra, d'estre bon en
faicts & en mœurs. Si ay racompté cy dessus com-

ment entre les autres bons desirs & nobles faicts que il auoit en volonté, estoit son intention & est par grande affection de trauailler à la paix de sainte Eglise. Lequel desir nulle heure ne depart de son bon couraige, comme il le monstre par effect, comme celuy qui ne cesse à son pouuoir, & tousiours a faict. Mais la faulx conuoitise attifée & enflambée par l'ennemy d'enfer és cœurs d'aucuns Prelats de l'Eglise, aueuglez par detestable & mauuaise detraction, & par male ambition & desordonnée auarice, ne souffre, quelque peine que le dict bon Marechal & les autres bons y mettent, terminer si tost la chose, ne tirer à bon effect. O faulx conuoitise, gouffre d'enfer insatiable, comment as-tu puissance de tellement aueugler le cœur de l'homme, que nonobstant que il congnoisse que longuement au monde ne peult viure, toutesfoiſ tu luy fais perdre comme toute congnoissance de la punition de Dieu? Et ce appert quand mesmement deux vieillards sur leur fosse, assis non deüement en siege Papal, ce sçauent-ils bien, (qui pour vn seul fut establi de Dieu, ne autrement ne peult licitemēt estre,) sont tant embrasez de ceste maudite conuoitise, accompagnée d'orgueil, que ils ont plus cher eulx damner, & tout le monde mettre en perplexité & douleur, & estre cause de la damnation de infinies ames, que renoncer à vn petit de brief honneur mondain receu induēment, que leur adherens leur font. O profond puis d'enfer, logis de Cain & de Iudas, à quoy tardes-tu que tu ne les appelles à toy.

& que ceste playe en Chrestienté cesse, laquelle tant dure pour les pechez des defaillans Chrestiens, Dieu ainsi le consentant? Mais à venir à nostre propos de monstrier comment le bon preud'homme, dont nous parlons, c'est à sçauoir le Marechal, met tousiours toute peine à tirer à fin d'vnion; pource que toutes choses ne se peuuent dire ensemble, comme dict est, adueint comme assez de gens le sçauent, que nostre Pape d'Auignon & celuy esleu de Rome, (tant y auoit trauaillé le bon Marechal, & plusieurs autres bons Seigneurs,) feurent tous deux d'accord ou feignirent estre, (Car feintise voirement estoit ce, comme il y a paru,) de ceder. Si auoit chascun d'eulx promis que pour mettre l'Eglise de Dieu en paix il cederoit, à condition que l'autre le voulust semblablement faire. Mais les faulx hypocrites, (tels se peuuent-ils par l'effect de leurs œuures appeller,) s'entre entendoient bien. Car ceste malicieuse voye ont fait à sçauoir entre eulx, pour se excuser chascun sur son compaignon, disant, mais que il cede ie cederay. Et semblablement respond l'autre. Et ainsi est la fable du Ricochet. Car ils ont plus cher auoir ce morceau eulx deux, que vn tiers y soit mis, & eulx deposez. Mais c'est le morceau qui les estranglera. Dieu aduance l'œuvre. Et ainsi par ceste voye passent & dissimulent le temps, & font musier en vain apres eulx & leurs fallacieuses responses tous les Princes du monde. Et debuioit lors que le dict accord fut pris le Pape de la Lune, dict d'Auignon, aller en vn chastel appelé Portouenere, qui

fied

sied au bout de la riuere de Gennes, & celuy de Rome debuoit aller en la ville de Lucques, qui est à vne petite iournée du dict chastel de Portouenere, Et là debuoient ordonner vn certain lieu, auquel s'assembleroient pour renoncer au Papat, presente l'assemblée des Cardinaulx & du Concile general; à ce que election d'un seul Pasteur feust faicte par la voye du Saint Esprit, comme Dieu l'a ordonné. Pour conclusion de ceste chose, tant feurent timonnez du Marechal & des autres bons, qui tendoient & tendent au bien de paix, tous les deux, que excuser bonnement ne se peurent que ils n'allassent es dictz lieux ordonnez. Mais leur venue peu profita. Car à le faire brief, la conclusion feut telle, que la difficulté du lieu trouuer où s'assembler debuoient feut si grande, que ils n'en peurent estre d'accord. Et quand l'un vouloit vne chose, l'autre le contredisoit, & eslisoit vne autre voye, laquelle semblablement l'autre desnioit. Si s'entendoient bien les faulx damnez. Car il n'est pas doubte que entre eulx auoyent faict ceste faulxe conspiration, pour abuser le monde par telles fallaces, & ainsi feirent semblant de non pouoir accorder. Et dire les causes de leurs friuoles excuses, seroit long procès sans necessité. Mais à dire en bref vrayement; tout ainsi que vn diable est plus malicieux que l'autre, & s'entredeçoient, nonobstant qu'il soyent compaignons, nostre Pape de la Lune sceut tenir telle voye & maniere, que de ce desaccord bailla tout le tort à celuy de Rome, au dire de tous, tant d'un costé que d'autre.

V u

338 HISTOIRE DV MARESCHAL
Pour laquelle cause les Cardinaux de Rome le laisserent, & s'en allerent malgré luy en la Cité de Pise, & tant que il ne demeura en toute Italie Seigneur ne terre qui le fauorifast. Parquoy quand il veid ce, enuoya requerer au Roy Lancelot de Naples que il le secourust, laquelle chose volontiers accorda; en intention d'vsurper & tirer à soy par celuy moyen & voye la Cité de Rome & tout le patrimoine, comme il feit apres, comme il fera dict. Si promet le dict Lancelot que il luy aideroit de tout son pouuoir par tout & contre tous. Dont pour ceste cause tant s'orgueillit le dict Pape de Rome, que du tout fut obstiné en son propos de non condescendre à la volonté d'un Concile general. Si alla tant ceste fustidite alliance de Lancelot avec l'Antipape de Rome, que ils traicterent entre eulx par leurs messai-gers, que par certains moyens, comme dict sera, Lancelot prendroit la Seigneurie de Rome, par telle condition que quand il l'auroit, luy mesme à si grande puissance que nul ne luy oseroit contredire, iroit querir à Lucques & l'emmeneroit. Et ainsi feut deliberée ceste chose.

CHAPITRE XX.

*De ce mesme, & comment Paul Vrsin Romain
meist le Roy Lancelot à Rome par argent
qu'il receut.*



Es nouuelles de la susdicte emprise, comment le Roy Lancelot debuoit fauoriser & secourir le Pape de Rome, & comment son intention estoit de se parforcer de prendre la Cité de Rome, veindrent aux oreilles du Marechal. De laquelle chose feut durement irrité. Car bien luy sembla que ce pourroit estre grand empeschement & empirement de traicté de paix au faict de l'Eglise. Et aussi moult luy pesa que la Cité de Rome, qui doibt estre & est le droit patrimoine de l'Eglise, deust par telle tyrannie estre rauie & vsurpée. Et par especial d'un si mauuais Chrestien comme il est, & ennemy du Roy de France, & si grand aduersaire du Roy Louys, cousin germain du dict Roy de France. Si sceut comment le dict Roy Lancelot alloit ja à toute sa puissance par mer & par terre, pour y mettre le siege. Si feut moult en grande pensée de trouuer aucune voye que ceste chose feust empeschée. Et quand il eut deliberé de ce qui estoit le meilleur à faire, il appella un de ses Gentils-hommes que il scauoit vaillant, saige, bon & diligent, nommé Iean de Ony, duquel est parlé autre fois en ce liure. Si luy dit en ceste maniere. Vous vous en irez de tire à Rome, & parlerez à Paul Vrsin, auquel me recommanderez, & de par moy luy direz, que luy qui est comme le chef & principal de Rome, & qui l'a en gouuernement, veuille monstrier par effect à ce grand besoing la loyauté, preud'homme & vaillance qui tousiours a esté en luy, & en ses nobles &

Vu ij

340 HISTOIRE DV MARESCHAL
anciens deuaneiers; si que de toute sa puissance &
force il monstre la feauté & bon amour que il por-
te, comme il est tenu à la Cité de Rome. En telle
maniere que il ne veuille souffrir que elle soit ainsi
contre droit & raison baillée, ne soufferte en mains
estrangeres, & en Seigneurie de nouuel Tyran. La-
quelle chose fil aduenoit seroit tres-grandement à
l'empiement de l'honneur de la Cité & des Ro-
mains. Et que s'ils ont esté & sont grands & de noble
courage, desprisans seruitude plus que gens du
monde, à ceste fois le veuillent monstrier. Et quand
ce ie le prie tant comme ie puis, & le fais certain &
luy promects que fil se tient hardiment, & fil se
deffend par grand vigueur contre le dict Lancelot,
si y aura grand honneur à tousioursmais, & que ie
le secoureray à tout grand puissance sans nulle faulte
dedans quinze iours. Iean de Ony à tout ceste
commission s'en alla batant à Rome, & avec luy
par le commandement du Mareschal vn autre Es-
cuyer bon & appert, nommé le Bourd de Larca. Si
fit sa legation à Paul Vrsin bien & saigement, tout
en la forme & maniere que enjoint luy estoit. Et
ouïyes les paroles, à dire en brief ce que Paul Vrsin
en feit, il monstra semblant que moult estoit liez de
ce que le Mareschal luy mandoit, en disant qu'il l'en
remercioit de bon cœur. Et que par faulte de cou-
rage, & de mettre toute peine, diligence, corps,
auoir, & vie, ne demeureroit mie que Lancelot ne
trouuast grande resistance. Et que à Rome y auoit
assez viures pour cinq mois, & puissance pour souf-

frir tant que ils feussent secourus. Si mettroit grand soyn que ils se teinssent forts contre le siege. De ainsi faire & tenir loyaument le iura & promet Paul Vrsin à Iean de Ony, & que sans faulte deffendrait la Cité hardiment iusques au dict terme, & tousiours à son pouuoir, attendant le dict secours. Et pour mieulx monstrier au Marechal la voye que il deuoit tenir, luy mesme figura de sa propre main la Cité de Rome sur vn peu de papier, & la Cité d'Ostie qui là pres sied, & la maniere & place où l'on pourroit combattre par mer le nauire du Roy Lancelot. Aussi deuila l'ayde que il feroit au Marechal, bailla enseigne comment on le congnoistroit, & dict la maniere comment Lancelot pourroit estre desconfit par terre. Toutes ces choses certifia à tenir le desloyal Paul Vrsin, qui oncques rien n'en teint. Car deux iours apres que le dict Iean de Ony partit d'auec luy, il meit luy mesme le Roy Lancelot dedans Rome, moyennant vingt-six mille florins que il receut, & deux chasteaux. Et Iean de Ony, qui en piece n'eust pensé ceste mauuaistié, s'en retourna deuers le Marechal. Toutesfois il laissa son compaignon à Rome, -c'est à sçauoir le susdict Bourr de Larca, pour faire sçauoir toutes nouuelles au Marechal, & pour tousiours solliciter Paul Vrsin des susdictes choses. Mais en s'en retournant trouua la venue du Roy Lancelot plus aduancée que luy ny le Marechal ne pensoient. Car ja estoit le dict Roy à toute sa puissance par terre & par mer au siege deuant la Cité d'Ostie, qui sied à la riue du Tibre pres

de Rome. Et auoit en sa compaignée par terre enuiron de huiët à neuf mille cheuaux , & deux cent hommes à pied. Et par mer auoit en nauire sept galées subtiles, & deux grosses galées huiffieres, & bien soixante dix barques chargées d'habillemens de guerre & de victuailles. Ces choses veües & sceües, le dict Jean de Ony, qui veid le besoing de rost hafter la chose, exploicta tant son erre, que en quatre iours feut de Rome à Portouenere. Auquel lieu trouua le Mareschal, qui apres le rapport ne musa mie, ains meit telle diligence en la besongne, que le quatriesme iour d'apres il appresta toute son armée, tant de gens d'armes, comme de naues, d'arbalestriers, de viures, & de toutes choses à ce necessaires. Et celuy iour monta en galée. Si auoit en sa compaignée huiët galées & trois brigantins, les mieux armées & fournies de gens d'armes & d'arbalestriers que on peult veoir. Desquelles dictes galées auoit faict Capiraines ceulx de qui les noms l'ensuiuent. Luy mesme feut le Capitaine de la premiere naue. Dom Iames de Prades de la seconde. Jean de Lune, nepueu du Pape, de la tierce. Messire Girard de Ceruillon, & le Mareschal du Pape, de la quatriesme. De la cinquiesme Frere Raimód de Lesture, Prieur de Thoulouze. De la sixiesme le Seigneur de la Fayette. De la septiesme Messire Robert de Milly. Et de la huitiesme Jean de Ony. Si estoyent en ceste compaignée entre les autres nobles & renommez gens, ceulx dont les noms cy ensuiuent, Messire Guillaume Muillon, Messire Lucas de Flisco,

Messire Gilles de Pruilly , Messire Beraut du Lac, Guillaume & Hugues de Tholigny, le Sire de Môtpefat , Robert de Fenis, Capitaine de l'un des brigantins, Gilet de Grigny, Chabrolé de Ony, neveu du susdict Jean de Ony, & plusieurs autres, qui long seroit à dire. A tout ceste belle compaignée se partit le Marechal. Mais comme Dieu le voulut pour son mieulx, tantost se leua vn vent contraire, & vn oraige si tres-grand, que nullement ne pouuoit aller auant, dont tout vif enrageoit. Et contre le vent par droicte force alla iusques deuant Moutron : mais pour neant. Car la tempeste s'enforcea si tres-grande que il luy conueint tourner arriere. Et dura cest oraige par trois iours. De laquelle chose tant estoit dolent le Marechal que plus ne pouuoit. Et ainsi en attendant tousiours que la tourmente cessast, pour le grand desir que il auoit de parfour nir son emprise, ne souffroit que nul de ses gens ississent hors du nauire, iusques à tant que le susdict Bourd de Larca, que le dict Jean de Ony auoit laissé à Rome, comme dict est deuant, arriua, qui venu estoit à grand haste, & par maints perils. Lequel dict les nouuelles comment Lancelot auoit esté par Paul Vrsin mis à Rome, comme dict auons deuant. Laquelle chose moult pesa au Marechal. Mais tous ceulx qui avec luy estoient regracierent nostre Seigneur de l'oraige & tourmente qui les auoit empesché d'aller plus auant. Car sans faillir si iusques là feussent allez, tous eussent esté trahis, morts & peris. Mais Dieu, qui tousiours defend les siens, garda

adonc son seruant le bon Mareschal, qui demeura dolent & courroucé de ce qui aduenu estoit. Mais ne defaillit mie pourtant en luy l'ardente volonté de tousiours trauailler au bien & paix de sainte Eglise. Ains puis qu'il auoit failly à vne de ses voyes, pour venir où il tendoit, c'est à sçauoir d'empescher celuy de Rome que il ne feust fauorisé par la puissance de Lancelot, comme dict est, Il prist à penser que il cercheroit voye & maniere de tant faire par toutes les parties d'Italie qui au dict Pape de Rome obeissoient, que ils feussent aduertis & congneussent les grands maulx & inconueniens qui à cause de l'erreur du dict Pape de Rome, & aussi de celuy d'Auignon, & par leur obstination, aduenoient en la Chrestienté. Et à ce tant se peïna, que il leur ouurit les yeux de verité en ceste cause. C'est à sçauoir que bon seroit que vn seul Pasteur feust esleu par sainte voye, & ces deux maudits deposez. Et semblablement fait tant par ses saiges & bonnes manieres, avec l'ayde de Dieu, verstous les Roys, & les terres & pays qui au dict Pape de Rome obeissoient, comme en Angleterre, Alemaigne, & ailleurs, & pareillement de celuy d'Auignon, comme France, Arragon, Espaigne, & autre part, que tous les Princes de la Chrestienté, & chascune puissance de pays mettroit peine à tendre à l'vnion, & que plus nul de ces deux ne seroit fauorisé ny soustenu en son erreur. Et ainsi par long trauail, non mie tout en vn iour, mais en l'espace de plus de trois ans, (Car trop y a à faire de ramener infinies opinions, & diuerfes faueurs

faueurs à vne seule,) a tant faiçt par son saige pourchas, que il est venu à ce qu'il tendoit. C'est que tous les Princes de la Chrestienté qui leur obeïssent, & toutes les terres & pays sont aujourd'huy d'accord, & mesmement le Roy Lancelot, (qui souloit fauoriser celuy de Rome, comme dict est,) que tous deux cedent, & vn vray Pape soit esleu. Et chascun endroiçt soy y trauaille. Et au cas qu'ils y soient contredisans, & ne aillent à la Iournée, qui pour ceste cause est prise à certain iour au mois d'Auril, en cest an mille quatre centhuiçt, en la Cité de Pise, où le Concile general doibt estre assemblée, & eulx mesmes y sont appelez, & ja de toutes parts y vont Prelats, & Ambassadeurs de tous les Princes & pays, (En laquelle chose France a grand honneur, le Roy & les Princes d'icelle, avec la noble Vniuersité de l'Estude de Paris, qui grand peine & par long temps y a mis,) ils seront delaissez seuls comme heretiques damnez, mauuais & detestables, de tous leurs Cardinaux, de tous les Princes, & de toute gent, & leur sera ostée toute puissance, & punis s'ils peuuent estre tenus, & vn nouuel esleu par le saint College, sans contraincte, en maniere deuë, par la voye du Saint Esprit. Laquelle chose Dieu par sa sainte misericorde veuille terminer briefuement, au bien & paix de toute la Chrestienté, comme mestier est. Car il n'est nul doubte que à cause de ce Schisme sont venus par l'ire de Dieu les maux qui depuis sont venus au monde moult merueilleux. Et en cest estat, & sous la forme que en brief ie deuise,

346 HISTOIRE DV MARESCHAL
est à cestuy iour dixiesme de Mars , mille quatre
1408. cent huit, le faict de l'Eglise. Enuiron lequel iour
doibuent partir pour aller au dict Concile les En-
uoyez du Roy de France, c'est à sçauoir le Patriar-
che d'Alexandrie, & autres notables Prelats, & no-
bles Clercs de la dicte Vniuersité de Paris, & main-
te gent d'autorité. Si en lairray à tant, & diray des
autres bien faicts du vaillant Cheualier en qui pre-
nons nostre matiere.

CHAPITRE XXI.

*Cy deuise comment le Mareschal en venant
par mer de Genes en Prouence, combatit
quatre galées de Mores, où grande
foison en y eut d'occis.*

ME B O N Champion de Iesus Christ,
c'est à sçauoir le Mareschal, qui est de
cœur, de volonté & de faict le vray per-
secuteur des mescreans, eut volonté d'al-
ler en Prouence veoir sa belle & bonne femme, &
visiter sa terre. Si se partit de Genes le vingtiesme
1408. iour de Septembre, en l'an mille quatre cent huit,
& monta sur la galée de la garde de Genes. Et ainsi
comme il alloit par mer, ouït nouuelles que quatre
galées de Mores estoient en son chemin. De ceste
chose demâda aduis aux vaillans hommes qui avec
lay estoient, & que il leur sembloit qu'estoit bon à

faire. Et ils respondirent que il estoit presques nuict, & que ils conseilloient que il demeurast ceste nuict à Porto Morice, & que il enuoyast tout coyement sçauoir où ils estoient, & que le lendemain feist ce que bon luy sembleroit : Mais que ils le prioient que sa personne descendist à terre, pour euitier tous perils. Car trop grand meschef aduiendroit s'il auoit mal ne encombrer, dont Dieu deffendre le voulust. De tout ce que dict auoyent les creut le dict Mareschal, excepté de descendre, & de ce ne les voulut escouter. Delà ne se bougea. Si eut enuiron minuict nouuelles que iceulx Sarrafins estoient en son chemin ancrez au plus pres d'un chasteau nommé Rocquebrune, ne semblant faisoient de s'en aller. Oüyes, ces nouuelles, quoy que chascun feist la chose moult perilleuse & doubteuse, pour ce que grand foison estoient, le Mareschal dit que pour ces Mores ne laisseroit son chemin : & se tourna vers ses gens, & comme en souffrant leur dit, Or y apperra de ce que vous sçaurez faire, voicy bien à besongner. Mais es fortes besongnes acquiert-on le grand honneur. Adonc pour leur aller courir sus prist à faire ses ordonnances. Cinquante arbalestriers prist sur sa galée, & ordonna par la dicte galée les lieux où il vouloit que ses gens combattissent. Premièrement coste luy pour combatre en pouppe, feurent les principaux ceulx de qui les noms icy s'ensuiuent, Messire Choleton, le Seigneur de Montpesat, Guillaume de Tholoigny, Pierre Castagne, Messire Thomas Panfan, Geneuois, & plusieurs autres

Xx ij

Gentils-hommes. Et pour combatre en proüe feit mettre Iean de Ony, Macé de Rochebaron, le bastard de Varanes, le bastard d'Auberons, & plusieurs autres. Et au long de la galée ordonna Louys de Milly, accompagné de plusieurs autres. Le matin se meit en son chemin au nom de Dieu le Mareschal, & droiët sur l'heure de Vespres arriua au lieu où les dicts Mores auoient reposé, mais partis s'en estoient, & allez ancrer deuant le port de Villefranche. Si teint vers là son chemin au plus tost que il peut, tant que trouuer les veint, comme vne heure deuant Soleil couchant. Et adonc par grand signe de hardiesse, faisant toute monstre de fier assault, courut à eulx, qui attendre ne l'oserent. Et tant feurent effroyez, que ils coupperent à grand haste les cables, & laisserent les autres. Et de tout leur pouuoir se meirent à fuir. Là feurent huez, en criant apres, apres, & tant feurent poursuiuis que on les attraignit deuant la ville de Nice apres Soleil couchant. Si furent durement enuahis. Et là feut faict de moult belles armes, & moult s'y esprouua bien chascun endroit soy. Mais pource que long seroit à dire les faicts que chascun y feit, vous dis que l'œuvre loüe le Maistre. Car de tel randon y feurent heurtez les dicts Sarrafins, qu'en la propre place où acconsuiuis feurent mourut de eulx de quatre vingt à cent, que la mer jecta le lendemain à terre. Et iceulx taschoient de fuir, mais de si pres estoient requis qu'espace n'en auoient, & non pourtant se mettoient à deffence par grand vigeur, & aux nostres fort lan-

çoient. Et ainsi toute nuit dura entre eulx l'escarmouche, où le traict fut si grand, que de la galée du Marechal feurent tirées sept grosses casses de viretons. Et le lendemain, ainsi tousiours escarmouchant allerent iusques deuant le chastel de Brigan-son, auquel lieu le Marechal veid la nuit. Et les Sarrafins se retirerent en vne Isle qui est deuant le dict chastel, & à la minuit se partirent secretement, & teindrent leur chemin en Barbarie. Mais des leurs y perdirent plus de quatre cent hommes que morts que affolez, comme rapporterent les Chrestiens qu'ils auoient pris, lesquels leur estoient eschappez en la dicte Isle. Et des gens du Marechal que morts que blesez y en eut dixneuf: mais moult estoient lassez, & à bon droit, car cessé n'auoient de combattre ou escarmoucher vne nuit & vn iour. Si teint son chemin le Marechal, & veint trouuer le Roy Louys à Toulon, qui moult grād chere & honneur luy feit, loüant Dieu de la belle aduanture qui aduenü luy estoit. Et quand assez eurent esté ensemble, & deuisé de leurs affaires & aduantures, le Marechal prit congé, & vers sa femme alla, qui à la plus grande liesse que son cœur pouuoit auoir le receut au chastel de Marargues, en plorant de ioye.

CHAPITRE XXII.

Cy deuise comment Messire Gabriel Marie, bastard du Duc de Milan, cuida vsurper au Roy la Seigneurie de Gennes, & comment il eut la teste couppée.

D I C T vous ay cy deuant comment Messire Gabriel Marie, bastard du premier Duc de Milan, vendit la Cité de Pise aux Florentins, & comment le Mareschal à toutes ses besongnes luy auoit esté amy, voire si amy luy auoit esté, que par maintes fois luy auoit sauué la vie, & gardé de faim, & de maints autres encombriers. C'est chose vraye. Mais iceluy Gabriel mauuais & desloyal, comme il y parut, luy en cuida rendre si petit guerdon, comme de se parforcer de vsurper au Roy & soustraire la Seigneurie de Gennes, comme par moy vous sera deuisé. Il est vray que quand iceluy Messire Gabriel eust faicte la dicte vendition de Pise, il alla demeurer avec le ieune Duc de Milan & le Comte de Pauie ses freres, qui benignement le receurent. Et à brief dire, quoy que ils le traictassent amiablement comme frere, il se porta si mal vers eulx, que il attira tant de gens vers soy, par ses tromperies, que il osa faire guerre à ses dicts freres. Et de faict se bousta en vne forte place de Milan, que on dit la Cita-

delle, & la teint par force, en cuidant pouoir for-
çoyer contre eulx. Mais sa presumption le deceut
car il conueint au dernier que par necessité de viures
& par force de famine il se rendist. Laquelle chose
feut sauue sa vie. Et le Duc de Milan pour celuy
meffaict le bannit à certain terme, & le confina à
aller demeurer en la Cité d'Ast, qui est au Duc
d'Orleans. Laquelle chose iura & promet. Mais de
ce serment se parjura, & feit tout le contraire. Car il
s'en alla au pays de Lombardie deuers Facin Kan,
qui est vn grand Tyran, & meneur de compai-
gnées de gens d'armes, ennemy de Dieu, & de na-
ture humaine. Car tous maulx, occisions & dom-
maiges sont & ont esté par long temps par luy faicts
& executez. Ce Facin Kan est ennemy du Roy de
France, & tres-grand aduersaire du dict Duc de
Milan, & du Comte de Paue son frere. Et se teint
le dict Gabriel en vne Cité que Facin auoit vsurpée,
laquelle se nomme Alexandrie de la paille, l'espace
d'un an, en portant de tout son pouoir mal &
dommaige à ses dictes freres. En ces entrefaictes ne
luy suffit pas ceste seule mauuaistié, ains luy & son
desloyal compaignon le dict Facin Kan vont ma-
chiner grande mauuaistié, si à chef l'eussent peu
meestre. Mais Dieu de sa grace ne le voulut consen-
tir. Ce feut que ils proposerent d'oster au Roy la Sei-
gneurie de Gennes, y occire tous les François, &
l'attribuer à eulx, ou au moins, si tout ce faire ne
pouuoient, mettre la ville à sac, qui est à dire la cou-
rir & piller, & eulx en aller à tout la proye. Ceste

deliberée entre eulx, feirent tant que aucuns Guibellins feurent de leur accord. Si estoit telle leur intention, que le dict Gabriel, qui tousiours auoit trouué amitié & courtoisie au Marechal, viendroit à Gennes deuers luy, & demanderoit marque sur les Florentins pour aucun reste de deniers que encores luy debuoiert à cause de la vendition de Pise, & par celle voye, tandis que à Gennes seroit, pourroit aduiser la maniere de mettre à fin ceste entreprise. Ceste chose deliberée, manda au Marechal que il luy pleust que deuers luy veinst ; laquelle chose il octroya volontiers. Mais non pourtant Gabriel, auant qu'il y veinst enuoya demander au dict Marechal vn saufconduit, pource qu'il auoit demeuré avec Facin Kan, ennemy du Roy & des Geneuois. Et il luy donna, mais non pourtant pour faire dommaige en nulle maniere à luy ou à la dicte Seigneurie de Gennes. Et ainsi y veint Messire Gabriel, & le Marechal luy donna la marque que il demandoit, & le traictoit aussi amiablement pour l'amour de son feu pere, comme si ce feust son frere. Et à ses despens y feut enuiron six mois, en monstrant signe de poursuiure la dicte marque, mais à autre chose pensoit. Car c'estoit pour tousiours aduiser son point, pour à son pouuoir parfourrir la trahison. Mais la faige preuoyance du Marechal ne luy souffroit auoir opportunité, ny espace. Toutesfois pour entrer en son faict, auoit ja demandé au dict Marechal congé de passer huiet cent cheuaux par la Ville & riuage de Gennes, lesquels il vouloit mener de

de Toscane en Lombardie, pour certain sien affaire, comme il disoit. Lequel congé il luy auoit donné. Mais Dieu qui ja partant de fois a gardé de mal & d'encombrier son seruant le Marechal, ne voulut que plus feust ceste mauuaistié celée, laquelle feut par estrange maniere, descouuerte en telle maniere. En celuy temps le Marechal faisoit tenir le siege deuant vn chastel que on nomme Cromolin, que tenoit contre le Roy & la Seigneurie de Gennes vn mauuais rebelle nommé Thomas Malespine, qui estoit de l'entreprise de Gabriel & de Facin Kan. A dueint vne fois entre les autres, comme Dieu le voulut, que vn autre Geneuois qui estoit dehors au siege, prist fort à debatre avec celuy Thomas qui sur le mur du chastel estoit. En disant, que mal luy viendroît d'estre ainsi rebelle au Roy & à sa Seigneurie, & que mieulx feroit de serendre, & donner obeissance, comme raison estoit. A brief dire, grosses paroles eurent entre eulx, & s'entredirent de grandes vilénies, tant que le dict Geneuois dit à celuy Thomas que il luy verroit coupper la teste sur la place de Gennes. Adonc l'ire extrefme & le despit que le dict Thomas eust, le feit eslargir de paroles, selon la vanité de son couraige. Si respondit, Et ie te promets que auant que il soit gueres de iours tu me verras aller par entre les changes de Gennes. La parole que cestuy dict feut moult pesée des oyans, qui tantost penserent que iamais cestuy-cy n'auroit la hardiesse de se tant tenir, s'il n'auroit port & esperance d'aucun. Si feut tantost tenu suspect le dict Ga-

Y y

briel, à cause de Facin Kan. Mais pour en sçauoir la certaineté, feut par secret Conseil ordonné vne certaine quantité de bons hommes d'armes, loyaux au Roy & à la Seigneurie, qui feurent enuoyez sur les montaignes enuiron Gennes, pour prendre garde si nul messaige ne pourroit aller ne venir de Gabriel à Facin Kan. Dont il adueint vn iour, comme ils estoient là en espie, que ils veirent venir vn compaignon à cheual. Tantost coururent sur luy à tout dagues & espées nues, disans Traistre tu es mort. Car nous voyons bien à la deuise que tu portes que tu es à ce faulx traistre Gabriel, qui est amy du Marechal que nous hayons sur tous. Car par luy sommes bannis de Gennes, si compareras le maltalent que nous auons à luy. Adonc celuy qui cuida que ils deissent vray, & que ils feussent des bannis de la Ville, haineux du Marechal, leur dict que pour Dieu ne le tuassent pas, & que puisque ennemis du dict Marechal estoient, telle chose leur annonçeroit, que s'ils en vouloient estre participans, ils seroient tous riches. Adonc iceulx faisans semblant que bien leur pleust ceste chose, luy tirèrent de bouche toute l'entreprise, & comment il portoit lettres à Facin Kan de par Gabriel, que il auoit entre les semelles de ses souliers. Lors iceulx faisans accroire que ils le meneroient sauement avec eulx, le menerent à Gennes. Dont il se trouua esbahy, & secretement fut examiné, & tantost recongneut toute la chose. Si feut pris Messire Gabriel, qui garde ne s'en donnoit, au Palais de la Ville, auquel habite le Marechal, où

f'estoit allé esbatre , pour aduiser le lieu , afin de miculx parfournir sa trahison. Et à tant feut mené, que de sa propre bouche recongneut tout le faict. Et comment à certain iour Facin Kan debuoit venir à tout deux mille cheuaux & trois mille hommes de pied deuant les portes de Gennes, & crier Viue partie Gibeline. Que adonc quand les gens du Mareſchal & les Geneuois sortiroient dehors contre luy, Messire Gabriel à tout ses huiet cent cheuaulx debuoit faire semblant de saillir en leur ayde, & auec eulx contre le dict Facin. Mais il tiendrait la porte ouuerte, pour donner lieu au dict Facin d'entrer dedans. Et que au cas que les Gibelins de Gennes se feussent voulu rebeller, ils eussent esté auec eulx si forts que tous les gens du Roy eussent tué. Et au cas qu'ils ne se rebellassent, que au moins courroient-ils la Ville. & la pilleroient, puis s'en iroient. Si eut apres ceste confession Messire Gabriell la teste trenchée, comme il l'auoit bien deſſeruy.





CY COMMENCE
LA TABLE DES RVBRI-
QUES DE LA QUATRIESME ET
derniere Partie de ce Liure, laquel-
le parle des Vertus & bonnes
mœurs & conditions qui
sont au Mareschal, & de la
maniere de son viure.



- E** PREMIER Chapitre deuise la façon
de son corps. I.
Item la deuotion que le Mareschal a vers
Dieu en œuvres de Charité. II.
Item la reigle que le Mareschal tient à seruir Dieu. III.
Item comment le Mareschal se garde de outrepasser la
Loy de Dieu, & ses Commandemens, & mesmement
en faict de guerre, & la mesure que il y tient. IV.
Item comment le Mareschal est hardy & seur en ses sai-
ges entreprises. V.
Item comment le Mareschal est sans conuoitise, & large
du sien. VI.
Item comment la Vertu de continence & de chasteté est
au Mareschal. VII.
Item comment le Mareschal suit la reigle de Iustice. VIII.

Item comment le Marechal avec ce qu'il est Iusticier est moult piteux & misericordieux. Et prouue par exemples que ainsi doibt estre tout vaillant homme.

IX.

Item de la belle Eloquence que a le Marechal.

X.

Item de l'Ordonnance de viure du Marechal.

XI.

Item conclud que homme où tant y a de vertus doibt bien estre honoré.

XII.

Item dis, en parlant au Maroschal, que pourtant ne se veuille fier en fortune qui souuent tost se change, & de ce donne exemples.

XIII.

Item la fin du Liure, où la personne qui l'a faict s'excuse enuers le Marechal de ce que il l'a faict sans son congé & commandement, & non si bien mis par escript qu'il appartiendroit.

XIV.

Item exemples de vaillans hommes trespasssez, qui sceurent bon gré à ceulx qui auoyent escript & enregistré leurs gestes, & leurs vaillans faicts.

XV.



CHAPITRE I.

*Cy commence la quatriesme & derniere Partie
de ce Liure, laquelle parle des vertus, bonnes
mœurs, & conditions qui sont au Mares-
chal, & de la maniere de son viure.*

*Et deuise le premier Chapitre de
la façon de son corps.*



RAY dit & racompté, Dieu soit loué,
les faicts dignes de memoire iusques à
aujourd'huy accomplis & tirez à chef
par Messire Boucicaut, Mareschal de
France, de qui procede ceste Histoire, & comme
on me les a baillez par memoire les ay mis par ordre
au mieulx que i'ay sceu, & non mie si bien comme
la matiere le requiert. Car à ce mon entendement
n'est suffisant. Si n'en dirons plus à present, & irons
à ses mœurs & conditions. Car apres ce que nous
auons parlé du riche tresor, c'est bien raison que
nous disions du vaisseau dont il sort, combien que
les œuvres loüent assez le Maistre. Si me semble,
consideré que ses nobles mœurs & maniere reglée
de viure peuuent estre cause de tout bon exemple,
est bon que nous en disions aucunes choses. Et par-
tant commencerons premierement aux façons de
son corps. Il n'est mie moult hault de corpulence,
ny aussi des moindres. Maigre homme est, mais nul

ne pourroit estre mieulx formé que luy , ne plus habile de son corps. Et est de tres-bonne force, large poiſtrine, haulte & bien faicte, & espaules basses & bien taillées. Greslé & menu est par les flancs. De cuisses & de iambes nul ne pourroit estre mieulx faict selon le corps. Le visaige est de belle forme en toutes façons sur le clair brun, assez coulouré, & bien barbu, & de poil brun sur le sor. Le regard a hardy & asseuré, & saige maniere & contenance rassise & haulte. Et avec cetant a maintien Seigneu-rial, que Dieu luy a donné telle nature & grace, que la presence de sa personne est craincte & redoub- tée, & tenuë en reuerence de ceulx qui le voyent, & par tout où il va, & mesmes de tels qui sont plus grands & plus puissans que luy. Et toutesfois n'a-il en luy ne en son maintien fierté ny orgueil, ains le hait sur toute chose, si n'est contre ses ennemis, con- tre lesquels a tres-grand couraige, & greigneur fier- té. Et avec cela richement se vest, nettement s'ha- bille, & de tres-bons habits.

C H A P I T R E II.

*Cy dict de la deuotion que le Marechal a vers
Dieu en œures de Charité.*



PARLER des mœurs & conditions du Mareſchal, apres que nous auons racompté ſes faiçts. Tout premiere-ment dirons de la deuotion qu'il a vers Dieu, & commencerons à la vertu de Charité: Pource qu'elle eſt mere & ſouueraine des vertus, comme le teſmoingne Sainct Paul. Il a telle deuotion à faire bien aux pauures, & telle pitié a de eulx, que il faiçt enquerir diligemment où il y ait pauures meſnaigers, vieulx & impotens, ou chargez d'enfans, ou pauures pucelles à marier, ou femmes giſans, ou veufues, ou orphelins, & là ſecretement tres-largement enuoye de ſes biens. Et ainſi par luy ſont ſouſtenus maints pauures. Et encores ne luy ſuffiſent les aumônes que il faiçt au pays où il eſt, ains pource qu'il ſçait que à Paris y a maintes ſecretes grandes pauuretez, y enuoye ſouuent tres-grand argent pour employer en tels vſaiges à gens qu'il comect à ce faire. Et eſt choſe vraye, comme pluſieurs gens le ſçauent, que maints pauures meſnaiges & maints pauures impotens en ont eſté recomfortez, & maintes filles mariées. Moult volontiers auſſi ayde à ſecourir Conuents & Eglises, & faiçt reparations de Chappelles & lieux d'Oraiſons. Si comme il appert en maints lieux, & meſmement à Sainct Innocent à Paris, auquel lieu par l'argent qu'il a donné ſont faiçts les beaux charniers qui ſont autour du Cimetiere vers la drapperie, & auſſi à Sainct Maximin en Prouence, où eſt le chef de la Magdelaine, a donné mille eſcus comptant pour
faire

faire vne voulte sur la Chappelle où est le benoist
 chef, & refaire la dicte Chappelle toute neufue: la-
 quelle est faicte moult belle. Volontiers donne à
 pauvres Prestres, à pauvres Religieux, & à tous
 ceulx qui sont au service de Dieu. Et à tout dire, ja-
 mais ne fault à nul qui luy demande pour l'amour
 de Dieu. Et quand il cheuauche dehors, volontiers
 donne l'aumosne de sa main, non mie vn petit de-
 nier à la fois, mais tres-largement. Si est secourable
 & tres-grand aumosnier par tout où il peut sçauoir
 qu'il y ait pitié, & par especial des bons. Car il aime
 cherement tous ceulx qu'il peut sçauoir qui sont de
 bonne vie, & qui aimēt & seruent nostre Seigneur.
 Car comme dict le Prouerbe commun, Chascun
 aime son semblable. Mais pource que ie sçay qu'en
 son noble sens, condition, & nature, n'a nul default,
 ie me veulx excuser à luy si le cas aduenoit que ia-
 mais ceste presente Escriture veint en ses mains, par-
 quoy il feust aucunement troublé, si comme sont
 communément les bons quand ils oyent faire men-
 tion des biens que ils font pour Dieu, que de ce que
 i'en dis la verité luy plaise n'y vouloir auoir aucun
 desplaisir, ne m'en auoir aucun mauuais gré. Car ie
 ne le fais mie pour luy en donner vaine gloire, ains
 le fais en intention de donner bon exemple à tous
 ceulx qui en oiront parler, & qui ce present Liure
 liront & oiront. Car comme les saiges Theologiens
 le tesmoignent, l'Aumosne & le bien faict n'est
 conseillé à faire secretement, fors pource sans plus
 à ce que l'homme qui le faict n'y prenne aucune

362 HISTOIRE DV MARESCHAL
vaine gloire, en monstrant sa bonté deuant les gens.
Mais quand l'homme est si parfait, que pour bien,
aumosne, ou Oraison, qu'il face, soit en secret ou en
public, point ne s'y glorifie, ains le fait simplement
pour l'amour de Dieu, mieulx est qu'il le face de-
uant les gens, que en secret. La cause est, pour ce
qu'il donne exemple à ceulx qui le voyent de faire
bonnes œuvres.

CHAPITRE III.

*La reigle que le Mareschal tient au seruice
de Dieu.*



AVEC ce que le Mareschal est tres-
charitable, il aime Dieu, & le redoub-
te sur tout, & est tres-deuot. Car cha-
cun iour, sans nul faillir, dict ses heures
& maintes Oraisons & suffrages de
Saints. Et quelque besoing ou haste que il ait, il oit
chacun iour deux Messes tres-deuotement, les ge-
nouils à terre. Ne nul n'oseroit parler à luy tandis
qu'il est à ses Messes, & qu'il dit son seruice, & moult
deuotement prie Dieu. Et à brief dire, tant donne
bon exemple de deuotion à ceulx qui le voyent, que
grands & petits s'y mirent. Tant que tous les varlets
de son hostel seruent Dieu en ieunes & deuotions,
& se contiennent à l'Eglise aussi deuotieusement
que feroient Religieux. Et de tels y a qui ne souloient
sçauoir mot de lettre, qui ont appris leurs heures, &

soigneusement les disent. Et avec ce, comme tres-saige, & pourueu du bien de son ame, (ainsi que tout bon Chrestien doit viure ainsi qu'il voudroit mourir,) il a fait son testament, & l'accomplit luy mesme par chascun iour. Et quand le Marechal fait son Oraison, il fait tousiours sa petition & demande à Dieu, sous condition si c'est pour le mieulx, & que toutesfois quoy que il requiere, comme homme fragile est desireux, que sa sainte volonté soit faite. O qui l'a ainsi appris à prier? Ce n'est mie venu de sapience humaine, ny de la chair, qui tousiours tire à l'ensualité: mais du Saint Esprit, qui ainsi l'inspire. Et de ceste maniere auoir de Dieu prier ensuit bien la maniere de Socrates, qui tant feut saige Philosophe, que les anciens l'appelloient Oracle diuin. Celuy disoit Que on ne deuoit rien demander à Dieu immortel particulièrement: mais sans plus requerir son ayde generalement en ce que il sçait que le meilleur est. Car, ce disoit-il, Dieu sçait mieulx ce qui est profitable à chascun, que nous ne pouuons sçauoir. Et souuent nous demãdons chose qui à auoir nous feroit dommageable. Car la pensée des mortels, ce disoit-il, est enueloppée de tres-espaisles tenebres; parquoy il aduient que elle eslargit ses demandes à ce que son appetit desire; pource que elle ne sçait congnoistre son mieulx. Tu desires, dict-il, richesses, qui ont esté cause de la perdition de plusieurs. Tu conuoites honneurs, qui sont cause de mortelle enuie, & peu durent. Tu imagines & desires Royaumes, & Sei-

Zz ij

gneuries, desquelles les yssuës sont & ont esté souvent miserables. Tu desires & requiers nobles mariages, & te surhaulser en lignée: mais c'est souvent destruction de famille & de vie seure par diuers cas. Car qui plus se fliche au vent de Fortune, plus est dejeté. Ne t'amuse donc, dit-il, à telles prieres, mais te recommande simplement à l'acteur de toutes choses, qui sçait mieulx ce qu'il te faut que toy mesme ne fais, & mects toutes tes causes & faicts à son arbitrage & volonté. Si sont moult belles paroles venues d'un Payen, qui ne sçauoit rien de la Loy de Dieu, & toutesfois par raison naturelle il confessoit vne Deité. Et avec luy bien s'accorde Iuuenal au commencement de son quatriesme liure. A propos des Payens, lesquels sans loy escripte eurent par raison naturelle congnoissance de Dieu, & des choses diuines, est escript de Thales, qui fut l'un des sept Saiges, que il respondit moult notablement quand on luy demanda, Si Dieu sçauoit les faicts des hommes, Oüy, dit-il, & non pas les faicts seulement, mais les pensées. De sorte que nous ne debuons pas seulement vouloir auoir les mains pures, mais aussi pures pensées, quand nous croyons la Deité celeste estre presente à nos secretes cogitations. Doncques si les Payens sans loy eurent congnoissance de bien faire pour l'amour d'un Dieu, que debuons nous faire entre nous Chrestiens qui auons vraye congnoissance de la Loy par tant de saintes Escritures, & qui sommes du college de Iesus Christ, qui fut & est Dieu & homme. Si deburions plus que autres.

estre punis si nous mesprenons. Et comme dit Boece en la fin de son liure de la Consolation, Il nous est necessaire d'estre bons, quand nous faisons tout deuant le Iuge qui veoid & congnoist toutes nos œures, & qui nous payera selon les dessertes. Aussi le Mareschal a le iour du Vendredy en grande reuerence. Il n'y mange chose qui prenne mort, ne vest couleur fors noire, en l'honneur de la passion de nostre Seigneur. Le Sabmedy ieusne de droicte coustume, & tous les ieusnes commandez de l'Eglise, & pour rien nul n'en briseroit. Dauantaige iamaïs ne iure nostre Seigneur, ny la mort, ne la chair, ne le sang, ne autre detestable serment, ny le souffriroit iurer à nul de son hostel. Et n'est pas besoing à ses gens que ils renient & maugréent, comme plusieurs font en France: Car mal leur aduiendroît, s'il venoit à sa congnoissance, & n'y a si grand qu'il n'en punist. Et mesmement en la ville de Genneſ, & en toutes ses terres a mis Ordonnance sur ceste chose, fous peine de grande punition. Si qu'il n'y a si hardy qui de nostre Seigneur oſast parler non deüement, ne oultrageusement iurer. Si y auroit bon mestier d'un tel Gouverneur à Paris. Outro eela, il va tres-volontiers en pelerinaige és lieux deuots tout à pied en grand deuotion, & prend grand plaisir de visiter les sainctes places, & les bons preudes hommes qui seruent Dieu. Si comme il a faict maintes fois la montaigne & la saincte place en Prouence, où Marie Magdelaine feit sa penitence, en laquelle a grande deuotion. Et en celuy lieu tout à

vne fois donna cinq cent francs comptant , pour auoir liets, & autres choses pour l'hospital aux pauvres, & pour heberger les pelerins. Il aime moult cherement toutes gens dont il est informé qu'ils meinent bonne & saincte vie, & volontiers les visite & hante. Et quand il voyage aulcune part en armes, il faict defendre expressement, sur peine de la hart, que nul ne soit si hardy de greuer Eglise, ne Monstier, ne Prebstre, ne Religieux, mesmes en terre d'ennemis. Et ne souffre assaillir Eglise forte, quelque bien ou quelque richesse que le pays eust dedans retirée, quelque famine ou necessité qu'il ait. Et en ce demonstre bien tant sa deuotion comme sa non conuoitise. Et de ce faict tout ainsi le pouuons recommander, comme faict Valere en son liure Scipion l'Afriquin, dont ja plusieurs fois ay parlé en ce Liure, que il louie moult pour ce que semblablement le faisoit. Dont il dit, que quand le dict Scipion eut pris Carthaige, il manda par toutes les Citez de Sicile que chascun veint recongnoistre les ornemens de ses temples, lesquels Hannibal, qui auoit esté Empereur d'Afrique & de Carthaige, quand il eut conquis Sicile, auoit là portez, si les rapportassent en leurs lieux. De laquelle chose, ce dict Valere, il demonstra tant son religieux couraige, comme sa non conuoitise. Car il y en auoit de moult riches.

CHAPITRE IV.

*Comment le Mareſchal ſe garde de treſpaſſer
la Loy de Dieu & ſes Commandemens,
meſmement en faiët de guerre, & de la
meſure que il y tient.*



O V T homme qui aime Dieu, & le redoubte, de quelque eſtat qu'il ſoit, ſe garde communémēt de faire choſe qui ſoit contre ſes commandemens. Et quoy que tel homme ait à faire en l'office où Dieu l'a appellé, ne ſe departira point de ce qui eſt de la raiſon. Et pource à propos des mœurs & maniere de viure du Mareſchal en l'office que Dieu luy a commis, c'eſt à ſçauoir des armes, nonobſtant que à pluſieurs pourroit ſembler qu'en celuy exercice forte choſe ſoit à ſe fauuer, bien y a ſceu & ſçait tenir reigle iuſte & meſurée le Mareſchal. Si comme ont faiët en leur viuant pluſieurs vaillans nobles hommes des temps anciens, que ie ramenteueray cy apres, auſquels, par ce que ie trouue d'eulx & de luy ie le puis accompagner. Mais pource que Dieu doit aller deuant toutes choſes, & que auſſi luy meſme en tous ſes faiëts meët touſiours l'ayde de noſtre Seigneur au deuant, ay premiere-ment voulu parler de ſa Charité, & puis de ſa deuotion, ſi dirons tiercement de la belle reigle morale

qu'il tient en armes, & du bien qui luy en est ensuiuy. En cestuy office certainement il est tres-saige, & souuerainement aduisé. Car auant que il commence guerre, bien considere s'il est bon qu'il la face ou non, & s'il a cause iuste, & à quoy se pourra tourner, quelle puissance il a en gens & en finance, & quelle a celuy contre qui il veut guerroyer, la force du pays & du lieu, la saison & le temps, & tout ce qui luy pourroit nuire & ayder, & sur ce delibere par bons sens. Et quand il a conclu qu'il est bon que il la mette sus, & qu'il a assemblé les gens, bien les sçait ordonner, commettre les plus saiges & les plus experts aux armes & les plus accoustumez pour estre les Cheuetaines des autres, & expressément commande que chascun à son Capitaine obeisse, & si nul va alencontre qu'il en soit puny. Auec ce il prend bien garde quelles gens il prend auec soy, & s'ils sont bons & duiçts en guerre. Et a maintes fois laissé à mener gens d'armes d'aucunes nations est-il, pour le mal que ils font par tout où ils vont, & que à peine les en peut-on garder, quelque punition que on en face. En quoy on peut dire que le Marechal tient la reigle & discipline de Cheualerie que iadis faisoient les susdicts vaillans anciens. Comme il appert és histoires des Romains, qui punissoient tres-fort leurs propres enfans & parens qui desobeissoient aux Souuerains. Ha Dieu, & en icelle discipline de Cheualerie n'est-il mie semblable à Scipion l'Africain le tres-vaillant, que i'ay ja pour sa bonté plusieurs fois allegué, lequel quand il feut commis pour estre

estre Cheuetaine d'un grand ost, que les Romains enuoyerēt en Espagne, il ordonna & feit vn Edict, Que toutes choses superflües & sans necessité feussent chassées & ostées de l'ost ? Pour lequel commandement vne grande troupe de folles femmes vuidèrent, & toutes manieres de marchans qui apportoiēt à vendre choses delicates, & sans besoing. Semblablement ce tres-vaillant homme le Maréchal faict en ses armées crier sous grande punition, que nul ne soit si hardy d'appliquer son temps en vaine oisieté, comme de iouer aux dez, ne à autre ieu de fortune, & que il n'y ait en l'ost quelconque chose à quoy follement & vainement se puissent amuser, ne que on n'y vende chose sans necessité, & que nul n'y iure vilainement Dieu, ne maugrée. Et si aucun le faict, il est griefuement puny. Et que tenir telle voye en ost soit bonne, Valere dict que vn noble Cheuetaine de Rome, que on appelloit Metellus, prist avec soy par le commandement des Romains l'ost & la compaignée de gens d'armes que vn autre Cheuetaine souloit mener, lequel ost auoit esté si negligemment introduict, que leur valeur estoit comme toute amoindrie. Mais celuy Metellus, suiuant la maniere de Scipion, tantost qu'il feut reuenu en l'ost, remedia aux mauuaises coustumes que ils souloient auoir. Et pour mieulx les contraindre, defendit que nulles choses delicieuses feussent vendües en l'ost, ne que nul y eut varlets, ne cheuaulx, ne autres bestes, pour porter le harnois, & voulut que eulx mesmes se seruissent. Et toutes-

A a a

fois il changeoit souuent de place, & si leur faisoit luy mesme clorre leurs logis. Le Mareschal donc est faige à commencer guerre, & à bien les sçauoir mener, & instruire ses gens. Mais aussi nul ne sçauroit ne pourroit estre mieulx aduisé de bien congnoistre son aduantaige en toutes places où il se loge en champ, ou quand il attend ses ennemis, c'est à sçauoir de mettre ses aduersaires s'il peut au dessoubs du vent & de la poudre, & le visaige au Soleil, & au bas de la montaigne. Et s'il veoid son mieulx, il n'attend mie qu'on le vienne assaillir, ains aduise son point de courir sus, & de les prendre s'il peut despourueüement. Et s'il apperçoit que son meilleur soit il les attend pour les auoir par aulcune cautele. Si n'est ne chauld ne hastif pour leur courir sus à l'estourdie, ains attend lieu & temps conuenable. Tout en la maniere que estoit le noble homme Fabius Maximus, dont Valere escript que il feut enuoyé à tout grand ost par les Romains, pour resister à la puissance de Hannibal le Prince de Carthaige, dont il adueint que luy qui estoit de grand sçauoir, considera quand il feut approché de ses ennemis leur grand pouuoir, & l'orgueil en quoy ils estoient montez, pour cause d'une victoire qu'ils auoyent eüe contre les Romains. Si ne voulut pas combattre si tost à eulx, combien que il eust grand gent, & ne faisoit que soy tenir sur la garde, & ses gens ferrez avec luy, & suiuiot ses ennemis d'assez pres, sans les assaillir, & ainsi se passoit le temps. Et en ce tandis perdoit tousiours Hannibal de ses gens, qui auoyent

de grands defaults, parquoy ils alloient affoiblissans, & Fabius prenoit tousiours fortes places, & à son aduantaige, & Hannibal toutesfois moult domma-geoit le pays, par bouter feux où il pouuoit. Mais pour dommaige que il feist, oncques ne meut Fabius à nulle hastiueré, que tousiours n'attendist son point. Quand ce eust duré vn temps, le Maistre de la Cheualerie de Fabius, qui estoit nommé Minutius, qui moult estoit hardy, & peu saige, par plusieurs fois incita Fabius de courir sus à Hannibal, & disoit, que c'estoit grand honte de tant souffrir sans leur donner bataille. Mais de ce ne s'esmeut en rien le Duc Fabius. Tant que iceluy Minutius, qui plus y cuidoit sçauoir que son Maistre, s'en retourna à Rome, & fit tant deuers les Maistres du Conseil que il eut licence de combattre contre Hannibal. Et adonc les gens que auoit Fabius feurent partis en deux, & en eut Minutius la moiëtié, & gouerna chascun sa partie. Mais tousiours Fabius se tenoit en sa resolution, & de rien ne s'esmouuoit. Hannibal leur ennemy qui ja estoit si affoibly qu'il estoit sur le point de s'en partir, eut grand ioye de ceste chose; car il sçauoit bien que par la follie de Minutius il auroit tantost la bataille, & que aussi Fabius estoit affoibly de la moiëtié de ses gens. Si fit Hannibal, qui moult estoit malicieux, mettre vne embusche en certain lieu, & Minutius, qui auoit grande enuie de combattre, assaillit Hannibal. Mais par l'embusche qui veint sur eulx feut tantost Minutius desconfit. Et le saige Fabius, qui auoit preuen la fin de ceste

chose, & ne vouloit pas pour la folie de cestuy fail-
 lir aux siens, s'estoit mis en vne embusche, si courut
 sus à ceulx qui chassoient les fuitifs, & fait sonner
 ses buccines pour rassembler entour soy ceulx qui
 fuyoient. Et ainsi gaingna Fabius par sa saige souf-
 france, & Munitius perdit par sa folle hastiueré. Et
 c'est pour dire que l'atrempance du Mareschal &
 de tous autres semblablement en faict d'armes faict
 à loüer, & non mie folle hardieffe, & non deüe ha-
 stiueré. Et à ce propos encores, pour mieulx prou-
 uer, que saige cautele face moult à loüer en faict
 d'armes, auquel sçauoir ne fault mie à estre bien ap-
 pris le Mareschal, si comme sur Sarrafins & autre
 part par maintes fois l'esprouua, dict Valere que au
 temps que le dict Hannibal & Hasdrubal son frere
 estoient en Italie, qui tout destruisoient, deux no-
 bles Ducs de Rome feurent enuoyez contre eulx,
 lesquels deux Ducs si saigement s'y conteindrent,
 nonobstant que ils n'eussent mie tant de gens com-
 me les autres, que les deux grands osts des deux fre-
 res ne peurent oncques estre ioints ensemble. Car si
 ainsi feust, rien n'eust peu durer deuant eulx, pour
 la multitude des gens que ils auoyent. Et feirent tant
 les deux Romains, pour destruire l'un des osts de
 leurs ennemis, que sans que Hannibal s'en donnast
 de garde, s'assemblerent vne nuit ensemble les
 deux osts de Rome, & alla l'un vers l'autre vn tres-
 grand pays toute nuit, & son compaignon le re-
 ceut par merueilleux sens, tout en la maniere que si
 ce ne feust que vn mesme ost, & que secours ne leur

feust point venu. Si se teindrent serrez & ioincts ensemble, dont il adueint que Hannibal qui auoit baillé iour de bataille, & ne se cuidoit combattre que à vne des parties, feut desconfir.

CHAPITRE V.

Comment le Marechal est hardy & seur en ses saiges entreprises.



V E C ce que le Marechal est en armes tres-saige & tres-aduisé; il est tres-hardy, cheualeureux, diligent, & de grande entreprise, en telle maniere que il ne se trouua oncques en lieu que il eust à faire avec ses ennemis, que il n'en faillist à son honneur, & qu'il ne feust de son bien faict tres-grandes nouuelles. Et toutes ces choses en luy se sont esprouuées par maintes fois où il s'est trouué en lieu & place que il entreprenoit de telles choses, & acheuoit, que elles sembloient comme impossibles à venir à bonne fin. Mais par sa grande hardiësse, & par l'ordonnance que il mettoit en ses gens, il faisoit ce qu'il vouloit. Car quand il se trouuoit en aulcune tres-grande & tres-difficile & penible besongne, & qu'il voyoit bien que sans grande force, & sans moult y souffrir n'en viendroit-il mie à chef, adonc faisoit crier en son ost que sous peine de mort nul ne feust si hardy de partir de sa place, ne retourner au logis. Et par ce ses gens qui redoubtoient sa iustice

A a a iij

& punition qui rien n'espargnoit, aimoient mieulx mourir en la bataille s'il le conuenoit, que estre morts & deffaicts honteusement par punition, si s'exposioient à si grands perils, que il terminoit honnorablement tout ce qu'il entreprenoit. Et de ceste notable & tres-honorée maniere en faicts de guerre que il auoit, le puis derechef comparer aux vail-lans anciens, comme Valere recite de eulx & de leurs faicts. Dont entre les autres exemples dict que comme l'ost des Romains feut vne fois logé sur le fleuve de Lombardie pres de Plaissance, adueint que par force leurs ennemis les en deslogerent. Quand leur Consul, c'est à dire leur Duc le sceut, il commanda au Maistre de la Cheualerie qui les menoit, & à eux tous ensemble, que ils allassent recouurer leur place, ou tres-griefuement les en puniroit. Et ne le feist pas iceluy Duc en esperance qu'il eust que ce peussent-ils faire, mais à fin que ils ne demeurassent deshonzorez d'auoir gauchy ou fuy. Si feist vn Edict & vn commandement que si nul estoit veu fuir ne tournant arriere que tantost feust tué comme ennemy. Par laquelle seuerité, ce dict Valere, encores que ils feussent fatiguez de corps & d'esprit, pour le desespoir de leur vie, ils dirent, que mieulx vouloient mourir sur leurs ennemis honorablement, que on les tuast honteusement. Dont il adueint que nonobstant la multitude des ennemis, & la force du lieu, ils gaignerent la place. Si sçait bien tenir ces manieres le bon Mareschal, dont nous parlons. Et suffise à tant de ceste matiere d'armes; à

laquelle i'ay produit exemples pour mieulx prouuer l'autorité de sa vaillance. Et aussi l'ay fait, pource que ramenteuoir les faicts des bons doit donner couraige aux nobles qui leurs faicts oyent de les suivre, & faire comme eulx.

CHAPITRE VI.

*Comment le Marechal est sans conuoitise,
& large du sien.*



EST chose notoire, & que chascun sçait, que à tout homme qui desire aduenir à hault degré de vaillance est nécessaire qu'il soit sans conuoitise d'ammasser trefor, ne richesses. Car si il mettoit en ce son soin, il est impossible que il peust vacquer és grandes poursuites qu'il conuient faire en armes à ceulx qui en veulent auoir los, & ausquels si escharceté estoit trouuée & congneüe, elle leur osteroit l'amour & la compaignée de ceulx qu'ils hanteroient en celuy mestier, & par ainsi leur renom seroit estéint quoy qu'ils feissent. Si n'est mie vraiment de ceste tasche tasché le vaillant Marechal, comme il appert. Car oncques en sa vie n'achepta ne acquist Seigneurie, terre, ne heritaige, & mesmement de ce qu'il a de son patrimoine peu de compte en tient. Si monstre bien semblant que ailleurs sont ses pensées. Parquoy sans faillir tout ainsi se peut dire de luy qu'il est escript du sage Philoso-

phe Anaxagoras, lequel apres que il eut longuement
 delaissé son pays, pour recercher Science retourna
 à ses possessions, lesquelles il trouua gastées, & de-
 fertes, & non cultiuées, dont ses amis le blasmerent,
 ausquels il respondit, l'aime mieulx, dit-il, que ie
 me soye faict, que si i'eusse faict mes possessions.
 C'est à dire, que s'il eust entendu à cultiuier ses pos-
 sessions il n'eust mie acquis la grande perfection de
 Science que il auoit. Si fut sa parole bien suiuant la
 Sapience. Car il eut plus cher auoir vacqué à culti-
 uier Science, & d'acquérir sçauoir, que à celuy de ses
 terres & heritaiges, laquelle occupation luy eust osté
 l'exercice de l'estude. Ainsi ce bon Mareschal dont
 nous parlons, qui vrayement tout ainsi que les an-
 ciens appelloient les saiges Philosophes Cheualiers
 de Sapience, se peult bien appeller Philosophe d'ar-
 mes, c'est à dire amateur de la science d'icelles, qui
 aime mieulx s'estre faict en vaillance, vertu, & aul-
 tre renommée, que s'estre entendu à acquérir terres,
 richesses, & manoirs. Mais il a acquis vn tres-grand
 trefor, qui est la Suffisance. Et c'est la propre rich-
 se, ny point n'en est d'autre. Car, dit Aristote, celuy
 est riche qui rien ne conuoite, & ceste richesse ne
 luy peut estre ostée : Car bonne pensée ne craint
 nulle male fortune. Et ainsi ensuit les vaillans preux
 qui oncques nul compte ne teindrent d'amasser
 auoirs. Et qu'il n'en tienne compte, sans faillir il le
 monstre bien. Car nul noble homme ne pourroit
 plus abonder en saige & bien ordonnée largesse de
 ce qu'il a que il faict. Car aux Cheualiers & aux Gen-
 tils-hommes

rils-hommes estrangers & priuez donne largement,
 tost, & sans demander, à chascun selon le merite de
 son bien faict, & selon ce qu'il vault grandement
 guerdonne celuy qui luy faict aucun seruice ou
 plaisir. Ny ne veult rien debuoir, ains paye & con-
 tente les marchans qui le leur luy liurent. Et à brief
 parler, tant faict en ce cas cy, que tout homme à qui
 il a à faire a cause de se loüer de luy. Ne il n'est aise
 fors que quand il faict bien à aultruy. Et toutesfois,
 ainsi que doibuent faire tous hommes saiges, bien
 regarde à qui, quoy, comment, & pourquoy il don-
 ne. Et non mie par folle largesse, qui moult est des-
 prisee, mais par pure franche liberalité, saigement
 assise, & du sien propre, & non pas de l'autrui, ainsi
 que Sainct Augustin dit que largesse se doibt faire.
 Car il se garde moult bien de faire tort, grief, ne ex-
 tortion à quelconque personne. Car ce ne luy souf-
 firoit mie la grâde charité dont il est plain. Ne dons
 ne esmolumens quelsconques ne veult prendre que
 on luy veuille donner à cause de l'office du Gouver-
 nement qu'il a. Et en ce faisant tient bien l'enseigne-
 ment du saige Duc d'Athenes, qui fut appelé Peri-
 cles, qui disoit, comme rapporte Iustin, Que il af-
 fiert à chasque homme qui a l'administration de
 Iustice, de ne contenir pas seulement ses mains &
 sa langue, mais aussi ses yeux. Et en ce il monstroït
 que vn Prince ou homme qui a à gouverner les au-
 tres, & tout Iusticier, se doibt garder de receuoir
 dons qui corrompent les iugemens humains, &
 aussi de trop parler, & en outre de l'incontinence

Bbb

378 HISTOIRE DV MARESCHAL
de la chair. Car le menu peuple, ce dict-il, tire tantost la vie des souuerains en exemple. Et de toutes ces choses bien se sçait garder le Mareschal, si comme cy apres fera dict.

CHAPITRE VII.

Comment la vertu de Contenance & de Chasteté est au Mareschal.



VE cestuy homme dont nous parlons soit continent & chaste, appert par ses contenances & faicts. Car en trois signes principaux est apperceu le luxurieux. L'un est en estre trop delicat de la nourriture du corps, & en la curiosité de la vesture & des habillemens. Le deuxiesme en contenance & regards. Et le tiers signe est és paroles. Car, dict le Prouerbe, Où la dent se deult la langue va. Et dict l'Escripture, Qui de terre est de terre parle. Quant est de la nourriture du corps, sa coustume est telle, que quoy qu'il soit très-largement seruy, & que son hostel soit moult plantureux de tous biens, jamais à table ne mange que d'une seule viande, c'est à sçauoir de la premiere à quoy il se prend, soit bouilly, ou rosty, ou poulaille, ou grosse chair, ny ne boit vin qui ne soit le quart d'eau, ny nulle heure ne boit fors à disner & soupper, ny en estranges viandes ne faulces ou faueurs diuerses ne se delecte. Il boit & mange tres-atrempeement & sobrement. Et quoy

que les gens soyent seruis en argent doré moult richement, & qu'il ait assez de vaisselle, jamais son corps n'est seruy de nulle chose en or ne en argent: mais en estain, en voirre, ou en bois. De sa vesture & habillement n'est mignot ne desguisé, quoy que son appareil soit propre & net: mais non trop curieux en deguiseemens, ne moult ne s'y entend, ne amuse, ny ne dore son corps par diuerfes affiches, dont la superfluité ne sied pas moult à hommes solemnels, quoy que ils en vsent assez en France. Tient bel estat de gent, & honorable mesgnie de Gentils-hommes, veult que ils soient bien habillez, chascun selon son estat, & assez & largement leur donne de quoy. A table peu parle, ne nulle heure n'a moult de paroles. Et quand de son mouuement se prend à parler, tousiours est son deuïs de Dieu, ou des Saincts, de Vertu, ou du bien que aucun a faict, de Vaillance, & de Cheualerie, d'aucun bon exemple, & de toutes telles choses. Ne à nulle heure, soit en priué ou en public, on n'oit saillir de sa bouche parole vaine ne messeante, ne jamais ne dit mal d'autrui, ny n'en veult ouïr, ne paroles defraisonnables, ou vaines, & où il n'y a aucun bien n'oit point volontiers. Moult luy plaist ouïr lire beaux liures de Dieu, & des Saincts, des faicts des Romains, & histoires anciennes. Dauantaige nulles fois ne ment, & ce qu'il promet il le tient. Et veult estre obey tost & sans delay de ce qu'il commande. Il hait les mensongers & flateurs à merueilles, & d'avec soy les chasse. Il hait pareillemēt eux de fortune,

380 HISTOIRE DV MARESCHAL
ne nul temps n'y ioüe. Ces vertus qui sont contraires à lubricité sont en luy. Et si les signes sont par dehors de sa chasteté & continence, encores y est plus la reelle verité du faict. Car le lien de mariage garde en tres-grande loyauté & amour. Et vrayement Dieu a commis tout tel Gouverneur à Gennes comme il y conuenoit. Car comme par delà ils foyent moult ialouse gent, ny n'ont desir que on leur aille desbaucher leurs femmes, de cestuy leur est bien aduenü. Car plus de semblant n'en faict que si de pierre estoit, nonobstant que les Dames y foyent bien parées & bien attiffées, & que moult de belles en y ait. Et semblablement veult que ses gens s'y gouvernent, & si plainte luy en estoit venue d'aucun, mieulx luy vaudroit n'y estre oncques entré. Car avec ce que il le faict pour le bien de vertu, outre ce il veult garder l'amitié des Geneuois, que il congnoist en leurs mœurs & coustumes. Si ne veult que ils ayent cause de eulx tenir mal contents de luy, ne des siens, pas seulement mesmes au regarder. De laquelle chose i'ay ouï dire à vn de ses Gentils-hommes que vne fois entre les autres le Marechal cheuauchoit par la ville de Gennes, si y auoit vne des Dames de la ville qui au Soleil peignoit son chef, qui moult estoit blond & bel, comme par delà en sont communément curieuses. Si adueint que vn des Escuyers, qui cheuauchoit deuant luy, la veid par vne fenestre, & va dire, O que voila beau chef! & quand il fut passé oultre, encores retourna pour regarder la Dame. Et adonc le Marechal, qui le

veid ainsi retourner va dire, C'est assez faict. Ainsi de faict & de semblant le Marechal est net de cestuy vice de charnalité, & de toute superfluité, qui est parfaict signe de sa continence. Car, dient les Autheurs, que le vice de luxure abonde en iolietez, en regards, & contenance, & s'adjoit à conuoitise de choses delectables, & d'ornemens vagues, qui font le couraige volant par diuers mouuemens de delices. Si a bien regardé & aduisé cestuy faige dont nous parlons que c'est vn vice qui damnel l'ame, & estaint les vertus, comme le tesmoigne Sainct Augustin. Et pource l'a voulu du tout bannir de foy: & mesmement des sa tres-grande ieunesse, qui moult est grande vertu. Si est plus que chose du monde luxure contraire à vaillant homme d'armes. Car mesmement Iules Cesar, qui feut si vaillant conquerer, tant comme il feut en la contrée d'Egypte, en feut tres-vilainement diffamé. Et tellement, que sa plus eust continué sa vie luxurieuse en celuy pays tant qu'il y demeura, en s'occupant en folles plaisances & delices, il eust perdu tout honneur, & toute vaillance d'armes. Car ja le vouloient laisser ses Cheualiers. & ses gens d'armes, qui moult en murmuroient, & le tenoient pour homme perdu. Et qu'il soit vray que contraire chose soit à tout vaillant homme, dit Botace au cinquiesme liure de la ruine des nobles hommes, du Roy Antiochus, duquel Antioche feut nommée, & qui tant feut hault, riche & puissant Prince, que assez auoit pouuoir, richesse, & gent pour tout le monde conquerir, & qui ja

auoit subjugué & conquis par force d'armes moult grand pays, ny nul ne pouuoit resister à sa force & puissance, & deuât lequel toutes terres trembloient, que il feut deffaict & mis bas par sa luxure & delices. Car apres qu'il eut conquis vne partie de la Grece, il s'en alla hyuerner en Calcidie, auquel pays il feut pris de folles amours. Pour laquelle chose, pour soy occuper en iolietez & delices, en ieux & esbatemens, son fier couraige feut amolly. Si demena ceste vie tout l'hyuer, & tant que non pas seulement les Princes de son ost: mais aussi les Cheualiers & simples hommes d'armes ensuiuirent ses folles plaisances & delices. Et tellement delaisserent l'ordre de la discipline de Cheualerie, & maniere de viure que ils auoyent apprise & accoustumée à mener, qu'en la premiere assemblée où ils se trouuerent apres, qui fut contre les Romains, ils feurent vaincus, & s'enfuit le Roy Antiochus en la Cité d'Ephese. Iustin aussi confirme ceste chose, en disant que cestuy Roy par vn hyuer estoit tous les iours à nopces nouvelles, & dict que il estoit moult curieux en superfluitez, qui sont choses desirables aux luxurieux, & qu'il portoit cloux d'or en sa chaulsure, & auoit vaisseaux d'argent à l'vsaige de sa cuisine, & les paremens de tous ses habillemens estoient de moult grande richesse & magnificence. Dont dit Valere, Que telles choses sont plus desirables proyes aux ennemis, que elles ne sont cause de les vaincre & surmonter. Et me semble que les Autheurs qui escripuient ces choses en leurs liures, en ayant merueilles

que telles superfluitez feussent en homme, tant feust hault Roy, ou Empereur, n'auoient pas veu en leur temps courir les oultraiges & desrois qui sont en vsaige au temps present en France, & autre part. Et non mie seulement és Princes & és Gentils-hommes, mais aussi en de petits Ministres de leurs hostels, plus grands bombans en de tels y a, que n'auoit le Roy Antiochus en sa personne. Et pource à l'effect qui s'en ensuit, peut-on veoir les causes, & selon les causes peut-on iuger quels effects en peuuent ensuiure.

CHAPITRE VIII.

Comment le Mareschal suit la reigle de Iustice.

LA VERTU de Iustice, avec les autres biens qui sont au Mareschal, reluit en luy merueilleusement, ne nul ne la pourroit miculx garder à l'ögle qu'il la garde, comme il est necessaire, par especial au pays de par delà, voire sans ce que il vse de rigueur non deüe, ne de cruauté à creature née. Ains en tous ses faicts plus tire, comme doit faire tout bon Iusticier, sur Misericorde que sur rigueur, en gardant la ligne & la balance de droict, que il veult faire à tous, en rendant à vn chascun ce qui est sien. Et s'il la tient bien, & tousiours a tenuë, il y appert au lieu où il est. Qui est vne grande merueille à considerer, que par le sçauoir d'un seul Cheualier gens tant rebarbatifs, si

384 HISTOIRE DV MARESCHAL
rebelles, & tant mal accoustumez de ne rien crain-
dre, puissent estre ramenez à telle discipline, & à
telle paix, que tout homme pourroit porter à toutes
heures l'or, & le tresor sur la teste ou en ses mains par
toute la Cité de Gennes, sans ce que nul luy ostant,
ne luy en feist tort. Ny en vn an pas vne fois ne vient
à Iustice vne seule plainte d'une buffe donnée, ou
d'une barbe tirée, au lieu qu'ils se souloient entre-
tuer par la Ville tous les iours comme chiens, ny que
l'un die vilainie, ne face oultraige à l'autre. Ains y
court vne telle generale parole entre grands & pe-
tits, quoy que ils ayent à faire ensemble, Fay moy
raison de toy mesme, ou Monseigneur me la fera.
Si peut-on veoir que c'est solemnelement bien gar-
der Iustice. Pour laquelle vertu de Iustice bien gar-
dée est ensuiuy & ensuit tel bien aux Geneuois, que
les riches, qui souloient eulx tenir enclos, & mussez
pour peur des mauuais, comme deuant est dict,
montrent maintenant manifestement eulx & leur
auoir, sans auoir peur que tort ne grief leur soit fait.
Et leur faiët de marchandise, qui estoit comme tout
destruiët sur mer, & en moult petite quantité de
nefs, est maintenant à merueilles grand. Et monte
leur nauire, que ils enuoyent par tout le monde, à
plus de sept cent grosses naues. Et les mauuais, qui
souloient vestir riches robes de leurs larcins, sont
contraincts fils veulent viure de bescher en la vi-
gne, ou de mener vn asne. O Geneuois, que tant
debuez aimer celuy qui ainsi vous a mis de exil en
franchise, de pauvereté en richesse, de deüil en ioye,
de

de tenebres au clair iour, & qui a restauré de mort cent mille des vostres, qui ores feussent destruiçts, s'il n'eust esté, & qui a gardé vostre Cité de destruction ! C'est chose vraye, & nul ne le peut nier, & il y paroist, & par son moyen vostre puissance s'estend à present sur toute la mer & la terre. Quel guerdon rendrez-vous à vostre bon Duc & Gouverneur, qui tant de biens vous a faicts & faict chacun iour de mieulx en mieulx, ou prendrez-vous merite suffisant pour guerdonner ces grands biens ? Bien luy debuez obeir, l'aimer & le garder soigneusement, & prier Dieu pour luy, & qu'il le vous veuille sauuer : Car s'il vous estoit failly, ie me doubte que vostre gloire iroit au declin. Car tous les mauuais d'entre vous ne sont pas peris, quoy que par crainte ils tiennent cachez leurs felons couraiges. O que grand bien seroit pour vous, si la vie estoit perpetuelle ! Car plus n'y a de meschef en vostre faict fors ce qu'il est homme mortel, de qui la vie ne peut estre moult longue. Si le vous conuiendra perdre vne fois, qui vous fera grande desolation. Mais tant que vous l'avez, accoustumez-vous à bonnes coustumes, à tenir Iustice, & à suiure la voye de bonnes mœurs, & vous mirez en luy. Si delaissez vos cruauttez, & anciennes mauuaises coustumes de ainsi vous entredeffaire. De bonne heure vous estes donnez au Roy de France, qui tel Gouverneur vous a enuoyé. Bien debuez benir le iour que premier vestes celuy qui ainsi vous garde, gouuerne, & defend, & qui entre vous est si droicturier Iusticier,

Ccc

386 HISTOIRE DV MARESCHAL
que l'Empereur Trajan , lequel tant feut jadis re-
nommé par sa grande Iustice , & que les histoires
recommandent tant , oncques mieulx ne la garda ,
nonobstant que il descendist de son destrier , quand
il estoit armé pour aller en bataille , & feist arrester
tout son ost , pour faire droict & Iustice à la bonne
Dame veufue , qui luy requeroit droict d'un tort
que on luy auoit faict.

CHAPITRE IX.

*Comment avec ce que le Marechal est Iusti-
cier , il est piteux & misericordieux. Et
preuue par exemples que ainsi doit
estre tout vaillant homme.*



A I s avec ce que le Marechal est droi-
cturier Iusticier , ne default mie en luy
plaine misericorde & pitié. Car de cel'a
Dieu bien garny , tout ainsi que il affiert
à tout bon Seigneur & Gouverneur de gent. Car
maintes fois luy ont ses priuez ouï dire , Que il vou-
droit que il ne fouueint iamais à luy ne à aultre de
injure que on luy eust faicte , affin que il n'eust cause
ne volonté de s'en vanger. Ne oncques ne refusa à
nul pour quelconque mal qu'il luy eust faict mise-
ricorde , si la demande. Et qu'il soit vray que pitié
& misericorde soyent en luy , bien l'a monstre n'a
pas grandement , que il luy veint à congnoissance

que plusieurs de ses seruiteurs, c'est à sçauoir de ceulx qui auoyent le gouuernement de sa despence le desroboient, & auoient desrobé bien de quatre à cinq mille francs, l'un plus, l'autre moins. Si feit tant qu'il en sceut la verité, non mie par gehenne, ne par force, mais par faire prendre garde par bonnes gens que pouuoit monter chasque iour la despence, à le prendre au large. Si fut trouuée clairement la mauuaitié. Mais le bon Seigneur ne voulut que autrement en feussent punis, ains leur feist bailler de l'argent tres-largement à chascun selon le temps que ils l'auoient seruy, & courtoisement leur donna congé. Et pour ce que ils disoient que on pourroit auoir aucun mauuais soupçon sur eulx, pour ce que ils estoient congediez de son seruice, il voulut que bonnes lettres eussent que ils estoient en sa bonne grace, & que de son bon gré se partoient tant que il les remandast. Il espargne aussi les simples & ceulx qui aucunement melprennent non par malice, mais par non sçauoir, & par simplicité, & pardonne de leger à ceulx qui sans feintise & de bon courage se repentent, posons que à luy mesme ayent meffaißt. Tout en la maniere qu'il est escript de la grande debonnaireté de l'Empereur Octauian, qui seigneuria tout le monde, que vn Cheualier que on nommoit Lucius Cuminus par desraisonnable ire luy dit moult d'injures & de vilainies. Mais toutesfois oncques l'Empereur ne s'en esmeut à nulle impatience, ne ire. Dont il adueint que quand le lendemain cestuy homme feut refroidy de son vin, & de

son ire, il luy souueint comment outrageusement il auoit parlé à l'Empereur, il en eut telle honte, & telle repentance, que il se vouloit occire. Quand l'Empereur le sceut, il en eut grand pitié, & alla vers luy. Si le trouua tres-honteux & confus de sa follie, il l'accolla & reconforta, & dit qu'il luy pardonnoit, & que ja pour ce ne feroit en sa disgrâce, mais son amy comme deuant. Le Mareschal est aussi moult pitieux sur les vieulx hommes d'armes, qui plus ne se peuuent ayder, & ont esté bons en leur temps: mais rien n'ont espargné, ains sont pauvres. Si ne faict mie à la guise que on faict en maints lieux, que quād on ne se peut plus ayder d'un vieulx & affolé homme d'armes, tant il ait esté bon, & il soit pauvre, on le boute hors comme un vieulx leurier de quoy on n'a plus cure. Si ne faict mie ainsi le Mareschal: ains à tousiours les prise & honnore, & pourueoit à leur vie, & supporte piteusement & tres-humainement leurs vieilleses: tout ainsi qu'il affiert à faire à tout vaillant & bon Cheuetaine, & Gouverneur de gent. Et par telles manieres luy veoir tenir il acquiert l'amour des gens d'armes, qui de meilleur cœur l'enferuent, & l'en aiment, prisent, & honnorent, en pensant autant feroit-il de nous si nous estions affolés du corps, ou enuieillis en sa compaignée. Et à ce propos est escript que ainsi le faisoit le Roy Alexandre le grand, dont il adueint que il estoit par un grand hyuer en la conqueste d'un pays, si va d'aduanture veoir un ancien Cheualier de son ost, qui estoit aux champs tout mourant de froid, & quasi

tout enroidy. Si en eut moult grand pitié, considérant ses anciens iours, & sa bonté, qui encores luy faisoit suiure les armes. Adonc le Roy luy mesme alla prendre le Cheualier entre ses bras, & l'ayda à mener en son pauillon, & l'assist en son propre siege, & le frota deuant beau feu, & l'eschauffa, pour le faire reuenir. Et ainsi ce noble Empereur humilia la grandeur de sa Majesté, par pitié & misericorde. Et tels exemples doibuent mouuoir les cœurs des Princes & Cheuetaines de semblablement faire.

CHAPITRE X.

De la belle Eloquence que le Marechal a.

DE s vertus de cestuy bon Marechal pourroye dire sans cesser, mais pour tirer à la fin de mon œuvre, vrayement par ce que moult de gens me rapportent, & comme dit l'Escripture, Le tesmoingnage de plusieurs doibt estre creu, Je tiens que nulle en luy ne default. Et à tout dire, tant en y a, que tous ceulx qui le voyent & hantent, qui ont bonne volonté de bien faire, prennent à leur pouuoir exemple à luy de toutes choses, & mettent peine à le ressembler. Et avec ce que il est tres-vertueux, & tres-faige de bien & pourueüement ordonner tous ses faicts, comme deuant est dict, & que par sa bonté il est aimé, & par sa iustice craint: son tres-beau langage doulx, benin, & bien ordonné, & sans fraude,

Ccc iij


attire les cœurs de maintes gens , Comme j'ay ja prouué par le faict de l'Eglise, où il ramena par sa saige & doulce parole les Geneuois à vraye obeissance, & aussi par autres grands faicts que il a tirez à fin par sa discrete eloquence. Si pourroit par aduantage sembler à aucuns qui oiront ou liront ceste Histoire, que forte chose soit que vn homme sans auoir grandement estudié puisse auoir si bel & si orné langaige comme ie dis. Mais ce ne doit sembler merueille à nul qui a discretion. Car il n'est scauoir quelconque qui soit impossible à acquerir à homme qui mettre y veult grande diligence, s'il a entendement. Posons encores que l'homme soit de rude entendement, si est-ce comme dict le Prouerbe, Que l'vsaige rend Maistre. Et pource que c'est moult belle chose & bien seante à tout Prince & Cheuetaine de gent, & à tout Gouverneur de peuple, & dont maints grands biens peuuent venir, que auoir beau langaige, & affin que chascun mette peine de l'acquerir, ne que nul se desespere de le pouuoir apprendre, tant ait rude maniere de parler, ie diray à ce propos aucuns exemples. Sainct Hierosme en son liure tesmoigne que Demosthenes acquit, par y mettre peine, la science de tres-solemnele Eloquence, & toutesfois, ce dit-il, estoit-il begue à son commencement, & de tres-laide voix, & ne pouuoit proferer ses lettres. Mais il se trauailla tant par grande peine & estude, & tant meit peine à mattr le vice de sa langue, que il prononça souuerainement ses mots. Et ainsi par force de accoustu-

mance il corrigea le default naturel de sa langue & de sa bouche. Celuy mesme aussi feut souuerain Musicien, & toutesfois auoit-il naturellement tres-laide voix, mais par longue accoustumance il ramena à douceur & accord mesuré & plaisant à ouïr sa voix, qui souloit estre laide & mal accordable, & desplaisante à ouïr. Et à brief parler, il estoit en toutes choses par nature si rude, excepté au desir de sçauoir qui estoit en luy, que Valere en le loüant grandement dit de luy qu'il se combatit avec la nature des choses, & en feut vainqueur, en surmontant sa malignité par force de couraige tres-perseuerant. Et ainsi, ce dit Valere, sa mere enfanta vn Demosthenes defectueux, & non parfaict, & l'estude & accoustumance le rengendra & refait Maistre vertueux & parfaict. Et pourtant, dit le Philosophe, Du grand bien qui vient de l'Eloquence & du gracieux & sage langage, peut-on tirer à exemple ce que dit Tullies, Que jadis les hommes habitoient és bois & és forests en guise de bestes, sans vser de nulle raison, fors seulement de force corporele, par laquelle ils pourchassoient leur vie. Mais adonc vn homme de grande autorité, qui par Eloquence & beau langage leur monstra le grand bien de la vie ciuile, c'est à dire de la communauté de gens, & d'habiter & conuerfer ensemble, sous loix & ordre de raison; tant de ce les enhorta, que il les attira à icelle ciuilité, & que ils s'assemblerent ensemble, & prirent à conuerfer l'vn avec l'autre. Et ainsi par la vertu d'Eloquence feurent premierement fondées les

Citez. Et à ce s'accorde assez la fable de laquelle fait mention Stace, Qui dict que Amphion fonda les murs de la Cité de Thebes, par la douceur de sa chanson. Ce que nous pouuons entendre, que par son beau langage il peupla ceste Cité. Et pareillement se peut entendre d'Orpheus, lequel les Poëtes dient que il attiroit mesmes les bestes sauuaiges, les serpens & les lyons au son de sa harpe. Ce sont les fieres gens, & cruels qu'il amollissoit & rendoit priuez par son beau langage.

CHAPITRE XI.

De l'ordonnance de viure du Marechal.



VCUNS dient que Diligence passe sens. Mais qui tous les deux peut auoir ensemble il ne fault mie à attaindre à maints grands biens. Et de ce est bien garny le Marechal. Car tant aime la vertu de exercice, & tant hait oisieté, que à peine pourroit-il estre pris ne trouué à nulle heure, que il ne s'exercitast à aulcune bonne œuvre. Si dirons de sa maniere de viure, & de employer le temps, apres que nous auons dict de ses vertus. Il se leue par chascun iour coustumierement moult matin. Et ce fait-il, affin que il puisse employer la plus grande partie de la matinée au seruice de Dieu, auant que l'heure vienne que il doit vacquer aux autres besongnes mondaines que il a à faire. Si se tient en œuvre

œuvre d'oraison enuiron trois heures. Apres ce il va au Conseil, qui dure iusques à heure de disner. Apres son disner, qui est assez brief, & en public, (Car nulle fois ne mange que d'un mets de viande, ny ne sçait que l'on luy doibt apporter à manger, ne iamais mange faulx d'espace, ne autre, fors verjus & sel, ny n'est seruy en argent, ny en or,) Il donne audience à toutes manieres de gens qui veulent parler à luy, & luy faire aucune requeste. Si n'y a mie petite presse souuent aduent, mais si grande, que toute la sale en est plaine, que d'estrangers, que de ceulx qui nouuelles luy apportent de diuers pays, & d'uns & d'autres. Et à chascun il parle gracieusement, & rend responces si benignes & si raisonnables que tous s'en tiennent contents selon leurs demandes, & tous expedie l'un apres l'autre. Et tost & brief les deliure, sans leur faire longuement en la ville en long sejour despenfer le leur. Apres il se retire, & adonc faict escrire lettres, où il les veut enuoyer, & ordonne à ses gens ce qu'il veut qu'il soit faict. Puis va à Vespres, s'il n'a autre trop grande occupation. Apres Vespres derechef il besongne un petit, ou parle à ceulx qui ont à parler à luy, iusques à l'heure que il se retire. Et adonc acheue ce qu'il a à dire de son seruice, & puis va coucher. Aux iours des Dimanches & des Festes il occupe le temps à aller en pelerinaiges tout à pied, ou à ouïr lire d'aucuns beaux liures de la vie des Saints, ou des Histoires des vaillans trespassez, soit Romains, ou autres, ou à parler à aucunes gens de deuotion. Et telle

D d d

est la maniere & l'ordre de viure qu'il tient quand il est à sejour en la Cité de Gennes, dont il est Gouverneur. Et quand il cheuauche en armes, nul ne pourroit prendre plus grand soing ne greigneur peine qu'il prend pour faire toutes choses conuenablement, & comme il appartient, & si bel & si bien que nul ne se plaint fors les ennemis. Et ainsi que dit le Prouerbe commun, Selon Seigneur mesgnie duite, Il prend garde de prendre gens à son seruice qui soyent bons & de bonne vie, & si y auoit en aucuns quelque mauuaise tasche ou laid vice, ja si grand ne seroit que il ne chassast d'environ soy. Si faict moult de biens à ceulx qui le seruent, & ils l'aiment loyaument, comme ils doibuent, & le seruent diligemment, obeissent, craignent, & doutent. Et ainsi ce tres-vaillant homme pour la tres-grande ardeur qu'il a continuellement que toutes choses qui luy touchent soyent bien faictes, ne prend comme point de repos, ne nul esbatement. Laquelle chose vraiment tous ceulx qui l'aiment & qui desirent sa santé, & longue vie, laquelle est bien seante, & comme necessaire au monde, & Dieu luy tienne, luy deburoient deconseiller de prendre si grand soing, & si continuel, sans aucune recreation de quelque esbatement. Car comme dient les Autheurs, si grande sollicitude est moult prejudiciable à la vie & santé du corps, à demeurer en si grand soing sans delaisser. Car quand l'imagination est trauaillée de plusieurs choses diuerses l'une sur l'autre, elle rend l'entendement qui est las de comprendre tant de

choses comme tout aueugle, & par longue coustume engendre melancolie, qui trouble aucunesfois la memoire: dont peuuent sourdre plusieurs maladies: Et mesmemēt disent les Saiges que c'est grand peril de s'endormir ne aller coucher en telle lasseté d'entendement, & sans auoir prins auparauant aucune recreation de ioyeuseté ou d'esbatement. Car ils dient que adonc que l'homme dort à tout sa fantaisie ainsi trauaillée, l'esprit souffre peine en songeant choses melācoliques & desplaisantes. Et pour ce affin de remedier aux inconueniens qui en peuuent ensuiure, les dicts Saiges conseillent à ceulx qui sont tant occupez ou d'estude, ou d'autre continuel affaire, auquel il conuient que l'entendement trauaille, que ils cessent aucune heure du iour de ouurer, & qu'ils recréent & resioüissent leur esprit d'aucune ioyeuseté & esbatement qui puisse reconforter nature, qui peut estre greuée par prendre trop grand & continuel soing. Si est moult à propos au reconfort de telle lasseté oüir chanter doucement, ou ioüer d'aucuns doux instrumens, oüir paroles ioyeuses sans peché, ne vice, ou quelque chose qui facerire, & qui reconforte aulcunement nature, laquelle est en creature humaine si tendre, que elle est de peu de chose greuée & affoiblie. Et n'est point de mal de resioüir la vertu qui gist en l'ame & en l'entendement, pour recréer & reconforter aulcunement la sensualité du corps: mais que on ne face point de peché ne chose vitieuse, ne il ne desplaist point à Dieu. Car n'est-il pas escript mesmement

D d d ij

que vn Sainct preud'homme Hermite , quand il auoit esté vne piece en Oraïson , prenoit sa recreation & son esbatement en petits oiselets que il nourrissoit? Dont il adueint que vne fois passoit par deuant son hermitaige vn Gentil-homme qui portoit vn arc derriere luy , va murmurer du bon homme qu'il voyoid esbatre à petits oiselets qu'il tenoit sur son doigt. Si dict en soy mesme, Si cest Hermite estoit si Sainct comme on dict , il feroit tousiours en oraïson , ny ne se ioüeroit pas à ces oiseaulx. Et lors le Sainct homme , qui feut inspiré par vertu diuine de ce que l'autre auoit pensé , le va arraisonner, & le va prier que il voulust tendre l'arc que il portoit , & l'autre le tendit. Et l'Hermite le pria que il le laissast tousiours tendu : & il respondit, Que non feroit ; car il gasteroit son arc , qui par continuellement estre tendu perdroit sa force , & deuiendrait si lasche que il ne pourroit tirer loing. Adonc luy respondit le bon homme , Beau fils , ainsi est-il de nature humaine , dont la foiblesse est si grande que elle ne souffre à l'homme , sans trop grande greuance, estre continuellement en contemplation en aucun labour , si conuient donner quelque plaisir à l'esprit , & qu'il se ioüe quelques fois , affin qu'il soit après plus prompt & plus prest à ouurer de son entendement.

CHAPITRE XII.

*Cy conclud comment homme où tant y a de
vertus doit bien estre honnoré.*



PAR CE qui est dict, qui est chose vraye, peut-on iuger si l'homme en qui toutes vertus s'assemblent est digne de los, & d'auoir gloire au Ciel, & hault renom au siecle. O quelle chose seroit-ce qui luy pourroit nuire? Certes nulle, quoy que les mouuemens de fortune soyent merueilleux, & qui souuent nuisent aux bons & aux vaillans: si n'est-il mie en la puissance d'elle de briser ne fieschir son fort & ferme couraige, pour quelconque aduanture. Car il est ja tout aduisé que fortune se peut changer, & que trop peu de fois est stable; ains souuent reçoit les honneurs & biens mondains que elle a prestez, & au lieu liure & donne maintes aduersitez. Si ne luy pourroit aduenir cas dont il ne soit tout pourueu de volonté de le porter constamment & patiemment, comme il affiert à tout saige & vaillant homme. Mais quoy que Fortune nuise & ait nuit à maints vaillans, les vertus ne peut-elle tollir. Si ne perd rien l'homme qui ne les perd. Car autres biens ne sont proprement siens. Et ce sçait bien le Saige dont nous parlons. O quantes fois par diuers cas que ie laisse à dire pour cause de briefueté, a-il esté en peril d'estre trahy, pris, & occis, & empoisonné au pays de delà, où les

D d d iij

398 HISTOIRE DV MARESCHAL
mauuais, qui tousiours hayent les bons, si les plus
forts eussent esté & feussent en la Cité de Genes,
ne l'eussent laissé iusques à ceste heure si longue-
ment au Gouuernement ? Mais de eulx se sçait-il
bien garder. Toutesfois oncques homme ne feut
tant saige qui de traistre priué se peust tousiours
garder. Et on ne sçait aucunes fois lesquels ce sont.
Car souuent aduient que les plus grands flateurs, &
les mieulx seruans, & qui plus semblent obeissans,
sont les plus desloyaux en couraige. Mais de machi-
nation, & de faulx œuvre de traistre le veüille Dieü
deffendre. Car grande perte seroit & grand dom-
maige si encombrier luy aduenoit. Si ne le veüillez
mie souffrir bons Geneuois, ne estre ingrats ne mes-
congnouissans des grands biens qu'il vous a faicts &
chascun iour faict. Et ne le souffrez mettre au com-
pte de ceulx qui ont esté hays pour bien faire. Car à
tousiours seroit grand reproche à vous & à vostre
Cité.

CHAPITRE XIII.

*Cy diët en parlant au Mareschal, que pour-
tant ne se veüille fier en Fortune, qui tost
se change. Et donne exemples.*



NOBLE Mareſchal, ie veux vn petit parler à toy. Et nonobſtant qu'à ton bon ſens ne faille rien apprendre, toutesfois pour ce que l'entendement de l'homme, quand il eſt occupé de pluſieurs grandes choſes, oublie aulcunes fois l'vne pour l'autre, le ramenteuoir meſmes aux Saiges, de ce qui leur eſt bon à faire ou à laiſſer ne leur peult nuire, ne deſplaire ne leur en doibt. Poſons que la perſonne qui pour bien leur dict ſoit ſimple & moins ſçauante que eulx. Vaillant homme, Tu te fies par aduantage es grands biens que tu as faiçts, & chaſcun iour, Dieu mercy, y perſeueres, tant au Royaume de France, dont es Mareſchal, où tu as par long temps & dès enfance eſprouué ta vaillance, & faiçt maints biens, comme en ce que tu as réparé la ruine de la Cité de Gennes, & auſſi aux grands encombriers que tu as faiçts par maintes fois aux meſcreans & Sarraſins, en l'exauſſement de la foy, & en ce que tu as mis peine en la paix de ſaincte Eglise, & maintes autres choſes profitables. Si te pourroit ſembler, ce qui eſt vray, que tu as moult bien merité par tant de peines endurer, & par tant de ſeruices faire, que tu ſoyes aimé & de Princes, & de nobles, & de ceulx que tu gouernes, & generallyment de tous Chreſtiens, pour laquelle cauſe peult-eſtre tu en ſerois moins ſur ta garde comme de nul doubter. Ha vaillant Cheualier, il va tout autrement. Car nonobſtant que le Prouerbe die, Fais ce que tu doibs, & aduienne ce qu'il pourra. Sçaiches que à tout hôme

qui faiçt bien, enuie luy engendre foison de haineux. Et affin que tu t'y prennes garde, & que de plus en plus soyes pourueu, ne point nel'oublies, & que si aucune chose mal à point le temps aduenir t'aduenoit, dont Dieu te garde, affin que les simples gens & aussi que les enuieux ne peussent dire que ce feust par ta desserte, il est bon que ie die aucuns exemples de plusieurs tres-vaillans preud'hommes qui ont esté hays & chassés de leur Seigneuries, & aucuns occis par l'enuie & ingratitude de ceulx à qui ils auoyent bien faiçt. Et le premier Exemple, affin que toy ne autre ne te fies en vaillance, ou renommée, parquoy en cuides estre plus asseuré, te diray premierement de Theseus. Cestuy preux Theseus feut Roy & Prince d'Athenes, & compaignon de Hercules le fort, & feut avec le dict Hercules en tous les principaulx faiçts qu'il feit. Iceluy feit tant de bien aux Atheniens, que il les affranchit de la seruitude que le Roy Minos auoit sur eulx, qui estoit si horrible que il conuenoit que tous les ans luy enuoyassent de leurs enfans, pour nourrir vn fier monstre qu'il tenoit en vne caige, qui les deuoroit tous, & iectoient les gens de la Cité aux lots, & ceulx sur lesquels les lots escheoient conuenoit que ils y allassent. Mais de ce meschef par sa force & bon sens les tira Theseus. Plus leur feit encores: Car il redifia, peupla & augmenta moult & accreut la Cité d'Athenes, qui estoit deuant comme tout en ruine, & feut le principal commencement de sa prosperité, & de la grande gloire où elle veint. Mais
les

les Atheniens luy en rendirent si bon guerdon que ils se rebellerent contre luy, & le chasserent en exil en vne petite Isle que l'on nommoit Scyros, & là pauurement finit ses iours celuy qui auoit eu tant de haults honneurs, & si grande renommée. Que par enuie telles nuisances souuentes fois aduiennent aux bons & vaillans, peut estre aussi prouué par ce que Valere racompte du tres-vaillant Cheualier, & vn des Princes de Rome, qui feut nommé Furius Camillus, auquel toutes les bontez ensemble estoient. Et pour ce que il estoit tant vaillant & preud'homme, que il sauuoit les bons d'estre persecutez des mauuais, enuie luy brassa tel breuuaige que elle feit controuuer sur luy que il n'auoit pas bien party les despoüilles & les proyes aux gens d'armes d'une grande victoire que luy mesme auoit eüe de la Cité de Veies, qui moult auoit longuement greué les Romains, & ill'auoit subjuguée. Et pour ceste cause les Romains plains d'ingratitude, nonobstant le grand bien que il auoit faict, l'enuoyerent en exil. Mais tout ainsi que bons preudes hommes ne doibuent mie regarder à la peruersité des mauuais que ils ne facent tousiours bien, & que ils ne rendent le bien pour le mal, comme nostre Seigneur le commande, ce tres-vaillant preud'homme qui mieulx aimoit le bien commun de Rome que le sien propre, ne laissa pas pour ce de monstrier le bien que il leur vouloit. Car il adueint au temps que il estoit en exil, que les Gaulois destruirent Rome. Mais luy qui de ce feut moult dolent, feit tant que il assembla les

E e e

amis, & alla contre iceulx, & les Romains qui s'en-
fuyoient rassembla. Si feit vne embusche, & courut
sur les Gaulois qui garde ne s'en donnoient, & les
desconfit, & recouura vne grande partie des biens
que ils auoient pilléz à Rome. Si donna tout pour
refaire la Cité, & defendit que ceulx qui estoient
demeurez ne s'en allassent: car tous s'en vouloient
aller, & laisser Rome. Si feut adonc la dicte Cité de
Rome ainsi que de nouuel refondée, & pource
feust-il appelé le second Romulus. Car ainsi que
Romulus la fonda premierement, ainsi cestuy Fu-
rius la refonda fécondement. A ce propos encores,
que tousiours ne sont pas bien recongneus & remu-
nerez les bien faictz des bons: mais leur est rendu
mal pour bien, n'en eust pas moins le tres-saige
homme Scipion Nasica, qui tant s'estoit trauaillé
pour le commun de Rome, & tant leur auoit faict
de bien, que maintes fois les auoit par ses belles &
saiges raisons sauuez & gardez de maintes grandes
seruitudes. Mais la recompense feut telle, que les
citoyens prirent si mal à gré ses vertus, & eurent tant
à mal ses bonnes œuvres, que ils trouuerent voye de
eulx en deliurer. Car pour excuse l'enuoyerent en
legation en Asie, & luy dirent que là attendist tant
que on l'enuoyast querir. Si vsa là le demeurant de
sa vie, sans que les Romains ingrats & mal con-
gnoissans de tant de biens que il auoit faictz eussent
nul desir de son retour. Et n'est pas de nouuel, ce
dict le Translateur du liure de Valere, que ceulx
qui veulent viure à volonté, & sans raison, hayent

ceulx qui les reprennent. Et ainsi feust ce preudhomme hay pour bien faire, & pour bien dire. Mais pource que tū te pourrois fier en ton grand sçauoir & prudence, dont tu as si grand los par excellence, que les Italiens, lesquels sont les plus fines gens que nation du monde, te tiennent le plus saige homme qui viue aujourd'huy. Sçaiches que iceluy Scipion, dont ie dis, feut tant saige, que Sainct Augustin au liure de la Cité de Dieu ramentoit ses vertus & ses dicts authentiques. Et aussi en parle Solin au premier liure, & dit, Que cestuy Scipion qui mesmement fut de la lignée des autres Scipions, feut tenu pour le plus saige & le meilleur homme de Rome, & non mie par le tesmoignage de peu de gens, ne en priué, mais de tout le Senat, & en public, qui si bien luy guerdonnerent sa bonté. Si peult-on bien veoir comment les iugemens des hommes sont souuentefois iniques & reprouuables, quand mesmement la Cité de Rome, qui voulut estre tenuë la plus morigenée & la plus vsant de droict que Cité du monde, feut par enuie tellement aueuglée. Si est bien à propos de ce que deuant ay dit, Que bien faire & bien dire engendrent souuent haine. Si ne veuille nul iuger quand Fortune nuit aulcunement à ceulx qui se trauaillent pour le bien public, & qui se messent de punir les mauuais, & soustenir les bons, que ce soit pour leurs dessertes, ny que pour leurs pechez secrets Dieu leur souffre encourir telle punition. Car plustost est-il souuentefois tout autrement, comme il appert de Iob, de qui Dieu vou-

Eee ij

lut esprouuer la patience, qu'il souffrit persecuter, & si estoit tres-iuste. Et de tels maux rendus pour bien faire sont les Histoires toutes pleines. Le vaillant Duc d'Athenes Milciades, qui tant feut preux, & plain de hardiesse, que il desconfit six cent mille Persiens, que Darius Roy de Perse auoit assemblez pour destruire Athenes, encores qu'il n'eust en sa compaignée que onze mille hommes d'armes, par son sens prit ses ennemis despourueüement, dont tant y ouura, qu'il meit Athenes en paix, & maints autres tres-grands biens leur feit. Mais le guerdon qu'il eut à la parfin, feut que les Atheniens par leur faulse enuie & mauuaistié le feirent mourir en prison vilainement. Aultant en voulurent faire vn temps après à vn leur Duc moult vaillant & preud'homme qui feut nommé Themistocles, lequel quand il eut tant trauaillé pour le bien d'Athenes, que il eust deliuré la Cité de tous ses ennemis, & l'eust renduë tres-puissante en faicts & renommée, riche, & Princesse de la Grece, le guerdon qu'il en eut feut que les Atheniens feurent tant ses ennemis, que il luy feut besoing de s'enfuir, pour garantir sa vie. Mais pource que aucuns pourroient dire que telles haines viennent souuentesfois de peuple à Seigneur, ou Cheuetaine à ses gens, pour cause que le Seigneur ou le Gouverneur ou Chef prend trop grand subside sur eulx, ou leur est trop cruel, ou ne leur est pas par aduanture assez abandonné & large de ses biens, sans faillir souuentesfois ne tient mie là. Et il appert par vn autre vaillant homme que les

Atheniens feirent mourir , lequel estoit nommé Phocion, & si estoit-il tres-debonnaire, large, liberal, & sans conuoitise, qui sont vertus par lesquelles communément l'homme est aimé, & ne souffrirent pas les desloyaulx Atheniens que le corps de ce vaillant homme feust enseuely en leur pays, ains le ietterent hors. Et de ces grandes ingrattitudes qui feurent és Atheniens, qui estoit la Cité du monde où l'Estude & les Sciences estoyent plus authentiquement leües dict Valere en les blasmant , que nonobstant que ils feussent plus en doctrine que les autres , & que ils adorassent Minerue , Deesse de Sapience, & des armes, selon leur Loy, & ils se teinsent pour les plus saiges du monde, & dont tant de solemnels Philosophes estoyent issus, leur iniquité que ils monstrent par tant de fois à ceulx qui tant de bien leur auoyent faict, estaignoit & amoindrissoit tout le bien qui pouuoit estre en eulx. Comme fil eust voulu dire, que les vices plus sont grieus & plus sont à blasmer és grands puissans & saiges hommes que és petits & ignorans. Et par ce conclud Valere , Que les Atheniens vsoient plus de leurs mauuaises conditions que de leurs iustes loix. Et parce il dit, Que plus faict à louer l'homme qui est si ignorant que il ne congnoist les vices, ne point ne les faict, que celuy qui a congnoissance des vertus, & point n'en vse.

Ecc iij

CHAPITRE XIV.

*La fin du Liure où la personne qui l'a faict
s'excuse vers le Marechal de ce que il l'a
faict sans son sceu & commandement,
& non si bien mis par escript que
il appartiendroit.*



EST temps que ie tire à fin la
matiere de mon Liure, nonob-
stant que dire encores assez se
pourroit. Mais pour ce que l'en-
tendement de l'homme se tra-
uaille aulcunes fois de moult oüir,
tant soyent les choses bonnes, icy concluëray mon
dire, delaisant à parler de luy au temps qu'il est en-
cores en la droicte fleur de son aage, dont i'espere
que ses biensfaicts ne fauldront mie à tant, ains croy
que tousiours iront croissans de mieulx en mieulx.
Cartout ainsi que on veoid que l'un vice attire l'au-
tre, pareillement croissent & multiplient les vertus.
Donc comme nous soyons tous mortels, s'il aduient
que mort ou autre encombrer me defende à plus
escrire & adjouster à mon Liure ce que le dict Ma-
reschal fera dorefnauant, ie supplie tous saiges ESCRI-
uains que aucun d'eulx veüille parfaire le surplus,
iusques à la fin, que Dieu bonne luy octroye. Si prie
& requiers humblement aux nobles, & notables

personnes par l'ordonnance desquels il a esté faict, que ils me veüillent pardonner si si suffisamment que la haulte matiere le requiert ne l'ay sceu traicter, ne mettre en ordre. Car vrayement il n'a mie tenu à faulte de bonne volonté, mais à non plus sçauoir. Si leur plaïse corriger les defaults, & auoir agreable mon labour tel comme il est. Et aussi ie supplie tres-humblement le bon Cheualier de qui il est faict, que s'il aduient que en son viuant il vienne entre ses mains, ou en oye parler, que pareillement me veüille pardonner, si si suffisamment que il appartient n'y ay enregistré & mis les nobles faicts & dignes mœurs, ne mauuais gré ne me veüille sçauoir, si i'ay eu hardiesse d'entreprendre à parler de luy, & de sa vie, fans en auoir auparauant congé de luy & licence, & sans son sceu. Car i'ay receu la charge & commission de ce faire volontiers, & à bonne intention, pour ce que la belle matiere dont il traicte, pourra à tousiours mais estre cause de bon exemple à ceulx qui desirent hault attaindre, & qui mirer s'y voudront. Si ne luy debura pas desplaïre d'auoir le payement de ce qu'il a bien defferuy, c'est à sçauoir los & renommée à tousiours mais au monde par les merites de ses biensfaicts. Car il ne desplaïsoit pas jadis aux vaillans preux, que memoires authentiques & perpetuels feussent faicts de leurs bontez, ainçois, dit Valere, & maints aultres Autheurs le tesmoignent, que en intention & esperance que ils acquissent bonne renommée faisoient & tiroient à chef les merueilleuses choses que ils entreprenoient.

Et dict à ce propos Aristote, Que los & honneur n'est mie encores assez suffisant merite à donner à l'homme qui est vertueux. Et qu'il soit vray, que vn chascun Prince & Gouverneur de pays, ou Chef de Cheualerie ou de Cōmunauté de gent, doibue raisonnablement vouloir auoir los, gloire, & honneur, afin que la reputation de leurs personies soit tenuë en plus grande reuerence de leurs subjects, par quoy ils en soyent plus craints & plus obeis, dit Varron, qui feut vn tres-saige Autheur des Romains, Que il estoit expedient que les Roys & les grands Princes se faignissent estre du lignaige des Dieux, comme plusieurs le feirent jadis, comme le Roy Alexandre, les Empereurs de Rome, & autres. Et de ce faict mention Sainct Augustin au liure de la Cité de Dieu. Parquoy nous pouuons dire que c'est chose conuenable que ceulx qui ont sous eulx administration de gens & de peuples, accroissent leurs auctoritez le plus que ils peuuent, non mie par orgueil, mais pour estre plus craints, & obeis comme il appartient. Doncques ne me sçaura pas mauuais gré ce vaillant preud'homme, si ie luy ay procréé & enfanté vn nouuel hoir, voire si durable que il ne pourra jamais mourir au monde. Car voirement les liures qui sont faicts representent les personnes de ceulx de qui ils parlent, si comme faict le fils la memoire du pere. O il ne sera pas plus desdaigneux que fut jadis Pompée le grand, à qui ne despleut mie de ce que le saige Poëte, qui feut nommé Teophanes, auoit escript sans son iceu ses gestes, & ses nobles faicts,

faicts, que il meit en moult beau langaige, & notable style. Il ne l'eut pas à desdaing, ains quand le volume luy presenta, il en feit ioye à grand merueilles, & dit que celuy qui auoit mis peine à prolonger sa memoire à tousiours-mais au siecle, l'aimoit de grand amour, quand il desiroit sa perpetuité, si auoit bien deseruy que grand guerdon luy redist de tel benefice, & seruice. Si le remunerera si grandement, que il le pourueut de son viure tres-honorablement, & avec ce pour ce que il auoit honoré & exaussé son nom par escript, pareillement le voulut honorer. Car il le meit au rang des Cheualiers, & le feit citoyen de Rome, qui estoit adonc le plus grand honneur que on peult faire à homme, & n'estoit mie chose accoustumée que on y receust nuls estrangers. Si estoit moult grande dignité pour les grands priuileges, franchises, & excellences de quoy vsoient les dictz citoyens. Et avec ce l'honora de grand louange en ses escripts, en moult bellangaige, & tres-orné, en luy rendant graces de ce qu'il auoit dict de luy, & à tousiours feut só familier, & amy singulier, avec les guerdons d'autres grâdes largesses que il luy rendit.

CHAPITRE XV.

*Exemples des vaillans hommes trespassez qui
sceuient bon gré à ceulx qui auoyent escript
& enregistré leurs gestes, &
leurs vaillants faicts.*

Fff



AREILLEMENT sceut grand gré Scipion l'Africain au Poëte Ennius, qui auoit escript ses nobles faicts, & luy en rendit grandes graces, & guerdons. N'en feit mie moins le noble & vaillant Cheualier Brutus Drusus, lequel pource que vn tres-excellent Poëte, nommé Actius, auoit mis, & escript és entrées des temples moult beaux vers, contenans les belles victoires que le dict Brutus Drusus auoit eües de ses ennemis, & commét les despoüilles & proyes que il auoit conquises il les auoit données pour orner les Temples, il reputa à tousiours celuy Poëte son amy, & estendit vers luy sa grande largesse & liberalité. Pareillement feit Iules Cesar. Car à plusieurs Clercs & Poëtes qui escriprent en diuers styles de luy, & de ses tres-nobles faicts, & auctorisées conquestes, sceut moult grand gré, & grand semblant leur en feit par maints guerdons que il leur en rendit. Et si leust agreable vn liure entre les autres, qui luy en feut donné bien le monstra. Car au temps que il estoit à la conqueste de la terre d'Egypte, comme recorde Lucain, & il se combatoit en mer contre ses ennemis, qui l'auoient tellement pressé que sa nef estoit moult eslongnée de ses autres gens, & de son grand nauire, parquoy il fut si contrainct que pour sauuer sa vie il conueint qu'il se desarmast, & faillist en mer, de toutes les richesses qu'il auoit il ne meit peine à rien sauuer fors seulement le liure de ses faicts que il porta en sa main senestre, & tous-

iours au dessus del'eaüe, de peur que il feust mouïllé, & nagea à la main dextre l'espace de cent pas de mer iusques à ce que il veint à ses gens. Qui feut vne merueilleuse vigueur en vn homme de pouuoir ce faire. Si estoit bien signe que il auoit grand amour à son liure. Et ainsi ces nobles hommes auoyent ioye que leur renom feust perpetuel. Et n'est mie de merueilles. Car tout homme naturellement desire gloire. Et la cause ce dict Aristote est, pour ce que toute chose par nature tend & tire le plus que elle peut à sa perfection. Et quoy que aucuns dient que on ne doit desirer louange, c'est à entendre quant aux choses spirituelles, comme au seruice de Dieu, mais és biens de Cheualerie, & de Science, n'est point vice à qui y est excellent d'en vouloir auoir los & renommée. Comment Aristote, qui tant feut solennel Philosophe, que oncques homme en Science de Philosophie ne l'atteignit, & qui en sa noble doctrine enseigne tres-bonnes mœurs à suiure, & fuir le contraire, ne feust-il luy mesme conuoiteux d'icelle gloire de renommée? Car quand il eut donné au disciple Theodorus les liures que il auoit faicts & composez de la Science & art de Rhetorique, que il auoit trouuée, comme tesmoingne Tullies en son liure, il voulut bien que il feust sceu que il les auoit faicts, affin que autre ne s'en donnast le los, & ne se les attribuast. Si comme maintesfois aduient que aucuns attribuent à eulx & se donnent l'honneur de auoir faict œures & choses que autres ont faictes. Semblablement se peut dire de Virgile, qui feut le

Prince & fouuerain des Poëtes, que auffi il defira auoir los & gloire de la Science, comme il le monstra, par ce que il dit des vers que il auoit faiçts, l'ay, dit-il, faiçt & composé ces vers: mais vn autre s'en donne l'honneur, par ce que il les attribüe à soy. Et ainsi adueint il mesmement de la Rhetorique d'Aristote, que vn autre s'en vouloit donner le los, dont Aristote seteint mal content, & pource declara il en vn autre lieu que il auoit faiçt les dicts liures: afin que la loüange qui luy estoit deüe ne feust à aultre attribuée. Si est doncques vraye chose & assez prouuée; que tout vaillant homme peut, & doit loisiblemēt vouloir & desirer los, honneur, & gloire au monde du bien que il faiçt. Et parce ils doibuent sçauoir moult grand gré à qui authentiquemēt & en bel style met en liures en Croniques & en Registres leurs nobles faiçts: affin que leur grand los ne dure mie tant seulement en leur viuant, maistant que le siecle durera. Car si ne feussent les Escriptures ja pieça feust morte la renommée de tous les vaillans trespassez. Et pour ce je conclus que mal gré ne me doit sçauoir le bon Cheualier, de qui j'ay composé ce liure. Car je luy ay maïsonné & fondé vn edifice si fort, & si durable, que feu, ne fer, eaüe, terre, ne autre chose corruptible ne pourra consumer ne destruire. Car il n'est chose plus impossible à aneantir au monde que est matiere escripte en liures, si tost qu'ils sont coppiez en diuers & plusieurs lieux. De laquelle chose on est conuoiteux communément, quand la matiere est belle, & bien composée, si

comme je tiens que cestuy liure sera volontiers veu, pour la plaissante nouuelle matiere dont il parle. Si prie à Dieu tout puissant, que au vaillant Mareschal Boucicaut, de qui est faict ce liure, doint longue vie, le garde de ses enuieux, & de ses malueuillans, & luy veuille accroistre sa prosperité de mieulx en mieulx, & luy doint grace de si bien & si iustement se gouverner au monde, que il puisse paruenir au Royaume du ciel, où est la ioye qui iamais ne finit.

Icy finit l'Histoire du Mareschal de Boucicaut, qui m'a esté mise en main, & donnée liberalement au public par Monsieur de Machaut, Sieur de Romainville.





¶ EXTRAICT de l'Histoire de
Louys II, Duc de Bourbon,
imprimée à Paris l'an 1612.

¶ Prusse.



AIG. 74, 75, 76, CHAP. 23. Comme
le Duc de Bourbon alla en Sauoye,
& comme aucuns des siens allerent
en Prusse.

Et tant cheminerent par leurs iournées qu'ils
veindrent à Mariembourg, le grand hostel de la
Religion des Cheualiers de Prusse, Et là les gens au
Duc de Bourbon trouuerent Messire Iean de Roye,
Messire Iean de Maingre, dict Boucicaut, qui par sa
Cheualerie fut depuis Mareschal de France, & par
son bon sens Gouverneur de la Cité de Gennes, &
moult d'autres qui estoient venus si bien à poinct
que merueilles. Car le Roy de Letho Sarrafin auoit
fort emprins de greuer & conquerir l'Ordre de
Prusse, & pour estre plus fort s'estoit adjoinct au
Roy de Norgalles. Le haut Maistre de Prusse, par le
secours des Cheualiers & autres nobles hommes de
plusieurs Nations qu'il auoit en sa compaignée, se
porta si vaillamment qu'il conquist le chastel d'En-

drach sur eux, & les chasserent des grandes forests de Prusse. Et tant feirent les Chrestiens queles Sarrafins feurent tous liez d'eux en aller en leur pays, parmy l'ordonnance faicte que de certain temps les Sarrafins de Letho ne de Norgalles ne pilleroient nulles des Eglises des Chrestiens, ne les brusleroiert.

¶ *Poitou.*

P. 77. 78. CHAP. 38. Comment le Duc de Bourbon assiegea *Vertueil*.

ET avec le Duc de Bourbon estoÿt à celuy siege le Seigneur de Partenay, Messire Boucicault, &c.

P. 184, 187, 190. CHAP. 50. Comme le Duc de Bourbon se combatit en mine à *Vertueil*, & comme il eut le Chastel.

ET les Cheualiers & Escuyers qui feirent armes à ceux de dedans feurent le Sieur de Partenay, Messire Boucicault, &c.

AINSI laissa le Duc de Bourbon six cent hommes d'armes en *Poitou*, & pour les conduire demurerent Messire Jean de Chastelmorant, qui portoit l'enseigne du Duc, Messire Regnault de Roye, Messire Boucicault, &c.

P. 191, 192. CHAP. 51. Comment les gens du Duc de Bourbon en son absence & les Poiteuins conquesterent *Corbies*, les *Granges*, & *Montuaillant*.

SI dirent les Poiteuins aux Bourbonnois, Il y a vne place à vingt-deux lieües d'icy appelée *Corbies*, & qui mettra là vne embusche, on ne fault point à prendre les meilleurs de la garnison. Et ne fault à ce faire que cent homes d'armes, où estoÿent

416 HISTOIRE DV MARESCHAL
en chef Messire Regnault de Roye, Messire Iean de
Chastelmorant, portant le pennon, Messire Bouci-
cault, & Messire Robert Damas, qui estoient tous
bien montez, & cheuaucherēt vn iour & vne nuit
les vingt & deux lieues, & meirent leur embusche
en vn bois deux heures deuant iour, & prirent le
Capitaine, & sa femme, & les amenerent deuant la
place avec plusieurs autres pour la faire rendre. Et
incontinēt le Capitaine fut d'accord à la rendre, &c.

¶ *Flandres.*

P. 206, 210. CHAP. 55. Comme le Roy de France
entreprist le voyage d'aller en *Flandres*.

ET les gens du Duc de Bourbon dont estoit Ca-
pitaine Messire Robert de Chalus ensemble Messire
Boucicault & autres ferirent tellement que des
Flamens y eust bien quatre mille morts en vn pré.

¶ *Bataille de Rosebecque.*

P. 211, 214, 215, 216. CHAP. 56. Comme par le bon
aduis du Duc de Bourbon, & du Sire de Coucy, le
Roy de France eut la bataille contre les *Flamens* à
Rosebecque.

MAIS à venir au Duc Louys de Bourbon, est à
nommer aucuns qui avec luy estoient en ce champ,
Messire Guy Sieur de Coufan, Messire Boucicault,
& autres en bon nombre, qui selonneusement fai-
soient aux Flamens accointance, & si bien oppu-
gnerent, qu'il n'y auoit queredire. A celle Bataille
sur le mont de Rosebecque furent morts des Fla-
mens de seize à dix-huit mille, & le demeurant
fensuit.

¶ *Montferrat.*

¶ *Montferrat.*

P. 382, 383, 384, 385, 386. CHAP. 93. Comme le Duc enuoya de ses gens au Marechal Boucicault.

ESTANT encores le Duc de Bourbon en sa Baronnie de Beaujolais à Villefranche, en celuy an mesme mille quatre cent huiet enuoya le Marechal 1408. Boucicault Gouverneur de Gennes pour le Roy de France, que le Duc de Bourbon auoit nourry, Iean de Neufuis, Escuyer de bon affaire, deuers le Duc, afin qu'il luy pleust d'enuoyer au Marechal douze cent hommes d'armes, pour aucunes grandes rebellions que les gens du Marquis de *Montferrat* auoient faict au Roy de France, comme de luy auoir destrouffé huiet cent hommes d'armes du pays d'Auuergne, d'ot estoit Capitaine Messire Guillaume de Saigne, & outre enuoyoit le Marechal trois mille ducats, pour payer les compaignons iusques au Dauphiné, & au Dauphiné il bailleroit le payement pour vn mois aux gens-d'armes, iusques ils feussent à Gennes, & outre prioit le Marechal au Duc de Bourbon qu'il luy voulust prester Messire Iean de Chastelmorant, pour les conduire, qui autresfois auoit demeuré en Lombardie vn an avec le Marechal. Si luy accorda le Duc de Bourbon que tous ceulx qui y voudroient aller y allassent, & que Chastelmorant fut Chef d'icelle conduicte. Et de Sainte Gemme cheuaucherent tous les gens-d'armes que conduisoit Messire Iean de Chastelmorant pour le Duc de Bourbon à la Cité de Gennes, où le Marechal Boucicault les attendoit iour & nuict. Si

Ggg

418 HISTOIRE DV MARESCHAL
fut moult lyé & ioyeux , & les contenta & paya
pour vn autre mois.

¶ *Vercel, Paue.*

P.386,387,388,389,390,391. CHAP. 94. Comme
le Mareschal Boucicault, & les gés au Duc de Bour-
bon desconfirent le Marquis de *Vercel*, & les Bri-
gans deuant Milan.

LE Gouverneur de Cennes Messire Iean le Mein-
gre, dict Boucicaut, Mareschal de France, dict à
Messire Iean de Chastelmorant, & aux autres Capi-
taines qu'il auoit amené avec luy en l'ayde du Ma-
reschal de par le Duc de Bourbon, Messeigneurs,
je remercie moult de fois Monseigneur le Duc de
Bourbon, quin'a mie oublié ja son seruiteur, mais
m'a enuoyé vne si noble compaignée comme
vous estes, & vous foyez les tres-bien venus, &c. Et
entra-on en la chasse en la Ville de *Vercel* avec eulx,
où il y eut gagné cent mille francs, & se retrahit le
Marquis de *Vercel* en vne tour, & feist traicter au
Mareschal Boucicault qu'il deuiendroit homme du
Roy de France par feaulté, mais qu'on luy rendist sa
Ville, & le Mareschal qui veid que la Ville estoit
comme gastée, la rendit au Marquis, & le receut en
hommage du Roy de France, dont les Lettres sont
à Paris. Et ce faict, se partit le Mareschal Boucicault,
les gens du Duc de Bourbon, & les autres Capitai-
nes passerent les montaignes, & entrèrent au bel
pays Plaisantin deuant la Cité de Plaisance, laquelle
se rendit au Roy, & autres pays, dont le Mareschal
Boucicault auoit quinze mille ducats pour mois de

truage, que les Villes rendēt en Lombardie, & delà passerent le Pau, & allerent à Pauie. Si feit le Comte de *Pauie* hommaige au Roy de France en la main du Marechal, lequel il meit dedans sa Ville, ensemble toute la compaignée. Et au bout de huiēt iours alla le Marechal Boucicault de *Pauie* à Milan, & toute sa compaignée, auquel le Duc de Milan feit ouverture, &c.

Et vous certifie que si bien se mainteint le Marechal Boucicault à l'aide des gens au Duc de Bourbon, & des autres Capitaines, & compaignons, qu'il prenoit de truage accoustumé en Italie de *Raenene*, de *Vercel*, de *Plaifance*, de *Pauie*, & de *Milan*, septante neuf mille ducats d'or. Et auoit fait vne telle conqueste pour le Roy.



Ggg ij



EXTRACT DE
L'HISTOIRE DV ROY
CHARLES VI, DE JEAN IVVENAL
des Vrsins, Archeuesque de Rheims,
imprimée à Paris l'an 1614.

¶ *Bataille de Nicopoli.*

1396.

PAIGE 155, 156, 157. L'an 1396. le Roy de Hongrie enuoya deuers le Roy vne Ambassade de gens de bien. Lesquels exposerent en suppliant & requerant au Roy qu'il luy pleust de enuoyer gens pour resister à la mauuaise volonté des mescreans. Et les ouit le Roy tres-doucement, & benignement, & comme ayant pitié des maux qu'ils faisoient aux Chrestiens, assembla son Conseil pour y enuoyer. Et au Conseil estoit present le Duc de Bourgongne nommé Philippes le hardy, lequel dit qu'il y enuoyeroit son fils aîné Jean Côte de Neuers. De laquelle offre il fut honoré & prisé, & feut dict qu'il y venoit de vaillant couraige de offrir son fils aîné. Et lors le Comte d'Eu, Connestable de France, Messire Jean le Maingre, dict Boucicault, Marechal, & Messire Jean de Vienne, Admiral de France, & les Seigneurs de Coucy, de Roye,

de la Trimoüille, & plusieurs Cheualiers & Escuyers s'offrirent d'y aller. Ce qui leur feut accordé. Puis assemblèrent gens d'armes, & de traiçt, & se meirent en chemin, en intention de passer le plustost qu'ils pourroient, &c.

A PRES veindrent deuant Nicopoli, vne forte Cité & bien garnie de Sarrafins vaillans en armes, & l'assiegerent, &c.

ET feurent les François, & ceux de leur compaignée desconfits, & tous morts, ou pris. Et plusieurs feurent pris sans tuer, & mesmement le Comte de Neuers, le Marechal Boucicault, Vienne, Coucy, & autres, lesquels feurent menez deuant le Basac.

¶ *Perigort.*

P. 167. L'AN 1398. le Comte de Perigort, qui 1398.
estoit grand Seigneur & puissant au pays de Guyenne, assembla gens de guerre, & les meit en ses places. Et sous ombre qu'il se disoit tenir le party des Anglois, commença à faire aspre & forte guerre aux François vers les marches de Guyenne, & faisoit maux infinis, & pilloit robboit & faisoit courre tout le pays. Pour laquelle cause le Roy delibera y enuoyer. Et feut deliberé que le Marechal Boucicaut y iroit. Et y alla à grâde compaignée de gens de guerre, tant d'hômes d'armes, que de traiçt, & meit le siege deuant Môtignac, où le diçt Comte estoit, lequel finalement se soubmeit à la Cour de Parlement du tout. Et meit le diçt Marechal la Comté en l'obeïssance du Roy, & prit Montignac, Bourdeille, Auberoche, Saulac, & autres places, & y eut

Ggg iij

422 HISTOIRE DV MARESCHAL
grand peine, & de belles armes faictes. Et amena
Boucicaut le dict Comte de Perigort à Paris. Et luy
ouïy, à grande & meure deliberation feut dict par
Arrest, que le dict Comte auoit forfait corps &
biens. Toutesfois la vie luy feut sauuée.

¶ *Constantinople.*

1399. P. 173, 174. L'AN 1399. les Turcs & Sarrafins gre-
uoient fort Constantinople, & faisoient forte &
aspre guerre. Pour laquelle cause l'Empereur de
Constantinople enuoya deuers le Roy requerir ay-
de, & secours. Et y enuoya le Roy le Mareschal
Boucicaut, à tout douze cent combatans, & en sa
compagnée estoit Chasteaumorant, vn Cheualier
de Bourbonnois, lesquels se portèrent vaillamment,
& firent plusieurs grands dommaiges aux Sarra-
fins, & resisterent à leur mauuaise entreprise & vo-
lonté. Et quand ils eurent faict le mieux qu'ils peu-
rent, delibererent d'eux en retourner, dont les Grecs
feurent bien desplaisans. Mais l'air estoit non pro-
pice aux François, & des-ja aucuns se commen-
çoient à mourir, & si auoient faulte d'argent, & sou-
uent de viures. Et de faict le Mareschal Boucicaut
en partit, & laissa le dict Chasteaumorant vaillant
Cheualier à tant seulement cent combatans, lequel
tres-volontiers y demeura, dont les Grecs encores
combien qu'ils feussent peu de gens feurent gran-
dement reconfortez.

P. 143. LE Mareschal Boucicaut feut deux fois
sur les Sarrafins, & estoit chef des Sarrafins le Basac,
qui feut longuement deuant Constantinople, où

le dict Mareſchal feit moult de belles vaillances, & armes, & aida fort à ſecourir la Ville de Conſtantinople, qui eſtoit aſſiegée des dicts Sarraſins. Et dedans eſtoit vn Cheualier François nommé Chaſteaumorant, lequel vaillamment ſe porta, & tellement, que le Baſacleua ſon ſiege, & ſ'en allerent luy & ſes Sarraſins.

¶ *Gennes.*

P. 189, 190. L'AN 1403. le Mareſchal Boucicaut, 1403. qui eſtoit à Gennes, appaiſa moult de diuiſions, & differences, qui eſtoient entre eulx. Dont il fut fort priſé, & aimé, & ſe meit ſur la mer, & porta pluſieurs grands dommaiges aux Sarraſins, & leur faiſoit tres-forte guerre.

¶ *Milan, Plaiſance, Paue.*

P. 143. Le Mareſchal Boucicaut eut le gouuernement de Gennes pour le Roy, & auoit bien dix ou douze mille cheuaux, & meit en l'obeiſſance du Roy Milan, Plaiſance, Paue, & pluſieurs autres places.

¶ *Normandie.*

P. 369. L'an 1415. au mois d'Aouſt, Meſſire Boucicaut feut faiſt Capitaine de Normandie, & ſ'en alla à Rouën avec le Conneſtable. 1415.

¶ *Bataille d'Azincourt.*

P. 394, 395, 396. L'AN 1415. on ordonna le Mareſchal Boucicaut, Meſſire Clignet de Brabant, & vn baſtard de Bourbon, pour les cheuaucher. Ce qu'ils faiſoient diligemment, & porterent grand dom- 1415.

424 HISTOIRE DV MARESCHAL
maige aux dicts Anglois, & en tuerent plusieurs, &
ne se osoient eschapper, &c.

ET y eut diuerſes opinions & imaginations. Car
les vns diſoient qu'on les laiſſaſt paſſer ſans comba-
tre, & que à faire bataille eſtoit choſe bien dange-
reuſe, &c. Et diſoit-on que le Conneſtable d'Albret,
le Mareſchal Boucicaut, & pluſieurs autres anciens
Cheualiers & Eſcuyers qui auoyent veu, & frequen-
té les armes, eſtoient de ceſte opinion, &c.

ET y eut de priſonniers bien quatorze mille, en-
tre leſquels eſtoient les Ducs d'Orleans, & de Bour-
bon, les Comtes de Vendosme, & de Richemont,
& le Mareſchal Boucicaut.



¶ EXTRAICT



¶ EXTRAICT de l'Histoire du
Roy Charles VII, escripte par
Berry, premier Heraut
du Roy.

¶ *Bataille d'Azincourt.*



L'AN 1415. estoient à Caudebec 1415.
Messire Jean Boucicaut durant le
siege, qui estoit Marechal de France,
à tout mille & cinq cent hommes
d'armes, & le Sire d'Albret,
Connestable de France à tout mille & cinq cent
hommes d'armes à Honnefleu, lesquels se tenoient
là, & és places d'environ, pour cuider porter dom-
maige aux Anglois, &c.

Et l'on feist sçauoir que les Connestable & Marechal de France iroient au deuant d'eulx à Abbeuille, pour garder le passaige sur la riuere de Somme. Et si feirent-ils. Car ils teindrent bien quinze iours auant qu'ils peussent passer la dicte riuere. Mais à la fin ils trouuerent passaige entre Corbie, & Peronne, par où ils passèrent, &c.

AL'AVANTGARDE estoient le Sire d'Albret
Connestable de France, & Boucicaut, Marechal
Hhh

426 HISTOIRE DV MARESQUAL
qui auoient en leur compaignée trois mille hom-
mes d'armes, &c.

La moururent troistous les Seigneurs dessusdicts,
reserué les Ducs d'Orleans, & de Bourbon, & les
Comtes d'Eu, de Vendosme, & de Richemont, &
le Marechal Boucicaut, lesquels furent prisonniers
du Roy d'Angleterre, & menez en Angleterre.





LECTRE DV ROY
CHARLES VI, AV COLLEGE

DES CARDINAUX RESIDANT

à Auignon l'an 1394.

1394.



HARLES &c. A nos tres-chers & especiaux amis le Sainct College des Cardinaux estans à Auignon Salut, & dilection. Tres-chers & especiaux Amis, Incontinent que sceu auons le trespasement de sainte memoire Pape Clement VII, dont Dieu par sa sainte grace veuille auoir l'ame, Nous ensuiuans les traces & bonnes mœurs de nos predecesseurs, qui tousiours comme vous sçauiez ont esté vrais Catholiques, & singuliers protecteurs & defenseurs de l'vniuerselle Eglise, & qui desirons sur toutes choses, comme raison est, la bonne paix & vnion d'icelle Eglise, & la cessation de cest horrible & douloureux schisme qui si longuement a ja duré, & qui est disposé d'encores durer, si bonnement n'y est pourueu, auons par bonne & meure deliberation de plusieurs de nostre Sang, & lignaige, & de nostre grand Conseil, estans à present par deuers nous, ordonné & deliberé, comme naguères vous auons escript, d'enuoyer briefuement par deuers vous nos Messaigers solempnels, c'est à sçauoir nos amez & feaulx Louys de Sancer-

Hhh ij

428 HISTOIRE DV MARESCHAL
re, & Iean le Maingre, dict Boucicaut, Mareſchaux
de France, & Regnaut de Roye, nos Conſeillers, &
Chambellans, & Maiftre Iean Bertaut, noſtre Secre-
taire, leſquels nous y enuoyons preſentement, pour
vous informer par eux de noſtre intention, & vo-
lonté ſur les choſes deſſus dictes, & aucunes autres
plus plainement, que par Lettres ou Eſcripts infor-
mer ne vous pourrions. Si vous prions tres-chers &
eſpeciaux Amis tant affectueuſement & de cœur
comme nous plus pouuons, que nos dicts Meſſai-
gers vous vueillez plainemēt croire de tout ce qu'ils
vous diront & expoſeront de par nous, & le faire
& accomplir tout ainſi comme ſi nous meſmes le
vous diſions ou expoſions de bouche, & ſur tout l'a-
mour que vous auez & deuez auoir à la dicte paix
& vnion del'Egliſe, & le plaifir que faire nous vou-
lez ne vueillez aucune choſe faire ne ſouffrir faire au
contraire. Donnē à Paris le xxvj. iour de Septem-
bre, l'an 1394.



MEMOIRES CON-
CERNANS LA MAISON
DES BOVCICA VTS.

*¶ I. De Iean le Maingre, dict Boucicaut, I, du
nom Marechal de France du Regne des
Rois Jean II, & Charles V.*

HISTOIRE de Iean de Saintré,
Chambellan du Roy Iean II, escrite par
Antoine de la Salle, & dediée à Iean
Duc de Calabre, & de Lorraine, fils de
René Roy de Sicile, en parle de ceste sorte au Cha-
pitre XLVII.

EN celuy temps estoit en la Cour vn tres-jeune Escuyer,
tres-gracieux, de la Duché de Touraine, qui par esbute-
ment fut nommé Boussiquant, grand pere des Boussiquants
qui sont aujourdhuy. Tres-saige, subtil, & aduenant Es-
cuyer, & qui assez auant estoit en la grace du Roy. Sain-
tré qui estoit ieune, le voyant si homme de bien, aussi pour
l'amour du pays, tres-volontiers sen accointa, & tellement
se accompaignerent & aimerēt que deux freres ne eussent
seu plus s'entre aymer. Et jaoit ce que Boussiquant feut
depuis tres-vaillant Cheualier, outre plus estoit-il subtil
& attrempé plus que Saintré n'estoit. Et aussi au faict
d'armes Saintré estoit tenu le plus vaillant. Et pource les

Hhh iij

430 HISTOIRE DV MARESCHAL
*Heraults & les Roys d'armes en feirent vn commun Pro-
uerbe, en disant*

*Quand vient à vn assault
Mieux vault Saintré que Bouciquant.
Mais quand vient à vn Traicté
Mieux vault Bouciquant que Saintré.
C'est à sçauoir l'un pour les armes, & l'autre pour
le Conseil.*

ET c'est le mesme Boucicaud qui en l'an 1360. feut
choisy pour l'un des Deputez au Traicté de Breti-
gny de la part de Charles, Regent du Royaume,
depuis Cinquiesme du nom Roy de France.

S A veufue Florie de Linieres, sœur de Godemar
de Linieres, & Dame d'Escoubleau, & de la Berti-
niere viuoit encores l'an 1385.

IL s sont tous deux enterrez en l'Eglise de Saint
Martin de Tours, derriere le Chœur, en la Chap-
pelle des Boucicauds. Ainsi qu'il se veoid par leurs
Epitaphes, tels qu'il s'ensuit, qui m'ont esté commu-
niquez avec la plus part de ces Memoires par Mon-
sieur de Peirelc, Conseiller au Parlement de Pro-
uence.

*CY gist fen noble Cheualier, Messire Iean le Mein-
gre, dict Bouciquant, le pere Mareschal de France, qui
trespassa à Dijon, le xv. iour de Mars.*

*CY gist feüe noble Dame Florie de Linieres, femme
du dict Mareschal, laquelle trespassa en son chastel de
Breuil doré, le iour de MCCCC.*

¶ 2. *De Jean le Meingre, dict Boucicaut, II, du nom Mareschal de France du Regne du Roy Charles VI, & Gouverneur de Gennes, Duquel est ceste Histoire. Il estoit fils du susdict Jean I.*

L'AN 1406. il feit foy & hommaige à Louys II, Roy de Sicile pour les Seigneuries de Pertuis, Méirargues, Pellisane, les Pennes, & autres situées en Prouence.

L'AN 1414. il feut Gouverneur pour le Roy en Languedoc, & au Duché de Guyenne.

L'AN 1415. il feut faict prisonnier à la bataille d'Azincourt, estant à l'Avantgarde, & feut mené en Angleterre, où il deceda l'an 1421.

IL est inhumé avec ses pere & mere en la susdicte Chappelle des Boucicauts. Comme il appert de son Epitaphe, que voycy.

CY gist noble Cheualier Messire Jean le Meingre, dict Bouciquant, le fils, Mareschal de France, grand Connestable de l'Empereur & de l'Empire de Constantinople, Gouverneur de Gennes pour le Roy, Comte de Beaufort, de Clux, d'Aleſt, & Vicomte de Turenne, lequel tressassa en Angleterre, illec estant prisonnier, le 27. iour de.... M CCCC XXI.

SA femme Antoinete, Vicomtesse de Turenne, estoit fille de Raymond, Vicomte de Turenne, Lequel Raymód estoit fils de Guillaume Roger, Comte de Beaufort en Anjou, & d'Eleonor de Com-

¶ 3. *De Geoffroy le Meingre, dict Boucicaut,
Gouverneur du Dauphiné, frere puisné de
Iean le Meingre, dict Boucicaut, Il, du
nom Mareschal de France , &
Gouverneur de Genes.*

L'AN 1402. il estoit Gouverneur du Dauphiné,
Et luy appartennoient les Seigneuries de Luc; de
Rocquebrune, & de Bulbone en Prouence.

S A premiere femme se nommoit Constance de
Saluces. Et la seconde feut Ysabeau de Poictiers, De
laquelle il eut deux fils A sçauoir Louys, & Iean. Le
dict Louys feit son Testament en l'an Par ice-
luy il institüe son heritier Aymar de Poictiers, Sei-
gneur de Sainct Valier, son cousin germain, A la
charge de porter son escu escartelé des armes de
Poictiers, & de Boucicaut, & adjouster au surnom
de Poictiers celuy de Boucicaut, En disant Aymar
de Poictiers, dict Boucicaut. Et substitüe au dict
Aymar Guillaume de Poictiers, de Clerieu, & les
siens, & ceux qui seront proches des armes de la
Maison de Poictiers. Et à leur default le Seigneur
des Barres, & Iacques des Barres, oncle du dict Sei-
gneur des Barres, & les leurs.

¶ 4. De

¶ *De Geoffroy le Meingre, dict Boucicaut,
Euesque de Laon, frere puisné de Iean
le Meingre, dict Boucicaut, I du
nom Mareschal de France.*

L'AN 1363. il estoit Euesque de Laon.

L'AN 1370. il mourut à Boulongne la grasse en
Italie, Apres auoir institué ses nepueux Iean, &
Geoffroy, ses heritiers en ses biens meubles mon-
tans à la valeur de cinquante mille francs.

F I N.

lii

Fautes suruenües à l'Impression.

B AGE 3. ligne 7. Tyn levert, lisez Ingelbert,
Et partout ailleurs.

Pag. 12. lig. 13. apres aussi otez la virgule.
Pag. 38. lig. 9. pag. 39. lig. 20. pag. 40. lig. 23. Berteuil
lisez Vertueil.

Pag. 129. lig. 1. devant qu'elles mettez eschelles.

Pag. 166. lig. 19. qui lisez que.

Pag. 209. lig. 9. estoynassent lisez estriussent.

Pag. 232. lig. 8. quand lisez quant.

Pag. 267. lig. 13. Comte lisez Duc.

Pag. 269. lig. 15. Vrsirs lisez Vrsin.

Pag. 285. lig. 27. venu lisez venüe.

Pag. 301. lig. 9, & 18. Ligournel lisez Liouourne.

Pag. 351. lig. 30. apres Ceste lisez chose.

Pag. 373. lig. 2. Hannibal lisez Hasdrubal.

Pag. 414. lig. 13. de lisez le.

Pag. 415. lig. 8. 77, 78. lisez 177, 178.

Pag. 416. lig. 30. fensuit lisez f'enfuit.

Pag. 417. lig. 4. Beaujolis lisez Beaujolois.

Privilege du Roy.



Ouvr's par la grace de Dieu Roy de France, & de Navarre, A nos amez & feaulx les gens tenans nos Cours de Parlement, Prevoost de Paris, Baillif de Roüen, Seneschaux de Thoulouze, Bordeaux, Lyon, & Poitou, ou leurs Lieutenans, & à tous nos autres Iusticiers & Officiers quil appartiendra; Salut. Nostre cher & bien aimé Maître THEODORE GODEFROY, Advocat en nostre Cour de Parlement, & nostre Historiographe, Nous a tres-humblement fait remonstrer quil auroit recouuré *l'Histoire du Marechal de Boucicaut*, laquelle il desireroit mettre en lumiere, & faire veoir au public, comme estant pour l'honneur & decoration de nostre Couronne; Nous à ces causes desirans quil serue au public, & que le suppliant ne soit frustré de ses travaux, & diligence, luy auons permis de choisir & faire imprimer par tel Imprimeur que bon luy semblera la dicte Histoire pendant le temps & espace de dix ans consecutifs, à compter du iour & date que la dicte Histoire sera paracheuée d'imprimer. A la charge que le dict Imprimeur en mettra deux Exemplaires en nostre Bibliotecque. Faisans pour cest effect tres-expresses inhibitions & defences à tous Libraires, Imprimeurs, & autres personnes de quelque estat & condition qu'ils soyent d'imprimer, ou faire imprimer, vendre ne distribuer la dicte Histoire dans le dict temps sans le congé du suppliant, Sur peine aux contreuenans de mille liures d'amende, dont moictié nous appartiendra, & l'autre moictié au dict suppliant, & de tous le despens, dommages, & interets, & confiscation des Exemplaires qui se trouueront imprimez & mis en vente au preiudice de ces presentes. Si vous mandons ordonnons & enjoins

Iii ij

gnons que du present Priuilege vous faciez iouir & vser le dict suppliant plainement & paisiblement ; Cessans & faisans cesser tous troubles & empeschemens au contraire. Faisans proceder contre les contreuenans par routes voyes deües & accoustumées, nonobstant oppositions ou appellations quellsconques, Clameur de Harro, Charte Normande, & toutes autres Lettres à ce contraires faictes ou à faire, ausquelles nous auons defrogé & defrogeons par ces presentes. Et pour ce que d'icelles on pourra auoir affaire en diuers lieux, nous voulons que au vidimus d'icelles faict sous nostre Seel Royal, ou deüemēt collationnées par vn de nos amez & feualx Cōseillers & Secretaires' foy soit adjoustée comme au ~~present original~~. Voulons en outre qu'en mettant au commencement ou à la fin de la dicte Histoire eoppie d'icelles, qu'elles soyent tenües pour bien & deüement signifiées & venües à la congnoissance de tous. C A R tel est nostre plaisir. D O N N E à Paris, le quinziésme iour de Feburier, l'an de grace mille six cent vingt, & de nostre regne le dixiéme.

Par le Roy en son Conseil.

M O N S I G O R.

